






M. TULLII *t.a.f.*  
CICERONIS  
OPERA  
AD OPTIMAS EDITIONES COLLATAE  
PRAEMITTITUR VITA EX PLUTARCHI GRAECO  
LATINE REDDITA  
CUM NOTITIA LITERARIA  
ACCEDUNT INDICES  
STUDIIS SOCIETATIS BIPONTINAE



EDITIO ACCURATA

BIPONTI  
Ex TYPOGRAPHIA SOCIETATIS  
CICEROCCCLXX-X



4249

92.46.8



II

M. TULLII CICERONIS  
O P E R A.

СИОЛЯДАХУТ  
А Я З Я О

## M. TULLII CICERONIS

## VITA

EX PLUTARCHI GRAECO  
LATINE REDDITA.

**C**ICERONIS matrem tradunt Helviam claro genere et honesta vita fuisse: de patre nihil, quod non utrimque a medio recedat. Alii enim in officina fullonia et natum volunt et educatum<sup>1</sup>: alii ad Tullum Attium, clarum Volscorum regem, genus eius referunt<sup>2</sup>. Verum, qui huius gentis primus Cicero est cognominatus, eum arbitror virum fuisse memorabilem. Quare nec repudiaverunt eius posteri hoc cognomentum: sed, etiamsi a multis in ludibrium verteretur, id amplexi sunt. a cicere enim trahitur. Videtur nimirum ille habuisse in extremo nasi incisuram reflexam, similem oscillo ciceris, unde ei cognomen venit<sup>3</sup>. Ipse quidem, de quo scribimus, Cicero,

<sup>1</sup> cf. maledicam Orat. Q.  
Fuf. Caleni ap. Dionem L.  
XLVI.

<sup>2</sup> Erat equestris ordinis; sed quae vulgo tradebantur, mediocritatem hanc utrimque excedebant. cf. Cic. in Bruto c. 16.

<sup>3</sup> Reddimus pro nostro sensu verba Plutarchi, in quibus interpretes haerent omnes, Κακείνος εὐ τῷ πέρατι ίνσηγόνος διασολην (ως εοίκει)

αμβλειαν ειχεν, ωσπερ ερεβινδες διαφυν, αφης εκτησατο την επωνυμιαν. Plinius H. H. N. L. XVIII, c. 3. a liam a vulgi fama sententiam profert: Cognomina etiam prima inde: --- Iam Fabiorum Lentulorum, Ciceronum, ut quisque aliquod optime genus sereret. Priscianus L. II. p. 578 Plutarcho consentiens, cognomen ab habitu faciei ducatum tradit. Et sunt, qui ap.

quum primum honores peteret & rempublicam attin-  
geret, amicis admonentibus, ut abiiceret hoc no-  
men immutaretve, fertur iuveniliter elato animo res-  
pondisse, enisurum se, ut illustrius Ciceronis no-  
men Scauris et Catulis efficiat. Quaestor in Sicilia  
donum argenteum Diis consecravit, in quo initia in-  
scripsit duorum nominum, M. (arci) & T. (ullii), tertii  
loco cicer proxime illas literas incidere, artificem fa-  
cete iussit. De nomine haec prodita sunt.

- 2 Editum ferunt Ciceronem, facili partu et nullo  
matris dolore, a. d. III. Non. Ianuar. quo die ma-  
gistratus nunc vota faciunt, & sacrificant pro inco-  
lumentate Principis. Nutrici eius oblatam aiunt speciem,  
& auditam vocem: ingens tu bonum omnibus Ro-  
manis nutris. Haec cum somnia esse & vana alio-  
quin viderentur, ipse brevi ostendit, certum fuisse  
oraculum. Nam quum primum aetatem attigit studii  
humanitatis aptam, ingenium eius ita eluxit, tan-  
tumque nominis inter pueros & gloriae reperit, ut  
horum parentes ipsi, Ciceronem visuri, celebratum-  
que eius in discendo acumen & solertiam cognoscere  
cupientes, ad ludum venirent, agrestiores vero indig-  
narentur, quum a suis Ciceronem honoris causa me-  
dium deduci cernerent. Talis quum esset, qualem esse  
Plato vult studiosum & philosophiae amans inge-  
niuum, ad omnes natus artes complectendas, haud ul-  
lum doctrinae aut eruditionis genus aspernabatur; ad  
poesin fuit proclivior: & exstat poema quoddam par-

Quintil. I, 4, 25 inserant habitu corporis nomen traxere.  
Cicerones inter eos, qui ex

vum, quod puer edidit, Pontius Glaucus, versibus tetrametris compositum. Progrediente aetate quam magis ac magis Musas amplecteretur, non modo orator mox visus est, sed & poeta, inter Romanos praestantissimus. Ceterum laus eloquentiae, licet multa dein in dicendo novata fuerint, vel hac ipsi manet aetate: inter poetas vero, quia multi supervenere illustriores, obscuratum pridem nomen est.

Schola relicta puerili, Philoni dedit operam, A- 3  
cademico: quem Romani supra ceteros Clitomachi  
alumnos & ob dicendi facultatem admirati sunt, &  
dilexerunt ob morum suavitatem. Simul etiam ad Q.  
Mucium Scaevolam deductus, in congressionibus viro-  
rum consultissimorum tumque in Senatu principum  
versatus, ad legum prudentiam profecit. Aliquamdiu  
etiam bello Marsico sub Sulla militavit. Inde rempu-  
blicam in seditionem, & ex seditione in eius, qui  
plus posset ceteris, impotentissimum ruere dominatum,  
videns, otium studiosum repetiit; vixitque cum eru-  
ditis Graecis, unus literis intentus; quoad Sulla  
rerum potitus certum aliquem statum reipublicae de-  
disse videbatur. Hac tempestate libertus Sullae, Chry-  
sogonus, bona cuiusdam, quem detulerat, ut ex  
proscriptione caesum, viginti millibus aeris emit. Quod  
indignatus interfecti filius & heres, Roscius, cum  
probaret, hereditatem sexages valere; offensus Sul-  
la, quod argueretur, crimen ei per Chrysogonum in-  
tulit parricidii. Roscius quem nullum reperisset auxilium,  
sed omnes Sullae saevitiam exhorrescerent; destitutus ab  
omnibus adolescens contulit se ad Ciceronem: quem  
accenderunt amici, subiicientes, gradum ipsum ad

gloriam habiturum post hoc speciosiorem et pulchriorem nullum. Suscepta defensione causam, simul magnam admirationem, obtinuit. Ceterum metu Sullae in Graeciam abiit, sparsa fama, id se consilium, corporis curandi causa suscepisse. Et erat sane corpore gracili ac macilento; & propter stomachi infirmitatem, exiguum cibi, eumque & minutatim & facilem sero admodum capiebat. Vox eius canora quidem erat & bona; sed dura & incondita: quae ex nimia discordi contentionе, aliis semper agitata sonis, minaretur vitae periculum.

4 Quum venisset Athenas, Antiochum Ascalonitam audivit: cuius quidem flumine gratiaque dicendi delectatus; sed quae ab ipso in philosophia novabantur, non aequa probabat. Iam enim a nova, quam vocant, Academia desciverat Carneadeae sectae desertor Antiochus, & vel evidentia sensibusque victus, vel, ut quidam volunt, ambitione aliqua & dissensione cum Clitomachi & Philonis discipulis adductus, in plerisque fere Stoicorum decreta defendebat. Cicero autem maluit Academicorum placita sequi, eo animo, ut, si omnino de spe reipublicae capeffendae decidisset, huc se ex foro et a publicis negotiis referret, cum philosophia quiete & libere victurus. Deinde vero accepta morte Sullae quum iam exercitatione firmam corporis habitudinem recepisset, & vox eius ita conformata esset, ut iucunda & plena accideret auribus atque ad corporis constitutionem moderate composita; motus & precibus literisque amicorum, quae frequentes ad ipsum afferebantur, & cohortatione Antiochi, ut ad rempublicam accederet, artem oratoriam, ceu eius in-

strumentum denuo excoluit; vimque illam civilem, quae oratoris est, tum cura sua & commentatione, tum clarissimis se tradens oratoribus, excitare contendit. Igitur in Asiam & Rhodum navigavit: in Asia Xenocli Adramytteno, & Magneti Dionysio, & Menippo Cari operam dedit: Rhodi Apollonio oratori, Molonis filio, & Posidonio, philosopho. Hunc Apollonium fama est, quod imperitus esset Romanae linguae, a Cicerone, ut declamaret Graece, contendisse: in quo cum Cicero illi obtemperasset, quod putaret, se, ita melius ab illo corrigi posse; ceteris omnibus obstupefactis & certatim Ciceronem collaudantibus, Apollonium, dum audiret, vultum minime laetum induisse: & quum perorasset, diu sedisse cogitabundum: tandem, ubi id aegre ferre Ciceronem sensisset, dixisse: Te quidem laudo, Cicero, et admiror; sed Graecorum miseret me fati, cum video, quae sola nobis reliqua erat ex artibus honestis laus, eam quoque per te ad Romanos translatam esse, literas et eloquentiam.

Ergo quum ingenti Cicero spe erectus ad rempubli- §  
cam summo studio raperetur; ardor eius oraculo quodam repressus est. nam consulenti Apollinem Delphi-  
cum, qua potissimum ratione ad summam gloriam  
pervenire posset, Oraculum per Pythiam monuit,  
suam naturam, non multitudinis opinionem, du-  
cem vitae sequeretur. Quapropter Romam reversus  
primo timide vixit, & dubitanter ad honores acces-  
sus, coque nec ullo in numero habitus, sed Graecu-  
lus atque otiosus appellatus; quae nomina vel infimo  
& vilissimo cuique in promptu esse atque in ore con-

sueverunt. Quum vero ipse iam gloriae cupidine sua,  
& a patre amicisque incensus, se totum patrocinii dare coepisset; non iam sensim ad principatum eloquentiae adspiravit, sed statim illuxit, ceterosque oratores longe anteivit. Dicitur is non minus studiose, quam Demosthenes, in actione, h. e. voce cum vultu corporisque motu coniungenda, elaboravisse, eaque de causa sedulo, nunc Roscio, comoedo, nunc Aesopo, tragoedo, operam dedisse. Hunc Aesopum tradunt, dum in theatro ageret Atreum de puniendo Thye-ste cogitantem, ita fuisse commotum, ut in ipso affectu impos mentis ministrum quandam, qui repente praetercurrebat, feriret sceptro & occideret. Neque sane parum contulit adiumenti ad persuadendum actio Ciceroni, qui ipse oratores nimium vociferantes irridens, ex impotentia dicebat in clamorem, sicut claudum in equum, ascendere. Urbanitas in facetiis eius & in salibus hisce forensis visa est & lepida: sed quum esset in ea effusor, multos offendit, & malig-nitatis opinionem sibi concitavit.

6 Quaestor creatus, in summa caritate, ac sortitus Siciliam, initio molestus erat Siculis, quos cogeret, frumentum in Urbem mittere. Post ubi diligentiam eius, iustitiamque & comitatatem experti sunt, maiores ei quaestori honores, quam ulli unquam praetori tribuerunt. Eo tempore multi Romae adolescentes, claris parentibus atque honesto loco nati, accusati sunt neglectae disciplinae militaris effeminateque factorum stipendiorum. Hos ad praetorem Siciliae remissos Cicero magna cum sui commendatione defendit & conservavit. Alta iam spe Romam decedenti ridiculum

accidit, quod ipse refert 1. Cum enim in itinere per Campaniam in quandam illustrem Romanum, quem sibi amicum habere videbatur, incidiisset, quaeſiſſe ex eo, qui sermones a Romanis de rebus a ſe geſtis in Sicilia habeantur, quidve de ſe ſentiant; quippe perſuafum, ſe totam urbem fama ſui impleſſe. Sed cum ille interrogaſſet: Ubinam, Cicero, per hoc tempus fuiſti? tum ſe concidiſſe paene, quod rerum ſuarum fructum in Urbe, velut in vasto pelago, perdiſerit, nihiloque magis conſpectior nunc rediret. Igitur collectis rationibus, videns, rem anciptem incertique exitus eſſe, ad quam contenderit, gloriam, multum de eius ſtudio remiſit. Remaſte tamen ipſi ad extreſum uſque iuſto maior cupido gloriae, qua in multis ſuis, etiam reſulis, confiliis crebrius conturbabatur.

Quum iam animum ad rem publicam totum con- 7 vertiſſet, turpe duxit, cum opifices, qui instrumenta tractant & armamenta furda, nullius nomen, locum aut vim haud nescirent, hominem politicum, qui in efficiendis rebus hominum publicis verſetur, in cognoscendis civibus negligentem eſſe & ſupinum. Quare non modo ſingulorum nomina, ſed locum etiam, ubi inſignis quisque habitaret, aut praedia poſſide- ret, aut quibus uteretur amicis, & quos haberet vi- cinos, ita didicit Cicero, ut quacunque via Italianam peragraret, ſingula expedite proferre, & amicorum poſſeſſiones villasque demonſtrare poſſet. Rem habuit familiarem, modicam quidem, ſed ſufficientem, & qua tueri ſe poterat. Quo magis in admiratione habe- batur, quod patrocinii cauſa neque mercedem, neque

I pro Planco c. 26. paulo aliter haec ipſe Cic. narrat.

munera caperet ; praecipue , cum Verrem suscepisset accusandum. Tenuerat Verres ex praetura Siciliam provinciam , atque in ea fuerat libidinose , avare , crudeliterque versatus. Eum a Siculis repetundarum postulatum Cicero , non tam dicendo , quam quod quodammodo non diceret , evertit. Quum enim praetores in gratiam Verris saepius comperendinando causam in ultimum diem traxissent , appareretque , tempus causae perorandae non suppeditaturum , neque exitum habiturum iudicium : exsurgens Cicero opus esse oratione negavit producisse & interrogatis testibus , iudices ad sententiam ferendam compiluit. Quo in iudicio multa eius commemorantur facete dicta. Verrem enim Romani porcum nondum castratum vocant. Iam quum conditionis libertinae homo , isque superstitioni Iudaeae obnoxius , Caecilius nomine , contenderet , summotis Siculis , se accusatorem Verris constitui oportere : Quid , inquit Cicero , Iudeo cum verre ? Erat filius Verri adultus , quem parum pudice fama tenebat formam habere. Igitur Verre Ciceroni malitiam obiciiente : Liberis , inquit , intra ianuam conviciandum est. Orator Hortensius direcete patrocinari non ausus , tantum in litis aestimatione adfuit. qui Sphinge eburnea a Verre accepta , quum oblique quiddam in ipsum iacenti Ciceroni dixisset , Non intelligo haec aenigmata ; Atqui debes , inquit Cicero , cum Sphingem domi habeas.

<sup>8</sup> Verre damnato , cum Cicero litem ei aestimasset tricies H. S. <sup>1</sup> male audivit , quasi pecunia accepta

<sup>1</sup> In numero arguitur Plutarchone , II. Orat. in Verrem , china lectio. Ex ipso enim Cicerone & Asconio in Divinat. 5-

de multa remisisset. Siculi tamen, quo gratos se ostenderent, ad Ciceronem, cum adita aedilitate fungetur, ex insula advexerunt multa & attulerunt: quorum in suam rem nihil vertit; tantum ad levandam annonam Siculorum liberalitate usus est. Villam amoenam Arpini, praedium etiam prope Neapolim, & alterum Pompeiis, non lata habuit. accessit uxoris Terentiae<sup>1</sup> dos, quadringentorum octoginta millium numum. praeterea hereditas ei venit, quae ad trecenta sexaginta millia numum est redacta. His facultatibus liberaliter & frugaliter usus, habuit etiam convictores Graecos & Romanos, quibuscum doctos sermones misceret. Haud temere ante occasum solis acumbebat, non tam quod negotiis districthus esset, quam valetudinis causa ob stomachi imbecillitatem. Fuit alioquin in corporis cura nimius, ut & ad certum numerum frictionibus & ambulationibus uteretur. qua ratione habitum corporis validum & firmum ad multas & graves contentiones laboresque conservavit. Domum paternam concessit fratri: ipse, ne molestum clientibus esset longius iter, iuxta Palantium habitavit. Nec minori frequentia celebrabatur domus eius, quam illa Crassi divitiis, ac Pompeii militari laude praestantis, hos enim tum, ut potentissimos, admirabantur Romani: & ipse quoque Ciceronem observabat Pompeius, multumque Pompeii potentia & gloria aucta est Ciceronis auctoritate.

sestertium quadringenties repetitum discimus. Sed vide Ruardum & Barionium ad hunc Plut. locum.

<sup>1</sup> Terentiam Ciceronis, sororem Fabiae Terentiae, virginis Vestalis fuisse, notat Plut. in Catone minore.

9 In praeturae petitione, multos illustres quum haberet competitors, omnium primus designatus; & in ipsa praetura iudicia caste & innocentia exercere vi-sus est. Memoriae proditum legimus<sup>1</sup>, Licinium Ma-crum, qui & ipse multum in civitate poterat, & Crassii auxilio utebatur, quum de pecuniis repetundis apud Ciceronem praetorem accusatus esset, fretum potentia & studio amicorum, cum iudices adhuc sententias ferrent, dominum abiisse, statimque caput totondisse, sum-taque roga pura, tanquam victor foret, ad forum redditum fuisse: sed quum Crassus, ei in vestibulo obvius, omnibus damnatum dixisset sententiis, rever-sum decubuisse, atque de vita decepisse. Quae res Ciceroni, ut qui iudicia magna diligentia exerceret, gloria extitit. Vatinius, patronus asper, & minus reverens magistratum, collo strumoso, quum coram a Cicerone praetore aliquid petiisset, idque ille non statim concederet, sed diu deliberaret, Evidem, in-quit, si praetor sim, de eo non dubitarem. Tum conversus Cicero: At ego non habeo tantas cervices. Extremo anno quum dies ei non plus duo, aut eres, supereffent praeturae, Manilium quidam de peculatu apud ipsum postulavit. Manilio favebat popu-lus, quod propter Pompeium, quo utebatur familia-riter, accusari videretur. Ei petenti, ut sibi tempus con-situeretur, diem, qui unus supererat, Cicero de-dit insequentem. quam rem indigne tulit populus, quod mos esset, ut reis non minus decem dies con-cederentur a praetore. Quare statim produc-tus in con-

<sup>1</sup> cf. Cic. ad Att. I, 4. sed & Val. Max. IX, 12, 7.

cionem a tribunis pl. ibique accusatus fraudis , cum rogasset audientiam , dixit, Se , qui in reos semper , quantum leges permitterent; comis et humanus fuisset , indignum iudicasse , non eundem se Manilio praestare. itaque ei diem , quem unum praetor in sua potestate haberet , consulto praefinivisse : quum non sit eius , qui ipse causam rei adiuvare velit , ad alium magistratum iudicium reiicere. *Hac oratione mirum quantum populi animi commutati sunt :* multisque cum acclamationibus prosecuti , rogarunt , ut Manilii susciperet defensionem. quod ille praesertim ob Pompeium absentem cupide recepit : magna que orationis vi in studiosos potentiae paucorum , & Pompeii invidos invectus est.

*Ad consulatum non minori optimatum quam plebis studio proiectus est ; suffragantibus omnibus reipublicae causa. Conversionem reipublicae a Sulla factam , et si ea principio improbata esset , quum tempus & consuetudo populum docuissest , bonorum coniunctione eo valuisse , ut civitas quendam statum haberet ; erant tamen alii , qui praesentia convellere & mutari , nullo quidem bono publico , sed sui studio & cupiditatibus moti , molirentur. Pompeius id temporis per Pontum & Armeniam bellum cum regibus gerebat. Romae autem vis praesens nulla erat ad reprimendos rerum novarum cupidos. Ducebat his se praebebat homo audax , magna nimis cupiens & ad ea promptus , varius ac versutus , L. Catilina. Huic antea fuerat , praeter alia infanda scelera , crimini datum , quod cum virginem filia stuprum fecisset , & necasset fratrem . cuius metu criminis egit cum Sulla , ut fratrem suum , quasi ad-*

huc vivum, referret in proscriptos. Tali duce delecto improbi cives fidem cum aliis modis sanxere inter se, tum maestati hominis gustata carne. Corruperat vero quamplurimos ex iuventute Romana, variis ex cuiusque ingenio illecebribus, comissiones aut scorta cuique semper praebendo, neque sumtui in his suppeditandis parcendo. Prona erat tota ad defectionem Hetruria, & Gallia pleraque cisalpina: ipsa vero propter fortunarum inaequalitatem maxime motibus opportuna erat Roma. nam ut quisque nobilissimus erat, & animosissimus, ita familiares opes in spectacula, viscera-tiones, largitiones, honorum assequendorum causa, insanas substrictiones profuderat. Sic pecunia omnis ad homines defluxerat ignobiles & humiles, ut parvo momento quivis, cui foret animus, rempublicam per se aegram trahere valeret.

11 Verumtamen, quasi castellum aliquod validius, ex quo in rempublicam irrumperet, consulatum Catilina petebat, magnamque conceperat spem, C. Antonium sibi collegam fore, virum, qui per se neque ad bonum neque ad perniciem civitatis ducem se praebere valebat, sed alteri duci accessurus vires firmare posset. Unde studia plurimorum bonorum, qui ea prospiciebant, accensa ad consulatum mandandum M. Tullio Ciceroni: qui cum populo valde acceptus esset, superavit Catilinam. Creati Consules M. T. Cicero, & C. Antonius; licet inter candidatos solus Cicero pater natus esset equestri, non senatorio.

12 Quamvis vero Catilinae consilia nondum emanaverant in vulgus, iam tamen magnae contentiones prae-ludebant certamini, quod Ciceroni consuli suscipien-

dum esset. Nam tum illi, qui per leges Sullanas ab honorum petitione prohibebantur, proscriptorum filii, neque opibus carentes, neque pauci numero, sed magistratum cupidi, populi favorem captabant, multa de Sullae dominatu & vera & iusta disserendo; sed neque in loco, & alieno tempore movebant civitatem: tum tribuni plebis in eandem speciem leges rogabant<sup>1</sup>, ut decemviri summo cum imperio crearentur, qui Italiam totam, Syriam universam, eaque omnia, quae virtute Pompeii imperio Romano recens adiecta erant, in sua potestate haberent; venderent, quidquid publicum populi Rom. esset; iudicarent, de quibus ipsi vellet; colonias ducerent novas; pecuniam ex aerario caperent; milites, quot opus foret, alerent conscriberentque. *Huic igitur legi favebant cum illustres multi, tum ipse Ciceronis collega, Antonius, ut unus e decemviris futurus. qui cum eorum, quae Catilina contra remp. moliretur, conscius ea haud aegre ferre videretur, quod oppressus esset multo aere alieno; multo in metu erant optimates.* Verum ei rei primum remedium attulit Cicero concessa Antonio Macedonia sine sorte; ipse vero Galliam sibi decretam mox deposituit. Quo beneficio adeo devinxit sibi Antonium, ut, velut mercenarius histrio, in tuenda patriae salute secundas partes ageret. Igitur, ut eum sibi habuit obsequenter & tractabilem, iam maiore animo Cicero illos, qui moliebantur res novas, aggressus oratione in Senatu contra legem agrariam habita auc-

<sup>1</sup> cf. Cic. oratt. de lege Agr. contra Rullum.

tores legis ita perterrefecit, ut nihil tum contra dicerent. Et quum iidem de integro legem urgerent, iamque praeparati in concionem vocarent consules; Cicero, disceptatore populo Rom. uti, non dubitavit; cumque Senatum sequi se iussisset, progressus, oratione habita non modo legem eiecit, verum etiam tribunos in desperationem reliquorum, quae moliebantur, coniecit. adeo illos perturbaverat eius oratio.

13 Nimirum hic vir Romanis ostendit, & quantam gratiam eloquentia afferat honesto, & quod ipsum iustum est, si recte dicatur, fieri invictum, neque non decere eum, qui rempublicam diligenter tractare velit, uti in agendo honestum anteferre, ita dicendo omnem acerbitatem, ei quod utile est, detrahere. Quam grata autem illius eloquentia fuerit, in eo quoque declaratum est, quod ipso consule circa spectacula evenit. nam quum antea equites in theatro permixti multitudini, & cum plebe, prout contigisset, spectarent, primus locos equitum a sedilibus plebis distinxit M. Otho praetor<sup>1</sup>, illisque propria sedilia constituit, quae etiamnum tenent praecipua. Quod cum

<sup>1</sup> Plutarchum erroris infundulant, quod pro L. Roscio Othono, tribuno plebis, eoque ante quatuor annos legis theatalis auctore (cf. Cic. pro Mur. 19. Liv. epit. L. 99 & Vellei. II, 32) nominet M. Othonem praetorem. Fortasse Plut. erravit tantum in praenomine; Othoque unus ex praetoribus, huius anni, fue-

rit; an alias ex gente Salvia, qui legem Rosciam executus. Neque enim omnes huius anni praetores apud auctores nominantur. Sed nostrum non est, tales componere lites, cum praesertim oratio haec de Othone, quam inter consulares tertiam refert ipse Cic. ad Attic. II, I, perierit.

plebs ad ignominiam suam pertinere putaret, ingressum in theatrum Othonem sibilis consecuta est; sed equites contra illum plausu exceperunt. sublato deinde maiore, illinc sibilo, hinc plausu, convicia ingesta, & tumultus tota cavea consecutus est. Quum Cicero consul advenisset in theatrum, re audita populum ad aedem Bellonae evocavit, itaque reprehendendo & admonendo castigavit. tum reversa in theatrum plebs Othoni magnum plausum dedit, eique certatim cum equestri ordine honorem perhibuit.

At coniuratio Catilinae, trepida initio & perculta, 14 resumxit animos: & conventu habito sese mutuo cohortati sunt, ut animosius aggrederentur ad ea, quae agitabant, antequam Pompeius, qui cum robore legionum iam redire ferebatur, reversus esset. In primis vero Catilinam incenderunt veteres Sullani milites, qui per totam quidem Italiam effusi, sed plurimi & fortissimi in Etruriae oppida sparsi, novas rapinas divitiarumque paratarum direptiones somniabant. Hi quum duce usi Manlio, uno ex iis, qui sub Sulla cum insigni laude militaverant, se adiunxissent Catilinae; Romam venerunt ad comitia, ut eius petitio nem suffragiis suis iuvarent. Petebat enim iterum consulatum, deliberato animo, Ciceronem in ipso comitiorum tumultu occidendi. Visum vero etiam numen, quae futura essent, ostendere terrae motibus, fulguribus & ostentis. Quae ab hominibus facta erant indicia, ea quidem vera habebantur, sed nondum satis firma ad coargendum hominem nobilem ac praepotentem. Quare die comitiorum prolata, Catilinam in Senatum arcessivit, arcessitumque de iis rebus iussit,

si quid vellet, quae ad consulem allatae esent, dicere. Atque ille, putans, plures esse in Senatu novarum cupidos, simul coniuratis se ostentandi gratia, Ciceroni haud molliter respondit: Quid enim indigne ago, si ego, cum duo corpora sint reipublicae, unum debile infirmo capite, alterum validum sine capite, huic caput ipse addo? Hisce in Senatum & plebem per allegoriam dictis commotus magis Cicero est: eumque loricaindutum, primores omnes ac frequens iuventus in campum deduxere. Ibi consulto loricam dissuta ex humeris tunica ostendit, ut omnes in metu & periculo consulem viderent; qua re graviter commoti omnes boni praesidii causa eum circumstetere. Denique suffragiis populi repulso Catilina, consules declarantur D. Silianus & L. Murena.

15 Non multis post diebus quum ad arma capienda, qui Catilinæ favebant, in Etruria convenissent, diesque ad facinora, quae suscepérant, constituta adesset; media nocte principes potentissimi civitatis M. Crassus & M. Marcellus & Scipio Metellus ad Ciceronis aedes venere, pulsatisque foribus & vocato ianitore, Ciceronem excitari e somno iussérunt, eique nuntiare, se adesse. Erat autem res haec: Crasso post coenam ianitor suus reddiderat epistolas ab homine ignoto allatas, alias aliis inscriptas, unam ipsi eamque sine auctore: qua lecta, Crassus, ubi cognovit, magnam caedem per Catilinam parari, seque moneri, ut urbe clam exiret; ceteras epistolas non resignat, sed statim ad Ciceronem, tanto periculo attonitus, simul suspicionem, in quam ob amicitiam Catilinæ venerat, a se remoturus, properat. Cicero, re deli-

berata , prima luce convocat Senatum , epistolae reddit his , ad quos erant datae , iubetque , ut eas publice legant . Omnes vero literae pariter nunciabant insidias . Quum vero etiam Quintus Marcius , vir praetorius , significasset , delectus in Etruria haber , ac Manlius nuntiaretur cum magna manu illic circa civitates imminere rebus novis , & operiri motum in arbe ; quod rarius neque nisi in atrociori negotio fieri solebat , Senatus decrevit , ut viderent consules , ne quid respublica detrimenti caperet .

Ea potestate , quae a Senatu magistratui permittebatur maxima , accepta , Cicero , quae agenda foris erant , Quinto Metello permisit , urbi ipse praefidio futurus : ac quotidie tanta stipatus caterva in publicum processit , ut ingrediens in forum magnam eius partem occuparet comitatu suo . Tum longioris morae impatiens , Catilina excurrere ad Manlium statuit in castra ; Marcium vero et Cethegum <sup>1</sup> cum armatis , sicuti salutatum , ad Ciceronem introire ac de improviso domi suae imparatum confodere iussit . Quem dolum Fulvia , mulier nobilis , ipsa nocte enun-

<sup>1</sup> Sallustius c. 28 , operam suam ad caedem pollicitum dicit C. Cornelium equitem , & cum eo L. Vargunteum senatorem , quos ipse Cic. pro Sulla c. 2 , 6 & 24 nominat . Marciū nemo inter coniuratos refert . Forsan in nomine Marciū L. Vargunteii nomen gentis expressum latet . Tum putant , Plutarchum errasse in

nomine Cethegi , quod & huic fuerit praenomen nomenque Caii Cornelii , cognomen vero Cethegi . Cethegum quidem , quem postea Ciceronis occidentai partes sumisse , refert Sall. c. 43 & quem Cic. pro Sulla cap. 19. caedi in urbe facienda praepositum , dicit , Plutarchus miserrime videtur , cum C. Cornelio equite .

tiat Ciceroni, eumque monet, ut caveret sibi a Cethego eiusque comitibus. Hi quum diluculo accessissent, ianua prohibiti, aegrius id ferentes adiecerunt clamores tantos, ut multo suspectiores fierent. At Cicero progressus Senatum vocavit in aedem Iovis statoris, quae erat initio sacrae viae, qua ad palatium adscenditur. Eodem Catilina inter alios, velut sui expurgandi causa, venit, eique nullus senator assidere voluit; sed omnes parte illa subselliorum, ad quam accesserat, diergessi sunt, & dicere incipienti obstrepere. Tandem surgens Cicero eum egredi ex Urbe iussit. oportere enim inter se, qui consilio et dicendo, et illum, qui armis tempublicam tractaret, murum interesse. Igitur Catilina confessim cum trecentis armatis excessit, & quasi cum imperio esset, cum lictoribus ac fascibus aliisque insignibus correptis, in castra ad Manlium contendit: contractis ferme viginti millibus oppida adit & ad defectionem sollicitat. Itaque cum iam palam bellum gereret, missus est cum exercitu adversus eum Antonius.

17 Interim Romae Lentulus reliquias, quos Catilina corruperat, socios convocat & confirmat. P. Corn. Lentulus, cui cognomen Sura, patricius erat ex clarissima gente Corneliorum, sed moribus turpis, & probri causa iam ante Senatu motus; tum vero iterum praetor, qui honos dari consuevit recuperantibus senatoriam dignitatem. Cognomen Sura hac de causa traxisse dicitur. Dominante Sulla idem quaestor magnam pecuniae publicae summam interverterat abligurieratque: indignante vero Sulla & in Senatu rationes ab eo reposcente, procedens ipse, secu-

rus omnino probri, abiectissime dixit, rationes se reddere non posse, sed praebere suram; quod in pilae ludo pueri, ubi ab iis peccatum, facere solent. inde cognominatus est Sura<sup>1</sup>. Alio tempore in iudicium denuo vocatus, iudicibus aliquot pecunia corruptis, quum duabus sententiis absolutoriis, quae superarent, damnatione exemptus esset, impensam fuisse, inquit, supervacaneam, qua alterum iudicem sibi conciliaret. satis enim fuisse, si vel una sententia liberaretur. Tali hunc ingenio a Catilina incitatum, insuper inani spe dementem fecerant falsi vates, assentantes homini, & carminibus fictis sortibusque persuadentes, ex libris Sibyllinis regnum Romae tribus Cornelii portendi; Cinnam atque Sullam ante, ipsum tertium, cui fatum foret, Urbis potiri. itaque fortius aggredetur opus; neque, sicut Catilina, cunctando magnas opportunitates corrumperet.

Nihil iam mediocre aut parum insigne cogitabat 18 Lentulus; sed Senatum omnem, & quantum posset ceterorum civium, interficere, ipsam vero Urbem vastare statuit; neminique parcere, praeterquam Pompeii liberis, quos suae potestatis facere & incolumes detinere voluit, tanquam pacis cum Pompeio componendae pignora. creber enim & constans rumor erat, ipsum ingenti illo bello confecto ad Urbem redire. Hisce facinoribus unam ex Saturnalibus noctem de-

<sup>1</sup> Sed Pighius commentum hoc existimat, si quidem antiquius hoc cognomentum fuisse familiae Lentulorum, patet ex

tus M. Aem. praetoris memoria. Potuit tamen, si e maioribus huius fuit, per anticipationem sic dici Livio.

Liv. XXII, 31. ubi P. Sura lega-

stinaverant : iamque enses , stupam , sulphur clam ad Cethegum comportaverant : Urbem in centum partes descripsierant , quibus incendendis certum viros , singulos singulis forte duces , praeferant , ut momento , multis ignem subiicientibus , Urbs undique conflagraret . alii autem obstructuri erant aquae ductus , & obtruncaturi hos , qui aquari vellent . Dum haec pararentur , forte Romae agebant legati duo Allobrogum , gentis eo temporis plurimum afflictae , atque avaritiam magistratum gravantis . Hos Lentulus cum suis rati idoneos rebus novis & sollicitandae in arma Galliae , coniurationis participes faciunt : datusque literis ad Senatum civitatis Allobrogum , aliis ad Catilinam , illis pollicentur libertatem , hunc cohortantur , ut servitia ad libertatem vocet , ipseque ad Urbem accedat . Una cum legatis missus Titus quidam Crotoniensis <sup>1</sup> , qui literas ad Catilinam ferret . Sed haec inconsideratorum hominum & in vinis fere cumque mulieribus inter se conferentium consilia , Cicero industria ac sobria mente magnaque prudentia venatus , & de iis , quae extra Urbem agitabantur , per speculatorum certior factus , insuper clandestinis colloquiis cum multis studium coniurationis simulatibus , quos sibi fidos habebat , cuncta , quae cum legatis inaniter egerunt illi , edocetus ; nocte constituta , qua proficiscerentur , insidias collocat , & , Allobrogibus occulte cum eo facientibus , deprehendit Crotonensem cum literis .

19 Die illucescente , Senatu convocato in aedem Concordiae , literas recitat , indicesque interrogat . Addie & T. Kulturcius Crotoniensis dicitur plenius Sallustio .

quoque *Iulus Silanus*, esse, qui ex Cethego au-  
 divissent, brevi fore, ut tres consules ac qua-  
 tuor praetores occiderentur. *Alia eiusmodi etiam*  
*Piso*, *consularis, retulit.* *Caius vero Sulpicius*, e  
*praetoribus unus, domum Cethegi missus, magnam*  
*ibi vim telorum & armorum, quam plurimos pugio-*  
*nes & gladios, recens exacutos omnes, deprehendit.*  
*Tandem Crotoniensis fide publica dicere iussus a Se-*  
*natu, indicium facit: quo cum convictus esset Lentu-*  
*lus; decernitur, uti magistratu abdicatus (erat enim*  
*praetor) depositaque in curia praetexta, et veste*  
*fumpta praesenti calamitati conveniente, item ceteri*  
*praetoribus in liberam custodiam traderentur. Sub*  
*noctem progressus in concionem Cicero populo, qui ade-*  
*rat, quidquid in Senatu actum erat, exponit. inde de-*  
*ductus in amici vicini domum: eo quod domi eius*  
*sacra Bonae Deae, quam Graeci vocant Τυραινειαν*  
*(Femineam) celebrarent feminae, (haec sacra quot-*  
*annis in aedibus consulis uxor eius aut mater praes-*  
*entibus obit Vestalibus virginibus).* *Domum amici*  
*ingressus per paucis praesentibus secum volvit, quid*  
*de istis statuendum esset. Extremum enim supplicium,*  
*quod commeriti videbantur delictis tantis, persequi*  
*verebatur, ingenii sui lenitate motus, & simul, ne*  
*potestate sua nimium abuti, acerbiusque in viros no-*  
*bilissimos & amiciiis in Urbe potentes invehi vide-*  
*retur: si mollius consuleret, formidinem iniiciebante*  
*pericula ab iis futura: neque enim, si leviori poena,*  
*quam capitali afficerentur, quieturos fore videbat,*  
*sed ad omne nefas denuo erupturos, nova veteri ira*  
*addita: tum se, qui alioqui non haberetur valde ani-*

*mosus, magis etiam imbecillitatis & remissioris animi opinione laboraturum.*

- 20 *Dubitante sic Cicerone, feminis sacrificantibus fit ostentum. Peracto enim sacrificio cum ignis in ara iam extinctus putaretur, magna flamma e cineribus in altum sublata est: quo miraculo aliae quidem mulieres percussae fuerunt; sed virgines Vestales Terentiam, Ciceronis uxorem, confessim adire maritum ac monere iusserunt, quae de patriae salute agere instituisset, exsequi ea ne dubitaret; magnum ei a Dea ad salutem et gloriam afferri lumen. Terentia, quae alias non leni, nec pavida indole erat, sed ambitiosa, magisque, ut ipse Cicero refert, consiliorum de republica particeps esse, quam cum marito de rebus domesticis communicare gestiebat, haec statim nuntians, maritum in coniuratos incendit. incitarunt quoque Quintus frater, & P. Nigidius, communis philosophiae studio coniunctissimus, quo & plurimum utebatur in publicis negotiis. Postero die, Consul, convocato senatu, refert, quid de his fieri placebet, qui in custodiam traditi erant. Primus D. Jun. Silanus, (cos. des.) sententiam rogatus in carcerem publicum abducendos, et de iis supplicium sumendum decernit: cui sententiae omnes deinceps assensere; donec ad C. Caesarem, postea Dictatorem, sententiae dictio pervenit. Hic tum iuvenis adhuc, primis auctibus crescens in fastigium futurum, re publica gerenda & spe sua iam ingressus viam, qua Rempublicam verteret in principatum, ceteros quidem fecellit, Ciceroni vero multum suspectus, cavit, ne quam copiam sui faceret, ut argueretur. immo multi*

*suere, qui dicerent, Caesarem, cum parum abfuerit, quin a Cicerone deprehenderetur, quasi de manibus elapsum esse. alii vero referunt, Ciceronem amicos et potentiam Caesaris veritum, ultro dissimulasse, quae de eo facta essent indicia.<sup>1</sup> manifesto enim populum maluisse, coniuratos cum Caesare servari, quam Caesarem cum ipsis perire.*

*Caesar igitur, ubi ad eum ventum, sententiam ro-* 21 *gatus, censuit, non suppicio puniendos, sed pu-*  
*blicandas eorum pecunias; ipsos vero per municipia Italiae, quae viderentur Ciceroni, in vinculis habendos, donec foret cum Catilina debellatum.*  
*Cui sententiae, cum & mitior esset, & ab eloquentissimo viro dicta, momenti non parum Cicero addidit.*  
*Surrexit enim ipse & in utramque partem differens, partim illam Silani, partim hanc Caesaris defendit.*  
*Amici quoque Ciceronis, existimantes, Caesaris sententiam magis expedire Consuli, quem, si non interficerentur coniurati, minus invidiosum fore credebant, in eam discedere maluerunt, ita ut etiam Silanus oratione Caesaris permotus sententiam suam retractaret, negaretque, capitalem se dixisse; extremum enim senatori Romano supplicium esse carcerem.*  
*Primus vero sententiae Caesaris contradixit Lutatius Catulus. Eum deinde secutus Cato, oratione habita Caesarem, leniora suadentem, societate consilii suspectum fecit, incenditque ita omnium animos, ut uni-*

<sup>1</sup> Quae sequuntur dicta Plut. παντὶ γὰς εἶναι προδηλον οὐτε μάλλον αὐτοῖς γένοιντο προσδηποτε Καίσαρι σωτῆρις, n Kaiσαρε εκείνοις κορόσενς, sic potius interpretari visum, quam cum aliis a vero sensu aberrare, vel verba male vexare.

*versus Senatus in ipsius sententiam transiret ac supplicium in coniuratos decerneret. De publicandis bonis repugnabat tamen Caesar, ne qui mitiora ex ipsius sententia reieciſſent, retinerent id, quod acerbissimum videbatur. Urgentibus autem multis quum appellasset tribunos, neque ii intercessiſſent, ipſe Cicero cefſit remiſisque illam de publicandis bonis sententiae partem.*

- 22 Postquam Senatus in Catonis sententiam disceſſit, Cicero fine mora ivit ad coniuratos, neque vero hi omnes eodem in loco erant, sed alius ab alio aſſer-  
vabatur magistratu. Primum ex palatio accipit Lentu-  
lum, eumque per sacram viam mediumque forum de-  
ducit ipſe primoribus circumfusus, tanquam stipato-  
ribus. populus rei insolentia attonitus, silentio prae-  
terebat: iuvenes maxime, quaſi sacris patriis aristocra-  
ticī imperii cum metu & horrore initiari ſe putan-  
tes. Transito foro, ubi ad carcerem ventum eſt, Len-  
tulum vindici rerum capitalium tradidit necandum;  
pariterque dein Cethegus, mox ceterorum quisque eo-  
dem deduciſti, idemque supplicium paſſi ſunt. Consul,  
hiſce peractis quum frequentes adhuc in foro videret  
coniuratorum globos, nescientium, quae acta erant,  
noctemque, quaſi superforent iſti atque eripi poſſent,  
opperientium, alta voce pronunciavit, Vixerunt;  
quo verbo Romani ad vitandum male ominatum mor-  
tui vocabulum utuntur. Ad vesperum, quum Cicero  
per forum domum ſuam ſe recipereſt; non iam silen-  
tio cives, neque ordine illum persecuti, ſed quocum-  
que acceſſerat, omnes eum vocibus atque plauſu ex-  
cipiebant, ſervatorem & conditorem patriae appelle-  
bant; in foribus lampades & faces accensae vicos

& angportus clarissima luce collustrabant : pro tectis mulieres stabant, ut eum virum honorarent ac spectarent, qui domum regrederetur cum honestissimo comitatu principum civitatis. Quorum plerique, magnis bellis confectis, triumphis actis, auctoque terra & mari imperio Romano nobiles, sibi invicem in via confitebantur, multis quidem tum imperatoribus ducibusque divitias, spolia, et potentiae incrementa debere populum Romanum, sed securitatem ac salutem uni acceptum referre Ciceroni, qui tali tantoque periculo eripuisset rempublicam. Neque his tam miraculo erat, illum repressisse conatus & flagitosos homines punivisse, quam quod periculum, omnium, quae unquam reipublicae impenderunt, maximum, quam minimis incommodis sine seditione & tumultu amolitus erat. Etenim plerique, qui ad Catilinam confluxerant, audito Lentuli & Cethegi supplicio, dilabebantur : ille vero cum reliquis, qui remanserant, fortissime adversus Antonium dimicans, praelio caesus est cum exercitu.

Fuerunt tamen, qui ob has res gestas Consulem dicens  
cendo factisque vexarent, ducibus designatis magistratibus, Caesare praetore, Metello & Bestia tribunis plebis<sup>1</sup>. qui etiam ante, quam ipsi magistratum ingressent, Ciceronem in concione, magistratu abeuntem

<sup>1</sup> Solum nominat Metellum Nepotem, trib. pl. designatum ipse Cic. ad fam. V, 2. Caesar enim praetor def. nondum ante Cal. Ian. magistratum interat, Bestia vero etiam tribu-

natu iam Non. Decembr. deceperat. Verum Metellus tum alienas & mandatas, a Caesare maxime, inimicitias exercuisse videtur.

*dicere non siverant ; sed positis pro rostris subselliis excluserunt a dicendo , tantumque permiserunt , si vellet , ut eiuraret magistratum statimque descenderet. Ita ille , ut iuraturus , processit , factoque silentio iuravit non solenne , sed praeclarum & novum iuramentum , rempublicam atque Urbem sua unius opera esse salvam. idque iusiurandum , tale atque tantum , populus Romanus universus in illa concione , iuratus ipse , una voce & consensu approbavit. Qua re magis commoti & Caesar & tribuni pl. alias procellas excitarunt Ciceroni , suaseruntque legem , ut Pompeius cum exercitu acciretur , ad dominatum Ciceronis reprimendum. Sed hoc tamen peropportune cecidit & Ciceroni & universae civitati , quod tum tribunus pl. fuit Cato , qui illorum actionibus pari potestate , sed maiori existimatione intercederet. Hic enim non solum cetera facile dissolvit , sed & Ciceronis consulatum ita amplificavit concionibus suis , ut honores ei decernerentur summi , ac parens patriae nominaretur <sup>1</sup>. quod ut cognomen ipsivenit , ex quo eum sic primus in concione Cato vocaverat.*

24 *Summa id temporis auctoritate valuit Cicero , sed tamen magnam sibi conflavit invidiam , nullo quidem flagitio ; sed quod semet ipse usque laudando suisque gestis amplificandis multos offenderet. ubique enim , in Senatu , sive in concione , sive in iudiciis perpetuores a se gestas iactabat : verum etiam libros scriptaque omnia suis complevit laudibus. qua insolentia ,*

<sup>1</sup> Praeter Plut. Appianus Alex. Ciceronem sic a Catone nominatum tradit scil. in populi concione. Sed in Senatu Q.

Catulus eum sic appellavit teste ipso Cic. in Pis. & pro P. Sextio. praeivit forsitan Cato Catulo.

velut morbi alicuius confinio, orationis suae suavitatem & gratiam ita corrupit, ut non fastidium modo, verum etiam odium afferret audientibus. Quanquam vero immodica gloriae cupidine laboraret, reprehensione tamen caruit invidiae in alios: atque tantum absfuit, ut ultro omnes & ante se viros insignes & aequales suos laudibus celebraret. Quod uti omnia eius scripta testantur, ita multa ab eo, quae feruntur, dicta: ut de Aristotele illud: flumen orationis aureum fundens Aristoteles<sup>1</sup>; de Platonis Dialogis<sup>2</sup>: Iovem, si graece loquatur, sic loqui. Theophrastum<sup>3</sup> appellare delicias suas consuevit. De orationibus Demosthenis interrogatus, quam maxime probaret, longissimam respondit<sup>4</sup>. Multi quidem eorum, qui se Demosthenis fautores assimulant, mordent dictum Ciceronis in epistola quadam ad familiarem, interim dormitare Demosthenem<sup>5</sup>. sed isti immemores sunt

<sup>1</sup> Cic. Acad. IV, c. 38, s. 119.

<sup>2</sup> Cic. in Bruto c. 31. s. 121. Sed Cic. hoc dictum a Philosophis adducit, Iovem, aiunt, philosophi, si &c.

<sup>3</sup> Appellat eum quidem Cic. ad Att. II, 16, amicum suum, passimque laudat; sed Dicaearchum, Aristotelis alium discipulum, vocat delicias suas Tusc. I, c. 51 s. 77.

<sup>4</sup> Plin. iun. I, ep. 20 de ipso M. Tullio scribit: eius oratio optima fertur esse, quae maxima.

<sup>5</sup> Dictum hoc etiam refert Quintil. X. 1, 24: cum Ciceroni dormitare interim Demosthenes, Horatio vero etiam Homerius ipse videatur; & XII, 1, 22, quanquam neque ipsi Ciceroni Demosthenes videatur satis esse perfectus, quem dormitare interim dicit. Vix credamus ipsa haec verba esse Cic. Interim certe pro aliquando Quintilianeo demum aevo usurpatum, non Ciceroni. Et videtur Quintilianus illud dormitare ab Horatio mutuatus. Rem vero admodum dixit Cic.

magnarum & egregiarum laudum, quibus illum passim cumulat; ipsumque Ciceronem orationes, in quibus prae ceteris suis elaboravit, illas nimirum in Antonium habitas, inscriptisse Philippicas. Aequalium autem virorum, sive eloquentia, sive sapientia illustrium, nemo est, cuius nomen non suo iudicio lubens illustrius reddiderit. Cratippo, Peripatetico, a Caesare, iam rerum potito, civitatem impetravit Romanam, & simul effecit ab Areopago decretum, quo is rogaretur, ut remaneret Athenis, cuius doctoris auctoritas esset Urbis ornamento. Exstant quoque Ciceronis patris epistolae & ad Herodem<sup>1</sup>, & ad ipsum filium, quibus hic Cratippum sectari, sed Gorgiam rhetorem, per quem credebat filium ad delicias & compotationes abduci, dimittere<sup>2</sup> iuberetur. Et haec fere una est Graecarum eius epistolarum, aliaque ad Pelopem Byzantinum, stomacho scripta. Gorgiam quidem hanc immeritum amaris incessit dictis, siquidem is, ut habebatur, improbus & luxuriosus erat: sed cum Pelope satis minuto animo expostulat & queritur, quod is, honores quosdam ipsi a Byzantinis decerni, neglexisset.

25 Atque uti haec agebat ab aestu gloriae, ita saepe dincitate abripi se passus est, ut modum excederet.<sup>3</sup> Quum aliquando T. Munatium defendisset, isque ab

in Orat. ad Brutum c. 29 extr. filio, Athenis agente, mandaverat, ad Att. XIV, ep.

s. 104.

16, & XV, 16.

<sup>1</sup> Suspectum nomen quidam habent. Sed erat ille Atheniensis, cui quidem ad Attic. II. ep. 2 ut scriptori rerum a Cic.

Cos. gestarum parum laudis trahuit, sed curam quandam de

<sup>2</sup> Vide ipsius Cic. filii ad Tironem literas, ad fam. XVI, 21, s. 11 & 12.

<sup>3</sup> Sed cf. Quintil. VI, 3, ab init.

*solutus 1 dein Sabinum, e Ciceronis familiaribus, postularet, ab ira eo fertur prolapsus Cicero, ut iactaret: Tu quidem, Munati, non tua innocentia evasisti, sed quod ego lumen iudicii caligine offuderam multa. M. Crasso, quem pro rostris magno populi plausus a se laudatum aliquot post diebus convicio proscindebat, tum ingerenti, Nonne me ex hoc loco ita pridem laudasti? respondit: Ego vero exercitationis gratia declaimavi ista, ut in re ficta. Eidem Crasso, quum aliquando dixisset, neinimem Crassorum Romae superasse annum aetatis sexagesimum, sed postea iret inficias, dicens, qui fieri potuit, hoc dictum ut excideret mihi, Cicero regessit: Sciebas nimicum, audituros id Romanos volentes. itaque populi hoc dedisti auribus. Crasso item dicente, sibi placere Stoicorum sententiam, DIVITEM ESSE BONUM VIRUM, subiecit: vide ne probes magis, quod contendunt, OMNIA ESSE SAPIENTIS. Laborabat enim Crassus avaritiae infamia. Crassi filius alter, qui Axio cuidam similis videbatur specie, ita ut in matrem conveniret turpitudinis suspicio, quum in Senatu orationem magna cum approbatione habuisset, interrogatus Cicero, quid ipsi de eo videatur, Graece inquit ΑΞΙΟΣ Κρασσος.*

*Profecturus autem in Syriam Crassus, quum amicū 26  
cum, quam inimicum relinquere mallet Ciceronem,  
huic amice coenam condixit, ab eoque etiam comiter*

**1** Ex Cic. ad fam. VII, ep. post Clodianam caedem de curiae 2, s. 5. dicas, eundem T. incendio accusaverat, olim ab Mun. Plancum, quem Cicero ipso fuisse defensum.

exceptus est. Paucis post diebus, quum quidam amici apud Ciceronem deprecarentur pro Vatinio, eius gratiam & amicitiam ambiente; ( fuerat enim infensus) num et Vatinius, inquit, mecum coenare cupit. & haec quidem in Crassum dixit. Sed ipsum Vatinium, cui cervix strumis tumebat, quum causam diceret, tumidum oratorem nominavit. Quum audisset, Vatinium diem supremum obiisse, mox certior fieret, ipsum superesse, Male, inquit, pereat malus, qui sefellit<sup>i</sup>! Quum Caesar legem tulisset de agro Campano militibus dividendo, & multis res in Senatu displiceret, L. Gellius, qui fere natu maximus erat, id se vivo futurum, negaret; Opperiamur, inquit Cicero, neque enim longam moram postulat Gellius. Octavio cuidam, cui vulgo ut probrum obiiciebatur, quod ex Libya ortus esset, in causa quadam Ciceronem se non exaudire dicenti, respondit: atqui auris tua haud tamen non perforata est. Metello obiiciente, ipsum delatione plures oppressisse, quam defendendo servasse, Fateor, inquit, plus mihi fidei, quam eloquentiae esse. Adolescenti cuidam, qui veneni in placenta patri suo oblati accusatus erat, ferociter iactanti, Ciceronem se probris insectaturum, hoc, inquit, malo abs Te, quam placentam. P. Sestius, advocate cum aliis Cicerone, quum dicturus ipse omnia, nulli advocatorum locum dedisset orandi, iamque satis constaret, futurum, ut absol-

<sup>i</sup> Ambigue hoc dictum Vatinio, qui spem sefellerit. Interpretes haud satis assicuti sunt falsam sparserat samam; & de sensum.

veretur a iudicibus, qui sententias ferre parabant; Cicero dixit, Servi hodie, Sestii, tempori, cum tibi datum est. cras enim unus eris de vulgo<sup>1</sup>. Publum Cottam<sup>2</sup>, qui legum peritus videri volebat, sed indoctus erat & ingenio inepto, quum ad testimonium dicendum in causa quadam citasset, isque se nihil scire responderet; putas fortassis, inquit, te aliquid de iure interrogari. Metello Nepoti in quadam controversia saepius interroganti, Quis est pater tuus, Cicero? respondit: Tu quidem quo minus constanter respondeas talia interrogantibus, effecit mater tua. ferebatur nimirum mater eius impudica: ipse autem inconstans habebatur. Tribunus enim plebis cum fuisset, magistratu deserto, ad Pompeium in Syriam navigaverat, mox inde maiore inconstantia revertit. idem igitur quum Philagrum praceptorum accuratius tumulasset & in monumento eius corvum marmoreum statuisset; intelligentius, inquit Cicero, hoc fecisti. volare enim te magis docuit, quam dicere. M. Ap-

<sup>1</sup> Graeca μελλεις γαρ αυ-  
γειον ιδιωτης ειναι, vulgo ex-  
ponunt: cras enim privatus eris.  
Neque vero sic patet urbanita-  
tas dieli. Sed Sestium pungit  
Cicero, (qui & eius dicta ut pa-  
rum acuta contemnit, ad div.  
VII, ep. 32,) ut insulsum,  
qui oratoris personam ultro su-  
stineat nequeat, cf. ad Attic.  
VII, 17. Idiowtēs etiam est ru-  
dis, imperitus, h. l. unus de  
vulgo, scil. qui alias audire,

non ipse dicere debeat.

<sup>2</sup> Varie scribitur hoc nomen.  
Vulgo legitur Ποπλιον δε Κον-  
σαν; sed Moses du Soul ex  
Cod. MS. Anon. reponi iu-  
bet Κοτλαν. Vulcob. dat Πο-  
πιλιον δε Γαιον; & apud  
Plut. Apopht. p. 205 ed. Reisk.  
idem legit Ποπιλιον Κασον,  
alii vero Κασσιον. Nos Πο-  
πιλιον λαίναν suspicamur;  
quem Augurem novimus ex Cic.  
ad Attic. XII, ep. 13 & 14.

pio in cuiusdam cause exordio se ab amico rogatum dicenti, ut ipsi studium suum, secundam & fidem praestaret, Adeone tu, inquit, durus fuisti, ut nihil eorum, quae Te rogavit amicus, praestares.

27 Inimicos quidem & adversarios dictis differre aceribus, oratorium videtur: sed dicta ab eo in quosvis, risus movendi causa, magnam in eum invidiam verterunt; quorum nonnulla referam. M. Aquilium, cuius duo generi erant exsules, vocabat Adrastum. L. Cotta censore, qui erat vinosissimus, consulatum petens Cicero in prensando quum fitisset, circumfusis amicis bibens, Recte veremini, inquit, ne quod aquam bibo, succenseat mihi censor. Voconio, tres filias deformes secum ducenti, obvius, exclamavit,

Invito Apolline seminavit liberos.

M. Gallius<sup>1</sup>, qui non ingenuis natalibus ortus ferebatur, cum clara voce & alta literas in Senatu recitasset, Nolite, inquit, mirari: et ipse unus est ex vocalibus<sup>2</sup>. Faustus Sulla, dictatoris, qui multos proscripti-

1 Vulgo legitur Γελλιος. Sed Gellii fuere illustri loco orti, & ipse, quem notat Cic. ad Attic. IV, 5, pro Sestio cap. 51 & in Vat. de har. resp. c. 27. Itaque potius videtur M. Gallius, vir praetorius, qui dein in partes Antonii transiit, inimicus Ciceronis; cf. Philipp. XIII, 12.

2 Cic. de claris orat. c. 60

s. 242 aliquos adducit, qui cum infimo loco nati essent, maiori voce sua, quam ingenio, studio & eloquentia, multorum periculis serviendo, honores, pecuniam, & gratiam consecuti essent. Atque hos ignotos & repentinus homines nominat vocales. Interpretes haec non viderunt.

rat homines, filius, aere alieno obrutus, magna-  
iam parte rei familiaris dissipata, quum auctionem  
rerum suarum prosciberet; Cicero hanc proscriptio-  
nem multo magis sibi placere dixit, quam patris  
illam.

Hinc multos offendit: & Clodiana factio in eum 28  
coorta, hac de causa. Erat Clodius nobili loco na-  
tus, aetate iuvenis, audax animi & insolens. hic  
Pompeiae, uxoris C. Caesaris amore captus, in ae-  
des eius furtim subintravit, ueste & ornatu psaltriae  
indutus. nam tum in aedibus Caesaris arcana illa  
sacra a feminis celebrabantur, quibus nefas est inter-  
esse viros. Iuvenis adhuc imberbis, sperans posse se  
occulte pervenire ad Pompeiam, quum noctu domum  
ingressus amplam in diverticulis oberraret; vagan-  
tem conspicata Aurelia, matris Caesaris ancilla, qua-  
sivit nomen. Proloqui coactus quum dixisset, se pedis-  
sequam Pompeiae, Auram nomine; illa, non mu-  
lieris esse vocem, exclamat, convocatque mulieres. que  
occlusis statim ianuis, omnibusque locis perquisitis,

<sup>1</sup> Corrupte vulgo editur απαρ-  
ηιαν προεγγαγε. Sed quidam  
Codd. απαρτιον, quod pro-  
bant Budaeus, Vulcobonus,  
Bartoni &c. sed Reiskius id  
se non intelligere dicit. Iulus  
Pollux quidem Onom. L. II.  
f. 18 & 19 docere potuit, α-  
παρηια nomen esse Ionicum  
notans vasa, quae Graecis quo-

que επιπλα vocantur. inde &  
ipsorum vasum venditionem  
& forum, in quo vendebatur,  
dictam esse απαρηιαν: quam  
vocem pro auctione etiam Hip-  
ponacli usurpatam probat. Ig-  
itur sic legendum est. De nota-  
tione vocis vide Interpretes a. t.  
Pollucem ed. Hemsterhuys.

*profugum in ancillae, cum qua domum ingressus erat, cubiculum, deprehenderunt Clodium. Quum ea res percrebuissest, Caesar uxorem dimisit; & Clodio de caerimoniis violatis dica scripta est.*

29 Cicero, qui amicus Clodio fuerat, & coniuratione Catilinae flagrante eo adiutore promptissimo sui-que corporis custode usus, quum Clodius, criminis refellendi causa, se ista nocte non Romae, sed procul urbe fuisse, contenderet, contra pro testimonio dixit, illum ad se domum venisse, et de quibusdam rebus egisse. quod quidem verum erat; sed Cicero non tam veritatis causa, quam ut uxoris suae, Terentiae, expleret iram, id testatus est. Erat enim huic cum Clodio simultas, cuius sororem Clodium Ciceronis nuptias ambire, & ad eam rem uti interprete putabat Tullo ex familiarissimis Ciceronis; qui frequens ibat ad Clodium, eam ut vicinam colens. hinc illa suspicio, qua acerbi animi mulier incensa & viri potens, Ciceronem incitavit, ut accusatoribus Clodii adefset, eumque testimonio premeret suo. praeterea vero complures viri honesti testimonia dixerunt de Clodii periuriis, sceleribus, ambitu, stupris. Lucullus etiam ancillas produxit testes, siuprasse Clodium minimam sororem suam, quum in matrimonio Luculli fuisset. quin fama vulgarior erat, cum duabus ceteris quoque sororibus consuesse Clodium, quarum Marcius Rex Tertiam <sup>1</sup> uxorem habuit, Metellus Celer Clodium, quam Quadrantariam <sup>2</sup> vo-

<sup>1</sup> Vulgo Terentiam.

<sup>2</sup> cf. Cic. pro Coelio c. 26.

cabant, quod quidam ex eius amatoribus pro argenteis numis aereos in crumenam illius immisisset. minutissimum enim aereum pumum vocant quadrantem. Ab hac maxime sorore infamis erat Clodius. Verum enim vero plebe tum adversus hos, qui ad urgendum testimonii suis Clodium sese coniunxerant, insurgente, trepidi iudices & praesidium sibi circumdedere, & tabulas plerique, in quibus literae<sup>1</sup> confuse scriptae, attulerunt. Videbatur tamen a maiore parte absolutus fuisse: & rumor aiebat, iudicium emtum esse<sup>2</sup>. Quare Catulus, quum obvios habuisset iudices, Quid vos, inquit, praesidium a nobis postulabatis? an, ne numi vobis eriperentur, timebatis? Cicero autem exprobranti Clodio, quod iudices testimonium dicenti non credidissent, respondit: Mihi vero XXV iudices crediderunt. tot enim damnaverunt te. XXX, quoniam numos ante acceperunt, quam te absolverent, tibi nihil crediderunt. Caesar vero citatus testimonium in Clodium omisit; negavitque, sibi compertum esse de adulterio uxoris; sed eam dimisisse, quod Caesaris cubile non ab omni factō solum turpi, sed & a suspicione castum servandum esset.

Ex hoc crimine elapsus factusque tribunus plebis, 30 confestim impetivit Ciceronem, omnesque magistratus & homines adversus illum concitavit. Populum quidem legibus maxime popularibus fecit suum: utrique autem consuli provincias decrevit amplissimas, Mace-

& Quintil. VIII, 6.

<sup>1</sup> Salutaris sc. illa, & tristis. Attic. I. ep. 16.

<sup>2</sup> Rem totam narrat, suaque

& Catuli dicta memorat ad

doniam Pisoni, Gabinio Syriam : multos, quibus neque res, neque spes bona fuit, ad res, quas ageret, instruxit, jervitiisque armatis se circumdedidit. Ex tribus, qui id temporis plurimum Romae poterant, Crassus aperte oppugnabat Ciceronem; Pompeius simulanter agens, utrobique se mollem praebebat; Caesar vero cum exercitu in Galliam iturus erat. quare huic potissimum, quamvis non amico, sed inde a Catilinae temporibus suspecto, se submisit Cicero, ut ei foret legatus. Qua legatione delata, Clodius, elabi e tribunatu suo intelligens Ciceronem, promtum se concordiae reconciliandae assimulat: & reiecta in Terentiam maxima culpae parte, de Cicerone, quoties eius mentionem faciebat, placato ore loquitur & benigne, quasi ipsum non odisset, nec ab eo offensus; sed moderate & amice exposulat. ita omnem Ciceronis metum discessit, ut is legationem Caesari renuntiaret, seque rursus ad rem publicam converteret. Qua re iratus Caesar, & Clodium corroboravit & Pompeium plane a Cicerone avertit: praeterea in concione aperte professus est, sibi haud videri Lentulum & Cethegum recte aut iure necatos. Atque hoc erat crimen; quo iam Cicero petebatur <sup>1</sup>. In hoc periculo constitutus ille vestem mutavit & sordidatus populo supplicavit <sup>2</sup>. Tum

<sup>1</sup> Locus corruptus varie legitur. Nos priora verba αὐτὴς οὐ η κατηγορία a glossa esse putamus; veriora dein καὶ επι τέλος ο Κικερών εκάλειτο. Quod ad rem attinet, Velleius

<sup>II</sup>, 45 ex vero scribit: Clo-

dius-legem in tribunatu tulit: Qui civem R. indemnatum interemisset, ei aqua & igni interdiceretur. Quibus verbis eti non nominabatur Cicero, tamen solus petebatur.

<sup>2</sup> Cuius consilii ipsum post

Clodius illi omnibus viciis occurrebat, stipatus hominibus contumeliosis & temerariis, qui mutationem vestis petulanter exagitantes, multisque locis luto & lapidibus in ipsum coniectis, supplicantem praepedirent.

Cum Cicerone tamen primum omnis fere ordo eque-<sup>31</sup>  
ster vestem mutavit: eumque iuvenes, non minus  
XX mille sordidati, deprecatores salutis comitabantur.  
Deinde quum Senatus frequens convenisset, ut popu-  
lus vestem, tanquam in publico lucretu, mutaret, decre-  
turus, idque consules vetarent, & Clodius cum gla-  
diis curiam ob sideret; senatores non pauci, vestibus  
discissis & clamore sublato se proripuerunt. Quod  
spectaculum acerbum postquam neque ad misericordiam  
neque ad pudorem revocaverat animos, sed Ciceroni in  
exsilium videbatur eundum, aut cum Cladio gladiis  
decernendum; imploratus erat Pompeii auxilium,  
tum ex composito absentis & ruri agentis in Albano  
suo. Primum quidem Pisonem, generum, ad eum  
misit, deprecatorem: deinde ipse quoque eo profectus.  
Sed adventu eius nuntiato, in conspectum venire non  
sustinuit Pompeius; vietus quippe pudore viri, qui  
contentiones pro ipso subierat maximas, multaque in  
republica ad eius voluntatem gesserat. Verum Pompeius,  
quod gener nunc esset Caesaris, huic obsecu-  
tus veterem amicum dedidit, seque, ne cum eo collo-  
queretur, alia subduxit ianua<sup>1</sup>. Desertus sic ad Con-

maxime poenituit, ad Attic. nisi nominatim mecum agi  
III, 15 Caeci, caeci, in-  
quam, sumus in vestitu mu-  
tando, in populo rogando: quod

<sup>1</sup> cf. Cic. in Pison. c. 31.

sules confugit. Gabinius quidem semper durus erat : sed Piso benigniori exceptum sermone hortatus est, ut digrediendo, cederet ultiro tempori, iterumque rem publicam ipsius causa periclitantem servaret. Quo responso accepto, deliberavit Cicero cum amicis. Lucullus quidem manendum censuit; ipsius fore victoriam : alii fugiendum ; futurum enim brevi, ut populus, furoris Clodiani satietae defessus, ipsum desideraret. Atque hoc consilium secutus Cicero, Minervae signum, quod domi iam a longo tempore religiosissime coluerat, in Capitolium dedicavit inscriptaque : Minervae Custodi Urbis. Tum dato ab amicis praesidio clam media nocte profugit ex Urbe, pedibusque per Lucaniām ivit, Siciliam petiturus.

**32** Ubi compertum fuit, Ciceronem discessisse, Clodius de exilio eius ad populum tulit, atque edictum proposuit, ut illi aqua et igni interdiceretur et ne intra quingenta millia passuum ab Italia tecto recipetur<sup>1</sup>. Fuere quidem, qui legis poena non deducarentur, quo minus hospitii & amicitiae ius officiumque Ciceroni praestarent<sup>2</sup>. Sed Hipporii, oppido Lucaniae, quod hodie Vibo vocatur, Vibius, homo Siculus, qui cum aliis multos fructus ex Ciceronis amicitia perceperat, tum eo consule praefectus fabrum fuerat, illum in aedes quidem non recepit, sed fundum se ipsi attributurum denuntiavit<sup>3</sup>. &

<sup>1</sup> Cato & Hortensius.

liceret esse.

<sup>2</sup> Sed ipse Cic. scribit ad Attic. III, 4 in rogatione correcta, fuisse eiusmodi, ut ipsi ultra quadringenta millia

<sup>3</sup> cf. Cic. ad fam. XIV, ep. 4.

<sup>4</sup> Isne qui Plut. nominatur Vibius, idem est cum Sica, in

C. Virgilius<sup>1</sup>, Siciliae praetor, cui cum Cicerone vetusta erat amicitia, in Siciliam venire vetavit. Fractus igitur animo Brundisium petere contendit: inde quum vento secundo solvisset Dyrrachium, vento exorto adverso, postridie reiectus ad Italiam est. Rumor quoque ferebat<sup>2</sup>, quum Dyrrachium navim egressurus esset, terram movisse & maris convulsionem extitisse; unde haruspices coniecissent, illius exfilium non fore diuturnum; quod haec mutationis signa essent. Quamvis autem frequentes eum celebrarent amici, & Graeciae civitates officiis erga eum certarent; is tamen demissus moestusque, crebro Italiam, instar eleicti amatoris, respexit, animoque minuto humili & angusto calamitatem tulit, ultra quam homini, qui in literis vixit, accidere posse, quisquam crederet. Atqui is contenderat saepius ab amicis, ut non oratorem, sed philosophum appellarent ipsum<sup>3</sup>. Philosophiam enim se tractasse, ut opus: eloquentiam autem, ut instrumentum, in re publica gerenda, ubi usus fuisset, adhibuisse<sup>4</sup>. atque eius opinio potius fundo apud Vibonem, Cic. pro Plancio neque in rogatione nondum correcta, aliquamdiu haesit Cicero? cf. ad Attic. III, 2 & 3.

<sup>1</sup> Vulgo Οὐεργίνος. Sed *A-*  
*non.* Cod. Οὐεργίλιος habet;  
& Cic. pro Plancio c. 40 C.  
Virgilium nominat, ubi Lambinus praeter Codd. Virgininum  
facit. cf. & ad fam. ep. 19.

<sup>2</sup> Sed nihil eiusmodi refert

Cic. pro Plancio neque in  
epp. ad Attic. II. cc.

<sup>3</sup> Locum hodie in Cic. scriptis desideramus.

<sup>4</sup> sqq. Graece sic leguntur:  
Αλλη δοξα δεινη τον λογον,  
ωσπερ βαφην, αποκλυσαι της  
ψυχης; cetera lege apud Plut.  
Locum alias difficulter negligenter  
gentius tractant interpretes &  
edd. Nobis dicta videntur in

tis est, veri rationem animo, quasi colorem, abstergere, eosque, qui in publico agunt, per usum & contagionem vulgi, affectibus eius imbuere; nisi quis diligenter sibi caveat, rebusque agendis ita se offerat, ut rerum ipsarum potens sit, non affectionem vulgi in iis capiat.

33 Eiecti Ciceronis villas inflammavit Clodius; domo-que pariter in palatio incensa, in eius area templum Li-ber-tatis exstruxit: reliqua voci praeconis subiecit, & hastam in foro posuit; sed nemo accessit emtor. Hinc metuentibus iam optimatibus, plebem in omnem petu-lantiam audaciamque secum trahens, adoritur Pompeium, vellicando nonnulla eius in bello acta. Quo-rum causa quum male audiret Pompeius, poenituit eum prodiisse Ciceronem: & mutata prorsus mente cum amicis de redditu illius agere coepit. Resistente vero Cludio, placuit Senatui, nihil rei publicae decernere, nulla de re agere, nisi prius Cicero ab exsilio revo-caretur. Lentulo consule seditio adeo gliscebat, ut etiam in foro tribuni plebis vulnerarentur; Quintus, Ci-ceronis frater, inter cadavera, quasi occisus, delites-ceret. cumque tum demum plebs animum flectere coe-pisset, Annius Milo, tribunus pl. primus Clodium de vi postulare ausus est: & ad Pompeium multi-tum ex Urbe, tum ex municipiis convenere. cum qui-bus processit ille, foroque post Clodium eieclum occupa-to, populum in suffragia misit. Neque ullam rem

hos, qui omisso studio sapien-tiae, nihil sibi praeter eloquen-tiam compararunt; unde siebat, ut & multitudinis & suo iudi-cio digni, qui rcp. gererent,

viderentur. hinc cum ad gubernacula reip. temerarii atque au-daces homines acceſſerant, ma-xima ac miserrima naufragia fiebant; cf. Cic. de Inv. I, 3 sq.

tanto consensu populum scivisse, memoriae proditum est. Senatus vero quasi cum populo certans, decretivit, ut honos haberetur civitatibus iis, quae Ciceronem, exsulem, officiose receperissent, domus vero & villae, quas diruerat Clodius, pecunia publica reaedificarentur. Ab exilio reversus est sexto & decimo mense Cicero. Tum tanta laetitia excitatae civitates, tantoque studio obviam venere homines, ut quod postea dixit<sup>1</sup>, se humeris Italia Romam reportatum fuisse, etiam infra veritatem dixisse videatur. Quandoquidem ipse quoque Crassus, qui ipsi ante exsiliū inimicus fuerat, tunc lubenti animo occurrit, & cum eo gratiam reconciliavit, filio gratificans, quem Ciceronis perstudiōsum fuisse ferunt.

Non multo post tempore, observata Clodii absentia 34 cum multis in Capitolium adscendit, & tabulas, quibus acta tribunatus Clodiani continebantur, refixas corrupit. Qua de re cum questus esset Clodius, & Cicero responderet, illum praeter leges e patriciis ad plebem transisse, neque adeo quidquam eorum, quae gessisset, ratum habendum esse; Cato indignatus ei contradixit: non quod Clodium probaret, cuius acta ipsi valde displicuerant; sed grave & violentum esse confirmabat, tot decreta et res gestas SCto tolli, in quibus essent etiam ea, quae ipse in Cypro et Byzantii gessisset. hinc Cicero in Catonis offenditionem incurrit, quae, quamvis non manifestior facta esset, multum tamen de consuetudine & benevolentia mutua ademit.

<sup>1</sup> Orat. post red. in Sen. extr.

35 Post haec, quum Clodius a Milone occisus esset, is de homicidio accusatur: eique Cicero adfuit defensor. Senatus vero, metuens, ne, quum reus esset vir potens & animosus, in Urbe otium perturbaretur, decrevit, ut Pompeius huic aliisque iudiciis praefideret, Urbique & iudiciis securitatem praestaret. Igitur quum ille ante lucem summa fori cum armatis insedisset; metuens Milo, ne spectaculo insolito terroritus Cicero minus feliciter causam diceret, persuasit ei, ut lectica delatus in forum tranquille se haberet, donec convenissent iudices, ac frequens corona circumstetisset. Ille vero non in bello solum visus est parum fortis, sed ad dicendum quoque trepidus accedebat; multisque in causis vix timere ac tremere definebat, ubi ad cardinem & constitutionem causae venisset. L. Licin. Murenam, a Catone accusatum, defensurus & Hortensium, cuius mire placuerat oratio, in dicendo aemulans, per totam noctem a lucubratione non requievit, ita ut nimia cura & vigiliis affectus se ipso inferior fuisse videretur. Atque tum, ubi ad Milonis iudicium ex lectica procedens Pompeium in celsiori loco, velut in castris, sedentem, forumque undique armis fulgens conspiceret, attonitus & confusus, orationem aegre & cum tremore corporis, & hæsitantи voce exorsus est; quum ipse Milo praesenti animo vultuque interrito adesset certamini, neque capillo ac veste sordidatus. quod non minimum ad eius damnationem momentum attulisse visum est. Cicero autem propterea magis de amico anxius, quam timidus ipse, habebatur.

36 In locum P. Crami, filii Marci, qui apud Parthos

cederat, Cicero augur factus est. Deinde provinciam forte accepit Ciliciam, in eamque cum exercitu XII mille peditum, duumque millium & 120 equitum navigavit. Mandatum ei simul fuit, ut Cappadociae regem Ariobarzanem insidiis praesentibus liberaret, et cum ipso rege regnum servaret: quod quidem integerrime & sine armis confecit. Cilicas autem ob Parthicam Romanorum cladem ac tumultum in Syria excitatos videns, mansuetudine imperii pacavit. Dona ne a regibus quidem accepit oblata. coenas provincialibus remisit: ipse vero quotidie bonos eosque elegantes viros convivio exceperit, non sumtuose, sed liberaliter. Domus eius sine custode erat; neque ipsum decumbentem quisquam vidit; sed mane aut stans, aut ambulans pro cubiculo, comiter appellabat, qui salutatum venerant. Neminem fertur virgis cecidisse, nec vestem ullius lacerasse, neque ira exarsisse in convicia, aut poenam irrogasse cum ignominia. Quum multa in civitatibus furti cognovisset, quae magistratus fecerant; & ipsos populos pecuniis referendis locupletavit, & eorum, qui retulerunt, nulla superaddita ignominia, conservavit famam. Bellum etiam cum latronibus, Amanum montem incolentibus, administravit, eosque de monte sustulit; unde ab exercitu Imperator appellatus est<sup>1</sup>. Caelio oratori, pantheras sibi Romam ex Cilicia mitti in luos aedilitios cupienti, de suis rebus gestis glorians rescripsit<sup>2</sup>, earum miram esse paucitatem, et eas,

<sup>1</sup> Uberius res a se bello ge- Attic. V, 20. brevius ad Cae-  
stas scribit ipse Cic. ad Cato- lium II ad fam. 10.  
nem; ad fam. XV, 4 & ad <sup>2</sup> ad fam. II, 11.

quae fuerint, decepsisse in Cariam, questas, quod nihil cuiquam insidiarum in ipsius provincia, nisi sibi fieret. *Provincia* *decedens* *primum Rhodum appulit*, *dein pristinae conversationis desiderio Athenis libenter moratus est.* *Visis ibi his, quibus in inventute usus erat magistris, ceterisque amicis & familiaribus, & qua decebat, veneratione a Graecia exceptus, ad Urbem rediit, ubi res iam, quasi ex inflammatione quadam, in bellum transibant civile*<sup>1</sup>.

37 *Quum vero decerneret ei triumphum Senatus, malle se, inquit, facta concordia, Caesaris currum sequi. Privatum vero utriusque auctor pacis fuit*<sup>2</sup>, multaque in eam rem ad Caesarem scripsit, & Pompeium coram precatus est; utrumque placare ac delinire cupiens. Sed quum res esset deplorata, Caesare invadente, Pompeius, eum non opperiens, cum multis optimatibus Urbe excessit. cui fugae quum se non dedisset Cicero, Caesaris partes tueri visus est. & constat, eum in utramque partem multum nutasse. Scribit enim in epistolis<sup>3</sup>, Nescire se, utro se convertat? cum Pompeius speciosam quidem et honestam causam belli habeat, Caesar vero prudentius rem gerat,

<sup>1</sup> *ad fam. XVI, 11* scribit *fruis*: Sed incidi in ipsam flam-  
mam civilis discordiae, vel po-  
tius belli.

<sup>2</sup> *Vellei, II, 48.* unice ca-  
mente Cicerone concordiae pu-  
blicae.

<sup>3</sup> *Non plane ad verbum in-  
veniuntur apud Cic. quae scrip-  
sse dicitur. Sed congerit in u-*

*num Plutarchus, quos Cic. per  
plures epp. sparrit sensus suos.  
cf. tum Attic. VII, 1, 10, 4,  
12, 20, 21, VIII, 1, 3, 7  
(atque in hac ultima dicit illud:  
Ego vero, quem fugiam ha-  
beo; quem separar, non ha-  
beo) & VIII 9. tum ad fam.  
IV, 2, V, 19 extr. VII 3 &  
passim.*

sibique et amicis consulat; seque adeo, quem fугiat, habere; quem sequatur, non habere. *Trebatus autem, unus ex Caesaris familiaribus, quum per literas significasset, Caesarem in ea esse sententia, ut ad suas partes accederet, suae consors spei futurus; sin hoc ei aetas non permitteret, in Graeciam se conferret, ibique neutri parti addictus quieti suae consuleret; Cicero admiratus, non ipsum Caesarem ad se scripsisse*<sup>1</sup>, *irate rescripsit*<sup>2</sup>, nihil se indignum rebus suis gestis facturum. Atque haec in eius epistolis leguntur.

*Profecto in Hispaniam Caesare, statim ad Pompeium transivit. Quo eius adventu cum gauderent ceteri, tum Cato, eum conspicatus, remotis arbitris multum obiurgavit, quod Pompeium secutus esset; Sibi quidem non fuisse honestum, deferere quas a principio probasset partes reipublicae; illum vero, qui patriae prodesse magis et amicis potuerit, si in Italia mansisset medius, quicunque rerum eventus foret, amicus futurus, nulla nunc ratione aut necessitate hostem Caelari factum esse, atque in tanti periculi societatem venisse. Cum hae rationes sententiam commutarunt Ciceronis; tum quod nulla magna in re eius opera uteretur Pompeius. cuius tamen rei ipse in causa fuit, prae se ferens, se facti sui poenitere. simul ridebat, quae a Pompeio parabantur bello, eiusque consilia obscure improbabat, neque a dickeris absti-*

<sup>1</sup> *Scripsit tamen postea; cf. pistola, sed ad Att. VII, 17 ad Attic. X, 8.*

<sup>2</sup> *Non exstat hodie haec e-*

nebat in socios bell'i iaciendis. Verum & ipse vultuosus ac tristis per castra incedens aliis nihil adversitimentibus risum excitabat. Operae pretium est, & horum quaedam huc inferere. Domitius quum hominem quandam bello inexpertum ad praefecturam provexisset diceretque probum virum & modestum esse, Quid igitur, inquit ille, non tutorem eum tuis liberis servas? Quum quidam Theophanem Lesbium, qui tum in castris erat praefectus fabrum, laudasset, quod egregie Rhodios, post amissam classem, consolatus esset; Quantum bonum est, Graecum habere pro praefecto. Caesare res plerumque feliciter gerente & quodammodo Pompeium obsidente, quum Lentulus Cos. nuntiari diceret, Caesaris amicos tristes videri, respondit: Narras, eos Caesari infenos esse. Marcius quidam ex Italia novissime adveniens quum referret, Romae rumorem increbuisse, obsideri Pompeium; Ergo, inquit, spectatum venisti, ut de eo certior fieres. Post cladem Pompeii Nonnio quodam ad bene sperandum hortante, septem enim aquilas in Pompeii castris superesse; recte, inquit, hortaris, si bellandum nobis sit cum graculis. Labienus quibusdam oraculis fatus quum confirmaret, victorem fore Pompeium; hoc igitur, inquit, consilio amisimus exercitum.

39 Verum enimvero post Pharsalicam pugnam, cui propter infirmitatem corporis Cicero non interfuit, quum Pompeius fugae se dedisset; Cato, magnas copias classemque habens Dyrrachii, contendit a Cicerone, ut exercitui cum imperio praeesset: ita legibus convenire, quod dignitate praecelleret consu-

lari. Quum Cicero non solum recusaret imperium, sed et prorsus belli finem sibi faceret, parum absuit quin interficeretur, cum & Pompeius iuvenis eiusque amici eum proditorem appellarent, gladiosque in eum stringerent. sed Cato resistens vix illum neci eripuit, & ex castris summovit ablegavitque. Ut appulit Brundisum, ibi moratus, Caesarem exspectavit, dum is in bello in Asia & Aegypto administrando occupatus esset. Ubi vero allatum est, Caesarem Tarentum navibus appulisse, atque inde Brundisum pedibus contendere, obviam ei processit: non equidem valde diffidens, sed tamen veritus, coram tanta multitudine hostis & victoris periculum facere. Verum non fuit opus, quidquam dicere aut facere praeter dignitatem. Caesar enim, ut eum longe ante alios occurrere vidit, ipse descendit eumque salutavit, cumque eo solo colloquens multa stadia processit. Deinceps quoque eum & coluit & humanitate sua complexus est, adeo ut Laudi Catonis a Cicerone scriptae rescribens librum, dictationem eius vitamque, ceu Periclis & Theramenis maxime geminam, collaudaret<sup>1</sup>. Atque ut Ciceronis liber Cato, sic Caesaris Anticato<sup>2</sup> inscriptus est. Quum

<sup>1</sup> cf. Plin. H. N. VII, 30 & Cic. in Bruto c. 72. Ipsi Cic. de Orat. III, 16 inter hos, qui in republica propter ancipitem, quae non potest esse se iuncta, faciendi dicendique sapientiam florerent, nominantur praecipui Themistocles, Pericles, Theramenes. Plut. in Nicia p. 524 refert, Aristote-

lem, cum dixisset, tres fuissent cives patriae amantissimos, tertium posuisse Theramenem. Atque is & hoc cum Cicerone habuit commune, ut inconstans putaretur.

<sup>2</sup> cf. Cic. ad Attic. XII, 40, Quintil. III, 7 extr. Tac. Ann. IV, 34 & Gellius, XIII, 18.

*Q. Ligarius reus factus esset, quod in numero hostium Caesaris fuisset, & Cicero eius patrocinium suscepisset, tum Caesarem ad amicos dixisse ferunt: Quid obstat, quin Ciceronem aliquamdiu audiamus dicentem? nam reum quidem hominem improbum et hostem esse, iam pridem certum est. Ubi vero Cicero ingressus dicere, mirificos motus concitavit, et oratio progressa cum affectibus varia, tum gratia admirabilis exstincta, palam visum ferunt, Caesaris vultum ad dicta mutasse colores, animumque omni modo iactatum, ac tandem quum Pharsalicam pugnam attigisset orator<sup>1</sup>, plane commotum corpore contremuisse, & libellos quosdam e manibus dimisisse. Victus igitur Caesar orationis vi, Ligarium criminis liberavit.*

40 *Hinc Cicero, quum penes unum omnis potestas esse coepisset, revocavit se a publicis actionibus, ac studiosis philosophiae iuvenibus vacavit, quorum consuetudini debuit (erant enim nobilissimi & primarii<sup>2</sup>) quod postea rursus summam in urbe auctoritatem consequeretur. Et ipse studium suum navavit dialogis conscribendis & terminis graecis, quibus Dialectici vel Physici utebantur, latine reddendis. Illum enim ferunt, φαντασιαν (visum), συγκαταδεσσιν (affensionem*

<sup>1</sup> pro Lig. c. 3 in fine: & eundem VIII, 3, 54. & Quid enim, Tubero &c. ipse Cic. IX, ad fam. ep. 16.

<sup>2</sup> Quintil. XII, 11, 6 Hirtium & Dolabellam dicendi discipulos, coenandi magistrorum se habere, facete dicit. de Cicerone: Sic Fanfam, Hirtium, Dolabellam in morem praceptoris exercuit, quotidie dicens audiensque. cf. I. c. ep. 7.

approbationem), εποχην (assensionis retentionem),  
 κατανόησιν (comprehensionem, cognitionem, perceptionem), ad haec ατόμον (corpusculum), απέριτος (individuum), τὸ κενόν (vacuum) aliaque eiuscmodi multa primum Romana lingua donasse, aut certe Romanis partim translationibus, partim alia proprietate quadam notasse & effecisse, ut familiaria fierent. Dexteritate condendi versus animi gratia utebatur: ferebaturque, quum scribendi impetum cepisset, una nocte quingentos scribere versus. Tempus hoc paene omne in agro suo Tusculano transigen\$ scripsit ad amicos, se Laertis vivere vitam<sup>1</sup>, sive pro more suo iocans, sive quod prae studio tractandi rem publicam, pertaesum esset praesentis status. Raro in urbem commeabat, idque salutandi Caesaris causa: interque hos, qui Caesaris honoribus suffragabantur princeps erat, semperque in novas eius laudes rerumque ab eo gestarum praedicationem promtus. Huc etiam pertinet, quod de Pompeii statuis, quas eversas & deiectas Caesar iussit reponi, restitutis dixit, ea humanitate Caesarem, qua Pompeii statuas erigat, suas statuere.

Instituerat quidem, uti fama est, patriam complecti historiam, & Graecorum multa intexere, pleniusque orationes eorum & ipsas fabulas scribere; sed multis publicis privatisque negotiis, adversis rebus & casibus, quae pleraque sibi ipse arcessisse videbatur, ab eo consilio distractus. Primum enim cum uxore Terentia divortium fecit, quod ab ea neglectus fuisset, ut in bellum proficiscenti ne quidem, quod opus esset,

<sup>1</sup> cf. Homer. Odyss. I, 189 sq.

viaticum dederit, & quum in Italiam rediisset, eadem parum benevoli usus. Neque enim ipsa Brundisium quum ibi diu haereret, visendi causa venerat; neque proficiscenti ad patrem filiae, quem decebat comitatum sumtumve praebuerat: immo vero domum Ciceronis omnium rerum nudam & inanem, praetereaque magnum aes alienum fecerat. Hae causae speciosissimae divortio praetexuntur. Terentiae vero, quae vel has ivit inficias, defensionem ipse praebuit praeclaram, quum mox virginem<sup>1</sup> duceret, ut exprobravit illi Terentia, forma eius captus; sed Tiro Ciceronis libertus scripsit, hunc divitiis eius adductum fuisse, ut aes alienum dissolveret. Erat enim puella dives valde, & bona eius Cicero, ut fidei commissarius heres<sup>2</sup> relictus custodiebat. Quare quam permagnum aes alienum haberet, amicorum & familiarium impulsu pueram uxorem praeter aetatem duxit, ut illius facultibus creditoribus satisfaceret. Antonius vero, in Orationibus, quas contra Philippicas scripsit, ubi mentionem facit harum nuptiarum, uxorem eum, inquit, apud quam consenuisset, eiecisse, festive simul desidiam Ciceronis, ut ignavi & imbellis, irridens. Haud diu post has nuptias filia eius ex partu decessit apud Lentulum<sup>3</sup>, cui post prioris mariti Pi-

<sup>1</sup> Publiliam; Quintil. Inst. VI, 3, 75. Ut Cicero obiurgantibus, quod sexagenarius Publilia in virginem duxisset, eras mulier erit, inquit.

<sup>2</sup> h. e. qui heres scriptus a patre Publilio, rogatus fuit,

ut hereditas ad filiam eveniret; ut est ap. Cic: de fin. I, 2. Fr. Fabricius in vita Cic. ad V. C. 703. sic reclusus interpretatus est Plutarchum, quam alii.

<sup>3</sup> Publ. Cornelius Lentulus

sonis obitum nupserat. Tum ad Ciceronem consolandum undique convenerunt philosophi : quippe hunc casum tulit gravissime , adeo quidem , ut uxorem recens nuptam dimitteret , quod visa est Tulliae morte laetari. Sic se habebant res Ciceronis domesticae.

Conspirationis in Caesarem , quamvis Bruto familiariſſime uteretur , & praesentem rerum ſtatum inique ferens , priftinae reipublicae defiderio , ut nullus alius , teneretur , particeps non fuit. Metuerant nimirum conſortes cum eius naturam , ut non ſatis animoſam , tum aetatem , quae vel fortiffimis ingeniiſ adi- mit confidentiam. Perpetrato autem per Brutum & Caſſium facinore , factaque Caſarīſ amicorum coitione , quum periculum eſſet , ne civili bello denuo implicaretur civitas ; Antonius Cos. convocato Se- natu pauca de concordia diſſeruit ; Cicero autem multa commemorans tempori iſti accommodata , induxit Senatum , ut Atheniensium exemplo omnium ſub Caſare actorum oblivionem , praeterea Caſſio et Bruto eorumque ſociis provincias decerneret. Sed nihil horum effectum habuit. Populus enim , ultro in commiſerationem praeceps , quum efferri per forū cadaver Caſarīſ vidiffet , Antonio inde uestem Caſarīſ oſtendente , oppletam ſanguine & gladiis omni ex parte perfoſſam , ira furens , iuſtigavit in percuſſores , & cum ardentibus titionibus , ad do-

Dolabella , tertius maritus fuit  
Tulliae Cic. F. Cic. ad div.  
VI , ep. 19 ( al. 18 ). Caſſi-  
pedem , qui inter Calpurnium  
Pifonem Frugi & P. Dola-

bellam medius erat maritus Tul-  
liae , haud memorant Plut. &  
Asconius. cf. Cic. ad div. I,  
ep. 7, 28. & ad Attic. IV,

mos eorum incendendas concurrit. Verum illi, quod praecavissent periculum, hoc quidem evasere; sed quia multa alia et ingentia sibi imminere videbant, cesserunt Urbe.

43 Hic confestim Antonius dominatu efferens animum, omnibus metuendum se, maxime Ciceroni, ostendit. Nam quum crescere rursus potentiam huius cerneret in republica, sciretque cupidum esse Bruti partium, praesentiam eius moleste ferebat: iamque ante dissimilitudo morum ac diversitas fecerat, ut sibi invicem suspecti essent. Haec igitur metuens Cicero statuit primum, legatus in Syriam cum Dolabella proficiisci. Verum quia consules designati Hirtius & Pansa, egregii cives ac fautores Ciceronis, rogabant, ne se desereret, pollicentes, ipso praesente se Antonium oppressuros; animi pendens Cicero Dolabellam misum fecit, Hirtioque promisit, se aestatem Athenis aucturum, & quum ipsis imperium inierint, reversurum. Ita solus iter ingressus est. Mora autem in navigatione intercedente, quum recens nuncius Roma, ut solet, allatus esset, plane immutatum esse Antonium, omniaque agere et administrare ex Senatus auctoritate, neque deesse quidquam ad rem publicam optime constituendam, nisi ipsius praesentiam; reprehendens ipse animi sui anxietatem, repetit Urbem. Neque eius spem fecellit ingressus in Urbem. Accedenti enim tanta multitudo obviam processit, ut dum ad portas ingredientem excipiunt, adventumque gratulantur, dies fere consumitus fuerit. Postridie, quum Antonius senatu convocato & eum arcessisset; non venit in curiam, sed languore fe-

ex via causans, lecto se continuuit: cum ipse insidias ex suspicione quadam & indicio, quod ad eum in itinere delatum erat, metuere videretur. Antonius autem eam calumniam aegre ferens, militibus edixit, ut ipsum vel adducerent, vel domum eius incenderent<sup>1</sup>: sed multis intercedentibus, qui deprecarentur, pignora cepisse<sup>2</sup> satis habuit. Ex quo, quum deinde inter se occurserent, praeteribant sine salutatione, & mutua in suspicione agebant; donec Caesar iuvenis (Octavius) Apollonia adveniens, dictatoris Caesaris hereditate adita, ambigeret cum Antonio de millies HS<sup>3</sup>, quod ex pecunia Caesaris detinebat (Antonius).

Igitur Philippus, Caesaris iuvenis vitricus, & 44 Marcellus, qui eiusdem sororem duxerat, cum ipso iuvene venere ad Ciceronem & cum eo pauci sunt, ut Cicero illi adesset eloquentia & auctoritate gerendi rem publicam<sup>4</sup> in senatu & apud populum, ille

<sup>1</sup> Ipse Cic. in Philipp. I. 5. dicit, Antonium dixisse, se cum fabris venturum ad disturbandam domum Cic.

<sup>2</sup> Quod facere solenne erat magistratibus, cum cogere vellet Senatores, ut in curiam venirent; cf. Liv. III, 38 & Cic. de Orat. III. 4.

<sup>3</sup> Consentiens cum Cic. Phil. II c. 17 & 24, Velleius II, c. 60. HS septies millies depositum a Caesare ad Aedem Copis, occupatum ab Antonio dicit. Plut. vero h. l. habet

περὶ τῶν δισχιλίων πεντακοσίων μυριαδῶν; quae fere conueniunt cum summa quatuor milie talentorum, ut idem Plut. in Antonio p. 922. habet. Quum summa haec septima tantum pars sit eius, quam Cic. & Velleius referunt, Bartonius ad Plut. nodum solvit, ita, ut hos de pecunia publica Plutarchum de privata Caesaris loqui existimet.

<sup>4</sup> Quam Plut. vocat πολιτειῶν. cf. infra c. 45 init.

Ciceronem opibus & armis tueretur. iam enim haud paucos secum adolescentulus habebat, qui sub Caesare militaverant.<sup>1</sup> Putabant vero etiam maiorem causam subesse amicitiae, qua Cicero Caesarem iuvenem lubens complexus est. Siquidem, in columbus adhuc Pompeio & Caesare, somniaverat, aliquem pueros senatorum in Capitolium accire, e quibus Iupiter unum designaret Romae Principem; cives tum spectandi causa accurrisse & templum circumfletisse; pueros autem praetextatos conseditisse tacitos; hinc foribus subito patefactis, singulos ordine ex surrexisse, & in orbem praeterisse Deum, qui omnes considerans tristes remiserit, uni huic (Octavio) ad se accedenti dexteram porrexerit his verbis: O Romani, hic finem apud vos faciet civilibus bellis, Princeps futurus. Pueri somno visi speciem, quum incognitam alias haberet, firmiter animo complexum esse Ciceronem; postridie autem, quum in campum Martium descenderit, inter obvios pueros, tum iam ab exercitatione redeuntes, primum vidisse illum, cuius imago secundum

<sup>1</sup> Secuti sumus lectionem Codd. integriorem, quam quae est vulg. Illi autem sic habent: Εδοκει δε γαρ και μειζων τις αιτια γεγονεναι, τα τον Κικερωνα αναδεξασθαι προσυμως την Καισαρος φιλιαν: Maior causa est divinitus subiecta somnio, quod refert Plut. mirorum captator. Plura eiusmodi de Augusto omina, inter se similia concessit Sueton. Aug.

c. 93. Ceterum Ciceronis veriorem de Octavio sensum, neque in eo alendo mentem aliam fuisse, quam ut eum ab Antonio seiungeret, disce ex eius ep. ad Attic. XIV, 12 & XV, 12. Et quis nescit, Philippum vitricum potius de republica, quam de privigni potentia laborasse, illoque & Cicerone invitis Octavianum Caesaris hereditatem & nomen cepisse?

quietem sibi observata sit ; nec sine admiratione visum , qui eius parentes sint , rogasse . Erat autem filius Octavii , viri non admodum clari , & Atiae , sororis Caesaris ( unde eum Caesar , liberis orbus , testamento heredem honorum suorum nominisque scripsit ) ; Ciceronem deinceps , quando in puerum incideret , accurate eum salutasse , eumque hac sua comitate plane sibi conciliasse . Etiam forte Octavio evenerat , ut nasceretur Cicerone consule .

Hae scribuntur vulgo causae . Sed veriores fuere , 45 odium in Antonium , tum animus gloriae nimium serviens <sup>1</sup> , quae eum Caesari adiangerent , sperantem , sic illius vires coniungere auctoritate sua <sup>2</sup> . ita enim illi se submiserat adolescens <sup>3</sup> , ut etiam appellaret patrem . Quare vehementer stomachans Brutus in epistolis ad Atticum , reprehendit Ciceronem , quod obmetum Antonii , Caesarem observans ostenderet , non se patriae libertatem , sed sibi dominum magis propitium quaerere <sup>4</sup> . Brutus tamen Ciceronis filium ,

<sup>1</sup> Iniquior h. l. est Plut. in Cic. quem reip. causa Octavium suscepisse , nota praeced. subindicavimus .

<sup>2</sup> Τη ( εαυτς , quod inserit Reiskius ) πολιτεια . cf. superius cap. init.

<sup>3</sup> Legimus cum doct. Tunstallo : ετω γαρ υπνει το μεγαλιον προσ αυτον .

<sup>4</sup> cf. in libr. sing. Cic. ad Brutum , ep. 17 Brutii ad Attic . Ut iam ista , quae facit , non dominationem , non , sed do-

minum Antonium timentis fint -- O magnam , stultitiam timoris , id ipsum , quod verearis , ita cavere , ut cum vitare fortasse potueris , ultro arcessas et attrahas ! -- Licet ergo patrem appellat Octavius Ciceronem , referat omnia , laudet , gratias agat : tamen illud apparet , verba rebus esse contraria . Atqui eo tendit , id agit , ad eum exitum properat vir optimus , ut sit illi Octavius propitius . Sed alii hanc

qui Athenis operam dabat philosophis, secum duxit, deditque ei praefecturam; quo ita usus est, ut multa ex sententia bello gereret. Fuit vero Ciceronis ea tempestate auctoritas Romae maxima: unde quum efficere posset, quae vellet, Antonium expulit Urbe, & tumultu decreto Hirtium & Pansam consules, qui cum bello persequerentur, emisit. Induxit quoque Senatum, ut Cæsari, velut pro patria pugnanti, lictores & prætoriam dignitatem decerneret. Superato autem Antonio quum Consulum, qui uterque occubuerant, exercitus suas vires coniunxit Caesar, timens senatus iuvenem, insigni fortuna usum, molebatur honoribus praemiisque ab eo revocare legiones, viresque eius distrahere, tanquam non amplius opus esset exercitibus ad defendendam rem publicam. Unde territus Caesar submisit certos homines, qui Ciceroni precibus persuaderent, ut Consulatum utriusque simul pararet; ipsum quippe suscipiendo & magistratu & iuvene, quem nominis tantum & gloriae cupidum facile regeret, quo vellet, omnia gesturum esse pro arbitrio. Ipse Caesar professus est, quum formidaret ruinam rerum suarum, ac desertum iri se, in tempore se abusum esse Ciceronis ambitione, eique ad consulatum petendum opes suas & gratiam pollicitum esse <sup>1</sup>.

epistolam, aequa & parem Brutì ad ipsum Cic. confictas, existimant, ab aliquo obtreclatore Ciceronis.

<sup>1</sup> Quae subiicit Plut. rumore magis nituntur, quam veritate; haud sane convenient in

Ciceronis animum, qui quamvis laudis studio teneretur nullam tamen laudem quaerebat, nisi quam re publica coniunctam crederet. Plutarchi testimonio, quamvis Dio & Apianus ei adsint, fides nuda

*Ita a iuvene senex impulsus , atque delusus ei ad- 46  
iutor exstigit petitionis Senatumque conciliavit ; sed  
statim ab amicis obiurgatus ipse paulo post sensit ,  
semper ipsum perdidisse , populique proddidisse liberta-*

*habenda est , si Ciceronis in Se-  
natu gesta hoc ipso tempore  
spectemus . Rectius ex his Velle-  
ius II , 62 colligit : Omnia ,  
antequam fugaretur Antonius ,  
honorifice a Senatu in Caesa-  
rem exercitumque decreta sunt ,  
maxime auctore Cicerone :  
sed ut recessit metus , erupit  
voluntas , protinusque Pompeianis partibus rediit animus .  
— Hoc est illud tempus , quo Ci-  
cero insito amore Pompeiana-  
rum partium , Caesarem lau-  
dandum & tollendum censebat ;  
cum aliud diceret , aliud in-  
telligi vellet . Sed cf. Cic. ad  
fam. XI , 20 & 21. Plancus  
vero de ipso consulatum petente  
Octavio ad Cic. X , 24 : Quae  
mens eum , aut quorum consi-  
lia , a tanta gloria , sibi vero  
etiam necessaria ac salutari ,  
avocant , & ad cogitationem  
consulatus bimestris summo  
cum terrore hominum et in-  
sulta cum efflagitatione trans-  
tulerint , exputare non pos-  
sum . Tandem ipse Cic. ad Bru-  
tum ep. 10 veros suos sensus  
exprimit : Sed Caesarem , meis*

consilii adhuc gubernatum ,  
praeclera ipsum indole admi-  
rabilique constantia , improbis-  
simis literis quidam fallacibus-  
que interpretibus ac nuntiis  
impulerunt in spem certissi-  
mam consulatus . Quod simul-  
atque sensi ; neque ego illum  
absentem literis monere desti-  
ti , nec accusare praesentes eius  
necessarios , qui eius cupiditati  
suffragari videbantur . nec in  
Senatu sceleratissimorum consi-  
liorum fontes aperire dubitavi  
nec vero ulla in re memini , aut  
Senatum meliorem , aut magi-  
stratus . Nunquam enim in ho-  
nore extraordinario potentis  
hominis vel potentissimi potius  
( quando quidem potentia iam  
in vi posita est et armis ) ac-  
cidit , ut nemo tribunus pl.  
nemo alio magistratu , nemo  
privatus , auctor exsisteret &c .  
Quam longe haec , & quae de  
Consulatus invasione Sueton.  
Aug. c. 26. aliquie narrant ,  
absunt a dictis Plutarchi , quem  
h. l. rumores parum cohaeren-  
tes & calumnias sparsas se-  
curum esse , manifestum ejus

tem. Quippe auctus adolescens consulari imperio, Ciceroni valedixit, Antonioque & Lepido conciliatus conianxit cum earum vi suam, imperiumque Rom. quasi possessionem aliquam cum iis est partitus. Proscripsere hi Triumviri, occidendos plus ducentos. Maximam vero contentionem Ciceronis proscriptio prae-  
buit. Antonio nullam conditionem accipere volente, nisi primus ille interficeretur, & assentiente Lepido, Caesar utriusque repugnabat. Congressus triumvirorum occultus in triduum fuit apud Bononiam, procul a castris in parva insula fluminis. Primis quidem diebus pro Ciceronis salute cum illis concertasse fertur Caesar, sed tertio die concessisse eiusque vitam prodidisse. fuitque permutatio ita facta, ut Ciceronem Caesar, L. Paullum fratrem Lepidus, L. Caesarem avunculum Antonius proscribi pateretur <sup>1</sup>. Sic ira & rabie correpti omnem humanitatis sensum mentisque consilia amisere; quin immo docuerunt, nullum homine esse immanius animal, si libido ei est cum potentia.

47 Dum haec aguntur, erat Cicero in Tusculano suo una cum Quinto fratre. Cognita vero procriptione, Asturam in maritimum Ciceronis fundum discedere, atque inde in Macedoniam ad M. Brutum transmittere constituerunt. De eius enim victoriis laetus iam rumor erat. Ferebantur lecticis confecti moerore; atque in itinere subsistentes, iunctis lecticis, inter se causum suum deplorabant. Quintus vero magis angebatur,

<sup>1</sup> Vellei. II, 66, addit: Caesar aliquem proscribere coactus est, aut ab ullo Cicerone proscriptus est.

quum subiret animum inopia omnium rerum: nihil enim secum domo extulisse dicebat. Sed & Marco per exiguum erat viaticum. Consultius igitur visum illi, Marcum fugam ante capere, se recurrere, ut domi convasaret. Quo consilio probato complexi se mutuo multisque cum lacrimis digressi sunt. Quintus non multis post diebus a servis suis proditus, missis ab Antonio percussoribus, cum filio interfactus est. Cicero Asturam delatus, navem, quam nactus ibi fuit, itlico conscendit, & oram legens Circeios usque vento pervenit. Inde solvere quum gubernatores parant, sive mare timens, sive nondum plane Caesaris fidem desperans, egressus de navi & millia passuum XIII fere pedibus Romam progressus, animi denuo pendere coepit, sententiaque mutata rursus ad mare descendit. ibique noctem gravibus & incertis cogitationibus traduxit, adeo, ut in animo haberet, Caesaris domum clam ingredi, sibique ante lares eius manus inferre, & diro hoc funere iras Deorum illi contrahere. Sed & ab ea ratione cruciatuum metu depulsus, alia rursus perturbatiore animo cogitans, servis se deportandum navigio permisit, ubi praedia habebat & iucundum aestate perfugium, quum gratissime spirarent etesiae. Est ibidem, haud procul a mari facellum Apollinis. Hinc sublatum agmen corvorum cum magno crocitu ad Ciceronis navem, dum terrae appellitur, advolabat: atque ex utraque parte antennae insedere, partim crocientes, partim rudentum capita rostris tundentes, quod dirum omen omnibus visum est. Cicero tamen egressus in villam se recepit & quieti dedit. ibi magna corvorum pars in fenestra considens tristes

ediderunt strepitus : unus vero in lectulum devolavit,  
& rostro vestem , qua Cicero tectus erat , paulatim a  
facie eius dimovit. Quo viso servi suam ipsi ignaviam  
damnantes , si manerent , donec herilis caedis specta-  
tores fierent , quum hero etiam bestiae opem ferrent  
ciusque indigno fato sollicitae essent , ipsi noni sub-  
venirent , partim precibus , partim vi , lectica ad mare  
detulerunt.

48 Interea percussores cum ministris supervenerunt , Herennius centurio & Popillius , tribunus <sup>1</sup> , quem par-  
rictidii reum olim defenderat Cicero . qui ubi fores  
clausas invenissent , eas effregerunt , quumque Cicero  
non appareret , & ii , qui intus erant , scire se , ubi  
esset , negassent , adolescentulum aiunt quendam ,  
a Cicerone liberalibus institutum literis & disciplinis ,  
Quinti fratri libertum , cui nomen Philologus  
erat , tribuno indicasse , lectica eum per consitas arbo-  
ribus & umbrosas ambulationes ad mare deferri.  
Tum tribunus paucis assumitis circum ambulationes  
ad exitum cucurrit. Herennium vero recta per easdem  
insequentem quum animadvertisset Cicero , servos lecti-  
cam eo loci ponere iussit. Ipse vero mentum sinistra  
manu , prouti consueverat , tangens , oculos intentos  
habuit percussoribus constanter , squaloribus plenis ,

<sup>1</sup> Livius epit. CXX vocat eum Popillium , legionarium militem. ( Valer. Max. V. c. 3 , n. 4. dicit Cn. Popilium Lenatem , Picenae regionis ). Appianus vero ait , Antonium post caudem Ciceronis occiso-

rem Popillium tribunatu milii-  
tum auxisse. Itaque credibile  
est , Herennium centurionem ;  
quem Plut. & Eusebius soli  
nominant , praefuisse percusso-  
rum manui.

capillo demisso & facie curis marcida, usque eo ut plerique, dum Herennius eum obtruncaret<sup>1</sup>, capita obtexerint. Cervicem ex lectica quum protendisset ad caedem, occisus est, cum annun*ī* iam LXIII ageret<sup>2</sup>. Praecidit illi Herennius, iussu Antonii, caput & manus, quibus Philippicas scriperat. Orationes enim in Antonium ipse Cicero inscripsit Philippicas, quo nomine etiam nunc appellantur.

Abscisa haec corporis membra quum Romam per-<sup>49</sup> lata essent, Antonius, qui tum forte comitia habebat, iis visis exclamavit, nunc finitam esse proscriptionem<sup>3</sup>: Caput<sup>4</sup> autem & manus pro rostris in tribunali poni iussit, spectaculum horrendum Romanis, qui non Ciceronis vultum, sed animi imaginem Antonii videre putabant. Unum tamen, si quosdam scriptores audimus, inter ista edidit aequitatis specimen, quod Pomponiae, Quinti uxori, tradidit Philologum. Haec vero eius potens facta cum aliis

<sup>1</sup> Sed Livius & Val. Max. l. c. occisum dicunt a Popillio. Eusebius in Chron. Plutarcho consentire videtur, dum Cic. in Formiano suo ab Herennio & Popillio LXIII aetatis suae anno caesum tradit. Popillius certe membra praecisa Romam detulit Antonio; cf. Senecam Contr. III. 17 & Suas. 7.

<sup>2</sup> Livius l. c. annum habet LXIII.

<sup>3</sup> Vellei. II, 64 Utrique (Ciceroni, & Canutio trib. pl.)

vindicta libertatis morte stetit: sed tribuni sanguine commissa proscriptio; Ciceronis, vel satiato Antonio poena, finita. Appiano teste Popillio non modo tribunatum dedit Antonius, sed & numeravit pro mercede HS decies centena milia, cf. Vellei. II, c. 66.

<sup>4</sup> Quod Fulviam, Antonii etiam, antequam auferretur, manibus traclasse, & conspuendo illusisse, linguam vero acubus compunxisse, refert Dio.

diris excruciaavit suppliciis, tum carnes suas ipsum praecidere paulatim, assare, dein comedere adegit. Sed ipstus Ciceronis libertus, Tiro, plane nihil de productione per Philologum scribit. Caesarem accepi longo post tempore ad quendam ex filia nepotem accessisse; hunc autem, quod volumen quoddam Ciceronis in manibus haberet, consternatum id ueste contexisse; Caesarem, qui id animadverterat, sumsisse volumen, & statim magna ex parte evolvisse, inde reddidisse puero his verbis: Doctus hic vir, mi fili, doctus fuit et patriae amans. Quum max posthaec Caesar Antonium debellaret, consul ipse collegam cooptavit filium Ciceronis; quo consule ex senatus consulto Antonii statuae deieclae, ceteri honores aboliti, decreatumque insuper, ut nemo in posterum gentis Antoniae Marci praenomen ferret. Ita Deus ulti poenam Antonii extremam reservavit Ciceronis domui.

*In partem anni 723 Cos. suffectum.*

V Itae per Plutarchum scriptae subiungimus breviarium vitae, actionum et scriptorum, ad annos Ciceronis et U. C. digestum, quale quondam Christoph. *Heidmannus*, Prof. Helmstadiensis, tanquam indicem aliquem *historiae Ciceronis per Franc. Fabricium* scriptae, eique an. 1620 denuo a se editae, adstruxit. Atque cum id et ad supplendam Plutarchinam scriptionem, et ad cognoscendos scriptorum Cic. etiam orationum, et epistolarum, praesertim ad Atticum, Brutum et Q. fratrem, annos opportunum sit; nostrum duximus, in eum ad Plutarchinam scriptionem accommodando, tum corrigendo et augendo nostram curam admisere Heidmannianae. Editio Londinensis operum Cic. 1681 ex eaque Berolinensis 1747 praemissum habent aliud eiusmodi breviarium, longe quidem brevius, sed et parum accurate ad annos ( non 64, sed 63 ) Ciceronis digestum.

## B R E V I A R I U M

## VITAE, ACTIONUM ET SCRIPTORUM CICERONIS.

*An. mundi*

*3876.* **N**ATUS est *M. Tullius Cicero* III Non. Ian.  
*An. U. C.* votis ipsis, matre Helvia, patre Arpinate; Plut.  
*Cat.* 647, *Varr.* 648. c. 1. Eodem anno natus quoque Pompeius Prid.  
*Aet. 1.* Kal. Oct.

— 5 Archia poeta Romam venit; quo praceptorē post usus Cicero.

Ciceronis ingenium elucescit & honoratur.

Poema *Pontius Glaucus* versibus tetrametris puer componit. Plut. c. 2.

*c. 663* 16 Toga pura sumta.

— 17 Exercet se legendō, scribendo, commentando, dicendo.

Arati carmina de coelo stellisque convertit (de Nat. Deor. II, 41) quorum fragmenta exstant.

— 18 *Marium*, tragicum carmen, scribit. de Legg. I, 1 & de Div. I, 47.

— 19 Iuri civili operam dat, & assiduus est apud Q. Mucium Scaevolam augurem (Lael. I). militat, Sullae legatus, bello Marsico; Phil. 3.

— 20 Philonem Academicum Romae audit, & philosophiae studet acerrime. Scaevola augure mortuo ad Mucium Scaevolam pontificem transit, atque in studio iuris se confirmat; Plut. c. 3. & Cic. in Bruto c. 89 & Lael. c. 1.

— 21 — 23 Apollonio Moloni, Rhodio, rhetori & oratori operam dat, Romae. de *Inventione* commentarios rhetoricos inchoatos & rudes edit; de Or. 1.

Triennio, quo fuit urbs sine armis, in omnium doctrinarum meditatione versatur, dialecticis in primis exercetur a Diodoto Stoico; declamat quotidie, cum Latine, tum Graece; Cic. in Bruto c. 90. Xenophontis *Oeconomicum* latinum facit; Cic.

*An. Aet.* de offic. II, 24 extr. item forsan Platonica quae-  
dam; Quint. X, 5.

— 26 Ad causas & publicas & privatas adire coepit;  
Cic. in Brut. c. 90. causam privatam pro *Quintio*  
dicit. Gell. XV, 28. Moloni iterum operam dat.

*679 u.c.* 27 Primam causam publicam dicit pro *Sexto Roscio Amerino*, eumque contra Chrysogonum, Sul-  
lae libertum, & ipsam Dictatoris potentiam de-  
fendit; in Bruto l. c. & Plut. c. 3.

— 28 Ob habitum corporis parum firmum, forsan  
etiam metu Sullaë, in Graeciam profectus, Athe-  
nis Antiochum Ascalonitam, ex Academico Sto-  
cum, & Phaedrum atque Zenonem, Epicureos,  
audit; Plut. c. 4.

— 29 Sulla mortuo, precibus amicorum, & cohore-  
tatione Antiochi philosophi, ut remp. capesseret,  
motus, dicendi facultatem studiosissim denuo exer-  
cet apud Demetrium Syrum, post Asia peragrata  
cum Menippo Stratonicensi, oratore tota Asia  
disertissimo, Dionysio Magnete, Aeschylo Cni-  
dio, Xenocle Adramyteno, rhetoribus, tum Rho-  
di rursus se applicat ad Apollonium Molonem,  
& Posidonium audit; in Bruto c. 91. Plut. c. 4.  
Strabo L. XIII & XIV.

— 30 E Graecia domum redit exercitatio & prope  
mutatus, magna spe; sed oraculo repressus timide  
remp. attingit; unde *graeculus atque otiosus* ap-  
pellatur. Pronuntiationem & gestum conformat,  
magistris Roscio Comoedo, & Aesopo Tragico;  
Plut. c. 5. aemulus fit Hortensii.

— 31 Quaesturam petit, & accipit volente populo,  
cum causas nobiles egisset, interque eas illam pro  
*Q. Roscio Comoedo*, quae hodieque exstat.

— 32 *Quaeftor* Lilybetanus in Sicilia omnibus se pro-  
bare, & de civibus suis bene mereri studet. No-  
biles adolescentes apud Praetorem Siciliae ( Sex-

An. Aet. tum Pedicaceum ) defendit; Plut. c. 6.

— 33 E Sicilia, oratione Lilybaei habita, ( teste Asconio ) decedens omnia a Romanis sperat, sed se falsum pulchre in itinere discit. Romam venit eloquentia, ut videbatur, iam matura; Brut. c. 92 COSS. tum Romae erant L. Lic. *Lucullus*, & M. Aur. *Cotta*; & *Verres* praetor urbanus.

*a.u. 689.* — 37 Post quaesturam in plurimis causis & in principibus patronis quinquennium fere versatus, hoc magis in admiratione fuit, quod ab iis, quorum causas agebat, nulla dona aut munera, ( auctore Plut. c. 7 ) accipiebat, mediocri sua fortuna contentus. Designatus Aedilis curulis, reie<sup>c</sup>to Caecilio Nigro, in iudicium vocat *Verrem*, qui ex praetura Siciliam per triennium tenuerat, & crudeliter in ea versatus erat. In hoc iudicio fatigavit Hortensium; Plut. c. 7. Verrina III convictus Verres sua sponte in exsilio discedit. Reliquas Verrinas V Cicero non dixit, sed domi scriptas edidit; teste Asconio.

— 38 *Aedilis* Cicero ludos populo facit; pro *Fonteio* & *A. Caecina* dicit, ut fert opinio.

— 40 Praeturae candidatus designatur primo loco; Plut. c. 9. ad Attic. I, ep. 8 & 9 scripta.

*a.u. 687.* — 41 *Praetor* iudicia integerrime exercet; *Licinium Macrum*, hominem potentem, damnat; Plut. l. c. *Legem Maniliam* suadet; pro *Cluentio* dicit; pro *M. Fundano* item, & *Q. Gallio*, ut vult *Sigon*. Scholam *M. Antonii Grifonis* frequentat ( auctore Suet. de ill. Gramm. ); *P. Vatinium*, patronum asperum, acri dicto pungit, quod refert Plut. c. 9. *Manilio*, *Pompeii amico*, accusato diem pententi dat unum, qui praeturae supererat; idque factum suum, in concionem productus, populo approbat; Plut. l. c. ad Attic. I, ep. 3.

— 42 Omessa provincia prensat consulatum. pro *C.*

*An. Aet.* Cornelio quatriduo dicit; ad Attic. I, ep. 1.

— 43 Filius *Marcus* nascitur ex Terentia; ad Attic. I, ep. 2. Consulatum petit. Competitores fuere sex, in iisque duo patricii, *P. Galba*, vir optimus, & *L. Catilina*, homo improbissimus. Orationem in toga candida habet, cuius fragm. apud Asconium exstant; Quint. III, 9. Consul designatur magno populi studio, cum *C. Antonio*; Plut. c. 10 sq. *Q. Gallium*, ambitus reum, defendisse videtur ex Ascon. *Tulliam* filiam despondet *C. Pisoni L. F. Frugi*; ad Attic. I, ep. 2.

— 44 *Consulatum* init difficili reip. tempore (Plut. c. An. U. C. 11) propter molitiones tribunicias & *C. Antonii*

690. collegae sui. *Orationes XII*, quas ipse *consulares*

*Varr. 691.* vocat ad Attic. II, ep. 1, habet: quarum I & II

*legem agrariam* evertit (Plut. c. 12); III tumultum plebis & equitum in theatro ortum ob Legem

theatralem sedat, eiusque auctorem, *Othonem*, in

gratiam populi reducit (Plut. c. 13); IV *Rabirium*,

perduellionis reum, defendit; V *proscriptorum* filios ab honorum petitione repellit; VI *provinciae* sibi decretam, cum Antonio collegae

Macedoniam concessisset, *Galliam in concione deponit*.

Refert legem de ambitu; quam *Catilina* contra se latam putans, *Ciceronem* occidere parat,

ut ipse consul fieret. Quem contra rempublicam molientem desert ad *Senatum*, & interrogat;

tum armatus SCto illo nobili descendit ad *Comitia*, tectus lorica & praesidio. *Catilinam* iterum repellit a *consulatu*; Plut. c. 14. Dein insidiis domi sua appetitus, sed monitus a *Fulvia*,

& literis acceptis, quibus *Crassus* aliique monebantur, ut evaderent pericula *Urbi* futura (Plut. c. 15); *Senatum* in aedem *Statoris* vocat. quo

cum ipse quoque venisset *Catilina*, habet *Cicero* *Catilinariam I*, *consularium VII*, qua eum ex

*An. Aet.* Urbe emisit. VIII habet ad populum postridie quam Catilina profugit. quo profecto ad Manlium in castra, uterque hostes iudicati, decreatumque, ut eos Antonius bello persequatur, Consul Urbi esset praefidio; Plut. c. 16. *L. Murrenam*, cos. des. ambitus reum, defendit. Lentuli Surae consilia contra patriam indagat; Plut. c. 17. Allobrogum legatos, quos coniurati particeps illorum fecerant, sibi conciliat, & discedentes cum T. Vulturcio & literis ad Catil. deprehendit; Plut. c. 18. Tum principes coniurationis ad se vocat, & Senatum in aedem Concordiae; ubi coniuratio tota detegitur, eiusque auctores, qui Romae erant, in custodiam traduntur. Supplicatio decernitur Ciceroni cos. togato, qui populo ea omnia exponit, & haec est consularis IX in concione, quo die *Allobroges involgarunt*; Plut. c. 19. De coniuratis refert in Senatu; & cum Caesaris iniorem sententiam vicisset severior Catonis, & ipse Cicero habuisset consularem X, ex SCto supplicium de iis sumit *Nonis Decembr.* Honores summi ob id meritum Ciceroni habentur, qui *pater patriae* dicitur; Plut. c. 20-22. Legem quoque tulit de legationibus liberis, ne, sicut antea, infinitum, sed annum earum tempus esset; Cic. de Legg. III. Consulatum Ciceronis, a bonis viris laudatum, alii exagitare conantur, in iisque tribuni pl. novitii, praesertim Q. Metellus Nepos, cui tamen animose resistit; & ab illo dicere prohibitus, cum consulatu abiret, iuramentum novum iuravit, *Remp. & Urbem sua unius opera esse salvam*: idque populo iurato approbatum est; Plut. c. 23. ad Attic. I, ep. 16 scripta. Anno hoc natus est Octavius.

*An. Aet.* & simul facetiis multos offendit; sed tamen auctoritate tum fuit summa; Plut. c. 24--27. Metello tr. pl. eum ad populum calumnianti, fortiter repugnat, scripta etiam *Oratione Metellina*; ad Attic. I, ep. 10 & III, ep. 13 & ad fam. V, ep. 1 & 2. *P. Sullam*, coniurationis reum, defendit. Domum in Palatio emit (Gell. XII, 12. Cic. ad Attic. I, 10) concessa fratri domo paterna; Plut. c. 8. extr. *Atque ab hoc tempore incipiunt Epp. M. Cic. quae ad familiares s. diversos vocantur: quarum aliquot hoc anno scriptae. Tempora illarum notavit Ad. Theod. Siberus in sua ed. qui ordo chronol. a recentioribus editi. adiungi confuevit.*

— 46 In Clodium, de sacris violatis accusatum, *Ciceron* testimonium dicit; unde ei orta cum illo contentio; Plut. c. 28 sq. Pro *Archia* dicit hoc aut superiore anno. hoc quoque anno frater *Q. Ciceron*, praetor, Asiam fortitur, eamque dein per triennium obtinet; ad Attic. I, ep. 10 & 14.

— 47 Commentarium de *consulatu suo*, graece scriptum, ad Atticum & Posidonium mittit; ad Attic. I, ep. 16 & II, ep. 14. Scribit de eodem versibus *libros III*; ad Attic. I, ep. 6 & II, ep. 3. De *Prognosticis*, quae Atticum exspectare inbet II, ep. 1 res est ambigua. Scripsit quoque hoc anno I, 15 sq. & lib. II ep.

— 48 *C. Antonium* defendit, itemque *A. Thermum* bis; & *L. Valerium Flaccum*. Caesar cupit Ciceronem esse in numero XX virorum de agro Campano plebi lege Iulia dividendo; sed is locum repudiavit. Cum vero Clodius oppugnatum iret Ciceronem, legationem Caesaris in Gailiam ituri primum accipit, mox Clodio reconciliationis cupidinem simulante, eandem renuntiat. unde iratus Caesar Clodium corroborat & Pompeium a

*An. Act. Cic.* alienat. Tum Clodius tr. pl. factus in *Cic.* se convertit; *Plut. c. 30.* Hoc anno pulcherrima ep. 1 ad *Q.* fratrem cum sequente scripta; itemque ad *Attic. II*, 4 cum multis sqq.

— 49 *Annus funestus Ciceroni, L. Calp. Pisone Cae-*  
*A. U. C. sonino & A. Gabinio Coss.* Paetus enim cum his

*695. Clodius tr. pl. legem tulit, qui civem Rom. indem-*  
*Varr. 696. natum interemisset; ei aqua & igni interdiceretur,*

qua cum se unum peti videret Cicero, vestem mutat & populo supplicat; idemque faciunt equites. Senatus ne faciat, a Coss. & Clodio prohibetur. Igitur furoribus Clodianis cedens, cum praefidio ab amicis accepto Urbe exit, Lucaniā percurrit, Siciliam petiturus; *Plut. c. 31.* Tum Clodius sciscit ei exsiliū edictumque proponit, ne intra 500 millia passuum recipetur, hinc ille a Sicilia exclusus Dyrrachium petit, inde Thessaloniam; sed quamvis ab aliis amicis & civitatibus Graecis officiose coleretur, animo molliori exsiliū fert; *Plut. c. 32.* *Q.* Cicero ex Asia decedit, Clodius villas Ciceronis inflammat, & Romae domum, in cuius area templum Libertatis exstruit. his peractis vellicat quoque acta Pompeii; quo favente & adiuvante Senatus frequens decernit, ut de nulla ante re ageretur, quam de Ciceronis reditu latum esset; *Plut. c. 33.* Tribuni pl. legem promulgant & referunt eadem de re. Thessalonica Dyrrachium se recepit Cicero. Roma vero exierunt paludati Coss. Piso in Macedonia, Gabinius in Syriam, ad Attic. I, ep. 3 & 4. III, 5, 6, 7, 8 sqq. ad Terentiam aliquot priores. *L. XV* ad fam.

— 50 Agitur in Senatu de Ciceronis reditu; quem Clodiani caedibus intercludere conantur. Tribuni pl. vulnerantur, & *Q.* Cicero inter cadavera latet. Milo tr. pl. Clodium de vi in iudicium frustra

*An Aet.* vocans, vim in subsidium advocat. Itaque Pompeio suadente & post SC. de salute Cic. factum, lata a Lentulo Cos. lex de Cic. reditu summo consensu omnium centuriarum accipitur. Cicero Non. Sext. ipso die natali filiae suae, in Italiam redux Brundisio iter facit Romam magna celebritate & gratulatione omnium; quasi Italiae humeris reportatur Romam, ibique incredibili populi studio excipitur, pridie Non. Sept. Plut. c. 33. Orationes post reditum habet in Senatu, ad Quirites, pro domo. Is etiam decernit Pompeio potestatem rei frumentariae in toto orbe per quinquennium; unusque ex Pomp. legatis fit Q. Cic. in Sardinia. ad Attic. IV, 1, 3, 4. ad Q. fratrem II, 1 scriptae.

51 Acta Clodiana rescindit, cum offensione Catonis; Plut. c. 34. Tulliam filiam, cum eluxisset Pisonem anno priori mortuum, despontet *Furio Crassipedi*; ep. ad Q. fratrem II, 5. Orationem de rege Ptolemaeo, cuius apud veteres fit mentio, habet ineunte anno, cum regis restitutionem P. Lentulo decerneret. P. Sextium defendit & Vatinium accusat; pro Bestia dicit; de haruspicum responsis disputat; de provinciis Consularibus sententiam dicit; pro Corn. Balbo ac pro Coelio. ad Q. fratrem II, ep. 2—10. ad Attic. IV, 5—8. ad Lentulum L. I famil.

52 Scripsit libros III de Oratore; cf. prooem. L. II & ad Attic. IV, 12; ad fam. I. ep. 9, 73. Orat. in Pisonem dicit.

53 Scribit libros sex de republica s. de optimo statu civitatis; quos simul ac editi erant, avide se legisse dicit Coelius ad Cic. VIII, ep. 1. & ipse Cic. in libr. de legibus saepe respicit. Causis multis distinetur; ad frat. II, 15. Defendit Cn. Plancium, ambitus reuin, & C. Rabirium Postumum. Scriptae ad Q. fratrem II, 11—15 & ult. III, 5

*An. Aet.* sqq. omnes in Britanniam missae; ad Attic. IV, 13 & sqq. a fam. L. I, ep. longa ad Lentulum; V, 8 & 9; VII, 5, & ad Trebatium 6-10.

— 54 Cicero fit *Augur* in locum P. Crassi iun. competitore Hirro. Scriptae ad fam. II, ep. 1 & 5 ac sqq. ad Curionem.

— 55 Clodium occidit T. Ann. Milo, quem defendit Cicero. M. Saufeius, defendante Cic. & M. Coelio, absolvitur; sed T. Munatius Plancus Bursa a Cic. accusatus, a Pompeio defensus, damnatur. L. VII ad fam. ep. 2. hoc anno fингitur habitus sermo de finibus bon. & mal. quem postea L. V perscripsit. Scripsit etiam *de legibus*, certe post Clodii caedem, ut ex lib. II cognoscitur.

— 56 Cicero Ciliciam provinciam consl. cum exercitu fortitur, Appio Claudio successurus, itinere per Italiam & Graeciam facto venit in Asiam, Ephesum, Tralles & mox Laodiceam, inde in castra ad Iconium Lycaoniae, quo tempore Cassius quaestor M. Crassi ante adventum Bibuli Syriam a Parthorum impetu liberat. Cic. vero Ariobarzanem iun. regem Cappadociae praesentibus insidiis liberat; deinde iter in Ciliciam faciens Tarsum venit, indeque contra hostes perpetuos in Amano monte prosector, eos a d. III Id. Octobr. caedit, & *Imperator* appellatur; Plut. c. 36. castra apud Issum habet, quae olim Alexander. Pindenifsum capit. Multae hoc anno scriptae epp. ad fam. quae ap. Siberum videantur, & quae L. V ad Attic. continentur.

— 57 Supplicationes Ciceroni Romae decernuntur; Ipse provinciam integerrime obire pergens Tarsus abit in dioeceses Asiaticas. Tullia filia vidua nubit P. Corn. Dolabellae. Cicero quaestore C. Caelio provinciae praeposito a d. III Kal. Sextil. decedit in Graeciam. Rhodum appellit. Athenis commo-

*An. Aet.* ratur. Tironem patris aegrotantem relinquit : ipse Brundisium venit & Romam pergit ; Plut. l. c. L. V ad Attic. ep. ult. L. VI, 1, 2, 4, 6 & L. VII priores octo. Ad fam. L. II & III aliquot ad Coelium & Appium L. XVI. plures ad Tironem ; neque pauca ex reliquis libris.

— 58 Ad Urbem veniens prid. Non. Ian. honorifice excipitur ; sed in ipsam flammatum belli civilis incidit ; ad fam. XVI, 10. Kal. enim Ian. Q. Metelli Scip. sententiam factum erat SC. uti ante certam diem Caesar exercitum dimitteret. Si non faceret, eum adversus Remp. facturum videri. cui cum intercessissent M. Antonius & Q. Cassius tr. pl. Senatus magistratibus negotium dedit, ut curarent, ne quid Resp. detrimenti caperet. Ant. & Cass. cum Curione ex Urbe fugiunt. Cicero quidem est utriusque parti auctor pacis, (quod profitetur ad fam. XVI, 11 & in Oratt. pro Marc. Lig. & Deiot. item ad fam. IV, 6; VII, 3. cf. Plut. c. 37) sed frustra. Itaque descriptae Italiae regiones, quam quisque partem tueretur : Cicero Capuam sumit, ab Urbe discedit, *επικόνοτος* orae maritimae a Formiis, quum coiff. atque optimates omnes Urbe reliquissent. Evocatur deinde literis Pompeii in Apuliam; mox Brundisium, quo itinere Cic. & Caesarem convenit ; ad Attic. IX, 21. In villas suas recedit. Arpini filio togam puram dat. Profecto Caesare in Hisp. Cicero ad Pompeium navigat in Graeciam ; Plut. c. 38. A Catone propterea reprehenditur. Itaque & cum ibi vidisset multa vita, poenitit venisse ; ad fam. VII, 3. Caesar Hispania potitus a M. Lepido praetore *dictator* dictus. Huc referenda Epp. ad Attic. VII, 9, 10 & sqq. huius ac duorum proximorum librorum.

— 59 Caesar Brundisio in Epirum contra Pompeium traxit. Cicero e Graecia primum, dein ex castris

*An. Aet.* scribit ad Attic. X, epp. 2, 3 & sqq. Praefatio Pharsalico non interest. Cato, qui copias & classem habebat Dyrrachii, imperium & copias offert Ciceroni, ut consulari; sed ipse recusat magno suo periculo. Romam, certe in Italiam contendit. Brundisii Caesarem exspectat (Plut. c. 39); neque Antonium inimicum experitur. Tulliae morbo affligitur. Epp. ad Attic. XI, priores octo missae.

— 60 Tullia ad patrem venit Brundisium. *Caesar* dignitatem ei suam, datis ex Aegypto literis, conservat; in Italiam adveniens occurrit sibi *Ciceronem comiter excipit. Redit in Urbem & cum libris in gratiam*; ad fam. IX, 1 & Plut. c. 39. ad Attic. L. XI ep. 10 & sqq. missae.

— 61 Romae vivit & in villis. conquiescit in studiis; Plut. c. 40. Scribit *Partitiones Oratorias*, & *Brutum s. de claris Oratoribus*. A Caesare ornatur. Scribit *Catonem*, cui Caesar opponit *Anticatonem*, sed cum Cic. laudibus; Plut. c. 39. Cicero scribit *Oratorem*; gratias Caesari agit de *Marcello*; & pro *Ligario* apud eundem agit feliciter. Divortium facit cum Terentia, quod domum Cic. exinaniverat; Plut. c. 41. Vitam Terentia dein produxit ad CIII annum (Val. Max. VIII, 14) L. XII ad Attic. epp. priores.

— 62 Virginem *Publiliam* (al. *Popiliam*) uxorem dicit, cuius opibus aes alienum dissolveret; ad fam. IV, 14. Filiam Tulliam amittit, quae ex partu decesserat; hinc moeret nimium Cicero, ad quem consolandum philosophi confluunt, & amici literas mittunt M. Brutus, Ser. Sulpicius, L. Lucceius, C. Caesar. Ipse quoque scribendo librum *de consolatione* se consolatur. Publiliae, morte Tulliae laetari visae, nuntium remittit; Plut. c. 41. (Ea dein, non quod alii volunt, vetula Terentia, Vi-

*An. Aet.* bio Russo nupsisse videtur ). Domo abest & in villis suis Philosophiae operatur. Scribit *Hortensium*: tum *Academicos libros IV, & V de finibus*; *laudationem Porciae*. Filium Athenas mittit. *Pro Deiotaro* apud Caesarem dicit. Pleraeque Epp. L. XII & XIII ad Attic. scriptae. ad Brutum ep. 9. Hoc anno vel sq. scribit *Quaest. Tuscul. L. V.*

— 63 Romae est initio anni; sed coniurationis in Caesarem particeps non est: quamquam a M. Antonio, ut conscius, arguitur. Caesare imperfecto [Idibus Mart.] in Capitolium cum aliis adscendit, neque adduci potest, ut ad Antonium eat. Liberalibus i. e. XVI Kalend. April. in aede Telluris, quod in ipso est, fundamenta pacis iacit; sed ea effectu caruere; Plut. c. 42. Post Brutum & Cassium ipse quoque ex Urbe discedit, & villas suas lustrat. Scribit libros III de natura Deorum; duos de *Divinatione* & dial. de *Seneftute* s. *Catonem maiorem*; mox *Laelium* s. de *amicitia*. Dolabellae factum de eversa Caesaris ara s. columna valde probat. C. Octavianum mense Apr. ruri secum habet, qui tum praeter sententiam matris & vitrici hereditatem Caesaris avunculi adit: Hirtium quoque cos. des. in Puteolano; ubi sermo de *Fato* habitus, forte & *Timaeus Platonis* conversus. Sub finem Maii Romain versus proficiscitur, neque tamen in Urbem pergit, nisi post aliquot menses, ut videtur. *De Officiis* scribere instituit libros, quos post redditum e cursu Achaico absolvit. Antonium scil. vitandi causa iter in Graeciam ingreditur. Inter navigandum sine libris *Topica* ad Trebatium scribit. *De gloria* duos [qui deperditi hodie] iam ante ad Atticum miserat. Syracusas in Siciliam transgressus, in Graeciam traiicere frustra nititur; reiicitur enim adversantibus ventis ad Leucopetram, promontorium Reginorum. Auditio ibi, Antonium immu-

*An. Aet.* tatum omnia ex Sen. auctoritate agere, ac desiderari ipsius praesentiam, festinantius Romam contendit. Ibi incredibili studio & gratulatione populi excipitur; sed Antonio in Senatum vocanti excusat languorem; quod ille ira amens aegre & impatienter fert; Plut. c. 43. Postridie in Senatu satis libere loquitur, habita *Philippica I.* Antonius ei inimicietas denuntiat, inque Tiburtino Scipionis de eo declamat; in Senatu etiam XIII Kal. Oct. in absentiam invicitur. Ciceroni autem in Senatum venire eupienti per amicos non licet; respondet tamen Antonio, *Philippica II.*, nobili illa & divina, ut Iuvenalis ait, scripta quasi in praesentem. Rusticatur deinde & perficit libros *de Officiis*. Forte etiam *Paradoxa* scribit hoc tempore. Quum Antonius Urbe excessisset, Romain redit V Id. Dec. & XIV Kal. Ian. vocatu tribunorum pl. in senatum venit, sententiamque dicit, quae est *Philippica III.* Mox populo in concione exponit, quid in Senatu actum sit, *Philippica IV.* Epp. pleraeque lib. XIV. & XV; quaedam etiam L. XVI ad Att. scriptae.

64 Cicero amplectitur C. Octavium, iam tum po-  
*An. U. C.* tentem, quo uteretur adversus Antonium; pugnat-  
 q10 l. 611. que in Senatu, ut Antonius hostis iudicaretur, &  
*An. mundi* eius adversariis honores decernit, *Philippica V*;  
 3940. Plut. c. 44 & 45. SCtum de legatis ad Ant. mittendis populo in concione exponit *Philippica VI*. In Senatu pacem cum Antonio dissuadet *Philippica VII*. In Q. Fufium Calenum invehitur & disputat contra alios, qui *tumultus* noten, non *belli*, in sententia ponendum censuerant, *Philippica VIII*. Ser. Sulpicio, in legatione ad Antonium mortuo, statuam aeneam pedestrem in Rostris ponendam decernit *Philippica IX*. Cicero filius apud Brutum militans rem bene gerit, eique legio Pisonis se tradit. M. Cic. pater Calenum

*An. Aet.* oppugnat *Philippica X.* Cicero filius C. Antonium proelio victum in M. Bruti potestatem redigit. Cicero pater bellum contra Dolabellam C. Cassio decernit *Philippica XI.* Minerva, quam Cic. pridie quam in exsilio iret, ante cellam Minervae posuerat, turbinis vi deiecta & fracta, ex SC. Quinquatribus facto, restituitur. Legationem sibi ad M. Ant. decretam dissuadet *Philippica XII.* Pacem cum Antonio & Antonia- nis esse non posse, demonstrat *Philippica XIII.* Calumnia appetitur, quasi ipse fasces appeteret; quam diluere P. Apuleius tri pl. studet; et si nihil necesse erat. Populus enim universus testimonium integritati eius & amori in patriam perhibet. Nuntiata mox victoria Mutinensi [a. d. XVIII Kal. Maii] concursus ad enim mirificus populi fit: a quo in Capitolum maximo clamore & plausu deductus atque in rostris collocatus, domum reducitur. Supplicationem L dierum trium Imperatorum [Hirtii, Pansa & Octavii] nomine decernit *Philippica XIV.* Quum uterque Coss. Hirtius in praelio, Pansa ex vulnere obiissent, rumor it, de Cicerone Coss. facto, [ad Brut. ep. 8. & Plut. c. 45] sed falsus fuit. Cicero hortatur D. Brutum & L. Plancum, ut bello Antonium persequantur. legatis vero exercitus nomine impudenter in Senatu consulatum Octavio depositentibus, in iisque Centurione, ostensio gladii capulo, dicente, *hic faciet, si non feceritis vos;* libere respondet Cic. *Si ita Consulatum petieritis, eum accipiet;* Suet. in Oct. c. 26 & Dio L. 46. Octavius tum ad Urbem movet. ad eum venit Cic. in castra; sed paulo post ex Urbe fugit. Octavius X Kal. Oct. cum Q. Pedio Consul fit, & facta cum Antonio & Lepido triumvirali pactione valere iubet Ciceronem; ob cuius proscriptionem contentio Triumvorum. Antonius eum

*An. Aet.* perditum vult ; Lepidus accedit. Octavius per biduum repugnat; sed tertio die cedens , salutem Ciceronis deserit; Plut. c. 46. qui quum sub adventum Triumvirorum Urbe cessisset, tum in Tusculano agens cum fratre Quinto , certior de sua utriusque proscriptione , primo cum fratre fugit , dein cum hic viatici causa rediret, ab eo digressus miserabiliter, Astyram , villam suam , petit , marique fugam tentat; sed frustra. Interea Q. frater cum filio occisi. M. autem Ciceroni , multum fluctuanti tristiaque cogitanti eveniunt portenta infausta in villa Caietana. Servi quidem fideles , eum eripere gestientes , ad mare portant in lectica , Plut. c. 47. Sed superveniunt percussores , quorum ducibus nefariis Popillio Laenati tribuno , & Herennio Centurioni , Philologus ingratus , Q. Cic. libertus , iter Marci indicat. Herennium quum instare sibi sensisset Cicero , animo constanti servos lecticam ponere iubet , & immotam cervicem extra lecticam praebet praecidendam. Sic trucidatur *patriae parens* VII Id. Dec. Caput & manus praeciduntur , Antonio afferenda; Plut. c. 48. Quae membra ubi Romam allata , Antonius improbe laetus , iamque finitam proscriptionem dicens , illa poni iubet in Rostris , horrendum Romanis spectaculum ; Plut. c. 49. Vixit vero annos LXIII , menses XI , dies V , five annos LXIV , minus XXVI diebus ; victurus per omnium seculorum memoriam ; cf. Vellei. II , 66 *elogium Ciceronis*. Filius ipsi superstes M. T. Cicero an. U. C. 723 Cos. suffectus ex Id. Sept. consulatum gessit cum Augusto , in eoque auctor fuit , ut statuae , imagines , ornamenta M. Antonii omnia disiicerentur , fanciaturque edicto , ut ex Antoniana familia nemo Marcus nominaretur; Plut. c. 49 & Plin. hist. nat. XXII , 6.

# INDEX EDITIONUM CORPORIS TULLIANI

Auctior illis, quos exhibent Fabricius in  
Bibliotheca Latina & Ernestius in Sect. II praef.  
ad Cic. opp. a se an. 1774 edita Tom. I,  
secundum aetates digestus.

*AETAS I natalis 1467-98-1519*  
 refertur fere ad duum viros artis typographicae in  
 Italia, Conradum *Sweinhemium* & Arnoldum *Pannerz*, utrumque Germanum, qui artem suam pri-  
 mum in monasterio Sublacensi, deinde Romae exer-  
 cuere ab an. CCCCCCLXVII. Quamvis vero his  
 non principio fuerit consilium, ut unum corpus  
 operum Tullianorum facerent, edidere tamen om-  
 nes Ciceronis libros, praeter eos, qui sunt *de In-  
 ventione* (priuum cum illis *ad Herennium* editi Vene-  
 tiis 1470 fol. per Nic. Ienson). In monasterio qui-  
 dem Sublacensi ediderunt libros *de Oratore* & Epp.  
 ad fam. ceteros Romae: neque tamen omnes eadem  
 formae magnitudine; quorum indicem Io. Andreas,  
 Aleriensis Episcopus, epistolae ad Xystum IV (Six-  
 tum IV Papam) an. 1472 datae et T. I. Bibliorum  
 cum glossis Nic. de Lyrae praemissae subiunxit, in-  
 deque excerpte Maettarius T. I., Ann. Typogr. et  
 I. A. Fabricius Biblioth. lat. T. III. edit. Ern. ad cal-  
 cem notitiae typogr. p. 562-566.

¶ *Epp. ad Famil. 1467, ad Atticum 1470, de Ora-  
 tore cum ceteris 1471, Opp. omnia in philosophia  
 1469, Oratt. cum invectivis in Ant. Verrem, Catil.  
 et ceteros 1471.*

*Sed primus omnium proprie corpus fecit Alex.*

*MINUCIANUS*, Professor Mediolan. ex cuius officina prodiere

- 2 *Opera Cic. Mediol.* 1498 et 99 voll. IV formae maxima. Is vero, singulorum librorum exempla prius edita fecutus, non omnes ad ordinem temporis edidit, sed prouti vetustiora exempla nactus esset.
- 3 *Ascensiana I* *Paris.* ap. Badium 1511 et 1512 fol. repetitio fere est prioris: a qua, teste clar. Ernestio, in paucissimis abit; quamvis eius corrector Ger. *Vercellanus* multa mutata dixerit de iudicio Guil. *Budaei*, itemque Guil. *Maini*, praceptoris puerorum Budaei. In margine Varr. lect. undecunque ductae, nominatim *Becichemi* Scodrensis in Rhetor. coniecturae annotatae sunt.

*AETAS II* Aldino - Basiliensis 1519-1537; qua primum MSS. conferri coepere.

*ALDUS* avus in praef. ad epp. ad Atticum 1513 receperat, se omnia Ciceronis reliqua editurum sic emendata, ut pauca in iis desiderari possent: idque exequi cooperat a. 1514, edito Rheticorum volumine Venet. in aed. Aldi et Andreae soceri, quarta forma. Sed mors eius 1515 infecuta irritum fecit consilium. quod cum dein repetiisset socer, Andreas Asulanus, negotium mandavit Andreae *Naugero*. Is quidem in quibusdam libris textum meliorem fecit: sed in aliis lectiones minus hodie probatas induxit; neque satis curavit, ut operarum vitiis immunis esset editio, quae ex offic. Aldina ab an. 1519 ad 1523 prodiit. Fama vero officinae fecit, ut huic editioni, cuius pagg. fecutus quoque est Marius *Nizolius* in Lexico Ciceroniano an. 1535 edito, mox principatus tribueretur. hinc eam fecutae aliae, sed Basilienses Cratan-

dri et Hervagii bonitate sua superarunt.

- 4 *ALDINA I s. Naugeriana* Venetiis in aedibus Aldi et Andreae Asulanii socii 1519-23, 8. A. 1519 prodiere Oratt. voll. 3. epp. 1521. philds. quorum ultimum volumen nobis ad manus est 1523. Ad haec 9 voll. accessit ex eadem officie. an. 1522 *Asconii Padiani Expositio* in aliquot oratt. *Victorini* comm. in Cic. de Inv. et Ge. *Trapezuntii* in Or. pro Ligario Vol. 1, 8.
- 5 *Ascensiana II* Paris. 1522 fol. Aldinam secuta prioris exempli lectr. in margine servavit.
- 6 *Basiliensis I* Andr. *CRATANDRI*, 1528, 3 voll. fol. quae basin fecit Aldinam, eiusque in *Oratt.* recepit ordinem, sed in *Rheticis* veterem Badii retinens, *Topica et Partitiones* praemisit libris de *Oratore*. Ceterum multis Aldinam vincit novis bonis, quae in eam contulit Mich. *Bentinus*, in ipsa hac cura mortuus. Is ex vetustioribus Codd. in quibus et Palatini fuere, textum pluribus locis meliorem dedit, Orationes quasdam pleniores fecit, varias lectiones in margine adnotavit, excerpta e priscis et recentt. scriptt. ad interpretationem locorum difficultium praemisit, addiditque Indices copiosos.
- 7 *Basiliensis II* Io. *HERVAGII* 1534, 4 tomis 2 voll. fol. max. priori splendidior. Sequitur ea quidem Cratandrinae textum, sed cum iudicio: collatisque prioribus librorum exemplis Romanis, Florent. ac Venetis, sed et codice Gabr. Florentii *Talenti*, Senatoris Mediolanensis, ex quo Oratio pro P. Sextio tertia prope parte auctior facta est, nonnulla in ipso textu emendata habet; varietatem vero lectionis e marginibus amotam peculiari libello in calcem reiecto complectitur.

Exempla thesauri Ciceroniani, quae ex Her-vagii offic. prodiere 1546, 1551 et 1568 Caelii Sec. Curionis aliorumque curis aucta, etiam Her-vagianae cum Aldina collationem praemissam habent.

Ex eadem officina 1535 prodiere *Macrobius* in *Somnium Scip.* libri II, edente Ioach. Camerario.

*AETAS III* binos principes habet, Petr. *Victorium* primum ab an. 1534, alterum *P. Manutium*, A. F. ab an. 1540; comitem utriusque se fecit, Victorio Ioach. *Camerarius*, P. Manutio Rob. et Car. *Stephani*. Praeter hos multum quoque boni attulit hac aetate Seb. *Corradus*, tum singulis libris illustrandis, tum libro eruditissimo, qui inscribitur *Egnatius* sive *Quaestura*, Venet. 1537, 8. (recus. Lips. 1754, 8.) cuius pars I maior vitam Cic. undique collectam habet, altera Ciceronis loca emendat et explicat. Is maxime in Epp. operam egregiam posuit.

Recensemus primum Victorianas cum suis.

Petrus *VICTORIUS*, ob novam recensionem, qua textum vulgatum partim ex collatis MSS. in quibus Mediceus praefstat, et libris editis, partim conjectura usus, maxime in epistolis, emendavit, *Sospitator Ciceronis* dici meritus est. *Uni Victorie*, inquit Graevius, plus Cicero debet, quam reliquis omnibus, qui in eo perpoliendo operam posuerunt. Reprehenditur tamen in eo affectatum antiquitatis studium et insolentior verborum scriptura. Prodiere vero ex eius recensione opera Cic.

8 *Venetii ap. Luc. Ant. Iuntam* 1534-1537, 4 voll. fol.

9 *Parisii III apud Rob. STEPHANUM* (I) 1538-1539, 4 voll. fol. quae se Victorianae filiam profitetur, additasque habet Victorii castigationes suarum castigationum.

- 10 *Lugdun.* ap. *Seb. Gryphium I,* 1540. 9 voll. 8.  
habet ea et *Victorii* castigg. quae dein quoque  
ap. *Gryphios* recusae sunt.
- 11 *Basiliensis III* *Hervagii*, ex castig. *P. Victorii*, cu-  
ra *Ioach. CAMERARII*, cum *P. Victorii* castigg.  
et notis Camer. cet. 1540 4 voll. fol. inter praecipuas edd. numeratur. Quamvis enim *Victoriani* exempli fidem in plerisque secutus sit, priores tamen lect. et ipsas e MSS. ductas saepe praetulit *Victorianis*. primusque observavit, lectiones quasdam librorum diversas esse eiusmodi, ut suspicio esse vel possit, vel debeat, non alteram ex altera, commutatione aliqua vel librario-  
rum vel correctorum factam, sed utramque esse a *Cicerone* per duplarem libri alicuius editionem et novam eius castigationem; quam observatio-  
nem fecit quoque suam *Car. Stephanus* in ed. dein nominanda.
- 12 *Florentiae* prima *Victorian*a repetita est 1571,  
sed novis adornata scholiis; qua usus est *Graev.*  
*B. Paulus MANUTIUS* Aldi F. alter.  
Ciceronis vindex, idemque intelligentissimus interpres et felicissimus ipse imitator, cum admodum iuvenis (natus enim erat an. 1512) nullis sumtibus, nullique studio pepercisset, in antiquis Ciceronianorum libris indagandis, iisque cum superioribus exemplis, etiam *Victoriano*, confe-  
rendis: edidit tandem formatum a se ex Aldino textum, scholiaque addidit in epp. ad div. iam ante separatim edita. Et invenit ille etiam plures asseclas, quam *Victorius*, in quem ipse primo subiniquior, mox tamen aequior exstitit.
- 13 *Aldina II*, *Pauli I*, 1540, 10 voll. 8. quae editio in numeris fere convenit cum *Aldina I*,  
quos secutus est *Nizolius*.

- 14-16 *Aldina, Pauli repetita*, 1550 sq. 1554,  
1557; 1563 sq. Huic ultimae edit. iungimus *Af-*  
*conii Pediani Explanatt.* in oratt. 8. Venet. ap.  
Aldum 1563.
- 17-22 *Argenti*. editio post *Naugerianam* et *Victoria-*  
*nam* emendata a Io. *Sturmio* ap. *Wendelin*. 1540  
pagg. numeri et versuum Aldinis respondent.  
Eadem post postremam Nauger. et Victor. emend.  
a I. St. 1548, 1557, 1571 et 1574, \* 1578 ap.  
Ios. *Rihelium* repetita est. Aldinam maxime fe-  
quitur; sed et oratt. pro *Sestio* et *Ligario*, uti  
Aldina II integriorem exhibet. Praemissae sunt  
*Sturmii* et *Naugerii* praefatt.
- 23 Rob. *STEPHANI* (II) Parisiis (IV) 1543 sq.  
8 voll. 8. literis currentibus nitidissime exscripta.  
Huius quidem basin fecit Stephanus textum Ma-  
nuntianum, sed et Victorianam lectionem aut MSS.  
nonnunquam praefert; ceterum se multa diligent  
vetustorum exemplorum collatione emendasse  
profitetur. Voll. prima tria habent Oratt. 4 et 5  
Epp. 6 et 7 libros *philos.* ultimum, quod nobis ad  
manus est, *rhetoricos*, cum reiectis ad calcem va-  
riis lectt.
- Henrici Stephani in Cic. quam plurimos locos  
castigg. ann. 1557, 8 partim ex ingenio, partim  
ex vetustissimo et emendatissimo exemplari MS.  
Eiusdem Lex. Cicer. Graec. Lat. et Obsf. Paris.  
Morell. 1557, 4.
- 24 *Paris.* V ap. Sim. *Colinaeum* 1545, 10 voll. 12,  
répetitio Stephaniana nitida, quae refertur in  
in Fabr. bibl. lat. ed. Ern. T. I, p. 219. Sed et  
Ern. in praef. Cic. Sect. 2, 33, se exemplum editio-  
nis ap. *Colinaeum* factae an. 1553 ieq. 11 voll.  
12 habere dicit.
- 25 *Opera Ciceronis* 1551 Basil. 10 voll. 8.

26 Caroli *STEPHANI* Paris. VI 1555, 4 voll. fol.  
 Editio splendida textum prioris a fratre Roberto  
 editae maxime sequitur; suam tamen etiam lectio-  
 nem habet: quam et si clar. Ernestius plerumque  
 in deterius ivisse, collatis prioribus capp. Di-  
 vin. in Caecilium, colligat; habita tamen est isto  
 aevo haec editio omnium emendatissima, habet-  
 que ad calcem cuiusque tomii lectt. varias. Pro-  
 posita hinc fuit praefantioribus sequentis aetatis  
 curatoribus, in qua porro recognoscenda elabora-  
 rent, ut Dion. Lambino, Al. Scoto cet. Scotus  
 quidem in praef. s. ep. nuncup. edit. suae, quam  
 ad an. 1588 recensebimus, inquit » *Textu Car-*  
*roli Stephani*, qui et a doctis viris maxime pro-  
 batur, et inter vulgares Codices videtur inte-  
 gerrimus, conservato, praeter admodum pauca  
 loca, in quibus aperte mendum esse constabat. »

- 27, 28 *Gryphiana II* ex Victorii et Manutii castigg.  
 1546, 1548, 9 voll. 12. repetita 1551 et 1559 sq.  
 29 *Lugdun.* ex castigatione Io. *Boulierii* ap. Io. Frel-  
 lonium l. Ant. Vincentium [socios] 1560-1568.  
 Nullum certum sequitur exemplum; et nullo in  
 pretio est.

Fragmenta Cic. ex veterum monumentis post  
 Rob. *Stephanum* collegere Car. *Sigoni* Venet.  
 1559, 8. et, qui horum industriam vicit, Andr.  
*Patricius*, Striceco-Polonus ibid. ap. Ziletum 1560,  
 8. 1565. 4 et 1578, 4. c. commentt. Inde ea  
 suis edd. subiecere Dion. *Gothofredus* et Ian.  
*Gruterus* cet. quos dein recensebimus.

Sub hanc aetatem accessere duo, qui Ciceronis  
 editoribus sqq. lumen praeferrent suis emenda-  
 tionibus, M. Ant. *Muretus* in varr. lectt. quae pri-  
 mum prodiere Venet. ap. Ziletum 1559, 4. dein  
 Antverp. ap. Plantin. 1580, 8 et Francof. 1604,

8. et Adrianus *Turnebus* in *Adversariis* tom. duobus, quibus tertium addidit filius post mortem patris. Prodiere iunctim Paris. 1580, 2 voll. et Basil. 1581 fol.

*AETAS IV* Manutio-Lambiniana et Brutina.

Hortatu viri illustrissimi Errici *Memmii* excitatus et suppeditatis ab eodem aliisque instructus codicibus, Dion. *LAMBINUS*, illustris ingenio et omni genere doctrinae ad sensum veri elegantiamque Tullianam excultus, a vulgi superstitione alienus, summo studio in recognoscendis Ciceronis libris per biennium ac sex menses versatus, Manutianum textum, uti a Car. Stephano partim repetitus, partim emendatus erat, ita correxit, ut principatum ei mox decernerent alii, ut Io. Mich. *Brutus*, *Facciolatus*; alii, eius in ipsum textum ausa, [audebat autem multa pro ingenio, etiam sine codd. ut intelligibilem daret textum] vituperarent, ut *Muretus* et *Gruerus*. Hinc factum, ut quem dederat novi exempli textum, mox editores deferrent, retingentes vel Aldinum Pauli, vel Stephanianum, ita tamen ut Lambini lect. et notae accessio fierent meliorum huius aetatis editionum. Quamvis autem Lambinus saepe ingenio nimium tribuisse videatur, multae tamen eius lectiones hodie prae illis a Grutero postea restitutis probantur iis, qui inscite contumaces esse nolunt. Alterum attulere ornamentum commentarii P. *MANUTII* in *Oratt. Epp. et officiorum libros*, quibus editio Aldina maior 1584 aucta est. Praeter hosce duum viros de Cicerone promereri studuerunt Io. Mich. *BRUTUS* denuo, Dion. *GOTHOFREDUS* Ictus, et, quem omiserunt editionum censores, Alex. *SCOTUS*, et doctus Wecheliana curator.

30 *Prima eaque una vera ex Lambini recognitione*

et cum notis eiusd. *Parisiis* ap. du Puys 1566,  
2 voll. fol.

\* 31 *Aldina III*, Venetiis ex bibliotheca Aldina  
1569, 9 voll. 8, cuius curator, Hieron. Tur-  
risanus [Andreae Asulanii nepos, Francisci filius,  
qui se P. Manutii patruellem dicit] Aldinum qui-  
dem Pauli textum reddidit, sed vitam Cic. a  
*Lambino* conscriptam praemisit et cuique vol. *Lam-  
bini* adnotationes adiecit. Servatur ea in Biblioth.  
Bipont. Ducali.

32--34 *Gryphiana III* Io. Mich. *BRUTI* Lugd.  
ap. Ant. Gryph. 1570 sq. repetita ibid. 1578  
et 1585--87. Brutus in hac edit. exhibito etiam  
*Lambino* cum prioribus edd. Viatorio, Came-  
rario, Manutio, Turnebo aliisque textum sic  
emendavit, ut saepe lectiones Lambini recipi-  
ret; suaque animadversiones addidit ad calcem,  
quibus maxime textum suum tueretur.

35 Parisina *Lambini* [a. 1572 mortui] 1573 fol.  
textu Stephaniano substituto lectiones Lambini e  
textu in marginem electas habet; cura, ut vi-  
detur, Lambini filii.

36 Eadem ibid. 1573--1580, 9 voll. 8.

\* 37 Eadem *Lugduni* ap. Petrum Santandreamum  
1577--1578 4 tomi fol. mai.

38 Eadem *Argentor.* 1581, 9 voll. 8.

39 Eadem *Paris.* 1584, 2 voll. fol.

40 *Aldina IV maior*, c. comm. exquisitis et elab-  
oratissimis *PAULI* et *ALDI MANUTIO-  
RUM* Venet. 1578--1583, 5 voll. fol. Tex-  
tum fere Aldinum Pauli habet, sed operarum  
vitiis inquinatum. Omne igitur pretium est a  
P. Manutii comm. in Oratt. Epp. et officiorum  
libros. Aldinae vero notae, nisi ubi lectiones  
MSS. memorat, parum laudis invenere. Aldus

- Nepos etiam Nizolii Lex. Cic. repetierat 1570.
- \* 41 *Genevensis* c. n. Lambini et Ursini 1584, 2 voll. fol. Fulvii Ursini, doctissimi viri et Codd. MSS. usi, notae iam ante Antverp. 1581, 8 editae, multis locis egregiam lucem afferunt.
- \* 42 Dion. Gothofredi I; *Praeter hac tenus vulgar tam D. Lambini editionem accesserunt D. Gothofredi IC.* notae: in quies variae lectt. *Synopses generales & speciales singg. l. libris l. pagg. adiectiones: Cic. loca praecipua & difficiliora inter se primo, aliis deinde authoribus gramm. Rhett. poetis, hist. Ictis maxime collata: ut & formulae, quae ad ius, LL. Secta & actiones pertinent, explicatae. Index gener. adiectus est. Lugd. sumptibus Sybillae. a Porta 1588, 4 tomi, 2 voll. fol. min. l. 4.*
- \* 43 *Scotina*: Variis Dion. Lambini et aliorum doctissimorum quorumque Virorum lectionibus opera Alex. Scot, Scotti ad marginem illustrata et in sectiones apparatui Latinae locutionis respondentia. acc. D. Lambini et F. Ursini emendationum rationes singulis tomis distinctae. Lugd. sumptibus Io. Pillehotte. 1588. 12. Rhetorici libri duos primos tomos habent. Scotus fuit nobilis Scotus Abirdonensis Acad. A. L. Mag. et in Univ. Turnonensis S. Iesu Theol. Cand. qui sub idem fere tempus Apparatum latinae locutionis olim per M. Nizolium ex Cic. libris collectum, nunc denuo auctiorem factum et ad Sect. in quas Cic. opera sunt distincta, accommodatum, Lugd. ap. eundem edidit. [Col. Allobr. recus. 1612, 4; Paris. 1624, et Gen. 1627] Textum vero C. Stephani maxime secutus lect. Lambini, Man. Mureti, Victorii, Ursini cet. cum suis notis in marginem reposuit: Lambini [quem] unum plura quam omnes in hoc

- opus contulisse ait] annott. ad cuiusque vol. finem adiecit. Est igitur haec editio non contemnenda.
- 44 *Wecheliana* ad Manutianam et Brutianam conformata ap. her. Wechel. Frcof. 1590, 10 voll. 8. Praemissa est Fr. Fabricii historia Cic. Ad calcem vero cuiusque tomii annotationes et castigg. ex variis doctorum virorum scriptis selectae [ a docto sane viro, nescio an Frid. Sylburgio ]. Laudantur in iis post *Victorium*, *Manutios*, *Brutum* aliosque maxime D. Lambinus et ipse Ianus *Guilelmius*. Ed. praestans.
- 45--47 Eadem repetita 1606, et Francof. 1609 typis Wechel. ap. Cl. Marn. et her. Io. Aubrii totidem voll. 8, itidemque Hanoviae 1603, 12.
- 48 *Genev.* ex rec. Lambini 1594, 8, cura Gothofr.
- 49 D. Gothofredi c. eiusdem notis repetita Genev. ap. Guil. Laemarium 1596, 4 tomii 2 voll. 4.
- 50 Eadem repetita Genev. ap. Petrum de la Ro- wiere 1606, 4 tomii 2 voll. fol.
- 51--53 Eadem c. n. Lambini et Gothofr. Colon. Allobr. f. Genevae, 1616, fol. ea sectiones Scotinas habet. 1633 et 1646, 4 tomii, 2 voll. 4.
- 54--56 *Lambiniana* cum sectionibus Scotti textum sine notis exprimens Genev. 1608, 1624, 1626 ap. Henr. Fetherston 2 tomii 8.
- 57 Eadem Lugd. 1616, 2 tomii 8.
- 58 Aug. Munatianae [ h. e. Basileae ] 1620, 9 voll. 12.
- AETAS V Victorio---Gruteriana.*
- Initia huius aetatis posuerat Ianus *Guilelmius Lubecensis*, qui iuvenis doctissimus, cum esset 27 annorum, excerptis scriptorum, quae itineribus per Galliam, Belgium et Germaniam factis collegerat, meditatus erat novam recensionem Ciceronis, sed operi m. Iun. an. 1584 immortuus est,

cf. Thuan. hist. L. 80 sub fin. Cum eodem sua excerpta eius generis Car. *Langius*, Canonicus S. Lambertii Leodiensis idemque eruditissimus librorum Ciceronis de officiis editor, et Suffridus *Petri*, Leowardiensis, communicaverant. Triumvirales has schedas post XXX nactus Ian. *GRUTERUS*, praeterea Codd. Palatt. tum ipse contulit, tum opera usus duorum Iuvenum, Iani *Gebhardi*, Palatini, et Dav. *Clerici*, Genevensis, illius in epp. ad div. huius ad Attic. *Erat* vero, ut clar. Ernestii [in praef. Sect. II, p. XLII] verbis utar, *Gruterus in re critica eo*, quo *Victorius sensu*, ita libris scriptis addictus, ut manifesta saepe menda etiam accuratissimis & evidentissimis virorum doctorum emendationibus praeficeret, eaque etiam explicare tentaret. Itaque basin suae editionis voluit esse textum *Victorianum*: quem tamen ille non modo e libris scriptis saepe mutavit, sed etiam interdum e coniecturis eorum quidem, quorum apud eum esset peculiaris quaedam auctoritas, ut Simeonis Bosii in epistolis ad Atticum. Editiones antiquiores & ipsas subinde commemorat, sed satis negligenter, non modo hanc in partem, quod primas illas Romanas & alias non requisivit, nec consuluit, sed quod etiam pro primis laudat, quae non sunt, ut subinde in notis monuimus & in singulorum voluminum praefationibus. Et quoniam ipse omnino in conferendis libris antiquis aliorum opera usus est, veremur, ne non certa sint omnia, multa etiam praetermissa. Notas ipse suas addidit, nisi in epistolarum, ut ante dictum, item in *Tusculanarum* libris, ubi *Gebhardi* sunt. Lallemandius sic porro: *Iniquior est Gruterus in Lambinum*, in quem, saepius etiam sine causa, invehitur, ut quum in *Philippicis* depromptas ex optimo cod. *Vaticano Faerni & Mureti* emendd. quas.

ipse non viderat, acerbe tanquam Lambini coniectanea respuit. Neque nobis omnino probatur Gruteri *oρθοδοξία* seu potius *ζηλοτυπία*, qua tum ipse Lambino iniuriam saepe intulit, tum eius adiutores, maxime iuvenis Ianus *Gebhardus*, in excellentioris ingenio et doctrina viri rationes invecti sunt. Verum sua cuique placent scripta, suum cuique ingenium. Fama tamen Gruteri fecit, ut textus eius pro optimo haberetur et editiones ex eo tempore obtineret. Textum Gruterianum paulo emendatiorem Iac. *Gronovius*, et qui hunc secutus est, Is. *Verburgius* ediderunt. Aetatis huius sub initium Andr. *Schötti*. Novorum Ciceronis emendatorum libri IV prodiere Antverp. 1613, 8, et cum eius observatt. humanis Hanov. 1615, 4.

59 *Gruteriana I* ex recogn. et cum notis Iani *Guilelmi* et Iani *Gruteri*. Hamburgi ex bibliopolio Froben. 1618, 4 tomis 2 voll. fol. sed ineleganter excusa, ad cuius pagg. refertur *Penu Tullianum*, collectore Geo. Lud. Frobenio, quod ibidem prodiit 1619 fol. In hac ed. primum est divisio in capita a Grutero instituta.

\* 60 c. optimis ac postremis exempl. accurate collata Lugd. Bat. ex offic. *Elysevir* 1642, 10 voll. 12, sine capp. distinctione.

Ex eadem offic. 1644 prodiere Q. *Asconii Padiani* Commentt. in Cic. Oratt. in 12. et iam ante hist. Cic. a Fabricio scripta ex edit. Heidmani 1640, 12.

61 Amstelod. *Blaw.* 1658 sqq. 10 tomi, 12.

62 Basil. 1659, 4. Gruterumne, an superius exemplum sequatur, non habemus.

63-65 *Schreveliana* c. n. Gruteri et varr. Lugd. Bat. 1661, 4. repetita Basil. (l. Genev.) sumptibus Leon. Chouet et Io. Ant. Cramer, typis I. R.

- Genathii 1687, 4. et Venetiis 1687, 4 tom.  
4 mai.
- 66 *Gruteriana II* Londin. 1681, fol. recusa pulchrius quam prima, sed omissa capitum distinctione.
- 67 *In usum Delphini explanata Parisiis 1684-1689*, 4, haud tamen prorsus absoluta editio, neque laudata. Singula igitur volumina eorumque editores indicamus.
- a. Oratorii per Iac. *Proust*; Parif. 1687, 1 vol.
  - b. Orationes per Car. *Merouville* ib. 1684, 3 voll. repetita Venetiis 1724.
  - c. Epp. ad fam. per Phil. *Quartier S. L.* ib. 1685.
  - d. Opp. philosophica per Franc. *Honore* ib. 1689, tomus I. Intercessit enim mors editoris, quo minus et alter in lucem ederetur. Desint vero etiam epp. ad Atticum, Q. fratrem et Brutum.
- 68 ex rec. nova Iac. *GRONOVI* Lugd. Bat. 1692, 4 partes et voll. 4, cum notis integris Iani *Guil'mii* et Iani *Gruteri*. Acc. Iac. Gronovii emendd. ut et Asconii Pediani et doctissimi veteris scholia (neutiquam tamen cum Asconio comparandi) scholia. Ceterum editor textum Gruteri etiam cum vitiis typogr. repetiit, nisi quod paucis locis suas intulit emendd. Nonnullos enim libros contulerat ad MSS. Fecit vero nomen Gronovianum, ut exemplar hoc crederetur emendatissimum et ab aliis repeteretur.
- 69 Eadem ibid. prodiere forma 12 quinque voll.
- 70-72 Isaaci *Verburgii* editio triplex Amstelod. 1724 fol. 2 voll. 4 voll. 4. et 12 voll. 8 textum habet *Gruterianum*, qualis a I. Gronovio editus est: tum notas integras Victorii, Camerarii, Ursini et selectas, quae vulgariter et absque ingenio con-

scriptae dicuntur. Etiam in excerptis legit. varr. iudicium desiderant eruditii. Consuluit tamen etiam Zach. *Pearcii* et *Davisi* edd. priores in libris de Oratore et Philos.

73 *Verburgiana* repetita Venetiis 1731, 12 voll.  
8 med.

*AETAS VI.* eclectica, cuius princeps est Io. Georg. *GRAEVIUS*, cui coniungendi sunt Zach. *PEARCIUS* et Io. *DAVISIUS* Angli. Tum sequuti Iosephus *OLIVETUS*, eclecticam rationem prae aliis secutus, Nic. *LALLEMAND* Galli, et novissime Io. Aug. *ERNESTIUS* Prof. Lipsiensis. Professus erat in praefat. ad libros de officiis et epp. ad fam. a se editis Criticus eruditione, industria et modestia praestans I. G. *Graevius*, Victorii lectio-  
nem maxime secutus, sed MSS. et edd. usus, se omnia Tulliana eadem ratione editurum esse; edideratque orationum et epistolarum volumina, cum illo de officiis cet. quum mors viri intercederet, quo minus et reliqua prodirent. Itaque opportune acceſſerunt *Davisius*, qui in libris philosophicis corrigendis et illustrandis operam laudabilem posuit; Zach. *Pearcius* libros de oratore egregie curavit, et P. *Burmannus*, qui illos incerti auctoris et Heren-  
nium et Cic. de Inventione novissime edidit. Super-  
sunt Brutus et Orator, in quibus quis ingenium ac stu-  
dium exerceat. Placet vero singulas has quatuor vi-  
rorum editiones coniungere, ut unum corpus idque  
praestantissimum efficere videantur.

\* 74 a. M. T. Cic. epp. ad fam. ex rec. I. G. *Graevii*, c. eiusd. animadv. auctis et notis integris P. Victorii, P. Man. Hier. Ragazonii [h. e. Car. Sigo-  
nii] D. Lamb. F. Ursini, nec non sel. I. F. Gron.  
cet. Amstel. ex off. Elzevir. P. et I. Bleav 1693,

- 2 voll. 8. Habet haec editio auctiores Graevii  
notas , quam prior a. 1677.
- b. Eiusd. epp. ad Atticum ex rec. Graevii c. eiusd.  
animadv. et notis integris Victorii Man. Leon.  
Malespinæ , Lamb. Urs. Simeonis Bosii , Fr.  
Iunii , Aufon. Popmae , nec non selectis Seb.  
Corradi , Is. Casauboni , I. F. Gron. et aliorum  
Amst. 1684 , 2 voll. 8.
- c. Post Graevium , sed ad eius modum , vir qui-  
dam doctus curavit reliquas epp. ad Q. Fratrem  
L. III et ad Brutum L. I cum notis integris Vict.  
Man. Malesp. Lamb. Urs. Iunii , Grut. et Iac.  
Gronovii , nec non Fr. Hottomanni Comm. in  
ep. I de prov. administranda. Adiectus est ad M.  
Tullium fratrem de petitione consulatus liber cum  
integro comm. Valerii Palermi Veronensis. Ha-  
guae Com. ap. Is. Vaillant 1725 , 1 vol. 8.
- d. Ei. Oratt. ex rec. Graevii c. eiusd. animadv. et  
notis integris Franc. Hottomanni , D. Lambini ,  
F. Ursini , P. Manutii ac selectis aliorum , ut et  
Q. Asconio Pediano et Anon. scholiaste cet. Am-  
stel. ex typogr. P. et I. Bleav , 1699 tom. 3 ,  
singuli bipartiti , unde 6 voll. 8.
- e. Ei. de officiis L. tres , Cato maior , Laelius , Pa-  
radoxa , Somnium Scip. ex rec. Graev. cum eiusd.  
notis , ut et integris animadv. D. Lambini , F.  
Ursini , C. Langii . Fr. Fabricii , A. Manutii nec  
non sel. aliorum. Acc. Favonii Eulogii Rhet. Carth.  
in Cic. Somnium disp. nec non Caelii Calcagnini  
disq. in de officiis libros. M. Ant. Maioragii dis-  
quis. Iac. Griffoli defensiones Cic. contra Cal-  
cagninum , ibid. ex eadem off. 1688 , 1 vol. 8.  
[Voluminum Graevian. ex bibl. I. Phil. Crollii ,  
quondam Rectoris , in bibl. Gymnasii transla-  
torum copia nobis est.]

f. Ei. *Opera philos.* (praeter libros de officiis) ex 8 codd. collatione recensuit notisque integris Victorii, Manutii, Camerarii, Lambini, Ursini cet. addidit Io. *Davissus.* Cantabr. 1724-1733, 6 voll. 8.

(Acadd. quaest. edidit Davissus Cantabr. 1725; de fin. bon. cet. 1728; *Quaest. Tuscum.* primum Cantabr. 1709, dein auctius 1723; tertio notis denuo auctis et emendatius 1730. Praferatur tamen prima, quod in novioribus conjecturae Bentleii in textum receptae sunt. De *nat. Deorum* Cantabr. 1718, 1723 et 1733. de *divinat.* et de *fato* Cantabr. 1721. De *Legibus* Cantabr. 1727. Cum quoque Davisii curae in libros de officiis cum igne interiissent, hos uti et illos de nat. Deorum edidit cum eruditis notis Zach. *Pearcii* 1745, 8.)

g. *De Oratore* libros tres Zach. *Pearcii* edidit Oxon. 1716 et iterum 1732, 8. emendato e MSS. et edd. vett. duabus textu, et locis difficilioribus explicatis.

h. Libros de *Invent.* cum illis ad *Herennium* P. *Burmannus Sec.* edidit Lugd. B. 1661, 8, cum notis integris Lambini, Urs. Grut. I. Gron. et excerptis aliorum, item Lect. varr. et notis postumis Graevii; additis in fine notis *Bruti* et indeditis Fr. *Oudendorpii.*

\* 75 *Ernestina I* Lips. 1737 sq. 5 voll. 8 med. ex rec. Iac. Gron. accedit varietas lectionis Pearciana, Graeviana et Davisiana, cum singg. librorum argg. et indice legum geogr. hist. verborumque philologico-critico. Praemissa vero etiam est Fr. Fabricii hist. Ciceronis. Ipsa quidem textus Grutero-Gronoviani editio mendis scatet. Adiecta in notis varietas parum sufficiat ad diligendam lectionem,

neque non desiderabiles facit lectionum Manutii et Lambini varietatem, eiusvemodi notas critt. quales olim Wechelianaæ edit. adiunctæ sunt. Una igitur huius edit. laus est a clave Ciceroniana [s. indicibus illis] quae etiam separatim divendita plurimum adiuvit studium Latinitatis, maxime Tullianæ.

- \* 76 *Ernestina II* repetita Halae, 1757 sq. parum differt a prima, nisi quod a parte vitiorum repurgata est.
- \* 77 *Berolinensis ad exemplar Londinense [1681] 1747*, 8, textum Gruteriam exhibit nitide quidem, sed et mendose recusum.
- 78 cum delectu commenstiorum cura Ios. OLIVETI Paris. 1739-1743 in 9 voll. distributa sic, ut primus habeat *rhetoricos libros*, alter et tertius *philosophicos*, tres sqq. *Orationes*, VII *epistolas ad fam.* VIII *ad Atticum*, nonus et ultimus epp. ad Q. fratrem, Brutum, et fragm. poem. aliorumque librorum. Tomus IX duas habet appendices, prima *Rhet. ad Herenn.* et Q. *Cic. de pet. Consul.* altera 1. historiam Cic. a Franc. Fabricio scriptam cum indd. 2. Indd. voc. gr. in Cic. occurrentium, 3. Ind. latin. 4. Ind. hist. et geogr. 5. Ind. rerum. Textus nulli certo exemplo adstrictus, sed ex quatuor exemplis, *Victorii*, *Manutii*, *Lambini*, *Gruteri* ita mixtus, ut in quibus omnes consentirent, nunquam discederet; in quibus autem dissentirent, suum iudicium fecutus est, quod Criticis nostratibus parum probatur, sed tamen ceterorum lect. adnotavit, praeterquam in Epp. quod casu periissent. Dedit vero separatim varias lect. e *Graevianis* decerptas. Textum deinde notis instruxit delectis e comment. in Cic. adiecto eius nomine, qui primus dixisset; quae ratio non plane improbanda sit.

tum praemisit tomis praestantiores aliorum praefatt. praeter suam; variumque apparatum, qui ad usum Cic. sit. In conscribendis indd. usus est clave Ernestii Ciceroniana.

79 *Oliveri* editio repetita Genev. 1758, 9 voll. 4 mai.

\* 80 e recens. I. N. *Lallemand*, Parif. apud Salignant, Defaint, Barbou, 1768, 14 voll. 12 med. Editio nitida multa habens sua bona, ex collatis Codd. MSS. cum Graevii, Davisii, Pearcii lectt. & varr. eosque maxime et alios praestantiores Criticos cum sensu veri suo secutus textum emendatiorem dedit; haud tamen aequa diligenter in edd. antiquis conferendis versatus, pro novis etiam vendit, quae illis pridem recepta. Videtur Verburgianam ed. maxime contulisse et simul Olivetum secutus: in Rheticis, quae Graevii aut Pearcii curam non experta erant, ipse, collatis codd. tribus et Beiotii excerptis optimi codicis, emendavit, eoque ceteris consulendus fuit. Cuique tomo adiecit notas de genere critico non contempnendas, et saepe alias, quae ad intelligentiam faciunt. Orationibus praemisit indiculum Legum et de Romana vetere pecunia; Epp. ad fam. addidit ind. chronol. Volumini ultimo adiecit indicem latinum ex Ernest. clave Cicer. excerptum.

81 Patavina 177... 8.

82 Wirceburg. ad ed. Parif. et Patavin. &c. 1776, 8 voll. 8. Editio mendozaissima.

\* 83 *Ernestina III* ex rec. Io. Aug. Ernestii, cum eiusdem notis et clave Ciceroniana, Halae Sax. in Orphanotropheo 1774. Vol. I continet Rhet. vol. II bipartitum Orationes, vol. III bipartitum epistolas et vol. IV bipartitum philos. unde existunt 7 tomi et clavis Cicer. Atque haec editio,

c  
haud paulo differt a prioribus. Omissa primum hist. Cic. quam scripserat Fabricius, praemisit corpori praefationem suam, in duas sectiones dispergitam; quarum prima ideam Critici Ciceroniani informat pro ingenio suo; eamque revocat ad quinque virtutes; singulorum verborum formarumque dicendi scientiam; et linguae universae analogiam, ut in temporibus, modis, similibusque; et sensum venustatis, concinnitatis, numeri atque soni orationis Ciceronianae; et usum rectum et accuratum librorum antiquorum, tam MSS. quam editorum; et, quod ultimum est, ingenium ad veriorem lectionem, cuius vestigia tantum in MSS. supersunt, festive odorandam doctum. Primam quidem virtutem concedit Victorio, Manutio, Lambino, Gronovio et Graevio. [Iac. Gronovius certe ceteris multum inferior videri potuit.] Alteram virtutem, quae sensu tota percipiatur, vulgatiorem demum Gesneri suaque disciplina factam ait. Tertiam laudem vix Lambino, et, qui eum non aequet, P. Manutio tribuit. In quarta laude dicit esse plures, ita tamen, ut qui in iis principes sint, Victorius, Gruterus et Gebhardus [Guilielmum praestare Gebhardo credimus] reprehensionem mereantur, praesertim quod editiones veteres parum diligenter adhibuerint. ipse vero clarissimus vir se in iis conferendis diligentius versatum profitetur. In iis, qui ingenium felicius et doctrinam cum iudicio attulerint ad emendandum Ciceronem, neminem nominat. Atque certe in eo genere praestat Lambinus omnes. Itaque nos quidem arbitramur, Criticum, qualis hodie ad Ciceronem recognoscendum cum auctoritate accedere debet, virum, Manutio doctrina, Lam-

bino acumine ingenii similem esse, eumque Victorii, sive, quamvis eo minoris, Gruteri religionem cum libertate sequi, denique Graevii industriam, aut Ernestii peritiam sermonis Ciceroniani cum patientia in colligendis stipulis, suam mature fecisse oportere. Sed discessimus a prae-  
fatione Ernestina, cuius altera sectio notitiam curatiorem editionum Corporis Tulliani exhibit; quam nos vel tertia parte auximus. Porro clar.  
vir singulis voluminibus praeftiones praemisit,  
quibus et scriptos et editos libros ad novam re-  
censionem textus Gruteriani suam adhibitos ce-  
teraque eius praecipua ipse pluribus indicat. Sic  
igitur haec editio, quamvis non nitore, prioribus tamen eius multum praestat. Quae in illas  
subrepserant menda, sublata pleraque videntur,  
sed nova admissa; quorum indicem ipse sub-  
iecit voluminibus Oratt. ep. et philosoph. sed in  
rhetoricis desideres.

Quare, ut textum, quantum fieri potest, emen-  
date redderemus, ex sociis illum *Exterus* noster  
denuo contulit cum nitidiore illa Alemanni, [ Lal-  
lemand ] Aldinis, praesertim 1569, Gryphiana  
1560, Lambiniana 1577 sq. Gruterianis, ceterisque  
et superioribus et nostrae aetatis editionibus, quas  
stellula notatas in indice videt Lector. Ita quam plu-  
rima vitia operarum emendata, rectior eaque con-  
stans scribendi ratio inducta, interpunctio in melius  
directa, multi loci ex melioribus edd. in quibus saepe  
inveniuntur, quae se Ernestius suspicari ait, sanati.  
Nihil coniecturae, quam dicunt, novae datum est;  
sed textus, qualem damus, optimorum librorum  
bona coniuncta habet. Sed haec et alia, quae a  
nobis ad hanc editionem accessere bona, cum ae-  
quitate iudicet ipse Lector.

NOTITIA LITERARIA  
DE  
M. TULLIO CICERONE  
Ex Io. Alb. Fabricii Bibliotheca latina  
a Io. Aug. Ernesti auctius edita,  
Tom. I. Lib. I. c. 8.  
Auctior et emendatior.

*I. Ciceronis aetas. II. Laus. III. Scripta quae exstant Rhetorica.*

*I. M. Tullius Cicero*, <sup>1</sup> Romanus, ex equestri familia, natus est in villa Arpinata <sup>2</sup>, A. U. C. 648 Q. Servilio Caepione et C. Atilio Serrano COSS. die tertio Ianuarii. An a Rege Tullo duxerit originem, disputant *Dausquius* et *N. Heinlius* ad Silium VIII, 407. Pater fuit eques, mater *Helvia*. Nam calumnia est Fufii Caleni ap. Dionem L. XLVI patre fullone natum dicentis. Sed de maioribus Ciceronis v. Interpr. ad Or. II. in Rullum. Vitam

<sup>1</sup> Plinius XVIII, 3 *Iam Fa-*  
*biorum [nomen] Lentulorum,*  
*Ciceronum, ut quisque aliquod*  
*optime [leguminis] fereret.*

<sup>2</sup> Idem Plin. XXXIII, 18  
*Cicero Arpinas, municeps C.*  
*Marii.* Quamquam vero non  
natus Romae Tullius, tamen  
ad decus Romani sermonis  
plus contulit, quam sexcenti alii  
etiam e disertis. Sed nec Varro,  
nec Lucretius, nec Caesar  
Romae geniti, et multi  
alii insignes Auctores Latini  
aliud quam Romam natale  
solum habuere. Nimurum, ut  
Cardinalis Bembus observat,  
saepius cultiores videmus scrip-

tores prodūsse, non natos iis  
in locis, ubi linguae elegantia  
tanquam in patria sua viget.  
quo maiorem illi adhibent di-  
lignantiam, ut effugiant vitia et  
sermonem castigent, cultum-  
que eius ac nitorem, quem  
negligentiores urbani non du-  
bitant congenitum sibi esse, stu-  
dio et attentione assequantur.

<sup>3</sup> Cf. illustris doctrinae viri  
*Steph. Baluzii* diff. de die na-  
tali Cic. et ep. ad Em. Car-  
dinalem Norisum, quae ex-  
stat ad calcem nott. in libr.  
Laetantii de mortibus perse-  
cutorum, ed. Traiectinae Pauli  
Bauldri 1693. 8. p. 118 sq.

ipsius e veteribus, ne perditos *Tullii Tironis & Cornelii Nepotis* libros memorem, *Plutarchus* scripsit, et brevius *Aurelius Victor* cap. LXXXI. Inter recentiores copiose eam atque diligenter singulari libro tradidit *Franciscus Fabricius, Marcoduranus*, digestam per annos aetatis, qua vixit Cicero quatuor et sexaginta. Prodiit haec vita pri-  
mum separatim Colon. a. 1563. 8. \* ac deinde saepius recusa est variis formis locisque, ut no-  
tatum Tho. Crenio parte 2. animadvers. p. 193.  
seq. novissime Budingae 1727. 8. Etiam adiuncta legitur melioribus quibusdam editionibus Cicero-  
nis, ut *Gruteriana*, Hamb. 1618. fol. apud Fro-  
benium. Ante Fabricium hoc argumentum tra-  
verunt *Leonhardus (Bruni) Aretinus* [† 1444] qui pro Plutarchi interpretatione novam ipse vi-  
tam Cic. dedit, inter Plut. parallelas latine editas plus semel excusam; tum *Iac. Angelus de Scarparia*, cuius narrationem de vita Ciceronis Romae reper-  
tam an. 1553 edidit Wolffg. *Peristerus*, Porussus,  
Berol. 8; tum *Darius Tibertus*, eques Caesenas, in  
epitome vitarum Plutarchi edita Florent. 1501,

\* Prima Ciceronis historiae per Fabricium scriptae editio prodiit Colon. ap. Maternum Cholinum 1563. 8. recusa est ibid. an. sq. 1570 & 1587. Repetita etiam in Veneta Ma-  
nutorum comment. illustrata ed. Opp. Cic. 1578 sqq. fol. in Wechelianis Fr. 1590. 8. T. I. Hanov. 1603. 12. Fr. 1606 & 1609. in *Gruteriana* I Hamb. 1618 fol. Tum eam separatim rursus edidit *Christoph. Heidmannus*, Prof. Helmst. cum breviorio vitae,

actionum & scriptorum Cic. & Indd. novis 1620. 8. quae Amstelod. recusa 1640 & Helmst. 1672. Adiunxere hanc historiam dein I. *Gronovius* cum suis adnott. editioni suae Cic. 1692. 4. *Ernestius* edd. I, 1737, & II, 1752. Separatim novissime prodiit *Fabricii H. C. c.* adnott. *Gronovii*, accessit *Chr. Cellarii* historia explican-  
dis epp. Cic. accommodata, cura Io. Mich. Heusingeri, Budingae. 1727. 8. Cr.

emendatius Basil. ap. Oporinum 1541, recusa Parisiis ap. Hier. Marnef. 1560; tum *Constantinus Felix Durantinus Ictus libris II de exilio et gloriose reditu Cic. Lipsiae 1535*, 4; tum *Henr. Bullingerus*, qui teste Ios. Simlero in eius vita fol. 8, b. vitam et encomium Cic. scripserat; tum *Christoph. Mylaeus Ictus*, cuius liber de vita et imit. Cic. Basil. ap. Oporinum prodiit; tum *Christoph. Preyssi Pannonius*, Basilea 1555. 8; tum *Seb. Corradus*, vir pereruditus in Egnatio sive Quaestura, qua Ciceronis etiam mores adversus Plutarchum aliosque tuetur, Bononiae anno eodem<sup>1</sup>; tum *Petrus Ramus in Ciceroniano*, Paris. 1556. Post Fabricium memorandus etiam *Lambinus* in sua Cic. editione: *Benedictus Herbestus*, a. 1568. \* tum *Io. Brantius*, qui cum elogiis virorum illustrium e Cicerone collectis Tullii vitam Chronologico ordine digessit, Antwerp. 1612. 4. *Davidis Chytraei tabula Chronologica*, cum *Scarpriae libello* edita Berolin. 1587. 8. *Sim. Vallambertus* in vita Cic. Paris. 1587. 8. *Masenius* in palaestra orat. Col. Agr. 1659. T. II. p. 229--84. *Rudolphus Capellus* in Protheoria Ciceroniana, Hamb. 1683. fol. *Casp. Sagittarius* libro de vitis Plauti, Terentii, ac Ciceronis. Altenburg. 1671. 8.

<sup>1</sup> Huius Corradinae Quae-  
sturae, cum sint duas partes,  
una tantum vulgo edita est,  
nempe maior, quae de vita  
Ciceronis est: alteram mino-  
rem, quae tractat loca Cice-  
ronis, emendat, explicat, &  
per eorum occasionem etiam  
aliorum scriptorum, ignoratam  
fere, sed dignam lectu addi-  
dit editio Lipsiensis a. 1754.

8. ex editione Venet. 1537.  
8.

\* *Cic. vita e scriptis & ver-  
bis eiusdem descripta opera &  
studio Ben. Herbesti, Roxo-  
lani, s. Rutheni patria, No-  
viomastensis Iesuitae, cum di-  
ligenti Chronologiae omnium-  
que Cic. actorum & scriptorum  
observatione. Fr. ap. Nic.  
Bassee. 1568. 4.*

Libro de lectione et imitatione Ciceronis, ibid.  
et in Historia vitae ac mortis Tulliae filiae, Ien.  
1669. 4. Tulliae vita nescio quo auctore Parisiis  
edita 1681. 8. Vide sis etiam Petrum Lambecium  
lib. 2. de Bibl. Vindob. p. 726. seq. His accessit  
The History of the Life of M. T. Cicero, by  
Conyers Middleton. D. D. principal Librarykeeper  
of the University of Cambridge, the 2d. edition  
Lond. 1741. 8. in III. Volumes. in praef. p. XX.  
as I have borrowed my Plan, so I have drawn  
my materials also from Cicero. ubi speciatim lau-  
dat Epistolas ad familiares et ad Atticum, velut  
memorias istorum temporum. Huius loca quaedam  
examinavit Iac. Tunstallus in Epist. ad Middleton-  
num, de qua infra. Erudite per Middletonum com-  
pilatam scriptionem melius digessit Prevost, Gal-  
lus, in hist. Cic. gallice edita, quae secundo pro-  
diit Paris. 1749. 4 Voll. 8. His accessit Morabinus,  
scriptor vitae Cic. 1745 editae, de qua v. not.  
sq. Praeter hos ex Germanis Georg. Lud. Goldner  
edidit: *M. T. Cic. patria, genus, ingenium, studia,*  
*doctrina, mores, vita, facta, res gestae, mors; om-*  
*nia fere ex ipso Cic. ac D. Lambino collecta.* tum  
quoque eiusd. *scripta &c. istorumque editi. Gerae.*  
1712. 8. et I. M. Gesnerus in Chrestomathia Ciceron.  
Vinariae. 1717. 8. recusa Ienae 1734. 8. \*

Ciceronis effigies exstat in numo Magnesiorum  
apud Tristianum Tom. 2. 429. et in alio apud  
Lambecium Tom. 2. p. 726. ubi de corona eius laurea,  
quam in Cilicia promeruit p. 628. atque in veteri  
Cyriaci Matthaei marmore ibid. nec non in gemma

\* Nos Plutarchinam Ci-  
ceronis vitam, quam ut fon-  
tem ceteri omnes adiere, cor-  
reliorem & adornatam nova

cura G. C. Crollii, cum Bre-  
viario ad illam supplendam  
apto, praemittere maluimus.

apud Laur. Begerum p. 71. thesauri Palatini : et  
in veteri anaglypho porticus serenissimi Ducis  
magni Hetruriae apud Iac. Gronovium Tom. 3.  
thesauri Graecar. Antiquitatum. In plerisque tamen  
horum desideratur vestigium naevi sive cicerculi  
sub sinistro oculo , a quo Ciceronis nomen aiunt  
tulisse , et quem in veteri statua marmorea thora-  
cide Venetiis vidisse se testatur Georg. Hieron.  
Welschius in actis Naturae curiosor. Decade I.  
anno 3. p. 54. Sed nomen a maioribus transmissum,  
ab eiusmodi Ciceronis naeve derivandum esse me-  
rito negat Conyers Middleton History of the Life  
of Cicero T. I. p. 6 sq. rationem appellationis pe-  
tens , duce Plinio Hist. nat. XVIII. 3. 1. ex eo ,  
quod maiores in colendo hoc genere leguminis  
nobiles fuerint : ut Fabii , Lentuli &c. unde sculp-  
tores etiam veteres Ciceroni naevum eiusmodi af-  
fingentes reprehendit. De peregrinatione sua et  
studiis Cicero ipse in Bruto cap. 91. seq. cui iun-  
genda V. C. Io. Georgii Walchii amoenitates  
historicae et geographicae de Ciceronis peregrin-  
atione Lips. 1715. Quis vero non miretur Cice-  
ronem , hominem novum , de quo ipse fere glo-  
riatur Orat. pro L. Muraena c. 8. primo statim ,  
quo petere eum licebat , tempore , hoc est , tertio  
et quadragesimo anno aetatis , Consulatum Romae  
et petuisse et impetrasse et gessisse tanta cum auc-  
toritate ? Cf. Orat. contra Rullum c. 1. sq. et de Catilina  
a Cicerone Confule oppresso Excerpta Pei-  
resciana p. 797. et Oratt. Catilin. Plutarchum , Sallu-  
stium &c. Consulatus sui res gestas breviter celebrat  
Cicero in Pisonem c. 2. 3. et redditum ab exilio c.  
15. Historiam exilii Ciceroniani gallice diserto  
stile scripsit Morabinus Parif. 1725. 12. vitam in-

tegram pollicitus \* ususque notis ineditis Abbatis *de San Real* in librum tertium et quartum Epistolarum ad Atticum. Eadem anglice etiam versa prodiit Lond. 1726. 8. Ante Morabinum de exsilio Ciceronis latine scripserat *Hortensius Landus & Constant.* *Felicius Duratinus*, cuius alter etiam libellus exstat de gloriose eius reditu, quem composuit annos natus non plures quam septendecim. Observations de vita Ciceronis separato libello Lond. 1731. 8. nescio quo auctore Anglice editae. Numus in Ciceronis ex Cilicia triumphum apud *Begerum* Tom. 2. thesauri Brandenburg. Consulere etiam iuvabit eiusdem *Begeri* examen dubiorum quorundam, ubi Ciceronem Proconsulem non Ciliciae tantum, <sup>1</sup> sed Cypri quoque et (partis) Afiae fuisse disputat. Berolin. 1704. fol.

Uxorem ipsius *Terentiam* fuisse, sororem Fabiae Terentiae virginis Vestalis, notat Plutarchus in Catone minore p. 768. Filius Ciceronis, *Marcus Tullius*, ex paterno ingenio nihil admodum habuit praeter affectionem urbanitatis sive iaciendi ioci, cuius exemplum affert *Seneca* suasoria ultima. Non minus tamen ac pater Consulatum obtinuit, gefitque eodem quo Augustus an. U. C. 723 suffectus ex Idibus Sept. Et in consulatu suo auctor fuit, ut statuae, imagines, ornamenta M. Antonii omnia deiicerentur, fancireturque edicto, ut ex Antoniorum familia nemo Marcus nominaretur. Vide Plinium XXII. 6. et Plutarchum in Ciceronis

\* Promisso stetit. Edidit enim ille *Histoire de Ciceron, avec des remarques historiques & critiques.* Paris. 1745. 2 Voll. 4. & 1746, 2 Voll. 12. ap. Phil. Nic. Lottin.

1 Cicero de Divinatione libro & capite I. *Cilicum autem & Bithynorum gens, & his finitima Pamphylia, quibus nationibus praefuiimus ipsi. &c.*

patris vita p. 886. Appianum quarto Civilium p. 619. Dionem p. 456. seq. &c. Numus Ciceronis filii, triumviri monetalis, apud Lambecium Tom. 2. p. 738. Multi sunt in huius Ciceronis filii laudibus efferendis scriptores duo recentiores, quorum unus latine, alter gallice vitam eius consignarunt, et simul nonnulla attigerunt de rebus patris, fratrisque eius Quinti, et quem hic habebat filium cognominem, Quinti Ciceronis. Latinus quidem, raro obvius, scriptus diligenter terisque stilo, non indignus mihi visus, quem prelo iterum subiici curarem Hamburgi 1729. 8. una cum Andreae Schotti Cicerone patre a calumniis vindicato. Titulus libri est : <sup>1</sup> *M. Tullii Ciceronis vita, continens rerum cum ab aliis tum ab ipso domi forisque praeclare gestarum historiam*, Simone Vallamberto, *Heduo Avalonensi autore*. Paris. apud Barthol. Macaeum 1587. 8. Auctor posterioris, quae gallice lucem vidi Hagae 1715. 12. <sup>2</sup> *Histoire des quatre Cicerons*, ex Vallamberto profecit, licet vix usquam commemoret nomen, nisi p. 222. vitiose *Valember pro Vallamberto*.

De *Tullia Ciceronis filia et genero Dolabella* <sup>3</sup> eruditam observationem leges in Acerra Philologica Hallensi germanice a. 1715. 8. edita p. 533. seq. De fano, quod Tulliae filiae suae defunctae Cicero monumentum dedicasse se innuit XII. 25. 27. ad Atticum, dissertatio Nicolai Mongalti inserta Memoriis Academiae Regiae inscriptionum, vulgatis

<sup>1</sup> Henr. Io. Butemeisteri programma Witeb. 1720.

<sup>2</sup> Acta Erud. a 1715. p. 155. Journal littéraire, Tom. V. p. 118. Neue Bibl. XXXIX.

p. 188.

<sup>3</sup> Duo Dolabellae, de quibus Graevius ad Suetonii Caesarem p. 776.

gallice T. 2. p. 473. Sed de Ciceronis uxore, liberis, videndus inpr. Corradus in Quaestura.

In Academiam et thermas Ciceronis, quae oculis medebantur, argutum Epigramma *Laureae Tullii*, eius liberti, servatum est a Plinio XXX. 2.

De clade Ciceronis patris v. Plutarchus in vita eius p. 884. seq. Ioannes Antiochenus in excerptis Peirescianis p. 798. Valerius Max. V. 3. 4. Martialis III. 66. et quae ex Livio et Severo Seneca suasor. VII. e recentioribus Io. Conradus Dietericus in vita Augusti Imp. p. 78. seq. et Theodorus Gorallus sive Io. Clericus ad fragmentum Cornelii Severi dedere.

Desiderii Lignaminei, Patavini ad Io. Bapti-  
stam Primitellum Cenetensem descripta et Venetiis  
a. 1557. edita facies monumenti Ciceronis, re-  
pertī ut aiunt a. 1544. in Zacintho insula cum in-  
scriptione *M. Tylly Cicero Have et tu tertia Anto-  
nia*, cumque urna inscripta verbis *Mar. Tul. Ave,*  
et vasculo excipiendis lacrymis, recusa exhibetur in  
ampliss. Viri Burchardi Gotthelf Struvii Biblio-  
theca librorum variorum, theca I. Ien. 1719. 4.

S. Hieronymus (cuius Epistolae selectae sub Tullii Christiani nomine a Monacho quodam Benedictino vulgatae sunt Parisiis a. 1718, 12.) Eustochio suae Epist. 22. narrat, febricitanti sibi visum se coram divino tribunali vapulare, quod Ciceronianus magis esset quam Christianus. Pro re vere gesta acci-  
piens Blaesensis Epist. 140. B. Hieronymus, inquit,  
*fere usque ad internacionem flagellatus est ab Angelo,*  
*quia rhetorici lepore sermonis illectus vanitati operam*  
*dabat. In Corpore Canonico Can. legimus 7. distinet.*  
37. Legimus de B. Hieronymo, quod cum libros  
legeret Ciceronis, ab Angelo est correptus eo, quod  
vir Christianus paganorum figurantis intenderet. Aliis

somnium , quod ipse alibi firmat Hieronymus : aliis, ut Heurnanno<sup>1</sup>, merum est commentum Hieronymi. Sed nihil impedit, quo minus fuerit somnium ex iis , quibus videmur nobis vigilare et tamen somniamus , quod febricitantibus saepius accidere est notissimum.

II. Verissime prodidit Velleius I, 17. *perfectum profiae eloquentiae decus sub principe operis sui Tullio erupisse* : atque S. Hieronymus , *in arce eum Romanae stetisse eloquentiae*. Quae enim vis , quae suavitas , quanta copia in eius oratione , quae dignitas , quanta rursus abundantia rerum , honestas sententiarum ! cumque familiariter agit cum amicis ac necessariis suis , quantus in simplicitate inimitabili nitor , quantus delectus verborum ! ecquod porro doctrinae genus , quae pars , quam ille ingenio suo non dicam attigerit , sed mirifice illustrarit et amplificarit ! quid tam abstrusum aut difficile , quod pro illo usu rerum et doctrinae , qua abundabat , ubertate non potuerit explicare facillime atque quam pulcherrimis luminibus exornare ! Ex innumerabili autem multitudine eorum , quibus admirabilis semper Cicero visus est , Stephano Doleto etiam *Deus* , unum duntaxat adscribemus testimonium Plinii VII. 30. Hist. *Salve primus omnium parens Patriae appellate , primus in toga triumphum linguaeque lauream merite , & facundiae latinarumque litterarum parens* : atque ut dictator Caesar , hostis quondam tuus , de te scripsit , *omnium triumphorum lauream adepte maiorem , quanto plus est ingenii Romani terminos in tantum*

<sup>1</sup> Anno aetatis Hieronymi XXXII. vide Tillemont. Tom. XII. memor. Hist. Eccles. p.

24. sq. Cherubini a S. Iosepho apparatus Biblicalum T. I. p. 380. seq.

*promovisse, quam Imperii.* Antonii Schultingii erudita Oratio de *Iurisprudentia Ciceronis* subiuncta est viri illius clarissimi dissertationibus editis Franequ. a. 1708. 4. et recusa ad calcem dissertationum eius de recusatione iudicis Lugd. Bat. 1714. 4. nec non post Cuiacii, Ruperti et Bynkershoekii notas ad Pomponium de origine iuris p. 309 seq. Halae 1735. 4. Quamquam, Ciceronem ICtum non fuisse, disputat. Nempe non fuit professione, et qui ab aliis consulteretur et operam scribendo, cavendo, respondendo navaret, sed iuris peritum fuisse nemo negat: nam alias causas civiles in foro agere non potuisset. add. Cornelium van Bynkershoek in Opusculis varii argumenti, p. 83,--90. de quibus opusculis vide Acta Erud. a. 1720. p. 111. et 116. seq. Nicolai Harscheri diatribe de divinatione Ciceronis (Reip. mutationem praesagientis) in exemplum divinationis civilis proposita Marpurg. 1710. 8. Iac. Perizonii Oratio inauguralis lectione dignissima, de Ciceronis eruditione et industria, proposita in exemplum iuventuti Academicae. Franequ. 1682. Io. Sam. Bergeri Cicero Medicus. Witeb. 1711. Io. Casp. Haferungii Cicero Theologus. Witeb. 1701. Io. Philippi Treunerii diss. de Theologia Tullii, Jenae edita. Ex utroque horum, sed longe magis ex ipsa Ciceronis lectione constare puto, alienum fuisse ipsum ab errore Epicuri, quem illi impingit Io. Matthias Gesnerus, qui in Chrestomathia Ciceroniana, libro utilissimo alioqui et commendando adolescentibus p. 277. providentiam divinam ab Cicerone negatam fuisse affirmat.

Vim dictionis Tullianae innuere videtur Ennadius Epist. 5. scribens de Avieno: *Aurum Demosthenis & ferrum Ciceronis expendit.* Idem Epistola XVI: *Adhibita, credo, aduersus me fuisse et Tulliani*

*profunditas gurgitis, Chrysippi proprietas, Varronis elegantia.* Manus Ciceronis, sive chirographa eius, adhuc superabant temporibus Quintiliani, quo iudice X. 1. Tullius effinxit vim *Demosthenis, Platonis copiam, & Isocratis iucunditatem*; atque, ut ait Velleius, effecit, ne quorum arma vicerant Romani, eorum ingenio vincerentur. Hieronymus prologo quaestionum Hebr. Sed & Tullius, qui in arce eloquentiae Romanae stetit, rex oratorum & Latinae Linguae illustrator, repetundarum accusatur a Graecis. Similiter Regem eloquentiae appellat Paschasius Ratbertus prologo in Evangelium Matthei. Et Themistio Graeco scriptori Oratione XIII ad Gratianum Imp. p. 173. audit ο πανσοφος Τελλιος, ο της παλαιας Ρωμαιων σοφιας πηγεμων, qui nihil ignoraret, dux & auctor veteris Romanorum sapientiae.

### III. Ex scriptis Ciceronis exstant :

I. Libri II, qui vulgo de *inventione* inscribuntur, soli tulere aetatem e libris quatuor, quos fecerat adolescens de arte *Rhetorica*. Confer Vosfium de natura Rhetoricae cap. XIII, p. 91. In duos illos libros edita sunt Commentaria Rhetoris antiqui *Fabii Marii Victorini* (de quo infra libro IV) cum variis Ciceronis scriptis, Venet. 1490. Mediolani 1498. & separatim Parif. apud Rob. Stephanum 1537. 4. atque una cum variorum Commentariis in universos Rhetoricos Ciceronis libros, additis *Marini Becichemi* castigationibus Basil. 1541. fol. ac denique inter antiquos Rethores latinos collectos et editos a Francisco Pithoeo, Parif. 1599, 4.

*Libri duo de inventione*, ab initio sub titulo *Rhetoricae veteris* prodierunt, quemadmodum libri ad Herennium nuncupantur *Rhetoricae novae*. Itaque et a Georgio Trapezuntio per Rheticam veterem libri de *inventione* denotantur, non libri ad He-

rennium, ut sibi persuasit Balthasar Gibertus <sup>1</sup>: idque recte observatum in Diario Lipsiensi <sup>2</sup>. At verba haec, Commentarii in libros ad Herennium, non sunt Marii Fabii Victorini, qui in illos non scripsit, sed recentis scriptoris: *Nova Rhetorica* (vocabantur libri ad Herennium) *ad differentiam veteris*, quam in adolescentia scripsit [Cicero] de qua in *Oratore* ait: qui libri nobis exciderunt &c. Hes libros cum iis, qui sunt ad Herennium, primum editos habemus Venetiis 1470. fol. per Nicolaum Ienson, cum his versibus ad calcem:

*Emendata manu sunt exemplaria docta  
Omniboni, quem dat utraque lingua patrem.  
Haec eadem Ienson Veneta Nicolaus in urbe  
Formavit, Mauro sub Duce Christoforo.*

Eius editionis exemplum repetitum est saepe etiam cum ipsis illis versibus, ut Mediol. 1474. et sine loci et anni notatione 1476. Venet. 1479. per Phil. Condam, 1481. per Baptst. de Tortis, 1483. per Io. de Fortivio, item 1486. 1488. 1490. 1493. &c. Post correctio adhibita est paulatim textui horum librorum maxime ab Aldo in editione Rhetoricorum Ciceronis 1514. 8. qui tamen textum nimis multis locis, saepe non bene mutavit. Ante a. 1508. 8. Florentiae ap. Iuntam eosdem libros ediderat Laur. Romuleus Flor. qui textus fere consentit cum textu Mediolanensi Operum Ciceronis 1498. Ceterum textus Aldinus deinde basis omnium editionum factus est. Habemus et ed. s. l. et a. 8. quae videatur initio Sec. XV facta esse Lugduni. Nam iisdem literis et eodem insigni habemus editionem Quintiliani, quae se Lugdunensem profitetur.

<sup>1</sup> Jugemens sur les Auteurs de la Rhetorique. T. I. Paris. 1713.

<sup>2</sup> Neuer Bucher Saal XXIX. p. 319.

Posthaec hos libros edidere separatim, etiam emendare studuerunt *Nascimbenus Nascimbenius Venet.* 1563. 4. additis etiam notis, item *I. Mich. Brutus* Lugd. 1570. 12. *Recentissime* Lugd. B. 1761. 8. cum libris ad Herenn. editi sunt a *P. Burmanno sec. cum not. integris Lambini, Ursini, Gruteri, Iac. Gronovii et excerptis aliorum*, item *Lect. Var.* et notis postumis *Graevii*: additis in fine notis *Brutti*, et ineditis *Fr. Oudendorpii*, in quibus textus emendationes e libris scriptis et edd. pr. propositae sunt diligenter collatis.

2. *Dialogi III. de Oratore*, ad Q. Fratrem, quos ipse laudare non dubitavit: et est iis nihil excellentius in hoc genere: ad Att. XIII. 19. et Div. I, 9. Top. 25. 26.

Prima editio facta est in monasterio Sublacensi per Sweinhemium et Panarz. 1466 aut 1467. f. ut docet Mermannus Origg. typogr. p. 246. Secuta est altera Romana 1468. per Ulricum Han, de Viena. Hanc exceptit Waldarferiana a. 1470. quae et repetita est 1472. Huic proxima esse videtur Mediolanensis 1477. f. per Lavagniam. nam ea, quae extat f. l. et a. utrum praecesserit eam, an secuta sit, incertum est. mihi tamen illud placet, sed haec, quae est f. l. et a. correctior est superioribus, quam et Mediolanensis in Operibus 1498. plerumque secuta est. De ea v. et Maittaire T. IV. P. II. p. 750. Exemplum eius est in Bibliotheca Lips. Paullina. Porro 1478. editi sunt Venetiis per Andr. Katharensem, qua usus est Pearcius. Cum Oniniboni Comm. rursus 1485. f. Seculo sequente *Lucas Robia Flor.* 1414. 8. ap. Iuntas edidit. Basin fecisse videtur tex-tum Mediolanensem 1498 (in Opp.), quem passim tamen mutavit: sed moderatius Aldo, qui eodem anno hos libros inter ceteros rhetoricos edidit. Se-

paratim etiam edidit *Phil. Melanchthon Hagenoae* 1525. 8. cum notis brevibus, et, nescio quis, *Lipfiae* 1517. f. non certe indoctus vir. Post opera<sup>e</sup> pretium fecit *Iac. Lud. Strebæus*, qui hos libros edidit cum docto Commentario Paris. 1540. f. Paucis annis ante 1533. ibidem cum notis ediderat *Audomarus Talaeus* \*, ut alios obscuros mittamus. *Oxon.* 1696. 8. edidit hos libros *Thom. Cockmannus* additis excerptis lectionum e MSS. edd. et notulis; haud paulo melius *Zach. Pearcius*, post Episcopus *Oxon.* 1716. et iterum 1732. 8. emendato e MSS. et edd. vett. duabus textu, et locis difficilioribus explicatis. Nam *Iac. Proust* ed. in usum Delphini *Paris.* 1687. 4. repetita etiam *Oxon.* ea vero nihil est. \*\* Praeter *Strebæum* etiam alii loca quaedam vel emendare vel explicare instituerunt, ut *Mari-nus Bechhemus Scodrensis*, cuius castigationes exstant in Corpore Basileensi Commentariorum in Ciceronis libros Rhetoricos: correctiones ipsas fere in margine indicavit *Ascensius* ed. 1511. *Ben. Averanii* Diss. in L. I. de Or. in Opp. eius T. II multas res illustrant, quarum in iis mentio est: suntque lectu iucundae et utiles. Locum de iocis L. II. 54. separatim illustravit *Adr. Turnebus* \*\* \*. Libertus eius *M.T. Ti-ro* collegerat libros III iocorum Ciceronis, *If. Voss.* de hist. lat. I. 17. *Ionsius* de Script. Hist. Phil. III, 17. Multos e Plutarcho, Quintiliano, Macrobio aliisque collegit *F. Vavassor* de dictione ludicra p. 328.

\* In *Aud. Talaei* Opp. quae Basil. ex offic. Pernaea per *Conr. Waldkilch.* 1584 prodiere, reperiuntur Cic. III libri de *Orat.* Eisd. *Topica* & *Partitt. or.* cum *Talaei* commentt.

\*\* Novissime cum *animad-verisonibus* interpretum suisque edidit *Theoph. Cph. S. Harles.* Norimb. 1776. 8.

\*\*\* Ioci libb. II de *Orat.* explicati per *A. T. Paris.* 1555. 4.

f. adde Passeratii praefationem de ridiculis Ciceronis, et A. Schottum in Cicerone vindicato a calumniis c. 5. 6. Exstat horum librorum versio Italica *Ludovici Dulcis* cum paucis eius notis, subiectis ad calcem Voluminis, quae lucem videt Venetiis 1554, 12.\* Gallica versio Paris. 1673. 8.\*\* Anglica auctore G. P. Lond. 1725.\*\*\*

3. *Brutus* sive dialogus *de claris Oratoribus*, quem, fuisse olim, qui in tres partes secarent, cum unus a suo auctore sit editus, testatur Hieronymus praef. in Paralipom. Hunc primum ex Codice MS. descripsisse se, et in manus hominum dedisse gloriatur Blondus Flavius in Italia illustrata p. 346. Cum in *Quintilianis Institutionibus* et ad *Atticum Epistolis nostrorum Italiae adolescentium ingenia desudarent*, Gasparinus Bergomensis, Grammaticus Rhetorque celeberrimus, Venetiis meliori solito doctrina nonnullos eruditivit, plurimos ad ea imitanda studia incitavit: florabantque iam et fama celebrabantur Petrus Paulus Vergerius, Omnibonus schola Patavinus, et natu maiores Leonardus Aretinus, Robertus Rossus, Jacobus Angeli et Poggius ac Nic. Mediceus, quem praceptor domi assiduus erudierat Arethinus, Guarinusque Venetiis et Victorinus Feltrensis Mantuae multos cooperant erudire, cum Philippus Mediolanensis dux tertius, Casparinum a Bergomo subditum hominem invitum Mediolanensis edocendis Padua et Venetia evocavit. Ubi id

\* Repetita ibid. 1745. 4.  
Novissime vertit P. Contova S. I. *I tre libri del Oratore di M. T. C. recati in lingua Toscana a riscontro del testo Latino*. Mediol. 1771. T. III. 8.  
Auctor simul obis. variasque lectt. addidit.

\*\* Adde : Traduction du traité de l'Orateur de Cic. avec des remarques, par l'Abbé Collin. Paris. 1737. 12.

\*\*\* Germanicam versionem publici juris fecit Io. Mich. Heintze. Helm. 1762. 8.

maxime adiumenti studiis eloquentiae attulit, quod repertus Laude a summo viro Gerardo Landriano tunc ibi Episcopo multis maximisque in ruderibus Codex Ciceronis pervetus, et cuius literas vetustiores paucissimi scirent legere, ad eius perveniens manus interitum evasit. Continebat is codex praeter rhetoricon novos et veteres, qui habebantur, tres quoque de Oratore integerrimos, Brutum de Orr. claris & Oratorem ad Brutum M. Tullii Ciceronis: unde liberatus est bonus ipse vir Gasparinus ingenti, quem assumserat, labore supplendi, quoad poterat, librorum de Oratore defectus: sicut diu antea in Quintilianis institutionibus multo labore suppleverat. Et quum nullus Mediolani esset repertus, qui eius vetusti Codicis literam sciret legere, Cosmus quidam egregii ingenii, Cremonensis, tres de oratore libros primus transcripsit, multiplicataque inde exempla omnem Italiam desideratissimo Codice repleverunt. Nos vero cum publicis patriae tractandae negotiis adolescentes Mediolanum adiissimus, Brutum de claris Oratoribus primi omnium mirabili ardore ac celeritate transcripsimus, ex quo primum Veronam Guarino, post Leonardo Iustiniano Venetias misso, omnis Italia exemplis pariter est repleta. In hac narratione sunt quaedam partim falsa, ut mox videbimus, partim incerta. Nam in hoc quidem, de quo nunc agitur, contrarium habet Decembrius in Polit. lit. p. 33. qui primum innotuisse Brutum, ait, per Guarinum Veronensem: sed id non multum refert.

Typographorum quidem arte primum publicatus est Romae per Sweinhemium et Panartium, una cum ceteris minoribus rhetorica libellis: idque corpusculum repetitum est, ut putamus Venet. 1485 ap. Andream Asculanum. Separatim postea editus non est. Proprium enarratorem habuit insignem Seb. Corradum, cuius Comm. editus est Flor. 1552. Exstat et

*Coelii Sec. Curionis Comm.* editus Basil. 1564. Ad-dantur *Io. Rivii Castigationes*, qui editione Rom. usus est et Veneta: ut taceamus *Aul. Ant. Palmyreni Scholia*, quae in Collectione Basil. reperiuntur. Idem Brutus Gallice a *Girio* versus est Paris. 1670. 12. exstantque et Entretiens de Ciceron sur les Orateurs illustres, Paris. 1725. c. selectis e Vet. Test. historiis in usum scholarum. Mem. de Trev. 1725. p. 1207. et cum *Or. Anglice a M.L. Jones* Lond. 1776. 8.

4. *Orator sive de optimo genere dicendi*, ad M. Brutum scriptus est A. U. 708. cum M. Brutus Galliam cis Alpes teneret. Vide Henr. Norisium ad *Cenotaphia Pisana* p. 271. Exemplum primum reper-tum est a *Gerardo Landriano*, Laudis Pompeiae Episcopo, missumque *Gasparino Barzizo*, ut describeretur et corrigeretur. Sunt, qui hoc de libris de Oratore tribus tradant, etiam veteres, *Sabellicus* de L. L. reparatione, et *Blondus* ante memoratus, item ipse *Furiettus*, vitae Barziziana scriptor. Sed Barzizius ipse in epistola ad *Gerardum*, in qua ei gratias agit, et apographum (a *Cosmo Cremonense* factum) mittit, diserte *oratorem* appellat, eumque unum. In eadem Epistola est descriptio Codicis, quem vocat *vetustissimum*, sed paene ad nullum usum aptum. Ex eo porro exemplo, sic descripto, omnia alia et scripta et formulis expressa exempla fluxere: unde de textu eius libri iudicare in promtu est.

Editiones antiquissimae sunt eaedem, quae Brutis quas secutae sunt eae, quae sunt in universorum Ciceronianorum Corporibus, Mediolanensi &c. Praeter has habemus Lipsiensem, factam a. 1515, f. ab *Hermanno Tulichio*, ex ed. Rom. factam maxime, variis Lecht. in marginem reiectis: Parisiensem 1542. 4. ap. Fr. Gryphium: quae tamen nihil

profuerit cuiquam. Profuere ei libro *Sirebaeus*, *Victor Pisanus*, *Io. Rivius et Melanchthon*, quorum notae sunt in Corpore Comm. Basileensi.

5. *Topica* ad C. Trebatium ICtum primum cum Oratore edita sunt Romae et Venetiis. Separatim a ceteris cum prodiere, fere adiunctum habuere *Boeckii* Commentarium, ut Paris. 1542. et 1547. 1557. 1561. 4. Sic et *Phil. Melanchthon* edidit additis Scholiis suis, Viteb. 1524. 8; et Hagenoae 1533. 8. Illustrarunt *Topica* etiam *Achilles Stadius*, qui cum eruditis notis *Topica* edidit, Lovan. 1552. 8. atque *Antonius Goveanus*, Paris. 1545. 8. Ed. Camerarii c. commentatiunculis. Lips. 1549, cuius dedicatio scripta 1544. Appendix quoque ad explanationes Statii exstat edit. Antverp. 1553. 8. Alios interpres reperies in Collectione Basileensi, ut *Georgium Vallam*, *Io. Visorium*, *Barth. Latomum* et *Hegendorphium*. Cum *Io. Visorii* et *Barth. Latomi*, Comm. prodiere Lugd. 1541. 8. Cum commentariis *Georgii Vallae*, fine anno et loco fol. *Coelii Secundi Curnonis* in *Topica* commentarius Basil. 1553. 8. Denique *Ioannes a Reberteria Turonensis*, ICtus Parisiensis, dignus Duarenii discipulus, vulgavit libros quatuor *Topicon iuris*, Paris. 1575. 8. Viteb. 1590. 8. quibus Ciceronis *Topica* illustrantur suppleturque.

6. *De partitione Oratoria Dialogus*, quo filius e patre Cicerone latine accipit, quae eidem de ratione dicendi graece tradiderat. Hunc coniecturis quibusdam, sed levibus, iudice Vossio, Ciceronis esse negat Angelus Decembrius lib. I. de Politia litteraria p. 62. *Maioragii* Commentarius in Tullii partitiones lucem videt Venetiis 1587. 4. Scripsere etiam in hunc librum *Io. Sturmius*, Rhetor sua aeta te insignis, (cuius 4 dialogi partitionum contextum

habent insertum , Arg. 1539 et 1558. 8. Deinde accessit I. Benzii epitome partitionum M. T. C. cura Ic. Sturmii recognita et perspicuis exemplis illustrata. Arg. 1593. 8.) *Vitus Amerbachius*, *Coelius Secundus Curio*, et, qui in collectione commentariorum Basileensi occurunt *Georgius Valla*, *Iac. Ludovicus Strebaeus*, *Barthol. Latomus*, (Colon. 1558. 12.) et *Christophorus Hegendorphius*. Prodiere etiam partitiones cum tabulis Claudii Minois Paris. 1582. 4. Editiones primae sunt eadem , quae Oratoris et Topicorum. Existat vero etiam ed. a. 1472. in qua Topicis iunguntur , v. Maittaire Ann. typ. T. III. p. 319. T. V. p. 282.

7. *De optimo genere Oratorum* brevis disputatio, quam Cicero prologi vicem <sup>1</sup> praemiserat *Orationibus contrariis Demosthenis atque Aeschinis latine a se conversis*. Hanc translationem intercidisse, vehementer dolendum est, quoniam Cicero illas Orationes, velut exemplar Atticae eiusque consummatissimae eloquentiae, de industria delegerat , ac Romanis suis ad imitandum proposuerat. *Achillis Statii Commentarius* in hunc libellum editus est Lovani 1552. 8. *Io. Antonii Viperani Antv.* 1581. 8.\*

I Asconius Pedianus in Orat. pro Milone tamen librum appellat: *Non tantum ex Oratione & Annalibus, sed etiam ex libro* appareat, qui Ciceronis nomine inscribitur de optimo genere Oratorum. Respicit autem haec verba, quae capite IV. leguntur. Sed si eodem modo putant, exercitu in foro & in omnibus templis quae circum

forum sunt collocata , dici pro Milone decuisse , ut si de re privata ad unum iudicem diceremus , vim eloquentiae sua facultate , non rei natura metiuntur.

\* *I. P. Rami* praelect. in Cic. de opt. gen. or. prodiere Basil. ap. Pernam. 1575. 4. & accessere eiusd. prael. in octo consulares oratt. ibid. 1580. 4.

8. Libri quatuor Rheticorum ad C. Herennium<sup>1</sup> cognatum ac familiarem suum, quos Ciceroni diserte tribuit S. Hieronymus libro I. in Rufinum atque praefat. ad Abdiam, itemque non uno loco Priscianus, sed et Lopus Ferrariensis (ut videtur) Epistola prima ad Eginhartum: atque Ciceroni praeter Antonium Marinellum aliosque singularibus diatribis vindicatum ivere Georgius Caspar Kirchmaierus, et Io. Petrus Ludovicus in Academia Hallensi Professor, Leonardus Aretinus, Dionysius Lambinus, Marinus Becichemus Scodrensis, qui ab adolescente scriptos<sup>2</sup> putat in diss. quod libri ad Herennium a familia Ciceronis amoveri non debeant, et Angelus Bucinensis in defensione pro Rheticis ad C. Herennium Philippo Strozae dicata. Becichemi et Eucinensis diatribae occurunt in collectione Commentariorum Basileensi in libros Ciceronis Rheticos. Audacter etiam pro Cicerone auctore pugnat Tranquillus Tamyras in Hexasticho, quod in antiquis editionibus legitur:

*Dic quibus, o Lector, validis rationibus instes  
Hoc non esse, sacri est quod Ciceronis opus?  
Non hic ingenium, non specias flumina linguae?  
Non cernis variis dicta ministeriis?  
Qui negat hoc, caeli tandem, reor, astra vetabit,  
Et maris esse undas, et gramen esse soli.*

Sed viri in lectione Ciceronis versatissimi, tum avorum nostrorum memoria, tum nostra aetate, e

<sup>1</sup> Lib. IV. c. 69. Nam & simul libenter exercemur, propter amicitiam, cuius initium cognatio fecit, cetera Philosophiae ratio confirmavit.

<sup>2</sup> Huic sententiae repugnat quod lib. I. cap. 20. exempli

loco affertur: *Tullius heres meus Terentiae uxori meae triginta pondo vasorum det quae volet. Atqui Tullius Ciceroni natus anno aetatis quadragesimo tertio.*

quibus vel unum iuvat honoris causa appellare Conr. Samuel Schurtzfleischium, communibus suffragiis, Tullio hos libros abrogant, tribuuntque vel *L. Cornificio*<sup>1</sup> patri, ad quem Ciceronis Epistolae exstant, vel *L. Cornificio filio*, qui anno U. C. 719. Consul fuit, et de Rhetorica arte scripsisse e Quintiliano intelligitur: vel *Ciceroni filio*,<sup>2</sup> aut *Laureae Tullii Ciceronis liberto*, qui et ipse *Cicero* vocabatur, vel *Tullio Tironi*, quem inter Rethores memorant Plinius ac Suetonius: vel *M. Gallioni*<sup>3</sup>, cuius nomen in antiquissimo codice librorum ad Herennium Romano, licet ab alia manu deletum, comparuisse refert Aldus Manutius Pauli F. Epistola ad A. Naugerium: vel *Virginio Rufo*,<sup>4</sup> quem voce et scriptis eloquentiam docuisse Neronis temporibus, tradunt Tacitus et Quintilianus: vel *Timolao* denique, uni e XXX Tyrannis, quem ad *Herennium fratrem* scripsisse auctor est Trebellius Pollio. At enim quicumque demum sit auctor, quem uti Cicernem esse vehementer negat, ita non mediocriter doctum virum fuisse & Rhetorica arte diligenter scrip-

<sup>1</sup> Ita P. Victorius, Paulus & Aldus Manutii, Adr. Turnebus, Muretus, Sigonius, Riccobonus in disl. advers. Marium Martium, Barthius in adversar. & Glandorpius in Onomast. And. Dounaeus ad Chrysost. T. VIII. p. 340. Vide etiam Io. Rainoldum praelect. XX. de libris Apocryphis Tom. I. p. 166. & Vossium de natura Rhetoricae cap. XIII. p. 92. 93. qui pro Cornificio filio, librorum ad Herennium auctore, disputat.

<sup>2</sup> Haec sententia placuit Nascimbenio in lib. 2. Cic. de invent. ut eidem Vossio notatum.

<sup>3</sup> Gallionis inter Rethores meinit Seneca & auctor Dialogi de causis corruptae eloquentiae. Idem forte ad quem Ovidius IV. 11. de Ponto. Gallioni libros ad Herennium tribuit & Iul. Caesar Scaliger.

<sup>4</sup> Haec Raphaelis Regii conjectura est in diff. an Rhetorica falso sit inscripta ad Herenrium.

*esse*, recte profitetur Franc. Floridus Sabinus libro I. lectionum subseciv. cap. IV. [ pag. 1033. T. 1. facis Artium Gruterianaæ ] certe non longe absuisse ab aetate Ciceronis, libenter mihi persuadeo : tametsi ante aetatem Augusti scriptos non esse ex Gellii XIII, 6. colligit Christianus Falsterus parte 3. amoenitatum philol. p. 286. Herennius, ad quem scripti sunt hi libri, qui fuerit, dici non potest. Contra non Cicerone modo, sed etiam Cornelio Celso et vel mediocri Celsi auditore [ qui et ipse de Rhetorica scripsit ] indignos esse ad Herennium libros disputat Franciscus Floridus Sabinus libro I. lect. subseciv. c. 4 Tom. I. Lampadis artium Gruterianaæ p. 1037. Sed totam hanc rem, qui accurate explicatam et disputatam cognoscere velit, adeat P. Burmannum Secundum V. C. in praefatione ad editionem eorum librorum, de qua mox. Quisquis vero fuit auctor, ( certe non Cicero ), doctore Hermete se usum innuit lib. 1. cap. XI. *Causarum constitutiones alii quatuor fecerunt, noster Hermetes tres putavit esse.*

Horum librorum editiones antiquae pleraque sunt eadem, quae librorum de Inventione, quibus cum sub titulo *Rheticorum veterum et novorum coniuncti* sunt. Separatim editorum exempla haec cognovimus. 1.) Romae, a. 1474. fol. per Vendelinum de Vila in artibus magistrum. 2.) 1477. f. Paris. et Papiae, 3.] Mediol. 1479. per Henr. de Cataneis, ap. Scinzeler et Pachel. 4.] Friburg. a. 1492. 4. editore Io. Curto de Eberspach. 5.] f. l. et a. f. eiusdem seculi, sed sine dubio in Germania facta, cuius exemplum e bibliotheca Comitis Wernigerodani missum est. 6.] Cracoviensis a. 1500. 4. cum Praef. Raph. Regii, unde patet esse repetitionem exempli Italici Io. Mich. Toxitae, cum ipsius notis Basil. 1558. 8. 7.] Gi-

*berti Longolii cum brevibus scholiis in margine Antverp. 1536. 8.) Ulr. Zafii, Bas. 1537. 8.*

Interpretes multos nacti sunt hi libri, toties ad usum studiosorum eloquentiae editi, fere eosdem cum libris de Inventione. Veteres reperiuntur in Collectione Basileensi: qui vix hodie leguntur. De ceteris, qui exemplis suis notas addidere, dicere separatum, non est necesse.

Corpus quoddam facere vel plurium vel universorum horum Operum rhetoriconum mature coeptum est: primum in libris ad *Herennium et de Inventione*: deinde in ceteris minoribus libris, *Bruto*, *Oratore*, *Topicis*, *Partitionibus*, et a Sweinhemio et Andr. Asculano. Ad extreum omnes coniuncti sunt, primum ab *Aldo seniore Venet. 1514. 8. mai.* Cuius textus pro basi deinde fuit editoribus horum librorum; idque institutum imitati sunt alii extra corpus universorum operum, *Venet. 1533. 8. \* Genev. 1621. 8. cum Lambini notis. Paris. 1681. 4. in usum Delphini a Iac. Proust.*

---

\* Adde c. n. Varr. Basil. 1541 f. Par. ap. R. Steph. ex offic. Winter. & Plat. 1546. 16. Colon. 1557. 12.

INCERTI AUCTORIS  
 S E U  
 UT DOCTIS QUIBUSDAM VIDETUR  
**C O R N I F I C I I**  
 R H E T O R I C O R U M  
 A D  
**C. H E R E N N I U M**  
 LIBER PRIMUS.

---

A R G U M E N T U M.

Libro primo Cornificius, sive quisquis librorum horum auctor est, de quo parum utique inter doctos constat, hoc inquam libro agit, pauca praefatus, de oratoris officio, tribus causarum generibus, c. 2. et de inventionis partibus, de exordio c. 3 - 7. de narratione c. 8 - 10. et de confirmatione et confutatione, quae quoniam ex causae cuiusque constitutione pendet, de tribus constitutionibus causarum, coniecturali, legitima et iuridicali, praecipit c. 11 - 17.

**E**tsi negotiis familiaribus impediti, vix satis otium 1 studio suppeditare possumus, et id ipsum, quod datur otii, libentius in philosophia consumere consuevimus; tamen tua nos, C. Herenni, voluntas commovit, ut de ratione dicendi conscriberemus; ne aut tua causa noluisse nos, aut fugisse laborem putares. Et eo studiosius hoc negotium suscepimus, quod te non sine causa velle cognoscere rhetoricam intelligebamus. Non enim parum in se fructus habet copia dicendi, et commoditas orationis, si recta intelligentia et definita animi moderatione gubernetur. Quas ob res illa, quae Graeci scriptores

inanis arrogantiae causa sibi assumferunt, reliquimus. Nam illi, ne parum multa scisse viderentur, ea conquisierunt, quae nihil attinebant, ut ars difficilior cognitu putaretur: nos autem ea, quae videbantur ad rationem dicendi pertinere, sumsimus. non enim spe quaestus, aut gloria commoti venimus ad scribendum, quemadmodum ceteri; sed ut industria nostra tuae morem geramus voluntati. Nunc, ne nimium longa sumatur oratio, de re dicere incipiemos; si te unum illud monuerimus, artem sine affiduitate dicendi non multum iuvare: ut intelligas, hanc rationem praeceptionis ad exercitationem accommodari oportere.

2. Oratoris officium est, de his rebus posse dicere, quae res ad usum civilem moribus ac legibus constitutae sunt, cum assensione auditorum, quoad eius fieri poterit. Tria sunt genera causarum, quae recipere debet orator: demonstrativum, deliberativum, iudiciale. Demonstrativum est, quod tribuitur in alicuius certae personae laudem, vel vituperationem. deliberativum est, quod in consultatione positum, habet in se suasionem et dissuasionem. iudiciale est, quod positum in controversia, habet accusationem, aut petitionem cum defensione. Nunc, quas res oratorem habere oporteat, docebimus: deinde, quo modo has causas tractari convenient, ostendemus. Oportet igitur esse in oratore inventionem, dispositionem, elocutionem, memoriam, et pronuntiationem. Inventio est excogitatio rerum verarum aut verisimilium, quae causam probabilem reddant. Dispositio est ordo et distributio rerum; quae demonstrat, quid, quibus in locis sit collocandum. Elocutio est idoneorum verborum et sententiarum ad inventionem accommodatio. Memoria est firma animi rerum et verborum, et dispositio-

nis perceptio. Pronuntiatio est vocis, vultus, gestus moderatio cum venustate. Haec omnia tribus rebus assequi poterimus, arte, imitatione, exercitatione. Ars est praeceptio, quae dat certam viam rationemque dicendi. Imitatio est, qua impellimur cum diligenti ratione, ut aliquorum similes in dicens velimus esse. Exercitatio est assiduus usus consuetudoque dicendi.

Quoniam igitur demonstratum est, quas causas oratorem recipere, quasque res habere conveniret, nunc, quemadmodum ad orationem possint oratoris officia accommodari, dicendum videtur. Inventione in sex partes orationis consumitur, in exordium, narrationem, divisionem, confirmationem, confutationem, conclusionem. Exordium est principium orationis, per quod animus auditoris constituitur ad audiendum. Narratio est rerum gestarum, aut perinde ut gestarum, expositio. Divisio est, per quam aperimus, quid conveniat, quid in controversia sit; et per quam exponimus, quibus de rebus simus dicturi. Confirmatio est nostrorum argumentorum expositio cum asseveratione. Confutatio est contrariorum locorum dissolutio. Conclusio est artificiosus terminus orationis. Nunc, quoniam una cum oratoris officiis, quo res cognitu facilior esset, producti sumus, ut de orationis partibus loqueremur, et eas ad inventionis rationem accommodaremus; de exordio primum dicendum videtur.

Causa posita, quo commodius exordiri possimus, genus causae considerandum est. Genera causarum sunt quatuor, honestum, turpe, dubium, humile. Honestum causae genus putatur, cum aut id defendimus, quod ab omnibus defendendum videtur; aut id oppugnamus, quod ab omnibus videtur op-

pugnari debere: ut pro viro forti contra parricidam. Turpe genus intelligitur, cum aut honesta res oppugnatur, aut defenditur turpis. Dubium genus est, cum habet in se causa et honestatis et turpitudinis partem. Humile genus est, quum contemta res affertur. Cum haec ita sint, conveniet exordiorum rationem ad genus causae accommodari. Exordiorum duo sunt genera, Principium, quod Graece προσμένον appellatur; et insinuatio, quae ερόδος nominatur.

Principium est, quum statim auditoris animum nobis idoneum reddimus ad audiendum. id ita sumit, ut attentos, ut dociles, ut benevolos auditores habere possimus. Si genus causae dubium habebimus, a benevolentia principium constituemus, ne quid illa turpitudinis pars nobis obesse possit. Sin humile erit genus causae, faciemus attentos. Sin turpe causae genus erit, insinuatione utendum est, de qua posterius dicemus, nisi quid nauci erimus, quare adversarios criminando, benevolentiam capere possimus. Sin honestum causae genus erit, licet recte vel uti, vel non uti principio. Si uti volemus, aut id oportebit ostendere, quare causa sit honesta, aut breviter, quibus de rebus simus dicturi, exponere. Si principio uti nolemus, a lege, a scriptura, aut ab aliquo firmissimo nostrae causae adiumento principium capere oportebit. Quoniam igitur docilem, benevolum, attentum habere auditorem volumus, quomodo quidque confici possit, apriemus. Dociles auditores habere poterimus, si summam causae breviter exponemus, et si attentos eos faciemus. nam docilis est is, qui attente vult audire. Attentos habebimus, si pollicebimur, nos de rebus magnis, novis, inusitatis verba facturos, aut de iis rebus, quae ad rem. pertineant, aut ad eos ipsos,

qui audient, aut ad Deorum immortalium religionem: et, si rogabimus, ut attente audiant: et si numero exponemus res, quibus de rebus dicturi sumus. Benevolos auditores facere quatuor modis possumus, a nostra, ab adversariorum, ab auditorum persona, et a rebus ipsis. A nostra persona benevolentiam contrahemus, si nostrum officium sine arrogantia laudabimus, aut in remp. quales fuerimus, aut in parentes, aut in amicos, aut in eos ipsos, qui audiunt, referemus, dum haec omnia ad eam ipsam rem, de qua agitur, sint accommodata. Item si nostra incommoda proferemus, inopiam, solitudinem, calamitatem: et si orabimus, ut nobis sint auxilio; simul ostendemus, nos in aliis spem noluisse habere. Ab adversariorum persona benevolentia captabitur, si eos in odium, in invidiam, in contemtionem adducemus. In odium rapiemus, si quod eorum spurce, superbe, perfidiose, crudeliter, confidenter, malitiose, flagitiose factum proferemus. In invidiam trahemus, si vim, si potentiam, factionem, divitias, incontinentiam, nobilitatem, clientelas, hospitium, sodalitatem, affinitates adversariorum proferemus, et his adiumentis magis, quam veritati eos confidere aperiemus. In contemtionem adducemus, si inertiam, ignaviam, desidiam, luxuriam adversariorum proferemus. Ab auditorum persona benevolentia colligetur, si res eorum fortiter, sapienter, mansuete, magnifice iudicatas proferemus: et si, quae de iis existimatio, quae iudicij exspectatio fit, aperiemus. Ab rebus ipsis benevolum efficiemus auditorem, si nostram causam laudando extollemus, adversariorum per contemtionem deprimemus.

Deinceps de insinuatione aperiendum est. Tria sunt tempora, quibus principio uti non possumus,

quae diligenter sunt consideranda: aut cum turpem causam habemus, hoc est, cum ipsa res animum auditoris a nobis alienat; aut cum animus auditoris persuasus videtur esse ab iis, qui ante contra dixerunt; aut cum defessus est eos audiendo, qui ante dixerunt. Si causa turpitudinem habebit, exordiri poterimus his rationibus: rem, non hominem; aut hominem, non rem spectari oportere: non placere nobis ipsis, quae facta dicantur ab adversariis, et esse indigna, aut nefaria. Deinde cum diu rem auxerimus, nihil simile a nobis factum ostendemus; aut aliquorum iudicium de simili causa, aut de eadem, aut de minore, aut de maiore proferemus. Deinde ad nostram causam pedetentim accedemus, et similitudinem conferemus. Item si negabimus, nos de adversariis, aut de aliqua re eorum dicturos, et tamen occulte dicemus interiectione verborum. Si persuasus auditor fuerit, id est, si oratio adversariorum auditoribus fidem fecerit: (neque enim non facile scire poterimus, quoniam non sumus nescii, quibus rebus fides fieri soleat:) ergo si fidem factam putabimus, his nos rebus insinuabimus ad causam: de eo, quod adversarii firmissimum sibi adiumentum putaverint, primum nos dicturos pollicebimur; aut ab adversarii dicto exordiemur, et ab eo maxime, quod ille nuperrime dixerit; aut dubitatione utemur, quid potissimum dicamus, aut cui loco primum respondeamus, cum admiratione. Si defessi erunt audiendo; ab aliqua re, quae risum movere possit, exordiemur, ab apolo, a fabula verisimili, imitatione, depravatione, inversione, ambiguo, suspicione, irrisione, stultitia, exsuperatione, collatione, litterarum mutatione; praeterea exspectatione, similitudine, novitate, historia, versu; aut ab alicuius interpellatione, aut arrisione; et si pro-

miserimus, aliter, ac parati fuerimus, nos esse dic-turos; nos non eodem modo, ut ceteri soleant, verba facturos; quid alii soleant, quid nos facturi simus, breviter exponemus. Inter insinuationem et principium hoc interest. Principium huiusmodi debet esse, ut statim apertis rationibus, quibus praescripsimus, aut benevolum, aut attentum, aut docilem faciamus auditorem. at insinuatio eiusmodi debet esse, ut occulte per dissimulationem eadem illa omnia conficiamus, ut ad eandem commoditatem in dicendi opere pervenire possimus. Verum hae tres utilitates tametsi in tota oratione sunt comparanda, hoc est, ut auditores sese perpetuo nobis attentos, dociles, benevolos praebeant; tamen id per exordium causae maxime comparandum est. Nunc, ne quando vitioso exordio utamur, quae viae vitanda sint, docebo. In exordienda causa servandum est, ut lenis sit sermo, et usitata verborum consuetudo, ut non apparata oratio esse videatur. Vitiosum exordium est, quod in plures causas potest accommodari, quod *vulgare* dicitur. item vitiosum est, quo nihilo minus adversarius potest uti, quod *commune* appellatur. item illud, quo (leviter commutato) adversarius poterit uti ex contrario. item vitiosum est, quod nimium appareat verbis compositum, aut nimis longum est, et quod non ex ipsa causa natum videtur, (quod *separatum* vocatur; in quo etiam *translatum* includitur,) ut proprie cohaereat cum narratione: et quod neque benevolum, neque docilem, neque attentum facit auditorem. De exordio satis dictum est: deinceps ad narrationem transeamus.

Narrationum tria sunt genera. Unum est, cum exponimus rem gestam, et unumquodque trahimus ad utilitatem nostram, vincendi causa: quod pertinet

ad eas causas, de quibus iudicium futurum est. Alterum genus narrationis est, quod intercurrit non-nunquam fidei, aut criminationis, aut transitionis, aut alicuius apparationis, vel laudationis causa. Tertium genus est id, quod a causa civili remotum est: in quo tamen exerceri convenit, quo commodius illas superiores narrationes in causis tractare possimus. Eius narrationis duo sunt genera: unum, quod in negotiis; alterum, quod in personis positum est. Id, quod in negotiorum expositione positum est, tres habet partes, fabulam, historiam, argumentum. Fabula est, quae neque veras, neque verisimiles continet res, ut hae, quae tragoedii traditae sunt. Historia est res gesta, sed ab aetatis nostrae memoria remota. Argumentum est facta res, quae tamen fieri potuit; velut argumenta comoediarum. Illud genus narrationis, quod in personis positum est, debet habere sermonis festivitatem, animorum dissimilitudinem, gravitatem, levitatem, spem, metum, suspicionem, desiderium, dissimulationem, misericordiam, rerum varietates, fortunae commutationem, insperatum incommodum, subitam laetitiam, iucundum exitum rerum. Verum haec in exercendo transfigentur. illud, quod ad veritatem pertinet, quomodo tractari conveniat, aperiemus.

9 Tres convenit res habere narrationem, ut brevis, ut dilucida, ut verisimilis sit: quae quoniam fieri oportere scimus, quemadmodum faciamus, cognoscendum est. Rem breviter narrare poterimus, si inde incipiemus narrare, unde necesse erit: et si non ab ultimo initio repetere volemus: et si summatim, non particulatim narrabimus: et si non ad extremum, sed usque eo, quo opus erit, persequemur: et si transitionibus nullis utemur: et si non deerrabimus ab eo, quod coeperimus exponere; et si exi-

tus rerum ita ponemus, ut ante quoque quae facta sunt, sciri possint, tametsi nos reticuerimus: quod genus est, si dicam, me ex provincia rediisse, profectum quoque in provinciam intelligatur. Et omnino non modo id, quod obest, sed etiam id, quod neque obest, neque adiuvat, satius est praeterire. Et ne bis aut saepius idem dicamus, cavendum est: etiam ne id, quod semel supra diximus, deinceps dicamus, hoc modo:

*Athenis Megaram vesperi advenit Simo :*

*Ubi advenit Megaram, insidias fecit virginī :*

*Insidias postquam fecit, vim in loco attulit.*

Rem dilucide narrabimus, si, ut quidque primum gestum erit, ita primum exponemus, et rerum ac temporum ordinem conservabimus, ut gestae res erunt, aut ut potuisse geri videbuntur. Hic erit considerandum, ne quid perturbate, ne quid contorte, ne quid ambigue, ne quid nove dicamus, ne quam in aliam rem transeamus, ne ab ultimo repetamus, ne longe persequamur, ne quid, quod ad rem pertineat, praetereamus; et si sequemur ea, quae de brevitate paecepta sunt. nam quo brevior, eo dilucidior et cognitu facilior narratio fiet. Verisimilis narratio erit, si, ut mos, ut opinio, ut natura postulat, dicemus; si spatia temporum, personarum dignitates, consiliorum rationes, locorum opportunitates constabunt: ne refelli possit, aut temporis parum fuisse, aut causam nullam, aut locum idoneum non fuisse, aut homines ipsos facere, aut pati non potuisse. Si vera res erit, nihilo minus haec omnia narrando conservanda sunt: nam saepe veritas, nisi haec servata sint, fidem facere non potest: sin erit ficta, eo magis erunt conservanda. De iis rebus caute configendum est, quibus in rebus

tabulae , aut alicuius firma auctoritas , videbitur interfuisse. Adhuc quae dicta sunt , arbitror mihi constare cum ceteris artis scriptoribus , nisi quia de insinuationibus nova excogitavimus , quod eas soli nos , praeter ceteros , in tria tempora divisimus , ut plane certam viam et perspicuam rationem exordiorum 10 haberemus. Nunc , quod reliquum est , quoniam de rerum inventione disputandum est , in qua singulare consumitur oratoris officium , dabimus operam , ut nihilo minus industrie , quam rei utilitas posculabit , quae si videamur ; si prius pauca de causarum divisione dixerimus.

Causarum divisio in duas partes distributa est. Primum enim perorata narratione debemus aperire , quid nobis conveniat cum adversariis , et si ea , quae nobis utilia erunt , convenient , quid in controversia relinquatur , hoc modo : *Interfectam esse matrem ab Oreste , convenit mihi cum adversariis : iuvene fecerit , et licueritne facere , id est in controversia . Item e contrario , Agamemnonem esse a Clytaemnestra occisum confitentur : cum id ita sit , me ulisci parentem negant oportuisse . Deinde , quum hoc fecerimus , distributione uti debemus . Ea dividitur in duas partes , enumerationem et expositionem . Enumeratione utemur , cum dicemus numero , quot de rebus dicturi sumus . Eam plus quam trium partium numero esse non oportet . nam et periculosest , ne quando plus minusve dicamus , et suspicionem affert auditori meditationis et artificii ; quae res fidem abrogat orationi . Expositio est , cum res , de quibus dicturi sumus , exponimus breviter et absolute .*

Nunc ad confirmationem et confutationem transeamus. Tota spes vincendi , ratioque persuadendi posita est in confirmatione et confutatione . nam

cum adiumenta nostra exposuerimus, contrariaque dissolverimus, absolute nimirum munus oratorium confecerimus. Utrumque igitur facere poterimus, si constitutionem causae cognoverimus. Causarum constitutiones alii quatuor fecerunt: noster doctor Hermes tres putavit esse; non ut de illorum quicquam detraheret inventione, sed ut ostenderet, id, quod oportuisset simpliciter ac singulari modo docere, illos distribuisse dupliciter et bipertito. Constitutio est prima deprecatio defensoris cum accusatoris insimulatione coniuncta. Constitutiones itaque, ut ante diximus, tres sunt, conjecturalis, legitima, iuridicalis. Conjecturalis est, cum de facto controversia est, hoc modo: *Ajax in silva, postquam rescivit, quae fecisset per insaniam, gladio incubuit. Ulysses intervenit: occisum conspicatur: e corpore tellum cruentum educit. Teucer intervenit; fratrem occisum et inimicum fratri cum gladio cruento videt; capit is arcessit.* Hic, quoniam conjectura verum quaeritur, de facto erit controversia, et ex eo constitutio causae conjecturalis nominatur. Legitima constitutio est, cum in scripto aliquid controversiae nascitur. Ea dividitur in partes sex, scriptum et sententiam, contrarias leges, ambiguum, definitionem, translationem, ratiocinationem. Ex scripto et sententia nascitur controversia, cum videtur scriptoris voluntas cum scripto ipso dissentire, hoc modo: *Si lex sit, quae iubeat, eos, qui propter tempestatem navim reliquerint, omnia perdere; eorum navim, ceteraque esse, si navis conservata sit, qui remanserint in navi. magnitudine tempestatis omnes perterriti navim reliquerunt, et in scapham consederunt, praeter unum aegrotum. is propter morbum exire et fugere non potuit. casu et fortuitu navis in portum incolumis delata est. illam aegrotus possidet. navim petit.*

ille, cuius fuerat. Haec constitutio legitima est ex scripto et sententia. Ex contrariis legibus controversia constat, cum alia lex iubet aut permittit, alia vetat quippiam fieri, hoc modo: *Lex vetat eum, qui de pecuniis repetundis damnatus sit, in concione orationem habere.* Altera lex iubet, augurem, in demortui locum qui petat, in concione nominare. *Augur quidam damnatus de pecuniis repetundis, in demortui locum nominavit.* petitur ab eo mulcta. Constitutio haec legitima est ex contrariis legibus. Ex ambiguo controversia nascitur, quum res in unam sententiam scripta, duas aut plures sententias significat, hoc modo: *Pater familias, quum filium heredem faceret, testamento vasa argentea uxori legavit: TULLIUS, HERES MEUS, TERENTIAE, UXORI MAAE, XXX PONDO VASORUM ARGENTEORUM DATO, QUAE VOLET.* Post mortem eius vasa pretiosa, et caelata magnifice, petit mulier. Tullius se, quae ipse velit, in xxx pondo ei debere dicit. Constitutio est legitima ex ambiguo. Ex definitione constat causa, cum in controversia est, quo nomine factum appelletur. ea est huiusmodi: *Cum L. Saturninus legem frumentariam de semissibus et trientibus laturus esset, Q. Caepio, qui per id temporis quaestor urbanus erat, docuit senatum, aerarium pati non posse largitionem tantam. Senatus decrevit, si eam legem ad populum ferat, adversus remp. videri eum facere.* Saturninus ferre coepit. Collegae intercedere. ille nihilominus cistellam detulit. Caepio, ut illum contra S. C. intercedentibus collegis, [adversus remp.] vidi ferre, cum viris bonis impetum facit, pontes disturbat, cistas deiicit, impedimento est, quo secius feratur lex: arcessitur Caepio maiestatis. Constitutio est legitima ex definitione. Vocabulum enim definitur ipsum, cum quaeritur, quid sit minuere maiestatem. Ex translatione con-

troversia nascitur , cum aut tempus differendum , aut accusatorem mutandum , aut iudices mutandos reus dicit. Hac parte constitutionis , Graeci in iudiciis , nos in iure civili plerumque utimur. In hac parte nos iuris civilis scientia iuvabit. in iudiciis tamen nonnihil ea utimur , hoc modo : *Si quis peculatus accusetur , quod vasa argentea publica de loco privato dicatur sustulisse , possit dicere , cum definitione sit usus , quid sit furtum , quid peculatus ; secum furti agi , non peculatus oportere.* Haec partitio legitimae constitutionis his de causis raro venit in iudicium , quod in privata actione praetoriae exceptiones sunt , et causa cadit is , qui non , quemadmodum oportet , egerit ; et in publicis quaestionibus cavetur legibus , ut ante , si reo commodum sit , iudicium de accusatore fiat , utrum illi liceat accusare , necne. Ex 13 ratiocinatione controversia constat , cum res sine propria lege venit in iudicium , quae tamen ab aliis legibus similitudinem quandam aucupatur. Ea est huiusmodi. Lex est : *Si furiosus exsistit , agnatorum gentiliumque in eo pecuniaque eius potestas esto.* Et lex : *Qui parentem necasse iudicatus erit , ut is obvolutus et obligatus corio , devehatur in profluentem.* Et lex : *Paterfamilias uti super familia pecuniave sua legaverit , ita ius esto.* Ex lex : *Si Paterfamilias intestatus moritur , familia pecuniaque eius agnatorum gentiliumque esto.* Malleolus iudicatus est matrem necasse. ei damnato statim folliculo lupino os obvolutum est , et soleae ligneae pedibus inductae sunt , et in carcerem ductus est. Qui defendebant eum , tabulas in carcerem afferunt ; testamentum ipso praesente conscribunt ; testes rite affuerunt : de illo supplicium paulo post sumitur. ii , qui heredes erant testamento , hereditatem adeunt. Frater minor Malleoli , qui ~~sum~~ oppugnayerat in ejus periculo , suam vocat he-

reditatem lege agnationis. Hic certa lex in rem nulla assertur, et tamen multae afferuntur, e quibus ratiocinatio nascitur, quare potuerit, aut non potuerit iure testamentum facere. Constitutio legitima est ex ratiocinatione. Cuiusmodi partes essent legitimae constitutionis ostendimus: nunc de iuridicali constitutione dicamus.

14 Iuridicalis constitutio est, cum factum convenit, sed iure, an iniuria factum sit, quaeritur. Eius constitutionis partes sunt duae, quarum una absolute, altera assumtiva nominatur. Absoluta est, cum id ipsum, quod factum est, ut aliud nihil foris assumatur, recte factum esse dicemus. Ea est huiusmodi: *Mimus quidam nominatim Accium poetam compellavit in scena. cum eo Accius iniuriarum agit. hic nihil aliud defendit, nisi licere nominari eum, cuius nomine scripta dentur agenda.* Assumptiva pars est, cum per se defensio infirma est, sed assumpta extraria re comprobatur. Assumptivae partes sunt quatuor: concessio, remotio criminis, translatio criminis, comparatio. Concessio est, cum reus postulat sibi ignosci. ea dividitur in purgationem, et deprecationem. Purgatio est, cum consulto se negat reus fecisse. Ea dividitur in fortunam, imprudentiam, necessitatem: fortunam, ut Caepio ad tribunos plebeam amissionem exercitus: imprudentiam, ut ille, qui de eo servo, qui dominum occiderat, supplicium sumsit, cui frater esset, antequam tabulas testamenti aperuit, cum is servus manumissus testamento esset: necessitudinem, ut ille, qui ad diem commeatus non venit, quod eum aquae interclusissent. Deprecatio est, cum et peccasse se, et consulto fecisse reus confitetur, et tamen postulat, ut sui misereantur. Hoc in iudicio fere non potest usu venire; nisi, quando pro eo dicimus, cuius multa

recte facta constant. hoc modo in loco communi per amplificationem iniiciemus: *Quod si hoc fecisset, tamen ei pro pristinis beneficiis ignosci conveniret: verum nihil postulat ignosci.* Ergo in iudicium non venit; at in ienatum, aut ante imperatorem, et in consilium talis causa potest venire. Ex translatione cri- 15 minis causa constat, cum fecisse nos non negamus, sed aliorum peccatis coactos fecisse dicimus: ut, *Orestes cum se defendit, in matrem confert crimen.* Ex remotione criminis causa constat, cum a nobis non crimen, sed culpam ipsam amovemus, et vel in hominem transferimus, vel in rem quampliam conferimus. In hominem transfertur: ut, *si accusetur is, qui P. Sulpicium se fateatur occidisse, et id iussu consulum defendat; et eos dicat non modo imperasse, sed rationem quoque ostendisse, quare id facere liceret.* In rem confertur, ut, si quis, ex testamento quod facere iussus sit, ex plebiscito vetetur. Ex comparatione causa constat, cum dicimus necesse fuisse alterutrum facere, et id, quod fecerimus, satius fuisse facere. Ea causa huiusmodi est: *C. Popillius, cum a Gallis obvideretur, neque effugere ullo modo posset, venit cum hostium ducibus in collocutionem; ita discessit, ut, si impedimenta relinqueret, exercitum educeret. Satius esse duxit, amittere impedimenta, quam exercitum. exercitum eduxit, impedimenta reliquit; arcessitur maiestatis.* Quae constitutiones, et quae 16 constitutionum partes sint, videor ostendisse. Nunc quo modo eas, et qua via tractari conveniat, demonstrandum est; si prius aperuerimus, quid oporteat ab ambobus in causa destinari, quo ratio omnis totius orationis conferatur.

Constitutione igitur reperta, statim quaerenda est ratio. Ratio est, quae causam facit, et continet defensionem, hoc modo, (ut docendi causa in hac

potissimum causa consistamus:) Orestes, cum confiteatur se occidisse matrem, nisi attulerit facti rationem, perverterit defensionem. ergo affert eam: quae nisi intercederet, ne causa quidem esset. *illa enim, inquit, patrem meum occiderat.* Ergo (ut ostendi) ratio ea est, quae continet defensionem, sine qua ne parva quidem dubitatio potest remorari damnationem. Inventa ratione, firmamentum quaerendum est; id est, quod continet accusationem, quod affertur contra rationem defensionis, de qua ante dictum est. Id constituetur hoc modo: Cum usus fuerit Orestes ratione, hoc pacto, *Iure occidi, illa enim patrem meum occiderat;* utetur accusator firmamento, hoc pacto: *Sed non abs te occidi, neque indemnata poenas pendere oportuit.* Ex ratione defensionis, et ex firmamento accusationis, iudicij quaestio nascatur oportet; quam nos iudicationem, Graeci *κριτικήν* appellant. Ea constituetur ex coniunctione firmamenti et rationis defensione, hoc modo: *Cum dicat Orestes, se patris ulciscendi causa matrem occidisse, rectumne fuerit, a filio, sine iudicio, Clytaenestram occidi.* Ergo hac ratione iudicationem reperire convenit. Reperta iudicatione, omnem rationem totius orationis eo conferri oportet. In omnibus constitutionibus et partibus constitutionum hac via iudicationes reperientur, praeterquam in conjecturali constitutione. Nam in ea nec ratio, quare fecerit, quaeritur; fecisse enim negatur: nec firmamentum exquiritur; quoniam non subest ratio. Quare ex intentione et initiatione iudicatio constituitur, hoc modo: Intentio, *Occidisti Aiacem.* Initiatione, *Non occidi.* Iudicatio, *Occideriene.* Ratio omnis utriusque orationis, ut ante dictum est, ad hanc iudicationem conferenda est. Si plures erunt constitutiones, aut partes constitutionum; iudica-

tiones quoque plures erunt in una causa; sed omnes simili ratione reperientur. Sedulo dedimus operam, ut breviter et dilucide, quibus de rebus adhuc dicendum fuit, diceremus. Nunc, quoniam satis huius voluminis magnitudo crevit, commodius est in altero libro de ceteris rebus deinceps exponere; ne qua, propter multitudinem literarum, possit animum tuum defatigatio retardare. Sed si quo tardius haec, quam studes, absolvantur, cum rerum magnitudini, tum nostris quoque occupationibus assignare debebis. Veruntamen maturabimus, et quod negotio diminutum fuerit, exaequabimus industria: ut pro tuo in nos officio, et nostro in te studio munus hoc accumulatissime tuae largiamur voluntati.

## RHETORICORUM

AD

C. HERENNII  
LIBER SECUNDUS.

## ARGUMENTUM.

Praemissa brevi cum dictorum superiori libro, tum hoc ipso dicendorum summa c. 1. 2, pergit ea exponere, quae ad genus causarum iudiciale pertinent, de quo superiori libro coepit praecipere, ut, quomodo quaeque in foro iudiciisque tractari causa oporteat, recte intelligatur. Et quoniam huius generis tres constitutiones sunt, coniecturalis, legitima et iuridicalis, quarum naturam et partes libro primo definiendo explicaverat, exemplique subiectis illustraverat, et quomodo constitutione causae et ratione firmamentoque causae repertis iudicatio s. quaestio (*το κριναμενον*) inveniatur, ostenderat; nunc etiam, quo quaeque constitutio modo tractari debeat ex artis praceptis, docet. Itaque primo a c. 2-9 de coniecturali agit, et multis ostendit, quo narrandi modo, quibus signis, argumentis, testimoniis, suspicionibus probabile fieri possit, rem aliquam esse factam aut non factam;

Cicer. Oper. Vol. I.


B



deinde a c. 9-13, quomodo orator debeat versari in tractandis legitimae constitutionis partibus, cum ex scripto aut in scripto aliquid natum controversiae est; denique vero etiam a c. 13 ad 18 quibus argumentationibus uti conveniat, cum, ubi rem a nobis factam, iure factam defendimus, et ubi iure factum aliquid sit, quaeritur, quae est constitutio iudicialis absoluta, tum, ubi extranea assumenda est defensio, quae assumtiva propterea dicitur. His expositis, de argumentationibus ornate absoluteque tractandis agit, et quae earum cum partes et virtutes, tum vitia sint, fuse enumerat a c. 18-30. denique de argumentorum conclusionibus, non his modo, quae in fine orationis cuiusque sunt, sed etiam quibus in principio, secundum narrationem, et post firmissimam argumentationem utimur.

**I**n primo libro, Herenni, breviter exposuimus, quas causas recipere oratorem oporteret, et in quibus officiis artis elaborare conveniret, et ea officia qua ratione facillime consequi posset. Verum, quia neque de omnibus rebus simul dici poterat, et de maximis primum scribendum fuit, quo cetera tibi faciliora cognitu viderentur; ita nobis placitum est, ut ea, quae difficillima essent, potissimum conscriberemus.

Causarum tria sunt genera, demonstrativum, deliberativum, iudiciale; multo difficillimum est iudiciale. ergo id prium absolvemus. Hoc et priore libro egimus, cum de quinque oratoris officiis tractaremus, quorum inventio et prima, et difficillima est. Ea quoque nobis erit hoc in libro propemodum absoluta, et parvam partem eius in tertium volumen transferemus. De sex partibus orationis primum scribere incepimus. in primo libro loquuti sumus de exordio, narratione, divisione, nec pluribus verbis, quam necesse fuit, nec minus dilucide, quam te velle existimabamus. deinde coniunctim de confirmatione et confutatione dicendum fuit. quare



genera constitutionum et earum partes aperiūimus : ex quo simul ostendebatur , quomodo constitutionem et partes constitutionis , causa posita , reperiri oporteret. deinde docuimus , iudicationem quemadmodum quaeri conveniret : qua inventa , curandum , ut omnis ratio totius orationis ad eam conferatur. postea admonuimus , esse causas complures , quibus plures constitutiones aut partes constitutionum accommodarentur. Reliquum videbatur esse , 2 ut ostenderemus , quae ratio posset inventiones ad unamquamque constitutionem aut partem constitutionis accommodare. et item quas argumentationes , quas Graeci επιχειρηματα appellant , sequi , et quas vitari oporteret : quorum utrumque pertinet ad confirmationem et confutationem. Deinde ad extremum docebimus , cuiusmodi conclusionibus orationum uti oporteat : qui locus erat extremus de sex partibus orationis.

Primum ergo quaeremus , quemadmodum quamque causam tractari conveniat. et nimirum coniecturalem , quae prima et difficillima est , potissimum consideremus. In causa coniecturali , narratio accusatoris suspiciones interieetas et dispersas habere debet , ut nihil actum , nihil dictum , nusquam ventum , aut abitum , nihil denique factum sine causa putetur. Defensoris narratio simplicem et dilucidam expositionem debet habere , cum attenuazione suspicionis. Huius constitutionis ratio in sex partes est distributa ; probabile , collationem , signum , argumentum , consecutionem , approbationem. Horum unumquidque quid valeat , aperiemus. Probabile est , per quod probatur , expedisse reo peccare , et a simili turpitudine hominem nunquam abfuisse. Id dividitur in causam et in vitam. Causa est ea , quae induxit ad maleficium , commodorum spe , aut in-

commodorum vitatione: ut cum quaeritur, num quod commodum maleficio appetierit, num honorem, num pecuniam, num dominationem; num aliquam cupiditatem amoris, aut huiusmodi libidinis voluerit explere: aut num quod incommodum vitarit, inimicitias, infamiam, dolorem, suppli-  
3 cium. hic accusator in spe commodi cupiditatem ostendet adversarii, in vitatione incommodi formidinem augebit: defensor autem negabit fuisse causam, si poterit, aut eam vehementer extenuabit; deinde iniquum esse dicet, omnes, ad quos aliquid emolumenti ex aliqua re pervenerit, in suspicionem maleficii devocari. Deinde vita hominis ex ante factis spectabitur. In quo primo considerabit accusator, num quando simile quid fecerit. Si id non reperiet, quaeret, num quando venerit in similem suspicionem: et in eo debebit esse occupatus, ut ad eam causam peccati, quam paulo ante exposuerit, vita hominis possit accommodari, hoc modo. Si dicet pecuniae causa fecisse, ostendet eum semper avarum fuisse: si honoris, ambitiosum: ita poterit animi vitium cum causa peccati conglutinare. Si non poterit par animi vitium cum causa reperire, reperiat dispar. Si non poterit avarum demonstrare, demonstret corruptorem vel perfidiosum, si quo modo poterit: denique aliquo aut quam plurimis vitiis contaminabit personam: deinde qui illud fecerit tam nequiter, eundem hoc tam perperam fecisse non esse mirandum. Si vehementer castus et integer existimatibus adversarius, dicet facta, non famam spectari oportere; illum ante occultasse sua flagitia; se planum facturum, ab eo maleficium non abesse. Defensor primum demonstrabit vitam integrum, si poterit: id si non poterit, confugiet ad imprudentiam, stultitiam, adolescentiam, vim, persuasio-

nem : quibus de rebus vituperatio eorum , quae extra id crimen erunt , non debeat assignari. Sin vehementer hominis turpitudine impedietur et infamia , prius dabit operam , ut falsos rumores dissipatos esse dicat de innocentie ; et utetur loco communi , rumoribus credi non oportere. Sin nihil horum fieri poterit , utatur extrema defensione , et dicat , non se de moribus eius apud censores , sed de criminibus adversariorum apud iudices dicere. Collatio est , 4 quum accusator id , quod adversarium fecisse criminatur , alii nemini , nisi reo , bonum fuisse demonstrat : aut alium neminem potuisse perficere , nisi adversarium : aut eum ipsum aliis rationibus aut non potuisse , aut non aequi commode potuisse , aut eum fugisse alias rationes commodiores propter cupiditatem. Hoc loco defensor demonstret , oportet , aut aliis quoque bono fuisse , aut alios quoque id , quod ipse insimuletur , facere potuisse. Signum est , per quod ostenditur idonea perficiendi facultas esse quaefita. id dividitur in partes sex : locum , tempus , spatium , occasionem , spem perficiendi , spem celandi. Locus quaeritur , celebris , an desertus ; semper desertus , an tum , cum id factum sit , fuerit in eo loco solitudo ; sacer , an profanus ; publicus , an privatus fuerit ; cuiusmodi loci attingant ; num , qui est passus , perspectus aut exauditus esse possit. Horum quid reo , quid accusatori conveniat , prescribere non gravaremur , nisi facile quivis , causa posita , posset iudicare. initia enim inventionis ab arte debent profici ; cetera facile comparabit exercitatio. Tempus ita quaeritur : qua parte anni ; qua hora : noctu , an interdiu : qua diei , qua noctis hora factum esse dicatur , et cur eiusmodi temporibus. Spatium ita consideratur , satisne longum fuerit ad eam rem transigendam , et potueritne scire , satis ad id per-

ficiendum spatii futurum. Nam parvi refert satis spatii fuisse ad id perficiendum, si id ante sciri et ratione provideri non potuit. Occasio quaeritur, idoneane satis fuerit ad rem adoriendam, an alia melior, quae aut praeterita sit, aut non exspectata. Spes perficiendi quae fuerit, spectabitur hoc modo: si, quae supra dicta sunt signa, concurrerint; si praeterea ex altera parte vires, pecunia, consilium, scientia, apparatio videbitur fuisse; ex altera parte imbecillitas, inopia, stultitia, imprudentia, inapparatio demonstrabitur fuisse: quare scire potuerit, utrum diffidendum, an confidendum fuerit. Spes celandi quae fuerit, quaeritur ex consciis, arbitris, adiutoribus, liberis aut servis, aut utrisque. Argumentum est, per quod res coarguitur certioribus argumentis, et magis firma suspicione. Id dividitur in tempora tria, praeteritum, instans, consequens. In praeterito tempore oportet considerare, ubi fuerit, ubi visus sit, quocum visus sit, num quid appararit, num quem convenerit, num quid dixerit, num quem habuerit de consciis, de adiutoribus, de adiumentis; num quid in loco praeter consuetudinem fuerit, aut alieno tempore. In instanti tempore quaeritur, num visus sit, cum faciebat, num qui strepitus, clamor, crepitus exauditus sit, aut denique, num quid aliquo sensu perceptum sit, aspectu, auditu, tactu, odoratu, gustatu. nam quivis horum sensus potest conflare suspicionem. In consequenti tempore spectabitur, num quid re transacta relictum sit, quod indicet aut factum esse maleficium, aut a quo sit factum. Factum esse, hoc modo: si tumore et livore decoloratum est corpus mortui, significat eum veneno necatum. A quo factum sit, hoc modo: si telum, si vestimentum, si quid eiusmodi relictum, aut vestigium repertum fuerit, si crux in vestimentis, si in eo loco comprehensus,

aut visus transacto negotio, quo in loco res gesta dicitur. Consecutio est, cum quaeritur, quae signa nocentis et innocentis consequi soleant. Accusator dicet, si poterit, adversarium, cum ad eum ventum sit, erubuisse, expalluisse, titubasse, inconstantiter locutum esse, concidisse, pollicitum esse aliquid: quae signa conscientiae sunt. Si reus horum nihil fecerit; accusator dicet, eum usque adeo prae-meditatum fuisse, quid sibi esset usu venturum, ut confidentissime resistens responderet: quae signa conscientiae, non innocentiae sunt. Defensor, si pertimuerit, magnitudine periculi, non conscientia peccati se commotum esse dicet. Si non pertimuerit, fretum innocentia negabit esse commotum. Appro-  
batio est, qua utimur ad extremum, confirmata suspicione. ea habet locos proprios atque communes. Proprii sunt, quibus, nisi accusator, et, quibus nisi defensor, nemo potest uti. Communes sunt, qui alia in causa ab reo, alia ab accusatore tractantur. In causa conjecturali proprius locus accusatoris est, cum dicit malorum misereri non oportere, et cum auget peccati atrocitatem. Defensoris proprius locus est, cum misericordiam captat, et cum accusatorem calumniari criminatur. Communes loci sunt cum accusatoris, tum defensoris, a testibus contra testes, a quaestionibus contra quaestiones, ab argumentis contra argumenta, a rumoribus contra rumores. A testibus dicemus secundum auctoritatem et vitam testium, et constantiam testimoniorum. Contra testes, vitae turpitudinem, testimoniorum inconstiam: si aut fieri non potuisse dicemus, aut non factum esse quod dicant, aut scire illos non potuisse, aut cupide dicere, et argumentari. haec et ad improbationem et approbationem testium pertinebunt. A quaestionibus dicemus, cum demonstrabimus, maiores veri in- 7

veniendi causa tormentis et cruciatibus voluisse quae-  
ri, et summo dolore homines cogi, ut quidquid sciant,  
dicant. Et praeterea confirmatior haec erit dispu-  
tatio, si quae dicta erunt argumentando, iisdem viis,  
quibus omnis coniectura tractatur, trahemus ad ve-  
risimilem suspicionem; idemque hoc in testimonii  
facere oportebit. Contra quaestiones hoc modo di-  
cemus: primum maiores voluisse certis in rebus in-  
terponi quaestiones, cum, quae vere dicerentur,  
sciri; quae falso in quaestione pronuntiarentur, re-  
felli possent, hoc modo: Quo in loco quid positum  
sit, et si quid esset simile, quod videri, aut aliquo  
simili signo percipi posset: deinde, dolori credi non  
oportere, quod alias alio recentior sit in dolore,  
quod ingeniosior ad comminiscendum, quod deni-  
que saepe scire, aut suspicari possit, quid quaesitor  
velit audire; quod cum dixerit, intelligat sibi finem  
doloris futurum. Haec disputatio comprobabitur,  
si refellemus, quae in quaestionibus erunt dicta pro-  
babili argumentatione; idque partibus coniecturae,  
quas ante exposuimus, facere oportebit. Ab argu-  
mentis, et signis, et ceteris locis, quibus augetur  
suspicio, dicere, hoc modo convenit: Cum multa  
concurrent argumenta et signa, quae inter se con-  
sentiant, rem perspicuam, non suspiciosam videri  
oportere. item plus oportere signis et argumentis  
credi, quam testibus. haec enim eo modo exponi,  
quo re vera sint gesta; testes corrumpi posse vel pre-  
tio, vel gratia, vel metu, vel simultate. Contra  
argumenta et signa et ceteras suspiciones dicemus hoc  
modo: si demonstrabimus, nullam rem esse, quam  
non suspicionibus quivis possit criminari; deinde,  
unquamque suspicionem extenuabimus, et dabi-  
mus operam, ut ostendamus, nihilo magis in nos  
eam, quam in alium quempiam convenire; indignum

esse facinus, sine testibus coniecturam et suspicio-  
nem firmamenti satis habere. A rumoribus dicemus: 8  
si negabimus temere famam nasci solere, quin sub-  
sit aliquid; et si dicemus causam non fuisse, quare  
quispiam configneret et comminisceretur; et praete-  
rea, si ceteri falsi soleant esse, argumentabimur hunc  
esse verum. Contra rumores dicemus primum, si do-  
cebimus multos esse falsos rumores, et exemplis ute-  
mur, de quibus falsa fama fuerit; et aut inimicos  
nostros, aut homines natura malevolos et maledicos  
confinxisse dicemus: et aut aliquam fictam fabulam  
in adversarios afferemus, quam dicamus omnibus in  
ore esse; aut verum rumorem proferemus, qui illis  
aliquid turpitudinis afferat, neque tamen ei rumori  
nos fidem habere dicemus; ideo quod quivis homo  
possit quemvis turpem de quolibet rumorem pro-  
ferre, & confictam fabulam dissipare. Veruntamen  
si rumor vehementer probabilis esse videbitur, ar-  
gumentando famae fidem poterimus abrogare. Quod  
et difficillima tractatu est constitutio coniecturalis,  
et in veris causis saepissime tractanda, eo diligen-  
tius omnes eius partes perscrutati sumus; ut ne  
parvula quidem titubatione aut offenditio impe-  
diremur, si ad hanc rationem praeceptionis, assi-  
duitatem exercitationis accommodassemus. Nunc ad 9  
legitimae constitutionis partes transeamus. Cum vo-  
luntas scriptoris cum scripto dissidere videbitur,  
si a scripto dicemus, his locis utemur, secundum  
narrationem: primum scriptoris collaudatione: deinde  
scripti recitatione: deinde percontatione, sci-  
rentne adversarii id scriptum fuisse in lege, aut in  
testamento, aut in stipulatione, aut in quolibet  
scripto, quod ad eam rem pertineat: deinde col-  
latione, quid scriptum sit, quid adversarii se fe-  
cisse dicant; quid iudicem sequi conveniat, utrum

id, quod diligenter perscriptum sit, an id, quod acute sit excogitatum: deinde ea sententia, quae ab adversariis sit excogitata, & scripto attributa, contemnetur et infirmabitur. Deinde quaeretur, quid ei obfuerit, si id voluisset adscribere, num non potuerit perscribi. Deinde a nobis sententia repetrietur, & causa proferetur, quare id scriptor scriberit, quod perscripsit: et demonstrabitur scriptum illud esse dilucide, breviter, commode, perfecte, certa cum ratione. Deinde exempla proferentur, quae res, cum ab adversariis sententia et voluntas afferretur, a scripto potius iudicatae sint. Deinde ostendetur, quam periculose sit a scripto recedere. Locus communis est contra eum, qui, cum fateatur, se contra id, quod legibus sanctum, aut testamento perscriptum sit, fecisse, tandem facti quaerat defensionem. A sententia sic dicemus. Primum laudabimus scriptoris commoditatem atque brevitatem, quod tantum scripserit, quod necesse fuerit: illud, quod sine scripto intelligi potuerit, non necessario scribendum putarit. Deinde dicemus, calumniatoris esse officium, verba et literas sequi, negligere voluntatem. Deinde id, quod scriptum sit, aut non posse fieri, aut non lege, non more, non natura, non aequo et bono posse fieri; quae omnia scriptorem noluisse quam rectissime fieri, nemo dicet: at ea, quae a nobis facta sint, iustissime facta. Deinde contrariam sententiam aut nullam esse, aut stultam, aut iniustum, aut non posse fieri, aut non constare cum superioribus et inferioribus sententiis; aut cum iure communi, aut cum aliis legibus communibus, aut cum rebus iudicatis dissentire. Deinde exemplorum a voluntate, et contra scriptum iudicatorum enumeratione utemur; deinde legum et stipulationum breviter exceptarum, in quibus intelligi-

gatur scriptorum voluntas et expositio. Locus communis contra eum, qui scriptum recitet, et scriptoris voluntatem non interpretetur. Cum duae leges inter se discrepant, videndum est primum, num qua obrogatio, aut derogatio sit. Deinde, utrum leges ita dissidentur, ut altera iubeat, altera vetet; an ita, ut altera cogat, altera permittat. Infirma enim erit eius defensio, qui negabit, se fecisse, quod cogereatur, cum altera lex permetteret. plus enim valet sanctio permissione. Item illa defensio tenuis est, cum ostenditur id factum esse, quod ea lex fanciat, cui legi obrogatum, vel derogatum sit: id, quod posteriori lege sanctum sit, esse neglectum. Cum haec erunt considerata, statim nostrae legis expositione, recitatione, collaudatione utemur. Deinde contrariae legis enodabimus voluntatem, et eam trahemus ad nostrae causae commodum. Deinde de iuridicali absoluta sumemus rationem iuris, et quaeremus partem iuris, utrum cum ea faciat; de qua parte posteriorius differemus. Si ambiguum esse scriptum putabitur, quod in duas aut plures sententias trahi possit, hoc modo tractandum est. Primum, sitne ambiguum, quaerendum est. Deinde, quomodo scriptum esset, si id, quod adversarii interpretentur, scriptor fieri voluisset, ostendendum est. Deinde id, quod nos interpretemur, et fieri posse, et honeste, recte, lege, more, natura, bono et aequo fieri posse; quod adversarii interpretentur, e contrario: nec esse ambiguë scriptum, cum intelligatur, utra sententia vera sit. Sunt, qui arbitrentur, ad hanc causam tractandam vehementer pertinere cognitionem amphibiorum eam, quae a dialecticis profertur. Nos vero arbitramur, non modo nullo adiumento esse, sed potius maximo impedimentoo. omnes enim illi amphibolias aucupantur, eas etiam, quae ex altera parte

sententiam nullam possunt interpretari. Itaque et alieni sermonis molesti interpellatores, et scripti tum odiosi, tum obscuri interpretes sunt; et dum caute et expedite loqui volunt, infantissimi reperiuntur. Ita dum metuunt in dicendo, ne quid ambiguum dicant, nomen suum pronuntiare non possunt. Verum horum pueriles opiniones rectissimis rationibus, cum voles, refellemus. In praesentiarum hoc interdicere non alienum fuit, ut huius infantiae garrulam disciplinam contemneremus. Cum definitione ute-  
12 mur, primum afferemus brevem vocabuli definitionem, hoc modo: *Maiestatem is minuit, qui ea tollit, ex quibus rebus civitatis amplitudo constat: [ quae sunt ea? quae capiunt ] suffragia populi, et magistratus consilium.* Nempe igitur tu et populum suffragio, et magistratum consilio privasti, cum pontes disturbasti. Item ex contrario: *Maiestatem is minuit, qui amplitudinem civitatis detrimento afficit.* Ego non affeci, sed prohibui detimento; aerarium enim conservavi, libidini malorum restiti, maiestatem omnem interire non passus sum. Primum igitur vocabuli sententia breviter, et ad utilitatem causae accommodate describetur: deinde factum nostrum cum verbi descriptione coniungetur: deinde contrariae descriptionis ratio refelletur, si aut falsa erit, aut inutilis, aut turpis, aut iniuriosa. id quoque ex iuris partibus sumetur de iuridicali absoluta, de qua iam loquemur. Quaeritur in translationibus, primum, num aliquis eius rei actionem, petitio-  
nem aut persecutionem habeat, quem non opor- teat; num alio modo, tempore, loco; num alia lege, num alio quaerente, aut agente. Haec legibus, moribus, aequo & bono reperientur; de quibus dicetur in iuridicali absoluta. In causa rationali primum quaeretur, ecquid in re-

bus maioribus , aut minoribus , aut similibus , si-  
milter scriptum aut iudicatum sit : deinde , utrum  
ea res similis sit ei rei , qua de agitur , an dissi-  
milis : deinde , utrum consulto de ea re scriptum  
non sit , quod noluerit cavere , quod satis cautum  
putarit , propter ceterorum scriptorum similitudi-  
nem . De partibus legitimae constitutionis satis dic-  
tum est , nunc ad iuridicalem revertamur .

Absoluta iuridicali constitutione 13 utemur , cum ipsam rem , quam nos fecisse confitemur , iure factam dicemus , sine ulla assumptione extrariae defensionis . In ea quaeri convenit , iurene factum sit . de eo causa posita dicere poterimus , si , ex quibus partibus ius constet , cognoverimus . Constat igitur ex his partibus ; natura , lege , consuetudine , iudicato , aequo et bono , pacto . Natura ius est , quod cognitionis aut pietatis causa observatur ; quo iure parentes a liberis , et a parentibus liberi coluntur . Lege ius est id , quod populi iussu sanc-  
tum est : quod genus , *Ut in ius eas , quum voceris.* Consuetudine ius est id , quod sine lege , aequo ac si legitimum sit , usitatum est ; quod genus , *Id , quod argentario tuleris expensum , a socio eius recte repetere possis.* Iudicatum est id , de quo sententia lata est , aut decretum interpositum . Ea saepe diversa sunt , ut aliud alii iudici , aut praetori , aut consuli , aut tribuno plebis placitum sit ; et fit , ut de eadem re saepe alias aliud decreverit , aut iudicaverit : quod genus , M. Drusus , praetor urbanus , quod cum herede mandati ageretur , iudicium reddidit ; S. Iulius non reddidit . Item , C. Caelius iudex absolvit iniuriarum eum , qui Luciliu[m] poetam in scena nominatim laeserat ; P. Mucius eum , qui L. Accium poetam nominaverat , condemnavit . Ergo , quia possunt res simili de-

causa dissimiliter iudicatae proferri, cum id usum  
venerit, iudicem cum iudice, tempus cum tempo-  
re, numerum cum numero iudiciorum conferemus.  
Ex aequo & bono ius constat, quod ad veritatem &  
utilitatem communem videtur pertinere; quod ge-  
nus, *Ut maior annis LX, & cui morbus causa est,*  
*cognitorem det.* Ex eo vel novum ius constitui con-  
venit ex tempore & hominis dignitate. Ex pacto  
ius est, *Si qui inter se pepigerunt, si quid inter quos*  
*convenit.* Paetia sunt, quae legibus observanda sunt,  
hoc modo: *Rem ubi pagunt, orato; ni pagunt, in comi-*  
*tio, aut in foro ante meridiem causam coniicito.* Sunt it-  
tem pacta, quae sine legibus observantur ex conventu,  
quae iure praestare dicuntur. His igitur partibus  
iniuriam demonstrari, ius confirmari convenit, id-  
que in absoluta iuridicali faciendum videtur. Cum  
ex comparatione quaeretur, utrum satius fuerit agere  
id, quod reus dicat se fecisse, an id, quod accusa-  
tor dicat oportuisse fieri: primum quaeri convenit,  
utrum fuerit utilius ex contentione, hoc est, utrum  
venustius, facilius, conducibilis. Deinde oportet  
quaeri, ipsumne oportuerit iudicare, utrum fuerit  
utilius, an aliorum fuerit statuendi potestas. De-  
inde interponetur ab accusatore suspicio ex constitu-  
tione coniecturali, quare putetur non ea ratione fa-  
ctum esse, quo melius deteriori anteponeretur, sed  
dolo malo negotium gestum. Deinde quaeretur, po-  
tueritne vitari, ne in eum locum veniretur. Ab  
defensore contra refelletur argumentatio coniectu-  
ralis, aliqua probabili causa, de qua ante dictum  
est. His ita tractatis, accusator utetur loco com-  
muni in eum, qui inutile utili praeposuerit, cum  
statuendi non haberet potestatem. Defensor contra  
eos, qui aequum censeant, rem perniciosaam utili  
praeponi, utetur loco communi per conquestionem,

et simul quaeret ab accusatoribus, et ab iudicibus 15  
ipsis, quid facturi essent, si in eo loco fuissent; et tempus, locum, rem, deliberationem suam ponet ante oculos. Translatio criminis est, cum ab  
reto facti causa in aliorum peccatum transfertur. In qua primum quaerendum est, iurene in aliud  
crimen transferatur. deinde spectandum est, an ae-  
que magnum sit illud peccatum, quod in aliud trans-  
feratur, atque illud, quod reus suscepisse se fa-  
teatur. deinde, oportueritne in ea re peccare, in  
qua aliis ante peccarit. deinde, oportueritne  
iudicium ante fieri. deinde, cum factum iudi-  
cium non sit de illo crimen, quod in aliud  
transferatur, oporteatne de ea re iudicium fieri,  
quae res in iudicium nondum venerit. Locus com-  
munis accusatoris, contra eum, qui plus censeat vim,  
quam iudicia valere oportere, & ab adversariis  
percontabitur accusator, quid futurum sit, si  
idem ceteri faciant, ut de indemnatis supplicia su-  
mant, quod eos idem fecisse dicant. Quid si ipse  
accusator idem facere voluisse? Defensor eorum  
peccati atrocitatem proferet, in quos crimen trans-  
feretur; rem, locum, tempus ante oculos ponet,  
ut ii, qui audient, existiment, aut non potuisse,  
aut non fuisse utile, rem in iudicium venire. Con- 16  
cessio est, per quam nobis ignosci postulamus. Ea  
dividitur in purgationem, & deprecationem. Pur-  
gatio est, cum consulto a nobis factum negamus.  
Ea dividitur in necessitudinem, fortunam, impru-  
dentiam. De his primum partibus ostendendum est;  
deinde ad deprecationem revertendum videtur. Pri-  
mum considerandum est, num culpa ventum sit  
in necessitudinem, num culpam veniendi necessitu-  
do fecerit. Deinde quaerendum est, ecquo modo  
vis illa vitari potuerit, ac levavi. Deinde is, qui

in necessitudinem causam conferet , expertusne sit , quid contra facere , aut excogitare posset. Deinde , num quae suspicione s ex conjecturali constitutione trahi possint , quae significant , id consulto factum esse , quod necessario accidisse dicitur. Deinde , si maxime necessitudo quaepiam fuerit , conveniatne eam satis idoneam causam putari. Si autem imprudentia reus se peccasse dicet , primum quaeretur , utrum potuerit scire , an non potuerit. Deinde , utrum data sit opera , ut sciretur , an non. Deinde , utrum casu nescierit , an culpa. nam qui se propter vinum , aut amorem , aut iracundiam , fugisse rationem dicet , is animi vitio videbitur nescisse , non imprudentia. quare non imprudentia se defendet , sed culpa contaminabit. Deinde conjecturali constitutione quaeretur , utrum scierit , an ignoraverit , et considerabitur , satisne imprudentia praesidii debeat esse , cum factum constet. Cum in fortunam causa conferetur , et ea re defensor ignosci reo dicet oportere , eadem omnia videntur consideranda , quae de necessitudine praescripta sunt. Etenim omnes hae tres partes purgationis inter se finitimae sunt , ut in omnes eadem fere possint accommodari. Loci communes in his causis ; accusatoris contra eum , qui , cum se peccasse confiteatur , tamen oratione iudices demoretur : defensoris , de humanitate , misericordia : voluntatem in omnibus rebus spectari convenire , et quae consulto  
17 facta non sint , in iis fraudem esse non oportere. Deprecatione utemur , cum fatebimus nos peccasse , neque id imprudenter , aut fortuitu , aut necessario fecisse dicemus , et tamen ignosci nobis postulabimus. Hic ignoscendi ratio quaeritur ex iis locis , si plura aut maiora officia , quam maleficia , videbuntur constare ; si qua virtus aut nobilitas erit in eo , qui supplicabit ; si qua spes erit , usui futurum , si sine sup-

plicio discesserit; si ipse ille supplex, mansuetus et misericors in potestatibus ostendetur fuisse; si ea, quae peccavit, non odio, neque crudelitate, sed officio et recto studio commotus fecit; si tali de causa aliis quoque ignotum est; si nihil ab eo periculi nobis futurum videbitur, si eum missum fecerimus; si nulla aut a nostris civibus, aut ab aliqua civitate vituperatio ex ea re suscipietur. Loci communes, de humanitate, fortuna, misericordia, rerum commutatione. His locis omnibus ex contrario utetur is, qui contra dicet, cum amplificatione, et enumeratione peccatorum. Haec causa, iudicialis fieri non potest, ut in primo libro ostendimus: sed quod potest vel ad senatum, vel ad consilium venire, non visa est supercedenda. Cum a nobis crimen removere volemus, aut in rem aut in hominem nostri peccati causam conferemus. Si causa in hominem conferatur, quaerendum erit primum, potueritne tantum, quantum reus demonstrabit, is, in quem causa conferetur, et quonam modo aut honeste, aut sine periculo potuerit obsistere: si maxime ita sit, num ea re concedi reo conveniat, quod alieno inductu fecerit. deinde in coniecturalem trahetur controversiam, et edifferetur, num consulto factum sit. Si causa in rem quandam conferetur, et haec eadem fere, et omnia, quae de necessitudine praeceperimus, consideranda erunt.

Quoniam satis ostendisse videmur, quibus argumentationibus in unoquoque genere causae iudicialis uti conveniret; consequi videtur, ut doceamus, quemadmodum ipsas argumentationes ornate et absolute tractare possimus. nam fere non difficile est inventire, quid sit causae adiumento: difficillimum vero est, inventum expolire, et expedite pronuntiare. haec enim res facit, ut neque diutius, quam satis sit,

in eisdem locis commoremur, neque eodem identi-  
dem revolvamur, neque inchoatam argumentatio-  
nem relinquamus, neque incommodo ad aliam dein-  
ceps transeamus. Itaque hac ratione et ipsi memi-  
nisse poterimus, quid quoquo loco dixerimus, et  
auditor cum totius causae, tum uniuscuiusque argu-  
mentationis distributionem percipere et meminisse  
poterit. Ergo absolutissima et perfectissima argumen-  
tatio est ea, quae in quinque partes est distributa,  
propositionem, rationem, rationis confirmationem,  
exornationem, complexionem. Propositio est, per  
quam ostendimus summatim, quid sit, quod probare  
volumus. Ratio est causa, quae demonstrat, verum  
esse id, quod intendimus, brevi subiectione. Ratio-  
nis confirmatio est ea, quae pluribus argumentis cor-  
roborat breviter expositam rationem. Exornatio est,  
qua utimur rei honestandae et collocupletandae cau-  
fa, confirmata argumentatione. Complexio est,  
quae concludit breviter, colligens partes argumen-  
tationis. Hisce igitur quinque partibus ut absolutis-  
sime utamur, hoc modo tractabimus argumentatio-  
nem. Causam ostendemus Ulyssi fuisse, quare in-  
terfecerit Aiacem: inimicum enim acerrimum de me-  
dio tollere volebat; a quo sibi non iniuria summum  
periculum metuebat. Videbat illo incolumi, se in-  
columem non futurum; sperabat illius morte se sa-  
lutem sibi comparare; consueverat, si iure non po-  
terat, quavis iniuria inimico exitium machinari; cui  
rei mors indigna Palamedis testimonium dat. Ergo  
et metus periculi hortabatur eum interimere, a quo  
supplicium verebatur; et consuetudo peccandi, ma-  
leficii suscipiendi removebat dubitationem. Omnes  
enim cum minima peccata cum causa suscipiunt, tum  
vero illa, quae multo maxima sunt maleficia, aliquo  
certo emolumento ducti suscipere conantur. Si mul-

tos induxit in peccatum pecuniae spes, si complures scelere se contaminaverunt imperii cupiditate, si multi leve compendium fraude maxima commutarrunt; cui mirum videbitur, istum a maleficio propter acerrimam formidinem non temperasse? Virum fortissimum, integerrimum, inimicitarum persequentiissimum, iniuria lacestum, ira exsuscitatum, homo timidus, nocens, conscius sui peccati, insidious, inimicum incolumem esse noluit: cui tandem hoc mirum videbitur? Nam cum feras bestias videamus alacres et erectas vadere, ut alteri bestiae noceant; non est incredibile putandum, istius quoque animum ferum, crudelem, atque inhumanum, cuipide ad inimici perniciem profectum; praesertim cum in bestiis nullam neque bonam neque malam rationem videamus; in isto plurimas et pessimas rationes semper fuisse intelligamus. Si ergo pollicitus sum, me daturum causam, qua inductus Ulysses accesserit ad maleficium, et, si inimicitarum acerrimam rationem, et periculi metum intercessisse demonstravi; non est dubium, quin confiteatur causam maleficii fuisse. Ergo absolutissima est argumentatio ea, quae ex quinque partibus constat; sed ea non semper necesse est uti. Tum enim complexione supersedendum est, si res brevis est, ut facile memoria comprehendatur: tum exornatio praetermittenda est, si parum locuples ad amplificandum et exornandum res videtur esse. Sin et brevis erit argumentatio, et res tenuis, aut humilis; tum et exornatione et complexione supersedendum est. In omni argumentatione de duabus partibus postremis, haec, quam exposui, ratio est habenda. Ergo amplissima est argumentatio quinquepartita; brevissima est tripartita; mediocris, sublata aut exornatione aut complexione, quadripartita.

Duo genera sunt vitiosarum argumentationum: 20

unum, quod ab adversario reprehendi potest, idque pertinet ad causam: alterum, quod tametsi nugatorium est, tamen non indiget reprehensionis. Quae sint, quae reprobatione confutari conveniat, quae tacite contemni atque vitari sine reprobatione, nisi exempla subiecero, intelligere dilucide non poteris. Haec cognitio vitiosarum argumentationum duplensem utilitatem afferet, nam et vitare in argumentatione vitium admonebit, et ab aliis non vitatum commode reprehendere docebit. Quoniam igitur ostendimus, perfectam et plenam argumentationem ex quinque partibus constare, in unaquaque parte argumentationis quae vitia vitanda sint, consideremus: ut et ipsi ab his vitiis recedere, et adversariorum argumentationes hac praceptione in omnibus partibus tentare, et ab aliqua parte labefactare possimus. Expositio vitiosa est, cum ab aliqua aut a maiore parte ad omnes confertur id, quod non necessario est omnibus attributum; ut si quis hoc modo exponat: *Omnes, qui in paupertate sunt, maleficio parare divitias, quam officio paupertatem tueri.* Si quis hoc modo exposuerit argumentationem, ut non curet quaerere, qualis ratio aut rationis confirmatio sit, ipsam facile reprehendemus expositionem, cum ostendemus, id, quod in aliquo paupere improbo sit, in omnes pauperes falso et iniuria conferri. Item vitiosa expositio est, cum id, quod raro fit, fieri omnino negatur, hoc modo: *Nemo potest uno aspectu, neque præteriens, in amorem incidere.* nam cum nonnemo devenerit in amorem uno aspectu, et cum ille neminem dixerit omnino, nihil differt raro id fieri, dummodo aliquando fieri, aut posse fieri intelligatur. Item vitiosa expositio est, cum omnes res ostendamus nos collegisse, et aliquam rem ido-

neam praeterimus, hoc modo : *Quoniam igitur hominem occisum constat esse, necesse est aut a praedonibus, aut ab inimicis occisum esse, aut abs te, quem ille heredem testamento ex parte fecerat.* Praedones illo loco nunquam sunt visi : *inimicum nullum habebat.* relinquitur, si neque a praedonibus, neque ab inimicis occisus est, quoniam alteri non erant, alteros non habebat, ut abs te sit interemptus. Nam in huiuscmodi expositione, reprehensione utemur, si quos praeter eos, quos ille dixerit, potuisse suscipere maleficium ostenderimus : velut in hoc exemplo, cum dixerit necesse esse aut a praedonibus, aut ab inimicis, aut a nobis occisum esse ; dicemus potuisse vel a familia, vel a coheredibus nostris. Cum hoc modo illorum collectionem disturbaverimus, nobis latiorem locum defendendi relinquimus. Ergo hoc quoque vitandum est in expositione, ne quando, cum omnia collegisse videamus, aliquam idoneam partem reliquerimus. Item vitiosa expositio est, quae constat ex falsa enumeratione : ut si, cum plura sunt, pauciora dicamus, hoc modo : *Duae res sunt, iudices, quae omnes ad maleficium impellunt, luxuries et avaritia.* Quid amor? inquiet quispiam : quid ambitio? quid irreligio? quid metus mortis, quid imperii cupiditas? quid denique alia permulta? Item falsa enumeratio est, cum pauciora sunt, et plura dicimus, hoc modo : *Tres res sunt, quae omnes homines sollicitant, metus, cupiditas, aegritudo.* Satis enim fuerat dixisse metum et cupiditatem ; quoniam aegritudinem cum utraque re coniunctam esse necesse est. Item vitiosa expositio est, quae nimium longe repetitur, hoc modo : *Omnium malorum stultitia est mater, quae parit immensas cupiditates. immensae porro cupiditates infinitae et immoderatae sunt.*

*hae pariunt avaritiam. avaritia porro hominem ad quodvis maleficium impellit. Igitur avaritia inducit adversarii nostri, hoc in se facinus admiserunt. Hic id, quod extreum dictum est, satis fuit expōnere, ne Ennium et ceteros poetas imitemur, quibus hoc modo loqui concessum est :*

*Utinam ne in nemore Pelio securibus  
Caesa cecidisset abiegnā ad terram trabes :  
Neve inde navis inchoandaē exordium  
Coepisset, quae nunc nominatur nomine  
Argo, qua veclī Argivi delecti viri,  
Petebant illam pellem inauratam arietis,  
Colchis, imperio regis Peliae per dolum :  
Nam nunquam hera errans mea, domo efferret  
pedem  
Medea, animo aegra, amore saevo faucia.*

Nam hic satis erat dicere ( si id modo, quod esset satis, curasset poeta )

*Utinam ne hera errans mea, domo efferret pedem  
Medea.*

Ergo hac quoque ab ultimo repetitione in expositionibus magnopere supersedendum est. Non enim reprehensione, sicut aliae complures, sed sua sponte 23 vitiosa est. Vitiosa ratio est, quae ad expositiōnem non est accommodata, vel propter infirmitatem, vel propter vanitatem. Infirma ratio est, quae non necessario ostendit ita esse, quemadmodum expositum est : velut apud Plautum,

*Amicum castigare ob meritam noxiā,  
Immane est facinus : verum in aetate utile  
Et conducibile.*

Haec expositio est. videamus, quae ratio afferatur :

*Nam ego amicum hodie meum  
Concastigabo pro commerita noxia.*

Ex eo, quod ipse facturus est, non ex eo, quod fieri convenit, utile quid sit, ratiocinatur. Vana ratio est, quae ex falsa causa constat, hoc modo : *Amor fugiendus non est : nam ex ea verissima nascitur amicitia.* Aut hoc modo : *Philosophia vivanda est : affert enim secordiam atque desidiam.* Nam hae rationes nisi falsae essent, expositiones quoque earum veras esse confiteremur. Item infirma ratio est, quae non necessariam causam assert expositio-  
nis : velut Pacuvius,

*Fortunam insanam esse et caecam et brutam per-  
hibent Philosophi,*

*Saxoque illam instare globoſo praedicant volubilem :  
Ideo, quo saxum impulerit fors, cadere eo for-  
tunam autumant.*

*Caecam ob eam rem esse iterant, quia nihil cernat,  
quo sepe applicet.*

*Insanam autem aiunt, quia atrox, incerta, in-  
stabilisque sit.*

*Brutam, quia dignum atque indignum nequeat  
internoscere.*

*Sunt autem alii Philosophi, qui contra fortuna  
negent*

*Miseriam esse ullam, sed temeritate omnia regi. id  
magis*

*Verisimile aiunt ; quod usus reapse experiendo edocet.*

*Velut Orestes modo fuit rex, modo mendicus  
factus est :*

*Naufragio res contigit. Nempe ergo haud fortuna  
obtigit.*

Nam hic Pacuvius infirma ratione utitur, cum ait,

verius esse temeritate , quam fortuna res regi. nam  
 utraque opinione philosophorum fieri potuit , ut  
 24 is , qui rex fuisset , mendicus fieret. Item infirma  
 ratio est , quae videtur pro ratione afferri , sed  
 idem dicit , quod in expositione dictum est , hoc  
 modo : *Magno malo est hominibus avaritia ; idcirco*  
*quod homines magnis et multis incommodis conflic-*  
*tantur propter immensam pecuniae cupiditatem.* Nam  
 hic aliis verbis idem per rationem dicitur , quod  
 dictum est per expositionem. Item infirma ratio  
 est , quae minus idoneam , quam res postulat , cau-  
 sam subiicit expositionis , hoc modo : *Utilis est*  
*sapientia , propterea quod qui sapientes sunt , pietas*  
*tem colere consueverunt.* Item , *utile est amicos veros*  
*habere. habeas enim quibuscum iocari possis.* Nam  
 huiusmodi in rationibus non universa , neque abso-  
 luta , sed extenuata ratione expositio confirmatur.  
 Item infirma ratio est , quae vel alii expositioni  
 potest accommodari , ut facit Pacuvius , qui ean-  
 dem affert rationem , quare caeca , eandem ,  
 quare bruta fortuna dicatur. In confirmatione  
 rationis , multa et vitanda in nostra , et obser-  
 vanda in adversariorum ratione sunt vitia ; propte-  
 reaque diligentius consideranda , quod accurata  
 confirmatio rationis totam vehementissime com-  
 probat argumentationem. Utuntur igitur studiosi in  
 confirmanda ratione dupli conclusione , hoc modo :

*Iniuria abs te afficio indigna , pater.*

*Nam , si improbum Cresphontem existimaveras ,*  
*Cur me huic locabas nuptiis ? sin est probus ,*  
*Cur talem invitam invitum cogis linquere ?*

Quae hoc modo concludentur , aut ex contrario con-  
 vertentur , aut ex simplici parte reprehendentur. Ex  
 contrario hoc modo :

*Nulla te indigna, nata, afficio iniuria.*

*Si probus est, collocavi: si autem improbus,  
Divortio te liberabo incommodis.*

Ex simplici parte reprehendentur, si ex duplice conclusione alterutra pars diluetur, hoc modo:

*Nam si improbum Cresphontem existimaveras,  
Cur me huic locabas nuptiis? Duxi probum.  
Erravi: post cognovi, et fugio cognitum.*

Ergo reprehensio huius conclusionis duplex est; acutior illa superior, facilior haec posterior ad excogitandum. Item vitiosa est confirmatio rationis, cum 25 ea re, quae plura significat, abutimur pro certo unius rei signo, hoc modo: *Neceſſe eſt, quoniam pallet, aegrotasse: aut, neceſſe eſt peperiffe, quoniam ſuſtinet puerum infantem.* Nam haec sua sponte certa signa non habent, si non cetera quoque similia concurrant. Quod si concurrerint, non nihil illiusmodi signa adaugent suspicionem. Item vitiosum est, cum vel in alium, vel in eum ipsum, qui dicit, id, quod in adversarium dicitur, potest convenire, hoc modo:

*Miseri ſunt, qui uxores ducunt: at tu duxisti alteram.*

Item vitiosum est id, quod vulgarem habet defensionem, hoc modo: *Iracundia inductus peccavit, aut adolescentia, aut amore.* Huiuscmodi enim deprecationes si probabuntur, impune maxima peccata dilabentur. Item vitiosum est, cum id pro certo sumitur, quod inter omnes non constat, quia etiam nunc in controversia est, hoc modo:

*Eho tu, dii, quibus eſt potestus motus ſuperum,  
atque inferum,*

*Pacem inter se se conciliant, et conferunt concordiam.*

Nam ita pro suo iure hoc exemplo usum Cresphonem Ennius induxit, quasi iam satis certis rationibus, ita esse, demonstrasset. Item vitiosum est, quod iam quasi fero, atque acto negotio, dici videtur, hoc modo: *In mentem mihi si venisset, Quirites, non commissem, ut hunc in locum res veniret; nam aut hoc, aut loc fecisset: sed me tum haec ratio fugit.* Item vitiosum est, cum id, quod in aperto delicto positum est, tamen aliqua levi tegitur defensione, hoc modo:

*Cum te expetebant omnes, florentissimo Regno reliqui: nunc desertum ab omnibus, Summo periculo sola ut restituam paro.*

- 26 Item vitiosum est, quod in aliam partem, ac dictum sit, potest accipi. Id est huiusmodi, ut, si quis potens ac factiosus in concione dixerit: *Satius est uti regibus, quam malis legibus.* nam et hoc tametsi rei augendae causa potest sine malitia dici, tamen propter potentiam eius, qui dicit, non dicitur sine atroci suspicione. Item vitiosum est, falsis, aut vulgaribus definitionibus uti. Falsae sunt huiusmodi, ut si quis dicat, iniuriam esse nullam, nisi quae ex pulsatione, aut convicio constet. Vulgares sunt, quae nihilo minus in aliam rem transferri possunt: ut si quis dicat, *Quadruplator, ut breviter describam, capitalis est. est enim improbus, et pestifer civis.* Nam nihilo magis quadruplatoris, quam furis, quam sicarii, aut proditoris attulit definitionem. Item vitiosum est, pro argumento sumere, quod in disquisitione positum est: ut, *si quis quem furti arguat, et dicat, eum esse homi-*

*nem improbum, avarum, fraudulentum; ei rei testimoniū esse, quod sibi furtum fecerit.* Item vitiosum est, controversiam controversia dissolvere, hoc modo: *Non convenit, Censores, istum vobis satisfacere ex eo, quod ait, se non potuisse adesse ita, ut iuratus fuerat. quod si ad exercitum non venisset, idne tribuno militum diceret?* Hoc ideo vitiosum est, quia non expedita, aut iudicata res, sed impedita, et in simili controversia posita, exempli loco profertur. Item vitiosum est, cum id, de quo summa controversia est, parum expeditur, et quasi transactum sit, relinquitur, hoc modo:

*Aperte fatur dictio, si intelligas.*

*Tali dari arma, qualis, qui gessit, fuit,*

*Iubet, potiri si studeamus Pergamo:*

*Quem ego profiteor esse me: me aequum est frui  
Fraternis armis, mihique adiudicarier,*

*Vel quod propinquus, vel quod virtutis aemulus.*

Item vitiosum est, ipsum sibi in sua oratione dissentire, et contra ea, quae ante dixerit, dicere, hoc modo:

*Quare accusem hunc, nequeo exputando evolvere.*

*Nam si veretur, quid eum accusem, qui est probus?*

*Sin inverecundum animi ingenium possidet,*

*Quid eum accusem, qui id parvi auditu existimet?*

Non incommoda ratione videtur sibi ostendisse,<sup>27</sup> quare non accusaret. Quid? postea quid ait? --

*Nunc ego te ab summo iam detexam exordio.*

Item vitiosum est, quod dicitur contra iudicis voluntatem, aut eorum, qui audiunt, si aut partes, quibus illi student, aut homines, quos illi caros habent, laedantur, aut aliquo huiusmodi vitio lae-

datur auditoris voluntas. Item vitiosum est, non omnes res confirmare, quas pollicitus sis in expositione. Item verendum est, ne de alia re dicatur, cum alia de re controversia sit; inque huiusmodi vitio considerandum est, ne aut ad rem addatur quid, aut quippiam de re detrahatur; aut tota causa mutata in aliam causam derivetur: uti apud Pacuvium Zethus cum Amphione, *quorum controversia cum de musica inducta sit, disputatio in sapientiae rationem et virtutis utilitatem consumitur.* Item considerandum est, ne aliud accusatoris criminatio contineat, aliud defensoris ratio purget; quod saepe consulto multi ab reo faciunt, angustiis causae coacti: *ut si quis, cum accusetur, ambitu magistratum petisse, ab imperatoribus saepenumero se apud exercitum donatum esse dicat.* Hoc si diligenter in adversariorum oratione observaverimus, saepe deprehendemus, [et in huiusmodi deprehensione ostendemus,] eos, de ea re quid dicant, non habere. Item vitiosum est, artem, aut scientiam, aut studium quodpiam vituperare propter eorum vitia, qui in eo studio sunt: veluti, *qui rhetorica vituperant, propter alicuius oratoris vituperandam vitam.* Item vitiosum est, ex eo, quod perperam factum esse constet, putare ostendi, a quo homine factum sit, hoc modo: *Mortuum deformatum, tumore praeditum, decoloratum fuisse constat: ergo veneno necatus est.* Deinde, si sit usque in eo occupatus (ut multi faciunt), venenum datum, vitio non mediocri conflictetur. Non enim factumne sit, quaeritur, sed a quo factum sit.

28 Item vitiosum est, in comparandis rebus alteram rem efferre, de altera mentionem non facere, aut negligentius disputare: ut si comparetur, *utrum satius sit populum frumentum accipere, an non?* quae commoda sint in altera re, cures enumerare: quae

in altera incommoda sint, velut depressa praetreas; aut ea, quae minima sint, dicas. Item vitiosum est, in rebus comparandis necesse putare alteram rem vituperari, cum alteram laudes: quod genus, si quaeratur, *utris maior honor habendus sit, Albensibus, an Venusinis,* quod reipublicae populū Romani profuerint, et is, qui dicat, alteris, alteros laedat. non enim necesse est, si alteros praeponas, alteros vituperare. Fieri enim potest, ut, cum alteros magis laudaris, aliquam alteris laudis partem attribuas, ne cupidius pugnasse contra veritatem puteris. Item vitiosum est, de nomine et vocabulo eius rei controversiam struere, quam rem confusudo potest optime iudicare: velut Sulpicius, qui intercesserat, ne exsules, quibus causam dicere non licuisset, reducerentur, idem posterius, immutata voluntate, cum eadem legem ferret, aliam sese ferre dicebat, propter nominum commutationem: nam *non exsules*, sed *vi electos* se reducere aiebat; perinde quasi id fuisset in controversia, quo illi nomine appellarentur a populo Romano, aut perinde quasi non omnes, quibus aqua et igni interdictum est, exsules appellantur. Verum illi fortasse iꝝ. oscimus, si cum causa fecit: nos tamen intelligamus, vitiosum esse intendere controversiam propter nominum mutationem.

Quoniam exornatio constat ex similibus, et ex-<sup>29</sup>emplis, et amplificationibus, et iudicatis, et ceteris rebus, quae pertinent ad exaggerandam et collocupletandam argumentationem, quae sint iis rebus vitia, consideremus. Simile vitiosum est, quod ex aliqua parte dissimile est, nec habet parem rationem comparationis, aut ipsi obest, qui affert. Exemplum vitiosum est, si aut falsum est, ut reprehendatur: aut si improbum, ut non sit imitandum:

aut maius, aut minus, quam res postulabit. Res iudicata vitiose profertur, si aut dissimili de re proferatur; aut de ea re, qua de controversia non est; aut si improba; aut eiusmodi, ut aut plures, aut magis idoneae res iudicatae ab adversariis proferri possint. Item vitiosum est id, quod adversarii factum esse confiteantur, de eo argumentari, et plenum facere factum esse. nam id tantum augeri oportet. Item vitiosum est, id augere, quod convenit doceri, hoc modo: ut, *si quis quem arguat, hominem occidisse*, et antequam satis idoneas argumentationes attulerit, augeat peccatum, et dicat, nihil indignius esse, quam hominem occidere. non enim, utrum indignum sit, an non, sed factumne sit, quaeritur.

Complexio vitiosa est, quae non, ut quodque primum dictum est, primum complectitur, et quae non breviter concludit, et quae non ex enumeratione certum et constans aliquid relinquit, ut intelligatur, quid propositum in argumentatione sit, quid deinde ratione, quid confirmatione, quid tota argumentatione demonstratum.

30 Conclusiones, quae apud Graecos *επιλογοι* nominantur, tripartitae sunt. nam constant ex enumeratione, amplificatione, et commiseratione. In quatuor locis uti possumus conclusionibus; in principio, secundum narrationem, secundum firmissimam argumentationem, in conclusione. Enumeratione est, per quam colligimus et commonemus, quibus de rebus verba fecerimus, breviter; ut renovetur, non redintegretur oratio: et ordine, quidquid erit dictum, referamus, ut auditor, si memoriae mandaverit, ad id, quod ipse meminerit, reducatur. Item curandum est, ne aut ab exordio, aut a narratione repetatur orationis enumeratio.

Facta enim , et dedita opera comparata oratio videbitur esse , aut artificii significandi , aut ingenii venditandi , aut memoriae ostentandae causa. Quapropter initium enumerationis sumendum est a divisione. deinde ordine breviter exponendae sunt res , quae tractatae erunt in confirmatione , et confutatione. Amplificatio est , quae per locum communem instigationis auditorum causa sumitur. Loci communes ex decem praeceptis commodissime sumuntur adaugendi criminis causa. Primus locus sumitur ab auctoritate , cum commemoramus , quantae curae ea res fuerit diis immortalibus , aut maioribus nostris , regibus , civitatibus , nationibus , hominibus sapientissimis , senatui. Item maxime , quo modo de his rebus legibus sanctum sit. Secundus locus est , cum consideramus , illae res , de quibus criminamur , ad quos pertineant : utrum ad omnes , quod atrocissimum est , an ad superiores , (quod genus ii sunt , a quibus auctoritatis locus communis sumitur , ) an ad pares , hoc est , in eisdem partibus animi , corporis , fortunarum positos ; an ad inferiores , qui omnibus his rebus antecelluntur. Tertius locus est , quo percontamur , quid sit eventurum , si omnibus idem concedatur : et ea re neglecta , ostendimus , quid periculorum atque incommodorum consequatur. Quartus locus est , quo demonstratur , si huic sit remissum , multos alacriores ad maleficia futuros , quos adhuc exspectatio iudicij remoretur. Quintus locus est , per quem ostendimus , si semel aliter iudicatum sit , nullam rem fore , quae incommodo mederi , aut erratum iudicium corrigere possit. Quo in loco non incommodum erit , ut ostendamus , alias res posse aut vetustate sedari , aut consilio corrigi ; huius rei aut

lenierdae , aut corrigendae nullam rem adiumento futuram. Sextus locus est , cum ostendemus , esse consulto factum , et dicemus , voluntario facinori nullam excusationem ; imprudentiae iustam deprecationem paratam. Septimus locus est , quo ostendemus taetrum facinus , crudele , nefarium , tyrannicum esse : quod genus , iniuria mulierum , aut earum rerum aliquid , quarum rerum causa bella suscipiuntur , et cum hostibus de vita dimicatur. Octavus locus est , quo ostendimus , non vulgare , sed singulare esse maleficium , spurcum , nefarium , inusitatum , quo maturius et atrocius vindicandum sit. Nonus locus constat ex peccatorum comparatione , quasi cum dicemus , maius esse maleficium , stuprare ingenuam , quam sacrum legere : quod propter egestatem alterum , alterum propter intemperantem superbiam fiat. Decimus locus est , per quem omnia , quae in negotio gerundo acta sunt , quaeque rem consequi solent , expemus acriter , et criminose , et diligenter , ut agires , et geri negotium videatur , rerum consequentium enumeratione. Misericordia commovebitur auditoris animus , si variam fortunarum commutationem dicemus ; si ostendemus , in quibus commodis fuerimus , quibusque in incommodis simus , comparatione. Si , quae nobis futura sint , nisi causam obtinuerimus , enumerabimus , et ostendemus. Si supplicabimus , et nos sub eorum , quorum misericordiam captabimus , potestatem subiiciemus. Si , quid nostris parentibus , liberis , ceteris necessariis casurum sit propter nostras calamitates , aperiemus , et simul ostendemus , illorum nos solitudine et miseria , non nostris incommodis dolere. Si de clementia , humanitate , misericordia nostra , qua in alios usi sumus , aperiemus. Si nos semper aut diu

et celeriter cum clamore verba conficere , ut vim volubilem orationis vociferatio consequi possit ; in distributione ab imis faucibus exclamationem quam clarissimam adhibere oportet : et quantum spatii per singulas exclamationes sumserimus , tantum in singula intervalla spati consumere iubemur. In amplificationibus , cum cohortatione utemur voce attenuatissima , clamore leni , sono aequabili , commutationibus crebris , maxima celeritate : in conquestione voce depressa , inclinato fono , crebris intervallis , longis spatiis , magnis commutationibus. De figura vocis satis dictum est : nunc de 15 corporis motu dicendum videtur.

Motus est corporis gestus , et vultus moderatio quaedam , quae pronuntianti convenit , et probabiliora reddit ea , quae pronuntiantur. Convenit igitur in vultu pudorem et acrimoniam esse : in gestu nec venustatem conspicuam , nec turpitudinem esse , ne aut histriones , aut operarii videamur esse. Ad easdem igitur partes , in quas vox est distributa , motus quoque corporis ratio videtur esse accommodanda. Nam si erit fermo cum dignitate ; stantes in vestigio , levi dexteræ motu loqui oportebit , hilaritate , tristitia , mediocritate vultus ad sermonis sententias accommodata. si erit in demonstratione sermo ; paululum corpus a cervicibus demitemus : nam hoc est a natura datum , ut quam proxime tum vultum admoveamus ad auditores , si quam rem docere eos , et vehementer instigare velimus. si erit in narratione sermo ; idem motus poterit idoneus esse , qui paulo ante demonstrabatur in dignitate. si in iocatione ; vultu quandam debebimus hilaritatem significare , sine commutatione gestus. Si contendemus per continuacionem ; brachio celeri , mobili vultu , acri aspecu u-

temur. siñ contentio fiet per distributionem; celeri proiectione brachii, inambulatione, pedis dextri rara supplauseione, acri et defixo aspectu uti oportebit. Si utemur amplificatione per cohortationem; paulo tardiore et consideratiore gestu conveniet uti, similibus ceteris rebus, atque in contentione per continuationem. siñ utemur amplificatione per conquestionem, feminis plangore, et capitis ictu, nonnunquam sedato et constanti gestu, moesto et conturbato vultu uti oportebit. Non sum nescius, quantum suscepimus negotii, qui motus corporis exprimere verbis, imitari scriptura conatus sim voces. Verum nec hoc confusus sum posse fieri, ut de his rebus satis commode scribi posset; nec, si id fieri non posset, hoc, quod feci, fore inutile putabam, propterea quod hic admonere voluimus, quid oporteret: reliqua trademus exercitationi. Hoc scire tamen oportet, pronunciationem bonam id perficere, ut res ex animo agi videatur.

16 Nunc ad thesaurum inventorum, atque ad omnium partium rhetoricae custodem, memoriam transeamus. Memoria utrum habeat quidquam artificioſi, an omnis a natura proficiscatur, aliud dicendi tempus magis idoneum dabitur. Nunc perinde atque constet, in hac re multum valere artem et praeceptionem, ita ea de re loquemur. placet enim nobis esse artificium memoriae: quare placeat, alias ostendemus: in praefentia cuiusmodi ea sit, aperiemus. Sunt igitur duae memoriae; una naturalis, altera artificiosa. Naturalis est ea, quae nostris animis insita est, et simul cum cogitatione nata: artificiosa est ea, quam confirmat inductio quaedam, et ratio praeceptionis. Sed quia in ceteris rebus ingenii bonitas imitatur saepe doctrinam,

ars porro naturae commoda confirmat et auget : ita sit in hac re , ut nonnunquam naturalis memoria , si cui data est egregia , similis sit huic artificiosae. Porro haec artificiosa , naturae commoda retinet , et amplificat ratione doctrinae. Quapropter et naturalis memoria praceptione confirmanda est , ut sit egregia : et haec , quae doctrina datur , indiget ingenii. Nec hoc magis , aut minus in hac re , quam in ceteris artibus fit , ut ingenio , doctrina , praceptione natura nitescat. Quare et illis , qui natura memores sunt , utilis haec erit institutio : quod tute paulo post poteris intelligere. Quod si illi freti ingenio suo , nostro non indigent , tamen iusta causa datur , quare iis , qui minus ingenii habent , adiumento velimus esse. Nunc de artificiosa memoria loquemur. Constat igitur artificiosa memoria ex locis et imaginibus. Locos appellamus eos , qui breviter , perfecte , insignite , aut natura , aut manu sunt absoluti , ut eos facile naturali memoria comprehendere et amplecti queamus , ut aedes , intercolumnium , angulum , fornicem , et alia , quae his similia sunt. Imagines sunt formae quaedam , et notae , et simulacra eius rei , quam meminisse volumus : quod genus , equi , leones , aquilae , quorum memoriam si volemus habere , imagines eorum certis in locis collocare nos oportebit.

Nunc , cuiusmodi locos invenire , et quo pacto reperire , et in locis imagines constitutre oporteat , ostendemus. Quemadmodum igitur qui literas sciunt , possunt id , quod dictatum est , scribere , et recitare , quod scripserunt : ita qui *μνημονία* didicereunt , possunt , quae audierunt , in locis collocare , et ex his memoriter pronuntiare. Loci enim cerae aut chartae simillimi sunt ; imagines , literis ; dispositio

et collocatio imaginum, scripturae; pronuntiatio, lectioni. Oportet igitur, si volumus multa meminisse, multos nobis locos comparare, ut in multis locis multas imagines collocare possimus. Item putamus oportere ex ordine hos locos habere, ne quando perturbatione ordinis impediatur, quo secius quanto quoque loco libebit, vel a superiore, vel ab inferiore, vel a media parte imagines sequi, ut ea, quae mandata locis erunt, videre et

18 proferre possimus. Nam ut, si in ordine stantes notos complures viderimus, nihil nostra intersit, utrum a summo, an ab imo, an ab medio nomina eorum dicere incipiamus: item in locis ex ordine collocatis eveniet, ut in quamlibet partem quantoquoque loco libebit, imaginibus commoniti dicere possimus id, quod locis mandaverimus. Quare placet et ex ordine locos comparare; et locos, quos sumserimus, egregie commendari oportebit, ut perpetuo nobis haerere possint. nam imagines, sicut literae, delentur, ubi nihil illis utimur: loci, tanquam cera, remanere debent. Et, ne forte in numero locorum falli possimus, quintum quemque locum placet notari: quod genus, si in quinto loco manum auream colloceimus; et in decimo aliquem notum, cui praenomen sit Decimo; deinde facile erit similes notas

19 quinto quoque loco collocare. Item commodius est in derelicta, quam in celebri regione locos comparare: propterea quod frequentia, et obambulatio hominum conturbat et infirmat imaginum notas; solitudo conservat integras simulacrorum figuras. Praeterea dissimiles forma atque natura loci comparandi sunt, ut distinetè interlucere possint. nam si quis multa intercolumnia sumserit, conturbabitur similitudine locorum, ut ignoret, quid quoque in

loco collocarit. Et magnitudine modica , et mediocres locos habere oportet. nam et praeter modum ampli vagas imagines reddunt ; et nimis angusti saepe non videntur posse capere imaginum collocationem. Tum nec nimis illustres , nec vehementer obscuros locos haberri oportet , ne aut obcaecentur tenebris imagines , aut splendore praefulgeant. Intervalla locorum mediocria esse placet , fere paulo plus , aut minus pedum tricenum. Nam ut aspectus , ita cogitatio minus valet , sive nimis procul removeris , sive vehementer prope admovevis id , quod oportet videri. Sed quanquam facile est ei , qui paulo plura exploraverit , quamvis multos et idoneos locos comparare : tamen si quis ad ista satis idoneos invenire se non putabit , ipse sibi constituat , quam volet multos , licebit. Cogitatio enim quamvis regionem potest amplecti , et in ea situm loci cuiusdam ad suum commodum et arbitrium fabricari et architectari. Quare licebit , si hac promta copia contenti non erimus , nosmet ipsos nobis cogitatione nostra regionem constituerre , et idoneorum locorum commodissimam distinctionem comparare. De locis satis dictum est : nunc ad imaginum rationem transeamus.

Quoniam ergo rerum similes imagines esse oportet , et ex omnibus verbis notas nobis similitudines eligere debemus , duplices similitudines esse debent ; unae rerum , alterae verborum. Rerum similitudines exprimuntur , cum summatim ipsorum negotiorum imagines comparamus : verborum similitudines constituuntur , cum uniuscuiusque nominis et vocabuli memoria imagine notatur. Rei totius memoriam saepe una nota , et imagine simplici comprehendemus , hoc modo : Ut , si accusator dixerit , ab reo hominem veneno necatum , & hereditatis causa

factum arguerit, & eius rei multos dixerit testes & consciens esse: si hoc primum, ut ad defendendum nobis expeditum sit, meminisse volemus; in primo loco rei totius imaginem conformabimus; aegrotum in lecto cubantem faciemus ipsum illum, de quo agetur, si formam eius detinebimus: si eum non agnoverimus, aliquem aegrotum non de minimo loco sumemus, ut cito in mentem venire possit, et reum ad lectum eius adstituemus, dextra poculum, sinistra tabulas, medico testiculos arietinos tenetem. Hoc modo et testium, et hereditatis, et veneno necati memoriam habere poterimus. Item deinceps cetera crimina ex ordine in locis ponemus: et, quotiescumque rem meminisse volemus, si formarum dispositione, et imaginum diligentि notatione utemur, facile ea, quae volemus, memoria consequemur. Cum verborum similitudines imaginibus exprimere volemus, plus negotii suscipiemus, et magis ingenium nostrum exercebimus. Id nos hoc modo facere oportebit. *Iam domitionem reges Atridae parant.* In loco constituiere oportet manus ad coelum tollentem Domitium, cum a regibus Marciis loris caedatur. Hoc erit, *Iam domitionem reges.* In altero loco Aesopum et Cimbrum subornare Iphigeniam, Agamemnonem et Menelaum. Hoc erit, *Atridae parant.* Hoc modo omnia verba erunt expressa. Sed haec imaginum conformatio tum valet, si naturalem memoriam exuscitaverimus hac notatione, ut, versu posito, ipsi nobiscum primum transeamus bis, aut ter eum versum; deinde cum imaginibus verba exprimamus. Hoc modo naturae suppeditabit doctrina. nam utraque altera separata minus erit firma; ita tamen ut multo plus in doctrina atque arte praesidii sit. Quod docere non gravaremur, ni metueremus,

ne , cum ab instituto nostro recessissimus , minus commode servaretur haec dilucida brevitas pראהceptionis.

Nunc , quoniam solet accidere , ut imagines partim firmae et ad monendum idoneae sint , partim imbecilles et infirmae , quae vix memoriam possint excitare : qua de causa utrumque fiat , considerandum est ; ut , cognita causa , quas vitemus , et quas sequamur imagines , scire possumus . Docet 22 igitur nos ipsa natura , quid oporteat fieri . nam si quas res in vita videmus parvas , usitatas , quotidianas , eas meminisse non solemus : propterea quod nulla nisi novā , aut admirabili re commovetur animus . at si quid videmus , aut audimus egregie turpe , aut honestum , inusitatum , magnum , incredibile , ridiculum , id diu meminisse consuevimus . Itemque quas res ante ora videmus , aut audimus , obliviscimur plerumque ; quae acciderunt in pueritia , meminimus optime saepe : nec hoc alia de causa potest accidere , nisi quod usitatae res facile e memoria elabuntur , insignes et novae manent diutius . Solis exortus , cursus , occasus nemo admiratur , propterea quod quotidie fiunt : at eclipses solis mirantur , quia raro accidunt , et solis eclipses magis mirantur , quam lunae , quoniam hae crebriores sunt . Docet ergo se natura , vulgari et usitata re non exfuscati : novitate et insigni quodam negotio commoveri . Imitetur igitur ars naturam , et quod ea desiderat , inveniat : quod ostendit , sequatur . Nihil est enim , quod aut natura extremum invenerit , aut doctrina primum : sed rerum principia ab ingenio profecta sunt , et exitus disciplina comparantur . Imagines igitur nos in eo genere constituere oportebit , quod genus manere in memoria diutissime potest . id accidet , si quam maxime notas

similitudines constituemus : si non mutas , nec vagas , sed aliquid agentes imagines ponemus : si egregiam pulchritudinem , aut unicam turpitudinem eis attribuemus : si aliqua re exornabimus , ut si coronis , aut veste purpurea , quo nobis notior sit similitudo : aut si qua re deformabimus , ut si cruentam , aut coeno oblitam , aut rubrica delibutam inducemus , quo magis insignita sit forma : aut si ridiculas res alias imaginibus attribuemus . nam ea res quoque faciet , ut facilius meminisse possimus . Nam , quas res veras facile meminimus , easdem fictas et diligenter notatas meminisse non est difficile . Sed illud facere oportebit , ut identidem primos quosque locos imaginum renovandarum causa celeriter animo percurramus .

- 23 Scio , plerosque Graecos , qui de memoria scripserunt , fecisse , ut multorum verborum imagines conscriberent , uti , qui eas ediscere vellent , paratas haberent , ne quid in quaerendo operae consumerent . Quorum rationem aliquot de causis improbamus : primum , quod in verborum innumerablem multitudine ridiculum sit , mille verborum imagines comparare . Quantulum enim poterunt haec valere , cum ex infinita verborum copia , modo aliud , modo aliud nos verbum meminisse oportebit ? Deinde cur volumus ab industria quemquam removere , ut ne quid ipse quaerat , cum nos illi omnia parata quaesitaque tradamus ? Praeterea similitudine alia alius magis commoveretur . Nam ut saepe , formam si quam similem cuiquam dixerimus esse , non omnes habemus assensores , quod alii videtur aliud : ita fit in imaginibus , ut quae nobis diligenter notatae sint , eae parum videantur insignes aliis . Quare sibi quemque suo commodo convenit imagines comparare . Po-

stremo praeceptoris est docere , quemadmodum quaeri quidque conveniat , et unum aliquod , aut alterum , non omnia , quae eius generis erunt , exempli causa subiicere , quo res possit esse dilucidior. Ut cum de prooemiiis quaerendis disputamus , rationem damus quaerendi , non mille prooe- miorum genera conscribimus : ita arbitramur de imaginibus fieri convenire.

Nunc , ne forte verborum memoriam , aut nimis difficilem , aut parum utilem arbitrere , et ipsarum memoria rerum contentus sis , quod et utiliores sint , et plus habeant facilitatis ; admonendum es , quare verborum memoriam non improbemus. Nam putamus oportere eos , qui velint res faciliores sine labore et molestia facile meminisse , in rebus difficilioribus esse ante exercitatos. Nec nos hanc verborum memoriam inducimus , ut versus meminisse possimus , sed ut hac exercitatione , illa rerum memoria , quae pertinet ad utilitatem , confirmetur ; ut ab hac difficiili consuetudine sine labore ad illam facilitatem transfire possimus. Sed cum in omni disciplina infirma est artis praeceptio sine summa assiduitate exercitationis , tum vero in μνημονικοις minimum valet doctrina , nisi industria , studio , labore , diligentia comprobetur. Quam plurimos locos ut habeas , et quam maxime ad praecepta accommodatos , curare debebis. In imaginibus collocandis exerceri quotidie conveniet. Non enim sicut a ceteris studiis abducimur nonnunquam occupatione , ita ab hac re nos potest causa deducere aliqua. Nunquam est enim , quin aliquid memoriae tradere velimus , et tum maxime , cum aliquo maiore negotio detinemur. Quare cum sit utile , facile meminisse , non te fallit , quod tantopere utile sit , quanto labore sit appetendum : quod poteris existi-

mare, utilitate cognita. Pluribus verbis ad eam te hortari non est sententia, ne aut tuo studio diffisi, aut minus, quam res postulat, dixisse videamur. De quinta parte rhetoricae deinceps dicemus: tu primas quasque partes in animo frequenta, et quod maxime necesse est, exercitatione confirma.

---

## RHETORICORUM

C. HERENNII  
LIBER QUARTUS.

## ARGUMENTUM.

In hoc libro quoniam de elocutione acturus et suis quasque definitiones, non aliunde petitis, illustraturus exemplis erat, eam autem rem abhorrere intelligebat a ceterorum consuetudine, qui in hoc genere elaborarant, ac propterea fore, ut in eorum aliorumque reprehensionem incurreret; praefationis loco, quo consilio, quibusque rationibus ductus a reliquorum more recesserit ostendit, multumque eo disputat, ut rectius se his facere vincat, qui ex oratoribus potius et poetis optimis quibusque exempla sumenda putent a c. 1-7. Deinde de ipsa elocutione ita differit, ut primo agat de tribus dicendi generibus s. figuris, gravi, mediocri et attenuata, c. 8-11. deinde, quas res debeat habere comoda et perfecta elocutio, ostendat. Harum tres facit partes, primam elegantiam, quae latitudinem et explanationem s. perspicuitatem desideret; alteram compositionem omnes orationis partes aequabiliter perpolientem; tertiam, dignitatem quae in verborum et sententiarum exornatione cernatur, c. 12. usque ad finem.

**Q**UONIAM in hoc libro, C. Herenni, de elocutione conscripsimus, et quibus in rebus opus fuit exemplis uti, nostris usi sumus; et id fecimus praeter consuetudinem Graecorum, qui de

hac re scripserunt; necessario faciendum est, ut paucis rationem nostri consilii demus. Atque hoc nos necessitudine facere, non studio, satis erit signi, quod in superioribus libris nihil neque ante rem, neque praeter rem locuti sumus. Nunc, si pauca, quae res postulat, dixerimus, tibi id, quod reliquum est artis, ita, ut instituimus, persolveamus. Sed facilius nostram rationem intelliges, si prius, quid illi dicant, cognoveris.

Compluribus de causis putant oportere, cum ipsi praeceperint, quo pacto oporteat ornare elocutionem, uniuscuiusque generis ab oratore aut poeta probato sumtum ponere exemplum. Et primum se id modestia commotos facere dicunt, propterea quod videatur esse ostentatio quaedam, non satis habere, praecipere de artificio, sed ipsos etiam videri velle artificiose gignere exempla: hoc est, inquiunt, ostentare se, non ostendere artem. Quare pudor in primis est ad eam rem impedimento, ne nos solos probare, nos amare, alios contemnere et deridere videamur. Etenim cum possumus ab Ennio sumtum aut a Graccho ponere exemplum, videtur esse arrogantia, illa relinquere, et ad sua devenire. Praeterea exempla testimoniorum locum obtinent. Id enim, quod admonuerit, et leviter fecerit praeceptio, exemplo, sicut testimonio, comprobatur. Non igitur ridiculus sit, si quis in lite, aut in iudicio, domestico pugnet sui ipsius testimonio, et abutatur? Ut enim testimonium, sic exemplum, rei confirmandae causa sumitur. Non ergo oportet hoc, nisi a probatissimo sumi, ne, quod aliud confirmare debeat, egeat ipsum confirmationis. Etenim necesse est aut se omnibus anteponant, et sua maxime probent; aut negent optima esse exempla, quae a probatissimis

oratoribus, aut poetis sumta sint. Si se omnibus anteponant, intolerabili arrogantia sunt: si quos sibi praepont, et eorum exempla suis exemplis non potent praestare, non possunt dicere, quare 2 sibi illos anteponant. Quid igitur ipsa auctoritas antiquorum? non cum res probabiliores, tum hominum studia ad imitandum alacriora reddit? immo erigit omnium cupiditates, et acuit industriam, cum spes iniecta est, posse imitando, Gracchi, aut Crassi consequi facultatem. Postremo hoc ipsum est summum artificium, res varias et dispares in tot poematibus et orationibus sparsas, et vase disiectas, ita diligenter eligere, ut unumquodque genus exemplorum sub singulos artis locos subiicere possis. Hoc si industria solum fieri posset, tamen essemus laudandi, cum talem laborem non fugissimus: nunc *sine summo artificio non potest fieri*. Quis est enim, qui nisi summe teneat artem, possit ea, quae iubeat ars, de tanta, et tam diffusa scriptura notare, et separare? Ceteri, cum legunt orationes bonas aut poemata, probant oratores, et poetas, neque intelligunt, quare commoti probent: quod scire non possunt, ubi sit, nec quid sit, nec quo modo factum sit id, quod eos maxime delectet. At is, qui et haec omnia intelligit, et idonea maxime elit, et omnia in arte maxime scribenda, redigit in singulas rationes praceptio-  
nis, necesse est eius rei summus artifex sit. Hoc igitur ipsum maximum artificium est, in arte sua posse et alienis exemplis uti.

Haec illi cum dicunt, magis nos auctoritate sua commovent, quam veritate disputationis. Illud enim veremur, ne cui satis sit ad contrariam rationem probandam, quod ab ea parte steterint ii, qui et inventores huius artificii fuerunt, et vetustate

iam satis omnibus probati sunt. Quod si , illorum auctoritate remota , rem omnino volent cum re comparare ; intelligent , non omnia esse concedenda antiquitati. Primum igitur , quod ab eis de modestia dicitur , videamus , ne nimium pueriliter proferatur. Nam si tacere , aut nihil scribere modestia est , cur quidquam scribunt , aut loquuntur ? Sin aliquid suum scribunt ; cur , quo secius omnia scribant , impediuntur modestia ? Quasi si quis ad Olympiacum venerit cursum , et steterit , ut mittatur , impudentesque illos dicat esse , qui currere coeperint , ipse intra carceres stet , et narret aliis , quomodo Ladas aut Boius cum Sicyoniis cursarint : sic isti , cum in artis curriculum descendrerunt , illos , qui in eo , quod est artificii , elaborant , aiunt facere immodeste ; ipsi aliquem antiquum oratorem , aut poetam laudant , aut scripturam , sic ut in stadium artis rhetoricae prodire non audeant. Non ausim dicere , sed tamen vereor , ne , qua in re laudem modestiae venentur , in ea ipsa re sint impudentes. Quid enim tibi vis ? aliquis inquiet . artem tuam scribis : gignis nobis novas praeceptiones : eas ipse confirmare non potes : ab aliis exempla sumis. vide , ne facias impudenter , qui tuo nomini velis ex aliorum laboribus libare laudem. Nam si eorum volumina prehenderint antiqui oratores & poetae , et suum quisque de libris sustulerit ; nihil istic , quod suum velint , relinquetur. At exempla , quoniam testimoniorum similia sunt , item convenit , ut testimonia , ab hominibus probatissimis sumi. Primum omnium exempla ponuntur hic non confirmandi , neque testificandi causa , sed demonstrandi. Non enim , cum dicimus esse exornationem , quae , verbi causa , constet ex similiter desinentibus verbis , et ponimus

hoc exemplum a Crasso , quibus possumus , et detemus , non testimonium collocamus , sed exemplum. Hoc igitur interest inter exemplum , et testimonium : exemplo demonstratur id , quod dicimus , cuiusmodi sit : testimonio , esse illud ita , ut nos dicimus , confirmatur. Praeterea oportet testimonium cum re convenire. aliter enim rem non potest confirmare. at id , quod illi faciunt , cum re non convenit. Quid ita ? quia pollicentur artem se scribere , et exempla proferunt ab iis plerisque , qui artem nescierunt. Tum quis est , qui possit id , quod de arte scripserit , comprobare , nisi aliquid scribat ex arte ? Contraque faciunt , quam polliceri videntur. nam cum scribere artem instituunt , videntur dicere se excogitasse , quod alias docerent : cum vero scribunt , ostendunt no-  
4 bis , quid alii excogitarint. At hoc ipsum difficile est , inquiunt , eligere de multis. Quid dicitis difficile ? utrum laboriosum , an artificiosum ? Si laboriosum , non statim praeclarum. sunt enim multa laboriosa , quae si faciatis , non continuo gloriemini : nisi forte etiam , si vestra manu fabulas , aut orationes totas transcripsissetis , gloriosum putaretis. Sin autem istud artificiosum , egregium dicitis ; videte , ne insueti rerum maiorum videamini , si vos parva res , sicuti magna delectat. Nam isto modo eligere rudis quidem nemo potest , sed sine summo artificio multi. Quisquis enim audierit de arte paulo plus , in elocutione praesertim , omnia videre poterit , quae ex arte dicuntur ; facere nemo poterit , nisi eruditus. ita ut , si de tragoe-  
tliis Ennii velis sententias eligere , aut de Pacuvianis periodos ; quia plane rudis id facere nemo poterit , cum feceris , te literatissimum putas , ineptus sis , propterea quod id facile faciat quivis me-

diocriter literatus : item si , cum ex orationibus aut poematis elegeris exempla , quae certis signis artificii notata sunt , quia ruditis id nemo facere pos- sit , artificiosissime te fecisse putas , erres ; prop- terea quod isto signo videmus te nonnihil eius scire : aliis signis , multa scire intelligemus. Quodsi artificiosum est intelligere , quae sint ex arte scripta , multo est artificiosius , ipsum scribere ex arte. Qui enim scribit artificiose , ab aliis commode scripta facile intelligere poterit : qui eliget facile , non continuo ipse commode scribit. Et , si est maxime artificiosum ; alio tempore utantur ea facultate , non tum , cum parere ipsi , et gignere , et pro- ferre debent. Postremo , in eo vim artificii con- sumant , ut ipsi ab aliis potius eligendi , quam alio- rum boni electores existimentur. Contra ea , quae ab iis dicuntur , qui dicunt alienis exemplis uti oportere , satis est dictum. Nunc , quae separatim dici possunt , consideremus.

Dicimus ergo , eos omnes , ideo quod alienis 5 utantur , peccare , tum etiam magis delinquere , quod a multis exempla sumant. Sed de eo , quod postea diximus , ante videamus. Si concederem , aliena oportere assumere exempla , vincerem unius oportere : primum , quod contra hoc nulla staret eorum ratio. liceret enim eligerent , et probarent quemlibet , qui sibi in omnes res suppeditaret ex- exempla , vel poetam , vel oratorem , cuius aucto- ritate niterentur. Deinde interest magni eius , qui discere vult , utrum unum omnia , an omnia ne- minem , sed aliud aliud putet consequi posse. Si enim putabit posse omnia penes unum consistere ; ipse quoque ad omnium nitetur facultatem : fin id desperabit , in paucis se exercebit. ipsis enim con- tentus erit. nec mirum , cum ipse praceptor artis

omnia penes unum reperire non potuerit. Allatis  
igitur exemplis a Catone , a Gracchis , a Laelio ,  
a Scipione , Galba , Porcina , Crasso , Antonio ,  
ceterisque ; item sumtis aliis a poetis , et historia-  
rum scriptoribus , necesse erit , eum , qui discet ,  
ab omnibus putare omnia , ab uno pauca vix potuisse  
sumi. Quare , si unius alicuius esse se similem satis  
habebit , [ omnia ] quae omnes habuerint , solum  
habere se posse diffidet. ergo inutile est ei , qui dis-  
cere vult , non , putare , unum posse omnia. Igi-  
tur nemo in hanc incideret opinionem , si ab uno  
exempla sumissent. nunc hoc signi est , ipsos artis  
scriptores non putasse , unum potuisse in omnibus  
elocutionis partibus enitere , quoniam neque sua  
protulerunt , neque unius alicuius , aut denique  
duorum , sed ab omnibus oratoribus et poetis ex-  
empla sumserunt. Deinde , si quis velit , artem ,  
demonstrare , nihil prodeesse ad discendum , non  
male utatur hoc adiumento , quod unus omnes artis  
partes consequi nemo potuerit. Quod igitur iuvat  
eorum rationem , qui omnino improbant artem ,  
id , non ridiculum est , ipsum scriptorem artis suo  
iudicio comprobare ? Ergo ab uno sumenda fuisse  
docuimus exempla , si semper aliunde sumerentur.  
Nunc omnino aliunde , sic intelligemus , sumenda  
non fuisse. Primum omnium , quod ab artis scrip-  
tore affertur exemplum , de eiusdem artificio debet  
esse ; non , ut , si quis purpuram aut aliud quip-  
piam vendens dicat , Sume a me ; sed huius exem-  
plum aliunde rogabo , tibique ostendam. Si merces  
ipsi qui venditant , aliunde exemplum quaeritent  
aliud mercis ; aut si acervos se dicant tritici habere ,  
et eorum exemplum pugno non habeant , quod  
ostendant : si Triptolemus , cum hominibus semen  
largiretur , ipse ab aliis id hominibus mutuaretur :

in malis fuisse ostendemus. Si nostrum fatum, aut fortunam conqueremur. Si animum nostrum fortem, patientem incommodorum ostendemus futurum. Commiserationem brevem esse oportet. Nihil enim lacryma citius arescit.

Fere locos obscurissimos totius artificii tractavimus in hoc libro. quapropter huic volumini modus hic sit. Reliquas praceptiones, quoad videbitur, in tertium librum transferemus. Haec si, ut conquise conscripsimus, ita tu diligenter fueris consecutus, et nos industriae fructus ex tua scientia capiemus, & tute nostram diligentiam laudabis, tuaque perceptione laetabere: tu scientior eris praceptorum artificio, nos alacriores ad reliquum perolvendum. Verum haec futura satis scio. te enim non ignoro. nos deinceps ad cetera pracepta transeamus, ut, quod libentissime facimus, tuae voluntati rectissimae morem geramus.

## RHETORICORUM

AD

C. HERENNII  
LIBER TERTIUS.

Hoc libro Auctor reliqua duo causarum genera, deliberativum & demonstrativum, persequitur, atque adeo a c. 2. ad 6. quibus quaeque res argumentis suadenda sit aut dissuadenda docet, et a c. 6. ad 9. omnes laudis vituperationisque fontes ac vias aperit. Ita absoluta prima artis, quae de inventione est, parte, ad reliquas pergit, et primo quo modo cum per integrum orationem, tum per singulas argumentationes disponenda sit causa quaeque, demonstrat c. 9. 10. deinde, quomodo vox in pronuntiando moderanda et qui motus corporis quoquo loco adhibendi c. 11--15. denique, qui locus imprimis notatu dignus at Cicer. Oper. Vol. I.

D

que in hoc genere praecipuus est, de memoria artificiali praecipit, ac non modo esse aliquod huiusmodi artificium, quo naturalis memoriae vis confirmari augerique possit, sed etiam, quomodo et qui loci inveniendi, et in iis imagines, nam his duabus rebus constat haec artificiosa memoria, collocandae sint, sive ostendit.

**A**d omnem iudicialem causam quemadmodum conveniret inventionem rerum accommodari, satis abundantter, ut arbitror, superiobus libris demonstratum est. Nunc earum rationem rerum inveniendarum, quae pertinerent ad causas deliberativas et demonstrativas, in hunc librum transstulimus, ut omnis inveniendi praeceptio tibi quamprimum persolveretur. Reliquae quatuor partes erant artificii. De tribus partibus in hoc libro dicemus, dispositione, pronuntiatione, memoria. De elocutione, quia plura dicenda videbantur, in quarto libro conscribere maluimus: quem, ut arbitror, tibi librum celeriter absolutum mittemus, ne quid tibi rhetoricae artis deesse possit. Interea prima quaeque et nobiscum, cum voles, et interdum sine nobis legendo consequere; ne quid impediare, quin ad hanc utilitatem pariter nobiscum progredi possis. Nunc tu fac attentum te preebeas: nos proficiisci ad instituta pergemus.

**2** Deliberationes partim sunt huiusmodi, ut quaeratur, utrum potius faciendum sit; partim huiusmodi, ut, quid potissimum faciendum sit, consideretur. Utrum potius, hoc modo: *Carthago tolenda, an relinquenda videatur.* Quid potissimum, hoc parte: ut, si Hannibal consultet, cum ex Italia Carthaginem arcessitur, in Italia remaneat, an dominum redeat, an in Aegyptum profectus occupet Alexandriam. Item deliberationes partim ipsae propter se consultandae sunt: ut, si deliberet senatus,

*captivos ab hostibus redimat, an non : partim propter aliquam extraneam causam veniunt in deliberationem et consultationem : ut, si deliberet senatus bello Italico, solvatne legibus Scipionem, ut eum liceat ante tempus consulem fieri : partim et propter se sunt deliberandae, et magis propter extraneam causam veniunt in consultationem : ut, si deliberet senatus bello Italico, sociis civitatem det, an non. In quibus causis rei natura faciet deliberationem, omnis oratio ad ipsam rem accommodabitur. In quibus extranea causa conficit deliberationem, in his ea ipsa causa erit adaugenda, aut deprimenda. Omnem orationem eorum, qui sententiam dicent, finem sibi conveniet utilitatis proponere, ut omnis eo totius orationis ratio conferatur. Utilitas in duas partes in civili consultatione dividitur, tutam, et honestam. Tuta est, quae conficit instantis aut consequentis periculi visitationem qualibet ratione. Haec distribuitur in vim et dolum : quorum aut alterum separatim, aut utrumque sumemus coniunctim. Vis decernitur per exercitus, classes, arma, tormenta, evocationes hominum, et alias huiusmodi res. Dolus consummitur in pecunia, pollicitatione, dissimulatione, maturatione, mentione, et ceteris rebus, de quibus magis idoneo tempore loquemur, si quando de re militari, aut de administratione reipublicae scribere volemus. Honesta res dividitur in rectum et laudabile. Rectum est, quod cum virtute et officio fit. Id dividitur in prudentiam, iustitiam, fortitudinem, modestiam. Prudentia est calliditas, quae ratione quadam potest delectum habere bonorum et malorum. dicitur item prudentia, scientia cuiusdam artificii. item appellatur prudentia, multarum rerum memoria et usus complurium ne-*

gotiorum. Iustitia est aequitas , ius unicuique tribuens , pro dignitate cuiusque. Fortitudo est rerum magnarum appetitio , et rerum humilium contemptio , et laboris cum utilitatis ratione perpessio. Modestia est in animo continens moderatio cupiditatem. Prudentiae partibus utemur in dicendo , si commoda cum incommodis conferemus , cum alterum sequi , vitare alterum cohortabimur : aut si qua in re cohortabimur aliquid , cuius rei aliquam disciplinabilem scientiam poterimus habere ; et quo modo , aut qua quidque ratione fieri oporteat , ostendemus : aut si suadebimus quipiam , cuius rei gestae aut praesentem aut auditam memoriam poterimus habere : qua in re facile id , quod velimus , exemplo allato persuadere possimus. Iustitiae partibus utemur , si aut innocentum aut supplicum dicemus misereri oportere : si ostendemus bene merentibus gratiam referri convenire : si demonstrabimus ulcisci male meritos oportere : si fidem magnopere censemus conservandam : si leges et mores civitatis egregie dicemus servari oportere : si societas , atque amicitias studiose dicemus coli convenire : si , quod ius in parentes , deos , patriam natura comparavit , id religiose colendum demonstrabimus : si hospitia , clientelas , cognationes , affinitates caste colendas esse dicemus : si nec pretio , nec gratia , nec periculo , nec similitate a via recta ostendemus deduci oportere : si dicemus , in omnibus ius aequabile statui convenire. His atque huiusmodi partibus iustitiae si quam rem in concione , aut in consilio faciendam censemus , iustum esse ostendemus ; contrariis , iniustum. Ita fiet , ut eisdem locis et ad suadendum , et ad dissuadendum simus comparati. Sin fortitudinis retinendae causa faciendum quid esse dicemus , ostendemus

demus, res magnas et celsas sequi et appeti oportere: et item res humiles et indignas viros fortes propterea contemnere oportere, nec idoneas dignitate sua iudicare. Item a nulla re honesta, periculi aut laboris magnitudine deduci oportere: antiquiorem mortem turpitudine habere: nullo dolore cogi, ut ab officio recedatur: nullius pro rei veritate metuere inimicitias: quodlibet pro patria, parentibus, hospitibus, amicis, et iis rebus, quas iustitia colere cogit, adire periculum, et quemlibet suscipere laborem. Modestiae partibus utemur, si nimias libidines honoris, pecuniae, similiumque rerum vituperabimus: si unamquamque rem certo naturae termino definiemus: si quod cuique satis sit, ostendemus, et nimium progredi dissuadebimus, et modum unicuique rei statuemus. Huiusmodi partes sunt virtutis, amplificandae, si suadebimus; attenuandae, si ab his dehortabimur, [ut haec attenuentur, ] quae supra demonstravi. Nam nemo erit, qui censeat a virtute recendum: verum aut res non huiusmodi dicatur esse, ut virtutem possimus egregiam experiri, aut in contrariis potius rebus, quam in his, virtus constare ostendatur. Item si quo pacto poterimus, quam is, qui contra dicet, iustitiam vocavit, nos demonstrabimus ignaviam esse, et inertiam, ac pravam libertatem: quam prudentiam appellari, ineptam, et garrulam, et odiosam scientiam esse dicemus: quam ille modestiam dicet esse, eam nos inertiam, et dissolutam negligentiam dicemus: quam ille fortitudinem nominarit, eam nos gladiatoriam et inconsideratam appellabimus temeritatem. Laudabile est, quod conficit honestam, 4 et praesentem, et consequentem commemorationem. Hoc nos eo a recto separamus, non quod hae

quatuor partes, quae subiiciuntur sub vocabulo recti, hanc honestatis commemorationem dare non soleant: sed quamquam ex recto laudabile nascitur, tamen in dicendo seorsum tractandum est hoc ab illo. Neque enim solum laudis causa rectum sequi convenit: sed si laus consequitur, duplicatur recti appetendi voluntas. Cum igitur erit demonstratum rectum, laudabile esse demonstrabimus aut ab idoneis hominibus, ut si qua res honestiori ordini placeat, quae a deteriore ordine improbeatur: aut ab aliquibus sociis, aut omnibus civibus, exteris nationibus, posterisque nostris.

Cum huiusmodi locorum divisio sit in consultatione, breviter aperienda est totius tractatio causae. Exordiri licebit, vel a principio, vel ab insinuatione, vel iisdem rationibus, quibus in iudicali causa. Si cuius rei narratio incident, eadem ratione narrare oportebit. Quoniam in huiusmodi causis finis est utilitas, et ea dividitur in rationem tutam atque honestam: si utrumque poterimus ostendere, utrumque pollicebimus nos in dicendo demonstruros esse: si alterum demonstraturi erimus, simpliciter, quod dicturi sumus, ostendemus. At si nostram rationem tutam esse dicemus, divisione utemur in vim et consilium. Nam, quod in docendo, rei dilucidandae causa, dolum appellavimus, id in dicendo honestius consilium appellabimus. Si rationis nostraræ sententiam rectam esse dicemus, et omnes partes recti incident; quadripartita divisione utemur: si non incident, quot erunt, tot exponemus in dicendo. In confirmatione et confutatione utemur locis, quos ante ostendimus, nostris confirmandis, contrariis confutandis. Argumentationis artificiosae tractanda ratio de secundo libro petetur. Sed si acciderit, ut in con-

sultatione alteri ab tuta ratione, alteri ab honesta, sententia sit, ut in deliberatione eorum, qui a Poenis circumfessi deliberant, quid agant: qui tutam rationem sequi suadebit, his locis utetur: Nullam rem utiliorem esse incolumitate: virtutibus uti neminem posse, qui suas rationes in tuto non collocarit: ne deos quidem esse auxilio iis, qui se inconferto in periculum mittant: honestum nihil oportere existimari, quod non salutem pariat. Qui tutae rei praeponet rationem honestam, his locis utetur: virtutem nullo tempore relinquendam: vel dolorem, si is timeatur; vel mortem, si ea formidetur, dedecore et infamia leviorem esse: considerare, quae sit turpitudo consecutra: at non immortalitatem, neque aeternam incolumitatem consequi: nec esse exploratum, illo vitato periculo, nullum in aliud periculum venturos: virtute vel ulro ad mortem proficiisci, esse praeclarum: fortitudini fortunam quoque esse adiumento solere: eam tute vivere, qui honeste vivat, non, qui in praesentia incolumis sit: et eum, qui turpiter vivat, incolumem in perpetuum esse non posse. Conclusionibus fere similibus in his, et iudicialibus causis uti solemus; nisi quod in his maxime conductit quamplurima rerum ante gestarum exempla proferre. Nunc ad demonstrativum 6 genus causae transeamus.

Quoniam haec causa dividitur in laudem et vituperationem, quibus ex rebus laudem constituerimus, ex contrariis rebus erit vituperatio comparaanda. Laus igitur potest esse rerum externarum, corporis, et animi. Rerum externarum sunt ea, quae casu, aut fortuna secunda, aut adversa, accidere possunt: ut genus, educatio, dvitiae, potestates, gloriae, civitas, amicitiae, et quae hu-

iusmodi sunt , et ea , quae his sunt contraria. Corporis sunt ea , quae natura corpori attribuit commoda [ aut incommoda ]: ut velocitas , vires , dignitas , valetudo , et quae contraria sunt. Animis sunt ea , quae consilio , et cogitatione nostra constant : ut prudentia , iustitia , fortitudo , modestia , et quae contraria sunt. [ Erit igitur haec confirmatio et confutatio nobis. ] In huiusmodi igitur causa principium sumetur aut a nostra , aut ab eius , de quo loquemur , aut ab eorum , qui audient , persona , aut ab re. A nostra , si laudabimus , dicemus aut officio facere , quod causa necessitudinis intercedat : aut studio , quod eiusmodi virtutis sit , ut omnes commemorare debeant velle : aut quod rectum sit , ex aliorum laude ostendere , qualis noster animus sit. Si vituperabimus , aut merito facere , quod ita tractati simus : aut studio , quod utile petemus esse , ab omnibus unicam malitiam atque nequitiam cognosci : aut quod placeat ostendi , quid nobis displiceat , ex aliorum vituperatione. Ab eius persona , de quo loquemur , si laudabimus , vereri nos dicemus , ut illius facta verbis consequi possimus : omnes hominis illius virtutes praedicare oportere : ipsa facta omnium laudatorum eloquentiam anteire. Si vituperabimus , ea , quae videbimus contraria , paucis verbis commutatis , dici posse , dicemus : ut paulo ante exempli causa demonstratum est. Ab auditorum persona , si laudabimus , quoniam non apud ignotos laudemus , nos monendi causa pauca esse dicturos : aut si erunt ignoti , ut talem virum velint cognoscere , petemus : quoniam in eodem virtutis studio sint , apud quos laudemus , quo ille , qui laudetur , fuerit , aut sit , sperare nos facile iis , quibus velimus , huius facta probaturos. Contraria vituperatio : quoniam norint , pauca de nequitia

eius nos esse dicturos : quod si ignorent , petemus ut cognoscant , uti malitiam vitare possint : quoniam dissimiles sint , qui audiunt , atque ille , qui vituperatur , nos sperare , illius vitam vehementer improbaturos. Ab rebus ipsis , incertos esse , quid potissimum laudemus : vereri , ne , cum multa dixerimus , plura praetereamus , et quae similes sententias habebunt : quibus sententiis contraria sumuntur a vituperatione. Principio tracto ab aliqua 7 harum , quas ante commemoraverimus , rationum , narratio non erit ulla , quae necessario consequatur : sed si qua inciderit , cum aliquod factum eius , de quo loquemur , nobis narrandum sit cum laude , aut vituperatione , praeceptio narrandi de primo libro repetetur. Divisione hac utemur. Primo exponeamus , quas res laudaturi sumus , aut vituperaturi : deinde , ut quaeque , quove tempore res erit gesta , ordine dicemus , ut , quid , quamque tute cauteque egerit , intelligatur. Sed exponere oportebit animi virtutes aut vitia : deinde commoda aut incommoda corporis , aut rerum externarum , quomodo ab animo tractata sint , demonstrare. Ordinem hunc adhibere in demonstranda vita debemus. Ab externis rebus : genus , in laude : [ quibus maioribus natus fit : ] si bono genere , parem aut excelsiorem fuisse : si humili genere , ipsum in suis , non in maiorum virtutibus habuisse praesidium : in vituperatione , si bono genere , dedecori maioribus fuisse : si malo , tamen his ipsis detimento fuisse. Educatio , in laude ; bene et honeste , in bonis disciplinis per omnem pueritiam educatum esse : in vituperatione , contra. Deinde transire oportet ad corporis commoda. A natura , in laude : si sit dignitas atque forma , laudi fuisse eam ; non quemadmodum ceteris , detimento atque dedecori : si vires atque velocitas

egregia ; honestis exercitationibus et industriis dicemus comparata : si valetudo , perpetua diligentia , et temperantia cupiditatum : in vituperatione , si erunt haec corporis commoda , male his usum dicemus , quae casu et natura , tanquam quilibet gladiator , habuerit ; si non erunt , praeter formam , omnia ipsius culpa et intemperantia non fuisse dicemus. Deinde revertemur ad extraneas res , et in his , animi virtutes , aut vitia quae fuerint , considerabimus : divitiae , an paupertas fuerit , et quae potestates , quae gloriae , quae amicitiae , quae inimicitiae , et quid fortiter in inimiciis gerendis fecerit ; cuius causa suscepit inimicitias , qua fide , benevolentia , officio gesserit amicitias : in divitiis qualis , aut in paupertate cuiusmodi fuerit : quemadmodum habuerit in potestatibus gerendis animum. Si interierit , cuiusmodi mors eius fuerit , cuiusmodi 8 res mortem eius sit consecuta. Ad omnes autem res , in quibus animus hominis maxime consideratur , illae quatuor animi virtutes erunt accommodandae : ut , si laudemus , aliud iuste , aliud fortiter , aliud modeste , aliud prudenter factum esse dicamus : si vituperemus , aliud iniuste , aliud ignave , aliud immodeste , aliud stulte factum esse dicamus. Perspicuum est iam nimirum ex hac dispositione , quemadmodum sit tractanda tripartita divisio laudis et vituperationis , si illud etiam assumferimus , non necesse esse nos omnes has partes in laudem , aut vituperationem transferre , propterea quod saepe ne incident quidem : saepe ita tenuiter incident , ut non sint necessariae dictu. quapropter eas partes , quae firmissimae videbuntur , legere oportebit. Conclusionibus brevibus utemur , enumeratione ad extitum causae : in ipsa causa crebras et breves amplificationes interponemus per locos communes. Nec

hoc genus causae, eo quod raro accidit in vita, negligentius considerandum est. Neque enim id, quod potest accidere, ut faciendum sit aliquando, non oportet velle quam commodissime posse facere. Et, si separatim haec causa minus saepe tractatur; at in iudicilibus, et in deliberativis causis saepe magnae partes versantur laudis, aut vituperationis. quare in hoc quoque genere causae nonnihil industriae consumendum putemus. Nunc, absoluta nobis difficultima parte rhetoricae, hoc est, inventione perpolita, atque ad omne causae genus accommodata, tempus est ad ceteras partes proficiisci. Deinceps igitur de dispositione dicemus.

Quoniam dispositio est, per quam illa, quae in- 9  
venimus, in ordinem redigimus, ut certo quidque loco pronuntietur: videndum est, cuiusmodi rationem in disponendo habere conveniat. Genera dispositionum sunt duo: unum ab institutione artis profectum: alterum ad casum temporis accommodatum. Ex institutione artis disponemus, cum sequemur eam praceptionem, quam in primo libro exposuimus, hoc est, ut utamur principio, narratione, divisione, confirmatione, confutatione, conclusione: et hunc ordinem, quemadmodum praeceptum est ante, in dicendo sequemur. Item ex institutione artis, non modo totas causas per orationem, sed per singulas quoque argumentationes disponemus, quemadmodum in secundo libro docuimus, [id est, expositionem, rationem, confirmationem rationis, exornationem, complexionem.] Haec igitur duplex dispositio est: una per orationes, altera per argumentationes, ab institutione artis profecta. Est autem et alia dispositio, quae, cum ab ordine artificiose recedendum est, oratoris iudicio ad tempus accommodatur: ut si a

narratione dicere incipiamus , aut ab aliqua firmissima argumentatione , aut a literarum aliquarum recitatione : aut si secundum principium confirmatione utamur , deinde narratione : aut , si quam huiusmodi permutationem ordinis faciamus : quorum nihil , nisi causa postulet , fieri oportebit. Nam si vehementer aures auditorum obtusae videbuntur , atque animi defatigati ab adversariis multitudine verborum , commode poterimus principio supersedere , et exordiri causam aut a narratione , aut ab aliqua firma argumentatione. deinde , si commodum erit , quia non semper necesse est , ad 10 principii sententiam reverti licebit. Si causa nostra magnam difficultatem videbitur habere , ut nemo aequo animo principium possit audire ; a narratione cum inceperimus , ad principii sententiam revertamur licebit. Si narratio parum probabilis est , exordiemur ab aliqua firma argumentatione. His commutationibus , et translationibus partium saepe uti necesse est , cum ipsa res artificiosam dispositionem artificiose commutare cogit. In confirmatione et confutatione argumentationum dispositiones huiusmodi convenit habere : firmissimas argumentationes in primis et in postremis causae partibus collcare : mediocres , et neque inutiles ad dicendum , neque necessarias ad probandum , quae , si separatim ac singulae dicantur , infirmae sint , cum ceteris coniunctae , firmae et probabiles fiant , interponi et in medio collocari oportet. nam re narrata , statim exspectat animus auditoris , ex qua re causa confirmari possit. Quapropter continuo firmam aliquam oportet inferre argumentationem. Et quoniam nuperrime dictum facile memoriae mandatur , utile est , cum dicere desinamus , recentem aliquam relinquere in animis auditorum bene firmam ar-

gumentationem. Haec dispositio locorum , tanquam  
instructio militum , facillime in dicendo , sicut illa  
in pugnando , parare poterit victoram.

Pronuntiationem multi maxime utilem oratori 11  
dixerunt esse , et ad persuadendum plurimum va-  
lere. nos quidem unam de quinque rebus pluri-  
num posse non facile dixerimus ; nec , egregie  
magnam esse utilitatem in pronuntiatione , audac-  
ter confirmaverimus. nam commodae inventiones ,  
et concinnae verborum elocutiones , et partium  
causae artificiosae dispositiones , et horum om-  
nium diligens memoria , sine pronuntiatione , non  
plus , quam sine his rebus pronuntiatio sola , va-  
lere poterit. Quare , quia nemo de ea re diligen-  
ter scripsit : ( nam omnes vix posse putarunt de  
voce , et vultu , et gestu dilucide scribi , cum hae  
res ad sensus nostros pertinerent ) et quia magnop-  
ere ea pars a nobis ad dicendum comparanda  
est , non negligenter videtur tota res consideranda.

Dividitur igitur pronuntiatio in vocis figuram ,  
et corporis motum. Figura vocis est , quae suum  
quendam possidet habitum ratione et industria  
comparatum. Ea dividitur in tres partes , magni-  
tudinem , firmitudinem , mollitudinem. Magnitudinem  
vocis maxime comparat natura , nonnihil ad-  
auget , sed maxime conservat cura. firmitudinem  
vocis maxime natura comparat , nonnihil adauget ,  
sed maxime conservat exercitatio declamationis.  
mollitudinem vocis , hoc est , ut eam torquere in di-  
cendo , pro nostro commodo , possimus , maxime  
faciet exercitatio declamationis. Quapropter de mag-  
nitudine vocis , et firmitudinis parte , quoniam  
altera natura , altera cura comparatur , nihil ad nos  
attinet commonere , nisi ut ab iis , qui non in-  
scii sunt eius artificii , ratio curandae vocis petatur.

12 De ea parte firmitudinis, quae conservatur ratione declamationis, et de mollitudine vocis, quae maxime necessaria est oratori, quoniam ea quoque moderatione declamationis comparatur, dicendum videtur. Firmam igitur maxime poterimus in dicendo vocem conservare, si quam maxime sedata et depressa voce principia dicemus. nam laeduntur arteriae, si, antequam leni voce permulsa sunt, acri clamore compleantur. Etiam intervallis longioribus uti conveniet: recreatur enim vox spiritu, et arteriae reticendo acquiescunt: et continuum clamorem remittere, et ad sermonem transire oportet: ( commutationes enim faciunt, ut nullo genere vocis effuso, in omni voce integri simus.) Et acutas vocis exclamations vitare debemus. ictus enim fit, et vulnerantur arteriae acuta atque attenuata nimis acclamatione, et si quis splendor est vocis, consumitur uno clamore universus: et uno spiritu continenter multa dicere in extrema convenit oratione: fauces enim calefiunt, et arteriae complentur, et vox, quae varie tractata est, reducitur in quendam sonum aequabilem atque constantem. Saepe rerum naturae gratia quaedam iure debetur, velut accidit in hac rem quae diximus ad vocem servandam prodefesse, eadem attinent ad suavitatem pronuntiationis, ut, quod nostrae voci proficit, idem voluptate auditoris probetur. Utile est ad firmitudinem vocis, sedata vox in principio. quid insuavius, quam clamor in exordio caufae? Intervalla vocem confirmant: eadem sententias concinniores divisione reddunt, et auditori spatium cogitandi relinquunt. Conservat vocem continui clamoris remissio: et auditorem quidem varietas maxime delectat, cum sermonе animum eius retinet, aut exfuscat cl-

more. Acuta exclamatio vocem et fauces vulnerat : eadem laedit auditorem. habet enim quiddam illiberale , et ad muliebrem potius vociferationem , quam ad virilem dignitatem in dicendo accommodatum. In extrema oratione continens vox remedio est voci. quid? haec eadem nonne animum vehementissime calefacit auditoris , in totius conclusione causae? Quoniam igitur res eadem vocis firmitudini , et pronuntiationis suavitati prosunt , de utraque re simul erit in praesentia dictum , de firmitudine , quae visa sunt , de suavitate , quae coniuncta fuerunt : cetera suo loco paulo post dicemus. Mollitudo igitur vocis , quoniam omnis ad rhetoris praeceptionem pertinet , diligentius nobis consideranda est. Eam dividimus in sermonem , contentionem , amplificationem. Sermo est oratio remissa , et finitima quotidianae locutioni : contentio est oratio acris , et ad confirmandum , et ad confutandum accommodata : amplificatio est oratio , quae aut in iracundiam inducit , aut ad misericordiam trahit auditoris animum. Sermo dividitur in partes quatuor , dignitatem , demonstrationem , narrationem , iocationem. Dignitas est oratio cum aliqua gravitate , et vocis remissione : demonstratio est oratio , quae docet remissa voce , quomodo quid fieri potuerit , aut non potuerit : narratio est rerum gestarum , aut perinde ut gestarum , expositio : iocatio est oratio , quae ex aliqua re risum pudentem et liberalem potest comparare. Contentio dividitur in continuationem et distributionem. Continuatio est orationis enuntiandae acceleratio clamosa : distributio est in contentione oratio frequens , cum raris et brevibus intervallis , acri vociferatione. Amplificatio dividitur in cohortationem et conquestionem. Cohor-

tatio est , quae aliquod peccatum amplificans , au-  
ditorem ad iracundiam adducit : conquestio est ora-  
tio , quae incommodorum amplificatione animum  
auditoris ad misericordiam perducit. Quoniam igit-  
ur mollitudo vocis in tres partes divisa est , et hae  
partes ipsae in octo alias distributae sunt , quae cu-  
iusque idonea pronuntiatio sit , demonstrandum  
14 videtur. Sermo cum est in dignitate , plenis fauci-  
bus quam sedatissima et depressissima voce uti con-  
veniet : ita tamen , ut ne ab oratoria consuetudine  
ad tragicam transeamus. Cum autem est in demon-  
stratione , voce paululum attenuata , crebris inter-  
vallis et divisionibus uti oportebit : ut ipsa pro-  
nuntiatione eas res , quas demonstrabimus , inse-  
rere atque interfecare videamur in animis audito-  
rum. Cum autem sermo in narratione est , tum  
vocum varietate opus est , ut , quo quidque pacto  
gestum sit , ita narrari videatur. Strenue quod vo-  
lumus ostendere factum , celeriuscule dicemus : at  
aliud otiose , retardabimus. Deinde modo acriter ,  
tum clementer , moeste , hilariter in omnes partes  
commutabimus , ut verba , ita pronunciationem.  
Si qua inciderint in narratione dicta , rogata , re-  
sponsa , si quae admirationes , de quibus nos nar-  
rabimus ; diligenter animum advertemus , ut om-  
nium personarum sensus , atque animos voce ex-  
primamus. Sin erit sermo in iocatione , leniter tre-  
m nebunda voce , cum parva significatione risus ,  
sine ulla suspicione mimae cachinnationis leviter  
oportebit a sermone serio torquere ad liberalem io-  
cum vocem. Cum autem contendere oportebit ;  
quoniam id aut per continuationem , aut per distri-  
butionem faciendum est : in continuatione , adauicto  
medocriter sono vocis , verbis continuandis , vo-  
cem quoque iungere oportebit , et torquere sonum ,

aut si Prometheus , cum mortalibus ignem dividere vellet , ipse a vicinis , cum testa ambulans , carbunculos corrogaret , non ridiculum videretur ? Isti magistri , omnium dicendi praeceptores , non vindentur sibi ridicule facere , cum id , quod aliis pollicentur , ab aliis quaerunt . Si , qui se fontes maximos , penitus absconditos , aperuisse dicat , et hoc , sicut sit , non rideatur ? Isti cum non modo dominos se fontium , sed se ipsos fontes esse dicant , et omnium rigare debeant ingenia , non putant fore ridiculum , si , cum id polliceantur aliis , arescant ipsi siccitate . Chares a Lysippo statuas facere non isto modo didicit , ut Lysippus caput ostenderet Myronis , brachia Praxitelis , pectus Polycleti : sed omnia coram magistrum facientem videbat , ceterorum opera vel sua sponte considerare poterat . Isti credunt , eos , qui haec velint discere , alia ratione doceri posse commodius . Praeterea ne possunt quidem ea , quae sumuntur ab aliis , exempla , tam esse accommodata ad artem , quam propria ; proprietaria , quod in dicendo leviter unusquisque locus plerumque tangitur , ne ars appareat . in praepiendo expresse conscripta ponere oportet exempla , ut in artis formam convenire possint : et post in dicendo , ne possit ars eminere et ab omnibus videri , facultate oratoris occultatur . Ergo etiam ut magis ars cognoscatur , suis exemplis melius est utilis . Postremo haec quoque res nos duxit ad hanc rationem , quod nomina rerum Graeca , quae convertimus , ea remota sunt a consuetudine . quae enim res apud nostros non erant , earum rerum nomina non poterant esse usitata . Ergo haec asperiora primo videantur necesse est , idque fiet rei , non nostra , difficultate . Reliquum scripturae consumetur in exem-

plis. haec aliena si posuissimus, factum esset, ut, quod commodius esset in hoc libro, id nostrum non esset; quod asperius, et inusitatum, id proprie nobis attribueretur. Ergo hanc quoque incommunitatem fugimus. His de causis, cum artis inventionem Graecorum probassimus, exemplorum rationem secuti non sumus.

Nunc tempus postulat, ut ad elocutionis praecepta transeamus. Bipartita erit igitur nobis elocutionis praeceptio. Primum dicemus, quibus in generibus semper omnis oratoria elocutio debeat esse: deinde ostendemus, quas res semper habere debeat.

8 Sunt igitur tria genera, quae genera nos figuras appellamus, in quibus omnis oratio non vitiosa consumitur; unam gravem, alteram mediocrem, tertiam extenuatam vocamus. Gravis est, quae constat ex verborum gravium magna et ornata constructione. Mediocris est, quae constat ex humiliore, neque tamen ex infima et per vulgatissima verborum dignitate. Attenuata est, quae demissa est usque ad usitatissimam puri sermonis confuetudinem.

In gravi figura consumetur oratio, si quae cuiusque rei poterunt ornatissima verba reperiri, sive propria, sive translatā, unamquamque in rem accommodabuntur: et, si graves sententiae, quae in amplificatione et commiseratione tractantur, eligentur: et, si exornationes sententiarum aut verborum, quae gravitatem habebunt, de quibus post dicemus, adhibebuntur. In hoc genere figurae erit hoc exemplum: *Nam quis est vestrum, iudices, qui satis idoneam possit in eum poenam excogitare, qui prodere hostibus patriam cogitarit? quod maleficium cum hoc scelerē comparari, quod huic maleficio dignum supplicium potest inveniri?* In iis, qui violassent ingenuam, matremfamilias constuprassent, pulsassent aliquem,

*aut postremo necassent, maxima supplicia maiores consumserunt : huic truculentissimo ac nefario facinori singularem poenam non reliquerunt? Atque in aliis maleficiis ad singulos, aut ad paucos ex alieno peccato iniuria pervenit; huius sceleris qui sunt affines, uno consilio universis civibus atrocissimas calamitates machinantur. O feros animos! o crudeles cogitationes! o derelictos homines ab humanitate! qui id agere ausi sunt, aut cogitare potuerunt, quo pacto hostes, revulsis maiorum sepulchris, deieictis moenibus, ovantes irruerent in civitatem: quo modo deum templis spoliatis, optimatibus trucidatis, aliis abreptis in servitutem, matribus familias & ingenuis sub hostilem libidinem subiectis, urbs acerbissimo concidat incendio (conflagrata): qui se non putant, id, quod voluerint, ad exitum perduxisse, nisi sanctissimae patriae miserandum scelerati viderint cinerem. Nequeo verbis consequi, iudices, indignitatem rei: sed negligentius id fero, quia vos mei non egetis. Vester enim vos animus amantissimus reipublicae facile edocet, ut eum, qui fortunas omnium voluerit prodere, praecepitem proturbetis ex ea civitate, quam iste spurcissimorum hostium dominatu nefario voluerit obruere.*

In mediocri figura versabitur oratio, si haec, 9  
ut ante dixi, aliquantulum demiserimus, neque tamen ad infimum descenderimus, sic: *Quibuscum bellum gerimus, iudices, videtis; cum sociis, qui pro nobis pugnare, et imperium nostrum nobiscum simul virtute & industria conservare soliti sunt. His cum se, & opes suas, & copiam necessariorum non rint; tum vero nihilo minus propter propinquitatem, & omnium rerum societatem, quid in omnibus rebus populus Romanus posset, scire & existimare poterant. His, cum deliberassent nobiscum bellum gerere, quae- so, quae res erat, qua freti bellum suscipere conaren-*

etur, cum multo maximam sociorum partem in officio manere inteligerent? cum sibi non multitudinem militum, non idoneos imperatores, non pecuniam publicam praesto esse viderent? non denique ullam rem, quae pertineret ad bellum administrandum? Si cum finitimi de finibus bellum gererent; si totum certamen in uno proelio possum putarent: tamen omnibus rebus instructiores ac paratiores venirent; nedum illud imperium orbis terrae, cui imperio omnes gentes, reges, nationes, partim vi, partim voluntate consenserunt, cum aut armis, aut liberalitate a populo Romano superati essent, ad se transferre tantulis viribus conarentur. Quaeret aliquis: Quid? Fregellani non sua sponte conati sunt? Eo quidem minus isti facile conarentur, quo, illi quemadmodum discessissent, videbant. Nam rerum imperiti, qui uniuscuiusque rei de rebus ante gestis exempla petere non possunt, ii per imprudentiam facillime deducuntur in fraudem: at ii, qui sciunt, quid aliis acciderit, facile ex aliorum eventu, suis rationibus possunt providere. Nulla igitur re induci, nulla spe freti arma sustulerunt? Quis hoc credat, tantam amentiam quemquam tenuisse, ut imperium populi Romani tentare auderet, nullis copiis fatus? Ergo aliquid fuisse necesse est. quid aliud, nisi id, quod dico, potest esse?

- 10 In attenuato figurae genere, quod ad infimum et quotidianum sermonem demissum est, hoc erit exemplum: *Nam, ut forte hic in balneas venit, coepit, postquam perfusus est, defricari.* Deinde, ubi visum est, ut in alveum descenderet, ecce ibi iste de transverso, *Heus, inquit, adolescens, pueri tui modo me pulsaverunt; satisfacias oportet.* Hic, qui id aetatis ab ignoto praeter consuetudinem appellatus esset, erubuit. *Iste clarius eadem & alia dicere coepit.* Hic vix tandem inquit: *Sine me considerare.* Tum vero iste coepit clamare voce ista, quae vel facile cuivis rubores eli-

ære posset : Ita petulans es atque acer , ut ne ad solarium quidem idoneus , ut mihi videtur , sed pone scenam , & in eiusmodi locis exercitatus sis. Conturbatus est adolescens : nec mirum , cui etiam nunc paedagogi lites ad auriculas versarentur , imperito eiusmodi conviciorum. Ubi enim iste vidisset scurram exhausto rubore , qui se putaret nihil habere , quod de existimatione perderet , ut omnia sine famae detrimento facere posset ? Igitur genera figurarum ex ipsis exemplis intelligi poterunt. Erit enim et attenuata verborum construc-  
tio quaedam , et item alia in gravitate , alia posita in mediocritate.

Est autem cavendum , ne , dum haec genera con-  
sectamur , in finitima et propinqua vicia veniamus. Nam gravi figuræ , quae laudanda est , propinqua est ea , quae fugienda est : quae recte videbitur appellari , si sufflata nominabitur. Nam ut corporis bonam habitudinem tumor imitatur saepe ; ita gravis oratio saepe imperitis videtur ea , quae turget et inflata est , cum aut novis , aut priscis verbis , aut duriter aliunde translati , aut gravioribus , quam res postulat , aliquid dicitur , hoc modo : *Nam qui perduellionibus venditat patriam , non satis supplicii dederit , si praeceps in Neptunias depulsus erit lacunas. Poeniteat igitur istum , qui montes belli fabricatus est , campos sustulit pacis.* In hoc genus plerique cum declinas-  
sent , et ab eo , quo profecti sunt , aberraverunt , et specie gravitatis falluntur , nec perspicere possunt orationis tumorem. Qui in mediocre genus oratio-  
nis profecti sunt , si pervenire eo non potuerunt , errantes perveniunt ad confine genus eius generis , quod appellamus fluctuans , et dissolutum ; eo quod sine nervis et articulis fluctuat huc et illuc , nec po-  
test confirmare , neque viriliter sese expedire. Id est huiusmodi : *Socii nostri cum belligerare nobiscum vel-*

*lent, profecto ratiocinati essent etiam atque etiam, quid possent facere, si quidem sua sponte facerent, & non haberent hic adiutores multos, malos homines & andaces. Solent enim diu cogitare omnes, qui magna negotia volunt agere. Non potest huiusmodi sermo tenere attentum auditorem. dissfluit enim totus, neque quidquam comprehendens perfectis verbis amplectitur. Qui non possunt in illa facetissima verborum attenuazione commode versari, veniunt ad aridum et exsangue genus orationis, quod non alienum est exile nominari, cuiusmodi est hoc: Nam istic ille ad balneas accessit; ad hunc postea dicit, hic tuus servus me pulsavit. Postea dicit hic illi, considerabo. Post ille huic convicium fecit, & magis magisque praesentibus multis clamavit. Frivulus hic quidem iam et illiberalis est sermo. Non enim adeptus est id, quod habet attenuata figura, puris verbis et electis compositam orationem. Omne genus orationis, et grave, et mediocre, et attenuatum, dignitate afficiunt exornationes, de quibus post loquemur: quae si rarae disponentur, distinctam, sicuti coloribus; si crebrae collocabuntur, oblitam reddent orationem. Sed figuram in dicendo commutari oportet, ut gravem mediocris, mediocrem excipiat attenuata. Deinde identidem commutentur, ut facile satietas varietate vitetur.*

12 Quoniam, quibus in generibus elocutio versari debeat, dictum est, videamus nunc, quas res debeat habere elocutio commoda et perfecta. Quae maxime admodum oratori accommodata est, tres res in se debet habere, elegantiam, compositionem, dignitatem. Elegantia est, quae facit, ut unumquodque pure et aperte dici videatur. haec distribuitur in latitudinem, et explanationem. Latinitas est, quae sermonem purum conservat, ab omni vitio remotum. Vitia in sermone, quo minus is

latinus sit, duo possunt esse: soloecismus, et barbarismus. Soloecismus est, cum in verbis pluribus, consequens verbum superiori non accommodatur. Barbarismus est, cum verbum aliquod vitiouse effertur. Haec qua ratione vitare possimus, in arte Grammatica dilucide dicemus. Explanatio est, quae reddit apertam et dilucidam orationem. Ea comparatur duabus rebus, usitatis verbis, et propriis. Usitata sunt ea, quae versantur in sermone et consuetudine quotidiana: propria, quae eius rei verba sunt, aut esse possunt, qua de loquemur.

Compositio est verborum constructio, quae facit omnes partes orationis aequabiliter perpolitas. Ea conservabitur, si fugiemus crebras vocalium concusiones, quae vastam atque hiantem orationem reddunt, ut hoc est: *Baccae aeneae amoenissimae impendebant.* et si vitabimus eiusdem literae nimiam assiduitatem: cui vitio versus hic erit exemplo: (nam hic nihil prohibet in vitiis, alienis exemplis uti: )

*O Tite, tute, Tati, tibi tanta tyranne tulisti,*  
et hic eiusdem poetae:

*Quidquam quisquam cuiquam quod conveniat, neget.*  
et, si eiusdem verbi assiduitatem nimiam fugiemus: ea est huiusmodi: *Nam cuius rationis ratio non exstet,*  
*ei rationi ratio non est fidem habere.* et, si non uteamur continenter similiter cadentibus verbis, hoc modo:

*Flentes, plorantes, lacrimantes, obtestantes.*

et, si verborum transiectionem vitabimus, nisi quae erit concinna, qua de re posterius loquemur: quo in vitio est Lucilius assiduus, ut hoc est in priore libro:

*Has res ad te scriptas, Luci, misimus, Aeli.*

Item fugere oportet longam verborum continuationem, quae et auditoris aures, et oratoris spiritum laedit. His vitiis in compositione vitatis, reliquum operis consumendum est in dignitate.

13 Dignitas est, quae reddit ornatam orationem, varietate distinguens. Haec in verborum et sententiarum exornationem dividitur. Verborum exornatio est, quae ipsius sermonis insignita continetur perpositione. Sententiarum exornatio est, quae non in verbis, sed in ipsis rebus quandam habet dignitatem.

Repetitio est, cum continenter ab uno atque eodem verbo in rebus similibus et diversis principia sumuntur, hoc modo : *Vobis istud attribuendum est, vobis gratia habenda, vobis res ista erit honori.* Item, *Scipio Numantiam sustulit, Scipio Carthaginem delavit, Scipio pacem peperit, Scipio civitatem servavit.* Item, *tu in forum prodire, tu lucem conspicere, tu in horum conspectum venire conaris?* audes verbum facere? audes quidquam ab ipsis petere? audes supplicium deprecari? Quid est, quod possis defendere? quid est, quod audeas postulare? quid est, quod tibi putas concedi oportere? Non iuriandum reliquisti? non amicos prodidisti? non parenti manus intulisti? non denique in omni dedecore volutatus es? Haec exornatio, cum multum venustatis habet, tum gravitatis et acrimoniae plurimum. Quare videtur esse adhibenda et ad ornandam, et ad exaugendam orationem.

Conversio est, per quam non, ut ante, primum repetimus verbum, sed ad postremum continenter revertimur, hoc modo : *Poenos populus Romanus iustitia vicit, armis vicit, liberalitate vicit.* Item, *ex quo tempore concordia de civitate sublata est, libertas sublata est, fides sublata est, amicitia sublata est, respublica sublata est.* Item, *C. Laelius homo natus erat, ingeniosus erat, doctus erat, bonis vi-*

ris & studiosis amicus erat. ergo in civitate primus erat. Item, Nam cum istos, ut absolvant te, rogas : ut perierent rogas : ut existimationem negligant, rogas : ut leges populi Romani tuae libidini largiantur, rogas.

Complexio est, quae utramque complectitur exorationem, et hanc, et quam ante expotuimus, ut et repetatur idem primum verbum saepius, et crebro ad idem postremum revertamur, hoc modo : Qui sunt, qui foedera saepe ruperunt ? Carthaginenses. Qui sunt, qui crudele bellum in Italia gesserunt ? Carthaginenses. Qui sunt, qui Italiam deformaverunt ? Carthaginenses. Qui sunt, qui sibi postulant ignosci ? Carthaginenses. Videte ergo, quid conveniat eos impetrare. Item, Quem senatus damnarit, quem populus Romanus damnarit, quem omnium existimatio damnarit, eum vos sententiis vestris absolvetis ?

Traductio est, quae facit, ut, cum idem verbum crebrius ponatur, non modo non offendat animum, sed etiam concinniorem orationem reddat, hoc pacto : Qui nihil habet in vita iucundius vita, is cum virtute vitam non potest colere. Item, Eum tu hominem appellas, qui si fuisset homo, nunquam tam crudeliter vitam hominis petiisset. At erat inimicus. ergo inimicum sic ulcisci voluit, ut ipse sibi reperiretur inimicus ? Item, Divitias sine divitum esse : tu virtutem praefer divitiis. nam si voles divitias cum virtute comparare, vix satis idoneae tibi videbuntur divitiae, quae virtutis pedissequae sint. Ex eodem genere exornationis est, cum idem verbum modo ponitur in hac, modo in altera re, hoc modo : Cur eam rem tam studiose curas, quae multas tibi dabit curas ? Item, Amari iucundum est, si curetur, ne quid insit amari. Item, Veniam ad vos, si mihi senatus det veniam. In his quatuor generibus exornationum, quae adhuc propositae sunt, non inopia verborum fit, ut ad idem

verbum redeatur saepius ; sed inest festivitas quae-dam , quae facilius auribus diiudicari , quam verbis demonstrari potest.

15 Contentio est , cum ex contrariis verbis aut rebus oratio conficitur , hoc pacto : *Habet assentatio iucunda principia , eadem exitus amarissimos affert.* Item , *Inimicis te placabilem , amicis inexorabilem praebes ?* Item , *In otio tumultuaris , in tumultu es otiosus ?* *In re frigidissima cales , in ferventissima friges ?* *Tacito cum opus est , clamas : ubi loqui convenit , obmutescis ?* *Ades ? abesse vis : abes ? reverti cupis.* *In pace bellum quaeritas : in bello pacem desideras ?* *in concione de virtute loqueris , in praelio p[ro]e ignavia tubae sonitum perferre non potes ?* Hoc genere si distingue-mus orationem , et ornati et graves poterimus esse.

Exclamatio est , quae conficit significationem doloris , aut indignationis alicuius , per hominis , aut urbis , aut loci , aut rei cuiuspiam compellationem , hoc modo : *Te nunc alloquor , Africane , cuius mortui quoque nomen splendori ac decori est civitati.* *Tui clarissimi nepotes suo sanguine abluerunt inimicorum crudelitatem.* Item , *O perfidiosae Fregellae , quam facile scelere vestro contabuistis ! ut , cuius nitor urbis Italiam nuper illustravit , eius nunc vix fudamentorum reliquiae maneant.* Item , *Bonorum insidiatores latrocino vitam innocentissimi cuiusque petistis : tantamne ex iniuitate iudiciorum vestris calumniis assumitis facultatem ?* Hac exclamacione si loco uteatur , raro , et cum rei magnitudo postulare videbitur ; ad quam volemus indignationem animum auditoris addu-cemus.

Interrogatio non omnis gravis est , neque con-cinna , sed haec , quae , cum enumerata sunt ea , quae obsunt causae adversariorum , confirmat supe-riorem orationem , hoc pacto : *Cum igitur haec om-*

*nia faceres, dices, administrares, utrum animos  
sociorum ab republica removebas, & alienabas, an  
non? Et, utrum aliquem exornari oportuit, qui ista  
prohiberet, ac fieri non sineret, an non?*

Ratiocinatio est, per quam ipsi a nobis ratio-  
nem poscimus, quare quidque dicamus, et crebro  
nosmet a nobis petimus uniuscuiusque propositio-  
nis explanationem. Ea est huiusmodi: *Maiores no-  
stri si quam unius peccati mulierem damnabant, sim-  
plici iudicio multorum maleficiorum convictam puta-  
bant. quo pacto? quoniam, quam impudicam iudi-  
carant, eam beneficii quoque damnatam existimabant.*  
*Quid ita? quia necesse est, eam, quae suum corpus  
addixerit turpissimae cupiditati, timere permultos. Quos  
istos? virum, parentes, ceteros, ad quos videt sui de-  
decoris infamiam pertinere. Quid postea? quos tan-  
topere timeat, eos necesse est, ut, quoquo modo possit,  
beneficio petat. Cur? qui nulla potest honesta ratio  
relinere eam, quam magnitudo peccati facit timidam,  
intemperantia audacem, natura muliebris inconsidera-  
tam. Quid beneficii damnatam? quid? putabant im-  
pudicam quoque necessario. Quare? quia nulla faci-  
lius ad id maleficium causa, quam turpis amor & in-  
temperans libido commovere potuit: cuius mulieris ani-  
mus esset corruptus, eius corpus castum esse non pu-  
taverunt. Quid in viris? idemne observabant? mi-  
nime. Quid ita? quia viros ad unumquodque malefi-  
cium singulae cupiditates impellunt: mulieres ad om-  
nia maleficia cupiditas una dicit. Item, *Bene ma-  
iores hoc comparaverunt, ut neminem regem, quem  
armis cepissent, vita privarent. Quid ita? quia, quam  
nobis facultatem fortuna dedisset, iniquum erat in eo-  
rum supplicio consumere, quos eadem fortuna paulo  
ante in amplissimo statu collocarat. Quid quod exer-  
citum contra duxit? desino meminisse. Quid ita?**

quia viri fortis est , qui de victoria contendant , eos hostes putare ; qui vieti sunt , eos homines iudicare , ut possit bellum fortitudo minuere , pacem humanitas augere. At ille , si viciisset , num idem fecisset ? non profecto tam sapiens fuisset. Quid igitur ei parcis ? quia talem stultitiam contemnere , non imitari consuevi. Haec exornatio ad sermonem vehementer accommodata est , et animum auditoris retinet attentum , tum venustate sermonis , tum rationum exspectatione.

17 Sententia est oratio sumta de vita , quae aut quid sit , aut quid esse oporteat in vita , breviter ostendit , hoc modo : *Difficile est primum virtutem revereri , qui semper secunda fortuna sit usus.* Item , *Liberis est existimandus , qui nulli turpitudini servit.* Item , *Egens aequa est is , qui non satis habet , et is , cui nihil satis potest esse.* Item , *Optima vivendi ratio est eligenda. eam iucundam consuetudo reddet.* Huiusmodi sententiae simplices non sunt improbandae , propterea quod habet brevis expositio , si rationis nullius indiget , magnam delectionem. Sed illud quoque probandum est genus sententiae , quod confirmatur subiectione rationis , hoc modo : *Omnes bene vivendi rationes in virtute sunt collocandae , propterea quod sola virtus in sua potestate est ; omnia praeter eam subiecta sunt sub fortunae dominationem.* Item , *Qui fortunis alicuius induci amicitiam eius secuti sunt , hi , simul ac fortuna dilapsa est , devolant omnes.* Cum enim recessit ea res , quae fuit consuetudinis causa , nihil supereft , quare possint in amicitia retineri. Sunt item sententiae , quae duplisper efferuntur , sine ratione , et cum ratione. hoc modo sine ratione : *Errant , qui in prosperis rebus omnes impetus fortunae se putant fugisse.* Sapienter cogitanti , qui temporibus secundis casus adversos refor-

midant. Cum ratione, hoc pacto : *Qui adolescentium peccatis ignosci putant oportere, falluntur, propterea quod aetas illa non est impedimento bonis studiis. at hi sapienter faciunt, qui adolescentes maxime castigant, ut, quibus virtutibus omnem vitam tueri possint, eas in aetate maturissima velint comparare.* Sententias interponi raro convenit, ut rei actores, non vivendi praeceptores esse videamur. cum ita interponentur, multum afferent ornamenti. Necessa est enim, eam comprobet tacitus auditor, cum ad causam videat accommodari rem certam, ex vita et moribus sumtam.

Contrarium idem fere est, quod contentio. Contrarium est, quod ex rebus diversis duabus alteram breviter et facile confirmat, hoc pacto : *Nam, qui suis rationibus inimicus fuerit semper, eum quomodo alienis rebus amicum fore speres?* Et item, *Nam, quem in amicitia perfidiosum cognoveris, eum quare putas inimicitiis cum fide habere posse?* Et, *Qui privatus intolerabili superbia fuerit, eum commodum et sui cognoscentem fore in potestate, qui speres?* Et, *Qui in sermonibus et conventu amicorum verum dixerit nunquam, eum sibi in concionibus credis a mendacio temperaturum?* Item, *Quos ex collibus deieciimus, cum iis in campo metuimus dimicare?* Qui cum plures erant, paucis nobis exaequari non poterant; hi postquam pauciores sunt, metuimus, ne sint superiores? Hoc exornationis genus, brevibus et continuatis verbis perfectum esse debet, et cum commodum est auditu, propter brevem et absolutam conclusionem; tum vero vehementer, id, quod opus est oratori, comprobat contraria re, et ex eo, quod dubium non est, expedit illud, quod dubium est, ut aut dilui non possit, aut multo difficillime possit.

19 Membrum orationis appellatur res breviter absolute sine totius sententiae demonstratione, quae denuo alio membro orationis excipitur, hoc modo : *Et inimico proderas.* id est unum, quod appellatur membrum : deinde hoc excipiatur oportet ab altero, *Et amicum laedebas.* Ex duobus membris haec exornatio potest constare : sed commodissima et absolutissima est, quae ex tribus constat, hoc pacto : *Et inimico proderas, et amicum laedebas, et tibi ipsi non consulebas.* Item, *Nec reipublicae consuluitisti, nec amicis profuisti, nec inimicis restitisti.*

Articulus dicitur, cum singula verba intervallis distinguuntur caesa oratione, hoc modo : *Acrionia, voce, vultu adversarios perterriti.* Item, *Inimicos invidia, iniuriis, potentia, perfidia sustulisti.* Inter huius generis, et illius superioris vehementiam hoc interest, quod illud tardius et rarius venit, hoc crebrius et celerius pervenit. Itaque in illo genere, ex remotione brachii, et contortione dexteræ gladius ad corpus afferri; in hoc autem crebro et celeri vulnere corpus consuiciari videtur.

Continuatio est densa et continens frequentatio verborum cum absolutione sententiarum. Ea ute-  
mur commodissime tripartito ; in sententia, in con-  
trario, in conclusione. In sententia, hoc pacto : *Ei  
non multum potest obesse fortuna, qui sibi firmius in  
virtute, quam in casu, praefidum collocavit.* In con-  
trario, hoc modo : *Nam si quis spei non multum  
collocarit in casu, quid est, quod ei magnopere casus  
obesse possit ?* In conclusione, hoc pacto : *Quod si  
in eos plurimum fortuna potest, qui suas rationes  
omnes in casum contulerunt ; non sunt omnia com-  
mittenda fortunae, ne magnam nimis in nos habeat  
dominationem.* In his tribus generibus ad continua-

tionis vim adeo frequentatio est necessaria , ut infirma facultas oratoris videatur , nisi sententiam , et contrarium , et conclusionem frequentibus efferaat verbis . Sed et alias quoque nonnunquam non alienum est , tametsi necesse non est , eloqui res alias per huiuscmodi continuaciones .

Compar appellatur , quod habet in se membra orationis , de quibus ante diximus , quae constent ex pari fere numero syllabarum . Hoc non dinumeratione nostra fiet : ( nam id quidem puerile est , ) sed tantum afferet usus et exercitatio facultatis , ut animi quodam sensu par membrum superiori referre possimus , hoc modo : *In proelio mortem pater oppetebat , domi filius nuptias comparabat ; haec omnia graves casus administrabant . Item , Alii fortuna felicitatem dedit , huic industria virtutem comparavit . In hoc genere saepe fieri potest , ut non plane par sit numerus syllabarum , et tamen esse videatur , si una aut etiam altera syllaba est alterutrum brevius : aut si , cum in altero plures sunt , in altero longior , aut longiores , plenior , aut pleniores syllabae erunt : ut longitudo aut plenitudo harum , multitudinem alterius assequatur et exaequet .*

Similiter cadens exornatio appellatur , cum in eadem constructione verborum , duo aut plura sunt verba , quae similiter iisdem casibus efferantur , hoc modo : *Hominem laudas egentem virtutis , abundantem felicitatis . Item , Cuius omnis in pecunia spes est , eius a sapientia est animus remotus . Diligentia comparat divitias , negligentia corrumpit animum ; et tamen cum ita vivit , neminem prae se ducit hominem . Similiter desinens est , cum , tametsi casus non insunt in verbis , tamen similes exitus sunt , hoc pacto : Turpiter audes facere , nequiter studes dicere . Vivis invidiose , delinquis studiose , loqueris odiose .*

Item, *Audacter territas, humiliter placas.* Haec duo genera, quorum alterum in exitus, alterum in casus similitudine versatur, inter se vehementer conveniunt: et ea re, his qui bene utuntur, plerumque simul ea collocant in iisdem partibus orationis. Id hoc pacto facere oportet: *Perditissima ratio est amorem petere, pudorem fugere; diligere formam, negligere famam.* Hic et ea verba, quae casus habent, ad casus similes; et illa, quae non habent, ad similes exitus veniunt.

- 21 *Annominatio* est, cum ad idem verbum et ad idem nomen acceditur commutatione unius literae aut literarum; aut ad res dissimiles similia verba accommodantur. Ea multis et variis rationibus conficitur. Attenuatione aut complexione eiusdem literae, sic: *Hic, qui se magnifice iactat atque ostentat, veniuit a te ante, quam Romam venit.* Ex contrario: *Hic, quos homines alea vicit, eos ferro statim vincit.* Productione eiusdem literae, hoc modo: *Hunc avium dulcedo ducit ad avium.* Brevitate eiusdem literae, hoc modo: *Hic tametsi videtur esse honoris cupidus, tamen non tantum curiam diligit, quantum Curiam.* Addendis literis, hoc pacto: *Hic sibi posset temperare, nisi amori mallet obtemperare.* Demendis literis, sic: *Si lenones vitasset tanquam leones, vitae se tradidisset.* Transferendis literis, sic: *Videte, iudices, utrum homini navo, an vano credere malitis.* Item, *Nolo esse laudator, ne videar adulator.* Commutandis, hoc modo: *Diligere oportet, quem velis diligere.* Hae sunt annominationes, quae in literarum brevi commutatione, aut productione, aut translatione, aut aliquo huiusmodi generere versantur. Sunt autem aliae, quae non habent tam propinquam in verbis similitudinem, et tamen dissimiles non sunt: quibus de generibus unum est

huiusmodi : *Quid veniam, qui sim, quare veniam, quem insimulem, cui profim, quem postulem, brevi cognoscetis.* Nam hic est in quibusdam verbis quae-dam similitudo non tam affectanda, quam illae su-periores, sed tamen adhibenda nonnunquam. Alterum genus huiusmodi : *Demus operam, Quirites, ne omnino Patres Conscripti circumscripti putentur.* Haec annominatio accedit magis ad similitudinem, quam superior ; sed minus, quam illae superiores : propterea quod non solum additae, sed uno tem-pore demtae quoque literae sunt. Tertium genus est, quod versatur in casuum commutatione, aut unius, aut plurium nominum. Unius nominis, hoc modo : *Alexander Makedo summo labore animum ad virtutem a pueritia confirmavit. Alexandri virtutes per orbem terrae cum laude et gloria sunt pervulgatae. Alexandro si vita longior data esset, Oceanum manus Makedo-num transvolasset. Alexandrum omnes, ut maxime metuerunt, item plurimum dilexerunt.* Varie hic unum nomen in commutatione casuum volutatum est. Plura nomina casibus commutatis, hoc modo fa-cient annominationem : *Ti. Gracchum rempublicam administrantem indigna prohibuit nex diutius in ea commorari. C. Graccho similiter occiso oblata est, quae virum reipublicae amantissimi subito de sinu civita-tis eripuit. Saturninum, fide captum maiorum, per-fidiae scelus vita privavit. Turis, o Druse, sanguis domesticos parietes, et vultum parentis aspersit. Sul-picum, cui paulo ante omnia concedebant, eum brevi spatio non modo vivere, sed etiam sepeliri prohibue-runt.* Haec tria genera proxima exornationum, quorum unum in similiter cadentibus, alterum in similiter desinentibus verbis, tertium in annomi-nationibus positum est, perraro sumenda sunt, cum in veritate dicemus : propterea quod non haec vi-

dentur reperiri posse sine elaboratione et consummatione operae. Eiusmodi autem studia ad delectationem, quam ad veritatem, videntur accommodatoria. Quare fides, et gravitas, et severitas oratoria minuitur his exornationibus frequenter collocatis: et non modo tollitur auctoritas dicendi, sed offenditur quoque in eiusmodi oratione auditor; propterea quod est in his lepos et festivitas, non dignitas, neque pulchritudo. Quare, quae sunt ampla et pulchra, diu placere possunt: quae lepida et concinna, cito satietate afficiunt aurium sensum fastidiosissimum. Quo modo igitur, si crebro his generibus utemur, puerili videbimus elocutione delecati: ita, si raro has interferemus exornationes, et in causa tota varie dispergemos, commode luminibus distinctis illustrabimus orationem.

Subiectio est, cum interrogamus adversarios, aut quaerimus ipsi, quid ab illis, aut quid contra nos dici possit: deinde subiicimus id, quod dici oportet, aut non oportet, aut nobis adiumento futurum sit, aut offuturum illis e contrario, hoc modo: *Quaero igitur, unde iste tam pecuniosus sit factus. Amplum patrimonium relictum est? at patris bona venierunt. Hereditas aliqua obvenit? non potest dici, sed etiam a necessariis omnibus exheredatus est. Praemium aliquod ex lute aut iudicio cepit? non modo id non fecit, sed etiam insuper ipse grandi sponsione victus est. Ergo si his rationibus locupletatus non est, sicut omnes videtis; aut isti domi nascitur aurum, aut, unde licitum non est, pecunias accepit.* Item, Saepe, iudices, anima verti, multos aliqua ex honesta re, quam ne inimici quidem criminari possint, sibi praesidium petere: quorum nihil potest adversarius facere. Nam utrum ad patris virtutem confugiet? at eum vos iurati capite damnastis. An ad suam revertetur

*antiquam vitam, alicubi honeste tractatam?* at hic quidem ante oculos vestros quomodo vixerit, scitis omnes. *An cognatos suos enumerabit, quibus vos conveniat commoveri?* at hi quidem nulli sunt. Amicos proferet? at nemo est, qui sibi non putet turpe, istius amicum nominari. Item, *Credo, inimicum, quem nocentem putabas, in iudicium adduxisti?* non. nam indemnatum necasti. Leges, quae id facere prohibent, veritus es? at ne scriptas quidem iudicasti. Cum ipse te veteris amicitiae commonefaceret, commotus es? at nihilo minus, sed etiam studiosus occidisti. Quid? cum tibi pueri ad pedes volutarentur, misericordia motus es? at eorum patrem crudelissime sepultura quoque prohibuisti. Multum inest acrimoniae et gravitatis in hac exornatione, propterea quod, cum quae situm est, quid oporteat, subiicitur id non esse factum. Quare facillime fit, ut exaugeatur indignitas negotii. Ex eodem genere, ut ad nostram quoque personam referamus subiectionem, sic: *Nam quid me facere convenit, cum a tanta Gallorum multitudine circumfederer?* an dimicarem? at cum parva manu tum prodiremus, locum quoque inimicissimum habebamus. Sederem in castris? at neque subsidium, quod exspectarem, habebamus, neque erat, qui vitam produceremus. Castra relinquem? at obsecramur. Vitam militum negligerem? at ea videbar eos accepisse conditione, ut, quoad possem, incolumes patriae et parentibus conservarem. Hostium conditionem repudiarem? at salus antiquior est militum, quam impedimentorum. Huiusmodi consequuntur identidem subiectiones, ut ex omnibus ostendi videatur, nihil potius, quam, quod factum sit, faciendum fuisse.

Gradatio est, in qua non ante ad consequens 25 verbum descenditur, quam ad superius consensum.

est, hoc modo : *Nam quae reliqua spes manet libertatis, si illis, et quod libet, licet; et quod licet, possunt; et quod possunt, audent; et quod audent, faciunt; et quod faciunt, vobis molestum non est?* Item, *Non sensi hoc, et non suasi; neque suasi, et non ipse statim facere coepi; neque facere coepi, et non perfeci; neque perfeci, et non probavi.* Item, *Africano industria virtutem, virtus gloriam, gloriae aemulos comparavit.* Item, *Imperium Graeciae fuit penes Athenienses, Atheniensium potiti sunt Spartiates, Spartiates superavere Thebani, Thebanos Macedones vicerunt, qui ad imperium Graeciae brevi tempore adiunxerunt Asiam bello subactam.* Habet in se quendam leporem superioris cuiusque crebra repetitio verbi, quae propria est huius exornationis.

Definitio est, quae rei alicuius proprias amplectitur potestates breviter et absolute, hoc modo : *Majestas reipublicae est, in qua continetur dignitas & amplitudo civitatis.* Item, *Iniuriae sunt, quae aut pulsatione corpus, aut convicio aures, aut aliqua turpitudine vitam cuiuspiam violent.* Item, *Non est ista diligentia, sed avaritia; ideo quod diligentia est accurata conservatio suorum: avaritia, iniuriosa appetitio alienorum.* Item, *Non est ista fortitudo, sed temeritas; propterea quod fortitudo est contemtio laboris & periculi cum ratione utilitatis, & compensatione commodorum: temeritas est cum inconsiderata laborum perpetuacione gladiatoria periculorum suscepitio.* Haec ideo commoda putatur exornatio, quod omnem rei cuiuspiam vim et potestatem ita dilucide proponit, et breviter explicat, ut neque pluribus verbis oportuisse dici videatur, neque lucidius potuisse dici putetur.

**26** Transfatio vocatur, quae cum ostendit breviter, quid dictum sit, proponit item brevi quid sequatur,

hoc modo : *In patriam cuiusmodi furit, habetis : nunc in parentes qualis exstiterit, considerate.* Item, *Mea in istum beneficia cognoscitis : nunc, quomodo iste mihi gratiam retulerit, accipite.* Proficit haec aliquantulum exornatio ad duas res. nam et quid dixerit commonet, et ad reliquum comparat auditorem. Correctio est, quae tollit id, quod dictum est, et pro eo id, quod magis idoneum videtur, reponit, hoc pacto : *Quod si iste suos hospites rogasset, immo innuisset modo ; hoc facile perfici posset.* Item, *Nam postquam isti vicerunt, atque adeo victi sunt : eam quomodo victoriam appellem, quae victoribus plus calamitatis, quam boni dederit ? O virtutis comes invicta, quae bonos insequeris plerumque, atque adeo infestaris !* Commovetur hoc genere animus auditoris. Res enim communi verbo elata, tantummodo dicta videtur : ast ea, post ipsius oratoris correctionem, magis idonea sit pronuntiatione. Non igitur satius esset, dicet aliquis, ab initio, praesertim cum scribas, ad optimum et elec<sup>tissimum</sup> verbum devenire ? Est, cum non est satius, si commutatio verbi id erit demonstratura, eiusmodi rem esse, ut, cum eam communi verbo appellaris, levius dixisse videaris : cum ad electius verbum accedas, insignior rem facias. quod si continuo venisses ad id verbum ; nec rei nec verbi gratia animadversa esset.

Occupatio est, cum dicimus, nos praeterire, aut 27 non scire, aut nolle dicere id, quod tunc maxime dicimus, hoc modo : *Nam de pueritia quidem tua, quam eu omni intemperantiae addixisti, dicerem, si hoc tempus idoneum putarem : nunc consulto relinquo.* Et illud praetereo, quod te tribuni rei militaris infrequentem tradiderunt : deinde quod iniuriarum satisfecisti *L. Labeoni*, nihil ad rem pertinere puto. Horum nihil dico : reverior ad illud, de quo iudicium est. Item, Non dico,

*te ab sociis pecunias accepisse : non sum in eo occupatus , quod civitates , regna , domos omnium depeculatus es : furtas , rapinas tuas omnes omitto.* Haec utilis est exornatio , si aut rem , quam non pertineat aliis ostendere , occulte admonuisse prodest , aut si longum est , aut ignobile , aut planum non potest fieri , aut facile potest reprehendi ; ut utilius sit occulte fecisse suspicionem , quam huiusmodi intendisse orationem , quae redarguatur .

*Disiunctio est , cum eorum , de quibus dicimus , aut utrumque , aut unumquodque certo concluditur verbo , sic : Populus Romanus Numantiam delvit , Carthaginem sustulit , Corinthum disiecit , Fregellas evertit . Nihil Numantinis vires corporis auxiliatae sunt ; nihil Carthaginensibus scientia rei militaris adiumento fuit ; nihil Corinthiis erudita calliditas praesidii tulit ; nihil Fregellanis morum & sermonis societas opitulata est . Item , Formae dignitas aut morbo deflorescit , aut vetustate extinguitur . Hic utrumque , et in superiore exemplo unamquamque rem certo verbo concludi videmus . Coniunctio est , cum interpositione verbi et superiores orationis partes comprehenduntur , et inferiores , hoc modo : Formae dignitas aut morbo deflorescit , aut vetustate . Adiunctio est , cum verbum , quo res comprehenditur , non interponimus , sed aut primum , aut postremum collocamus . Primum , hoc pacto : Deflorescit formae dignitas aut morbo , aut vetustate . Postremum sic : Aut morbo , aut vetustate formae dignitas deflorescit . Ad festivitatem disiunctio est apposita ; quare rarius utemur ea , ne satietatem pariat : ad brevitatem coniunctio ; quare saepius adhibenda est .*

28 Hae tres exornationes de simplici genere manant .

*Conduplicatio est , cum ratione amplificationis , aut commiserationis , eiusdem unius , aut plurium*

verborum iteratio , hoc modo : *Tumultus C. Gracchi* , *tumultus domesticos & intestinos comparat*. Item , *Commotus non es* , cum tibi mater pedes amplexaretur , non es commotus ? Item , *Nunc etiam audes in horum conspectum venire* , *proditor patriae* , *proditor* , *inquam* , *patriae* , *venire audes in horum conspectum* ? Vehementer auditorem commovet eiusdem redintegratio verbi , et vulnus maius efficit in contrario causae ; quasi aliquod telum saepius perveniat in eandem partem corporis. Interpretatio est , quae non iterans idem redintegrat verbum , sed id commutat , quod positum est , alio verbo , quod idem valeat , hoc modo : *Rempublicam radicibus evertisti* , *civitatem funditus deieci*. Item , *Patrem nefarie verberasti* , *parenti manus scelerate intulisti*. Necesse est eius , qui audit , animum commoveri , cum gravitas prioris dicti renovatur interpretatione verborum.

Commutatio est , cum duae sententiae inter se discrepantes ex transiectione ita efferuntur , ut a priore posterior , contraria priori , proficiuntur , hoc modo : *Esse oportet* , ut vivas ; non vivere , ut edas. Item , *Ea re poemata non facio* , quia , cuiusmodi volo , non possum ; cuiusmodi possum , nolo. Item , *Quae de illo dicuntur* , dici non possunt ; quae dici possunt , non dicuntur. Item , *Si poema loquens pictura est* ; *pictura tacitum poema debet esse*. Item , *Quia stultus es* , ea re taces ; non tamen , quia taces , ea re stultus es. Non potest dici , quam commode fiat , cum contrariae sententiae translatione verba quoque convertantur. Plura subiecimus exempla , ut , quoniam difficile est hoc genus exornationis inventu , dilucidum esset , ut , cum bene esset intellectum , facilius in dicendo inveniretur.

Permissio est , cum ostendimus in dicendo , <sup>29</sup> nos aliquam rem totam tradere et concedere ali-

cuius voluntati, sic: Quoniam omnibus rebus erexit, solus supereft animus & corpus, haec ipsa, quae mihi de multis sola relicta sunt, vobis & vestrae condono potestati. Vos me, quo paclo vobis videbitur, utamini, atque abutamini licebit impune: in me, quidquid libet, statuite: dicite, atque obtemperabo. Hoc genus tametsi alias quoque nonnunquam tractandum est, tamen ad misericordiam commovendam vehementissime est accommodatum.

Dubitatio est, cum quaerere videtur orator, utrum de duobus potius, aut quid de pluribus potissimum dicat, hoc modo: Obfuit eo tempore plurimum reipublicae consulum sive flultitiam, sive malitiam dicere oportet, sive utrumque. Item, Tu istud ausus es dicere, homo omnium mortalium? nam quo te, digno moribus tuis, appellem nomine? Expeditio est, cum rationibus compluribus enumeratis, quibus aliqua res aut fieri aut non fieri potuerit, ceterae tolluntur, una relinquuntur, quam nos intendimus, hoc modo: Necesse est, cum constet istum fundum nostrum fuisse, ostendas, te aut vacuum possedisse, aut usu tuum fecisse, aut emissé, aut hereditate tibi venisse. Vacuum, cum ego adessem, possidere non potuisti: tuum usu fecisse etiamnum non potes: emtio nulla profertur: hereditate tibi, me vivo, mea pecunia venire non potuit. Relinquitur ergo, ut me vi de meo fundo deieceris. Haec exornatio plurimum iuvabit coniecturales argumentationes. sed non erit, tanquam in plerisque, ut, cum velimus, ea possimus uti. nam facere id non poterimus, nisi nobis ipsa negotii natura dabit facultatem.

- 30 Dissolutio est, quae coniunctionibus verborum e medio sublatis, partibus separatis effertur, hoc modo: Gere morem parenti, pare cognatis, obsequere anacis, obtempera legibus. Item, Descende in integrum

defensionem ; noli quidquam recusare ; da servos in quaestione ; stude verum invenire. Hoc genus et acrimoniam habet in se , et vehementissimum est , et ad brevitatem accommodatum.

Praecisio est , cum , dictis quibusdam , reliquum , quod coeptum est dici , relinquitur in audientium iudicio , sic : *Mihi tecum praecertatio non est , ideo quod populus Romanus me ... nolo dicere , ne cui forte arrogans videar : te autem saepe ignominia dignum putavit.* Item , *Tu ista nunc audes dicere , qui nuper alienae domui ! ... non ausim dicere , ne , cum te digna dixero , me indignum quidpiam dixisse videar.* Hic atrocior tacita suspicio , quam diserta explanatio facta est.

Conclusio est , quae brevi argumentatione ex iis , quae ante dicta sunt , aut facta , conficit id , quod necessario consequatur , hoc modo : *Quod si Danais datum erat oraculum , non posse capi Troiam sine Philocletae sagittis , hae autem nihil aliud fecerunt , nisi Alexandrum perculerunt : hunc extinguere , id nimirum capi fuit Troiam.*

Restant etiam decem exornationes verborum , 31 quas idcirco non vage dispersimus , sed a superioribus separavimus , quod omnes in uno genere possitae sunt. Nam earum omnium hoc proprium est , ut ab usitata verborum potestate recedatur , atque in aliam rationem cum quadam venustate oratio conferatur. De quibus exornationibus nominatio est prima , quae nos admonet , ut , cui rei nomen aut non sit , aut satis idoneum non sit , eam nosmet idoneo verbo nominemus , aut imitationis , aut significacionis causa. imitationis , hoc modo , ut maiores rudere , et vagire , et mugire , et murmurare , et sibilare appellaverunt. significandae rei causa , sic : *Postquam iste in rempublicam fecit impetum , fragor civi-*

*tatis imprimis est auditus.* Hoc genere raro utendum est, ne novi verbi assiduitas odium pariat: sed si commode quis eo utatur, et raro, non modo non offendet novitate, sed exornabit etiam orationem. Pronominatio est, quae sicuti cognomine quodam extraneo demonstrat id, quod suo nomine appellari non potest; ut, si quis, cum loquatur de Gracchis, *At non Africani nepotes*, inquiet, *istiusmodi fuerunt*. Item, si quis, de adversario cum dicat: *Videte nunc*, inquit, *iudices*, *quemadmodum me Plagiosippus iste tractarit*. Hoc pacto non inornate poterimus et in laudando, et in laedendo, aut corpore, aut animo, aut extraneis rebus dicere, sicuti cognomen, quod pro 32 certo nomine collocemus. Denominatio est, quae a propinquis et finitimis rebus trahit orationem, qua possit intelligi res, quae non suo vocabulo sit appellata. Id aut ab inventore conficitur, ut si quis de Tarpeio loquens, eum *Capitolinum* nominet: aut ab invento, ut si quis pro Libero *vinum*, pro Cerere *frugem* appellat: aut ab instrumento dominum, ut si quis Macedonas appellaret, hoc modo: *Non tam cito sarissae Graecia potitae sunt*: aut idem, Gallos significans, dicat, *Nec tam facile ex Italia materis Transalpina depulsa est*: aut id, quod fit, ab eo, qui facit; ut, si quis, cum bello velit ostendere aliquid quempiam fecisse, dicat, *Mars istud te facere necessario coegit*: aut si, quod facit, ab eo, quod fit, ut, cum *desidiosam* artem dicemus, quia desidiosos facit: et frigus *pigrum*, quia pigrorum facit. Ab eo, quod continet, id, quod continetur, hoc modo denominabitur: *Armis Italia non potest vinci, nec Graecia disciplinis*. nam hic pro Graecis et Italibus, quae continent, notata sunt. Ab eo, quod continetur, id, quod continet, ut, si quis aurum, vel ar-

gentum , aut ebur nominet , cum divitias velit nominare. Harum omnium denominationum magis in praecipiendo divisio , quam in quaerendo difficilis inventio est , ideo quod plena consuetudo est non modo poetarum et oratorum , sed etiam quotidiani sermonis , huiusmodi denominationum.

Circuitio est oratio , rem simplicem assumta circumscribens elocutione , hoc pacto : *Scipionis prouidentia Carthaginis opes fregit.* Nam hic , nisi ornandi ratio quaedam esset habita , Scipio potuit et Carthago simpliciter appellari.

Transgressio est , quae verborum perturbat ordinem perversione , aut transiectione. Perversione sic : *Hoc vobis deos immortales arbitror dedisse pietate pro vestra.* Transiectione hoc modo : *Instabilis in istum plurimum fortuna valuit.* Item , *Omnes invidiose eripuit tibi bene vivendi casus facultates.* Huiusmodi transiectio , quae rem non reddit obscuram , multum proderit ad continuationes , de quibus ante dictum est : in quibus oportet verba sint ad poeticum quendam exstructa numerum , ut perfecte et perpoliticissime possint esse absolutae.

Superlatio est oratio superans veritatem alicuius 33 augendi , minuendive causa. Haec sumitur separatim , aut cum comparatione. Separatim sic : *Quod si concordiam retinebimus ; imperii magnitudinem solis ortu atque occasu metiemur.* Cum comparatione , aut a similitudine , aut a praestantia superlatio sumitur. A similitudine sic : *Corpore niveum candorem , aspectu igneum ardorem assequebatur.* A praestantia hoc modo : *Cuius ore sermo melle dulcior profluebat.* Ex eodem genere hoc est : *Tantus erat in armis splendor , ut solis fulgor obscurior videretur.*

Intellectio est , cum res tota parva de parte cognoscitur , aut de toto pars. De parte totum sic in-

telligitur : *Non illae te nuptiales tibiae eius matrimoniū commonebant?* nam hic omnis sanctimonia nuptiarum uno signo tibiarum intelligitur. De toto pars ; ut si quis ei , qui vestitum aut ornatum sumtuosum ostentet , dicat , *Ostentas mihi divitias , et locupletes copias iactas.* Ab uno plura intelliguntur , hoc modo : *Poenō fuit Hispanus auxilio , fuit immanis ille Transalpinus : in Italia quoque idem non nemo togatus sensit.* A pluribus unum sic intelligitur : *Atrox calamitas pectora moerore pulsabat. Itaque anhelans ex imis pulmonibus p̄ae cura spiritus ducebatur.* Nam in superioribus plures Hispani , et Galli , et togati , hic unum pectus , et unus pulmo intelligitur : et erit illic diminutus numerus festivitatis , hic aductus gravitatis gratia.

Abusio est , quae verbo simili et propinquo pro certo et proprio abutitur , hoc modo : *Vires hominis breves sunt ; aut parva statura , aut longum in homine consilium ; aut oratio magna , aut uti paucō sermone.* Nam hic facile est intellētu , finitima verba rerum dissimilium , ratione abusionis esse traducta.

34 Translatio est , cum verbum in quandam rem transfertur ex alia re , quod propter similitudinem recte videbitur posse transferri. Ea utimur rei ante oculos ponendae causa , sic : *Hic Italianam tumultus expergefecit terrore subito.* Brevitatis causa , sic : *Recens adventus exercitus subito civitatem extinxit.* Obscoenitatis vitandae causa , sic : *Cuius mater quotidianis nuptiis delectatur.* Augendi causa , sic : *Nullius moeror et calamitas istius explere inimicitias , et nefariam saturare crudelitatem potuit.* Minuendi causa , sic : *Magno se praedicat auxilio fuisse , quia paululum in rebus difficillimis aspiravit.* Ornandi causa , sic : *Aliquando reipublicae rationes , quae malitia nocentum exaruerunt , virtute optimatum re-*

*virescent.* Translationem dicunt prudentem esse oportere, ut cum ratione in consimilem rem transeat, ne sine delectu temere et cupide videatur in dissimilem transcurrisse.

Permutatio est oratio, aliud verbis, aliud sententia demonstrans. Ea dividitur in tres partes, similitudinem, argumentum, contrarium. Per similitudinem sumitur, cum translationes, una, aut plures, frequenter ponuntur a simplici ratione ductae, sic : *Nam cum canes funguntur officiis loporum, cui praesidio pecua credemus?* Per argumentum tractatur, cum a persona, aut a loco, aut a re aliqua, similitudo augendi aut minuendi causa, ducitur : ut si quis Drusum, Gracchum, nitorem obsoletum dicat. Ex contrario ducitur sic ; ut si quis hominem prodigum et luxuriosum illudens, parcum et diligentem appelleat. Et in hoc postremo, quod ex contrario sumitur ; et in illo primo, quod a similitudine ducitur, per translationem argumento poterimus uti. Per similitudinem, sic : *Quid ait hic rex, atque Agamemnon noster, sive, ut crudelitas est, potius Atreus?* Ex contrario, si quem impium, qui patrem verberaverit, Aeneam vocemus : intemperantem et adulterum, Hippolytum nominemus. Haec sunt fere, quae dicenda videbantur de verborum exornationibus. Nunc res ipsa monet, ut deinceps ad sententiarum exornationes transeamus.

Distributio est, cum in plures res, aut personas, 35 negotia quaedam disperiuntur, hoc modo : *Qui vestrum, iudices, nomen senatus diligit, hunc oderit necesse est.* petulantissime enim semper iste oppugnavit senatum. *Qui equestrem locum, splendidissimum cupit esse in civitate, is oportet istum maximas poenas dedisse velit, ne iste sua turpitudine ordini ho-*

*nestissimo maculae atque dedecori sit. Qui parentes habetis, ostendite istius suppicio, vobis homines impios non placere. Quibus liberi sunt, statuite exemplum, quantae poenae in civitate sint hominibus istiusmodi comparatae. Item, Senatus officium est, consilio civitatem iuvare. Magistratus officium est, opera et diligentia consequi voluntatem senatus. Populi officium est, res optimas, et homines idoneos maxime, suis sententiis diligere et probare. Accusatoris officium est, inferre crimina. Defensoris, diluere et propulsare. Testis est, dicere, quae sciat, aut audierit. Quaesitoris est, unumquemque horum in officio suo continere. Quare, L. Cassi, si testem, praeterquam quod sciat, aut audierit, argumentari, et conjectura prosequi patieris; ius accusatoris cum iure testimonii commiscebis, testis improbi cupiditatem confirmabis, reo duplarem defensionem parabis. Est haec exortatio copiosa. Comprehendit enim brevi multa, et suum cuique tribuens officium, separatim res dedit plures.*

36 *Licentia est, cum apud eos, quos aut vereri, aut metuere debemus, tamen aliquid pro iure nostro dicimus, quod eos minime offendat, aut quos ii diligunt, cum in aliquo errato vere reprehendi posse videantur, hoc modo: Miramini, Quirites, quod ab omnibus vestrae rationes deserantur? quod causam vestram nemo suscipiat? quod se nemo vestri defensorem profiteatur? id tribuite vestrae culpae; atque definite mirari. Quid enim est, quare non omnes istam rem fugere ac vitare debeant? Recordamini, quos habueritis defensores; studia eorum vobis ante oculos proponite; deinde exitus omnium considerate. tum vobis veniet in mentem, ut vere dicam, negligenter vestra, sive ignavia potius illos omnes ante oculos vestros trucidatos esse, inimicos eorum vestris*

suffragiis in amplissimum locum pervenisse. Item, Nam quid fuit, iudices, quare in sententiis ferendis dubitaveritis, aut istum hominem nefarium ampliaveritis? non apertissimae res erant crimini datae? non omnes hae testibus comprobatae? non contra tenuiter et nugatorie responsum? Hic vos veriti estis, si primo coetu condemnassetis, ne crudeles existimaremini? Dum eam vitas vituperationem, quae longe a vobis erat abfutura, eam invenistis, ut timidi atque ignavi putaremimi. Maximas, et privatas, et publicas calamitates accepistis: cum etiam maiores impendere videantur, sedetis et oscitamini. Luce noctem, nocte lucem exspectatis. Aliquid quotidie acerbi atque incommodi nuntiatur, et eum, cuius opera vobis haec accidunt, remoramini diutius et alitis; ac reipublicae perniciem retinetis, quoad potestis, in civitate. Eius- 37 modi licentia si nimium videbitur acrimoniae habere, multis mitigationibus lenietur. nam continuo aliquid huiusmodi licebit inferre: Hic ego virtutem vestram quaero, sapientiam desidero, veterem consuetudinem requiro; ut quod erit commotum licentia, id mitigetur laude, ut altera res ab iracundia et molestia removeat, altera ab errato deterreat. Haec res, sicut in amicitia, ita in dicendo, si loco fit, maxime facit, ut et illi, qui audient, a culpa absint, et nos, qui dicimus, amici ipsorum et veritatis esse videamur. Est autem quoddam genus licentiae in dicendo, quod astutiore ratione comparatur: cum aut ita obiurgamus eos, qui audiunt, quomodo ipsi se cupiant obiurgari: aut id, quod scimus facile omnes audituros, dicimus nos timere, quomodo accipient; sed tamen veritate commoveri, ut nihilo fecius dicamus. Horum amborum generum exempla subiiciemus. Prioris, huiusmodi: *Nimium, Quirites, animis estis simplicibus et man-*

*suetis : nimium creditis unicuique. existimatis unum-  
quemque eniti , ut perficiat , quae vobis pollicitus sit.  
Erratis , et frustra falsa spe iam diu detinemini. Stul-  
titia vestra id , quod erat in vestra potestate , ab aliis  
petere , quam ipsi sumere maluistis. Posterioris licen-  
tiae hoc erit exemplum. Mihi cum isto , iudices ,  
fuit amicitia , sed ista amicitia , tametsi vereor quo-  
modo accepturi sitis , dicam tamen , vos me privastis.  
Quid ita ? quia , ut vobis esset probatus , eum , qui vos  
oppugnabat , inimicum , quam amicum habere malui.  
Ergo haec exornatio , cui licentiae nomen est , si-  
cuti demonstravimus , dupli ratione tractabitur ;  
acrimonia , quae si nimium fuerit aspera , mitigabitur  
laude ; et assimulatione , de qua posterius dixi-  
mus , quae non indiget mitigationis , propterea quod  
imitatur licentiam , et sua sponte ad animum audi-  
toris se accommodat.*

38 Deminutio est , cum aliquid esse in nobis , aut  
in iis , quos defendimus , aut natura , aut fortuna ,  
aut industria dicemus egregium : quod , ne qua signi-  
ficetur arrogans ostentatio , deminuitur et attenua-  
tur oratione , hoc modo : *Nam hoc pro meo iure ,  
iudices , dico , me labore et industria curasse , ut disci-  
plinam militarem non in postremis tenerem.* Hic si quis  
dixisset , ut optime tenerem , tametsi vere dixisset ,  
tamen arrogans visus esset . nunc et ad invidiam vi-  
tandam , et ad laudem comparandam satis dictum  
est. Item , *Utrum igitur avaritiae causa an egestatis  
accessit ad maleficium ? Avaritiae ? at largissimus fuit  
in amicos ; quod signum liberalitatis est , quae est con-  
traria avaritiae. Egestatis ? at huic quidem pater (nolo  
nimium dicere ) non tentissimum patrimonium reliquit.*  
Hic quoque vitatum est , ne magnum aut maximum  
diceretur. hoc igitur in nostris , aut eorum , quos  
defendemus , egregius commodis proferendis obser-

vabimus. nam eiusmodi res et invidiam contrahunt in vita , et odium in oratione , si inconsiderate tractes. Quare , quemadmodum ratione in vivendo fugitur invidia , sic in dicendo , consilio vitatur odium.

Descriptio nominatur , quae rerum consequentia continet perspicuam et dilucidam cum gravitate expositionem, hoc modo : *Quod si istum, iudices, vestris sententiis liberaveritis, statim sicut e cavea leo missus, aut aliqua teterima bellua soluta ex catenis, volitabit & vagabitur in foro, acuens dentes multos, in cuiusque fortunas, in omnes amicos atque inimicos, notos atque ignotos incursans; aliorum famam depeculans, aliorum caput oppugnans, aliorum domum atque omnem familiam perfringens, rempublicam funditus labefactans. Quare, iudices, eiicite eum de civitate, liberate omnes formidine; vobis denique ipsis consulite. nam si istum impunitum dimiseritis, in vosmet ipsos, mihi credite, feram & truculentam bestiam immiseritis. Item, Nam si de hoc, iudices, gravem sententiam tuleritis, uno iudicio simul multos iugulaveritis. grandis natu parens, cuius spes senectutis omnis in huius adolescentia posita est, quare velit in vita manere, non habebit: filii parvi, privati patris auxilio, ludibrio & despectui paternis inimicis erunt oppositi: tota domus huius indigna concidet calamitate: at inimici statim sanguinolenta palma, crudelissima victoria potiti, insultabunt in horum miserias, & superbi res simul & verbis invehentur. Item, Nam neminem verstrum fugit, Quirites, capta urbe, quae miseriae consequi soleant: arma qui contra tulerint, statim crudelissime trucidantur: ceteri, qui possunt per aetatem & vires laborem ferre, rapiuntur in servitutem; qui non possunt, vita privantur: uno denique atque eodem tempore domus hostili flagrat incendio, & quos natura,*

*aut voluntas necessitudine, aut benevolentia coniunxit, distrahuntur: liberi partim e gremiis parentum diripiuntur, partim in sinu iugulantur, partim ante pedes constuprantur. nemo, iudices, est, qui possit satis rem consequi verbis, nec referre oratione magnitudinem calamitatis. Hoc genere exornationis, vel indignatio, vel misericordia potest commoveri, cum res consequentes comprehensae universae perspicua breviter exprimuntur oratione.*

40 *Divisio est, quae rem semovens ab re, utramque absolvit, ratione subiecta; hoc modo: Cur ego nunc tibi quidquam obiiciam? si probus es, non meruisti: si improbus, non commoveris. Item, Quid nunc ego de meis promeritis praedicem? si meministis, obtundam: si oblii estis, cum re nihil egerim, quid est, quod verbis proficere possim? Item, Duae res sunt, quae possunt homines ad turpe compendium commovere, inopia atque avaritia. Te avarum in fraterna divisione cognovimus: inopem atque egentem nunc videmus. qui potes igitur ostendere, causam maleficii non fuisse? Inter hanc divisionem, et illam, quae de partibus orationis tertia est, de qua in libro primo diximus secundum narrationem, hoc interest: illa dividit per enumerationem, aut per expositionem, quibus de rebus in tota oratione disputatio futura sit: haec se statim explicat, et brevi duabus aut pluribus partibus subiiciens rationes, exornat orationem.*

*Frequentatio est, cum res in tota causa dispersae coguntur in unum, quo gravior, aut acrior, aut criminosior oratio sit, hoc pacto: A quo tandem absit iste vitio? quid est, iudices, cur velitis eum liberare? Suae pudicitiae proditor est, insidiator alienae; cupidus, intemperans, petulans, superbus; impius in parentes, ingratus in amicos, infestus in cognatos, in superiores contumax, in aequos & pares fastidiosus,*

*in inferiores crudelis, denique in omnes intolerabilis.*  
Eiusdem generis est illa frequentatio, quae plurimum coniecturalibus causis opitulatur, cum suspicione<sup>41</sup>, quae separatim dictae, minutae et infirmae erant, unum in locum coactae rem videntur perspicuum facere, non suspiciosam, hoc pacto: *Nolite igitur, nolite, iudices, ea, quae dixi, separatim spectare: sed omnia colligite, & conferte in unum.* Si & commodum ad istum ex illius morte veniebat, & vita hominis est turpissima, animus avarissimus, fortunae familiares attenuatissimae, & res ista bono nemini praeter istum fuit: neque aliis quisquam aequem com mode, neque iste aliis commodioribus rationibus facere potuit: neque praeteritum quidquam est ab isto; quod opus fuerit ad maleficium: neque factum, quod opus non fuerit: & cum locus idoneus maxime quaesitus, tum occasio aggrediendi commoda, tempus adeundi opportunitissimum, spatium conficiendi longissimum sum tum est, non sine maxima perficiendi & occultandi maleficii spe: & praeterea ante, quam occisus homo iste, iste visus est in eo loco in quo est occisio facta, solus: paulo post in ipso maleficio, vox illius, qui occidebatur, audita: deinde post occisionem, istum multa nocte domum rediisse constat: postera die titubanter & inconstanter de occisione illius locutum: haec partim testimoniis, partim quaestionibus & argumentis omnia comprobantur, & rumore populi quem ex argumentis natum, necesse est esse verum: *vestrum est, iudices, his in unum locum collatis, certam sumere scientiam, non suspicionem maleficii.* Nam unum aliquid, aut alterum potest in ipsum casu cecidisse suspiciose: ut omnia inter se a primo ad postremum convenienter (maleficia), necesse est casu non posse fieri. Vehemens est haec exornatio, et in coniecturali constitutione causae ferme semper necessaria.

ria, et in ceteris generibus causarum, et in omni oratione adhibenda nonnunquam.

- 42 Exploitio est, cum in eodem loco manemus, et aliud atque aliud dicere videmur. Ea dupliciter fit, si aut eandem plane rem dicemus, aut de eadem re. Eandem rem dicemus, non eodem modo, ( nam id quidem obtundere auditorem est, non rem expolire ) sed commutate. Commutabimus tripliciter, verbis, pronuntiando, tractando. Verbis commutabimus, cum, re semel dicta, iterum, aut saepius aliis verbis, quae idem valeant, eadem res proferetur, hoc modo : *Nullum tantum est periculum, quod sapiens pro salute patriae vitandum arbitretur. Cum agetur incolumitas perpetua civitatis; qui bonis erit rationibus praeditus, profecto nullum vitae discrimen sibi pro fortunis reipublicae fugiendum putabit: & erit in ea sententia semper, ut pro patria studiose quamvis in magnam descendat vitae dimicationem.* Pronuntiando commutabimus, si tum in sermone, tum in acrimonia, tum in alio atque alio genere vocis atque gestus, eadem verbis commutando, pronunciationem quoque vehementius immutabimus. Hoc neque commodissime scribi potest, neque parum est apertum. quare non eget exempli. Tertium genus est commutationis, quod tractando conficitur, si sententiam traxiiciemus aut ad sermocinationem, aut ad exfuscationem. Sermocinatio est, ( de qua planius paulo post suo loco dicemus, nunc breviter ad hanc rem, quod satis sit, attingemus, ) in qua constituetur aliquius personae oratio accommodata ad dignitatem, hoc modo, ut, quo facilius res cognosci possit, ne ab eadem sententia recedamus : *Sapiens, qui omnia reipublicae causa suscipienda pericula putabit, saepe ipse secum sic loquetur : Non mihi soli, sed etiam,*

atque adeo multo potius, natus sum patriae : vita, quae fato debetur, saluti patriae potissimum solvatur. Aluit haec me: tute atque honeste produxit usque ad hanc aetatem: muniit meas rationes bonis legibus, optimis moribus, honestissimis disciplinis. Quid est, quod a me satis ei persolvi possit, unde haec accepta sunt? Quia haec loquitur secum sapiens, saepe ego in periculis reipublicae nullum ipse periculum fugi. Item, mutatur res tractando, si traducitur ad exsuscitationem, cum et nos commoti dicere videamur, et auditoris animum commovemus, sic: *Quis est tam tenui cogitatione praeditus, cuius animus tantis angustiis invidiae continetur, qui non hunc hominem studiosissime laudet, & sapientissimum iudicet, qui pro salute patriae, pro incolumitate civitatis, pro reipublicae fortunis, quamvis magnum atque atrox periculum studiose suscipiat, & libenter subeat?* Evidem hunc hominem magis cupio satis laudare, quam possum: idemque hoc certo scio vobis omnibus usu venire. Eadem res igitur his tribus in dicendo commutabitur rebus, verbis, pronuntiando, tractando: sed tractando dupliciter, sermocinatione, et exsuscitatione. Sed de eadem re cum dicemus, pluribus ute-  
mur commutationibus. Nam cum rem simpliciter pronuntiaverimus, rationem poterimus subiicere: deinde dupliciter, vel sine rationibus vel cum rationibus, pronuntiare sententiam: deinde afferre contrarium; de quibus omnibus diximus in verborum exornationibus: deinde simile et exemplum, de quo suo loco plura dicemus: deinde conclusionem; de qua in secundo libro, quae opus fuerunt, diximus, demonstrantes, argumentationem quemadmodum concludere oporteat. In hoc libro docuimus, cu- 44 iusmodi esset exornatio verbi, cui conclusioni no-  
men est. Ergo huiusmodi vehementer ornata pote-

rit esse expositio, quae constabit ex frequentibus verborum exornationibus et sententiarum. Hoc modo igitur septem partibus tractabitur. sed ab eiusdem sententiae non recedemus exemplo, ut scire possis, quam facile praceptione rhetorica res simplex multiplici ratione tractetur. *Sapiens nullum pro republica periculum vitabit; ideo quod saepe fit, ut, cum pro republica perire noluerit, necessario cum republica pereat.* Et quoniam sunt omnia commoda a patria accepta, nullum incommodum pro patria grave putandum est. ergo qui fugiunt id periculum, quod pro republica subeundum est, stulte faciunt. Nam neque effugere incommoda possunt, & ingrati in civitatem reperiuntur. At, qui patriae pericula suo periculo exceptunt, hi sapientes putandi sunt, cum & eum, quem debent, honorem reipublicae reddunt, & pro multis perire malunt, quam cum multis. Etenim vehementer est iniquum, vitam, quam a natura acceptam propter patriam conservaveris, naturae, cum cogat, reddere; patriae, cum roget, non dare: & cum possis cum summa virtute & honore pro patria interire, malle per decus & ignaviam vivere: &, cum pro amicis & parentibus & ceteris necessariis adire periculum velis, pro republica, in qua & haec, & illud sanctissimum nomen patriae continentur, nolle in discrimen venire. Itaque uti contempnendus est, qui in navigando se, quam navim, mavult incolumem: ita vituperandus, qui in reipublicae discrimine, suae plus, quam communi saluti, consulit. Nave enim fracta, multi incolumes evaserunt: ex naufragio patriae salvus nemo potest enatare. Quod mihi bene videtur Decius intellectus esse, qui se devovisse dicitur, & pro legionibus in hostes immisisse medios: unde amisit vitam; at non perdidit. re enim vilissima certam & parva maximam redemit. dedit vitam, accepit patriam: amisit animam, potitus est gloria, quae

*summa summa laude prodita vetustate quotidie magis enitescit. Quod si, pro republica debere accedere ad periculum, & ratione demonstratum est, & exemplo comprobatum, ii sapientes sunt existimandi, qui nullum pro salute patriae periculum vitant.* In his igitur generibus expolitio versatur, de qua producunt suimus, ut plura dicemus, quod non modo, cum causam dicimus, adiuuat et exornat orationem, sed multo maxime per eam exercemur ad elocutionis facultatem. Quare conveniet extra causam in exercendo rationes adhibere expolitionis, in dicendo uti, cum exornabimus argumentationem, de qua diximus in libro secundo.

Commoratio est, cum in loco firmissimo, quo tota causa continetur, manet diutius, et eodem saepius redditur. Hac uti maxime convenit, et id est oratoris boni maxime proprium. Non enim datur auditori potestas animum de re firmissima dimovendi. Huic exemplum satis idoneum subiici non potuit, propterea quod hic locus non est a tota causa separatus, sicuti membrum aliquod, sed tanquam sanguis, perfusus est per totum corpus orationis,

Contentio est, per quam contraria referuntur. 45 Ea est in verborum exornationibus, ut ante docuimus, eiusmodi : *Inimicis te placabilem, amicis inexorabilem praebes.* In sententiarum, huiusmodi : *Vos huius incommodis lugetis, iste reipublicae calamitate laetatur. Vos vestris fortunis diffiditis, iste solus suis eo magis confidit.* Inter haec duo contentionum genera hoc interest : illud ex verbis celeriter relativis constat ; hic sententiae contrariae ex comparatione referantur oportet.

Similitudo, est oratio traducens ad rem quamquam aliquid ex re dispari simile. Ea sumitur aut

ornandi causa , aut probandi , aut apertius dicendi ; aut ante oculos ponendi. Et quomodo quatuor de causis sumitur , ita quatuor modis dicitur ; per contrarium , per negationem , per brevitatem , per collationem. Ad unamquamque sumendae causam similitudinis accommodabimus singulos modos pro-  
46 nuntiandi. Ornandi causa sumitur per contrarium , sic : *Non enim quemadmodum in palaestra , qui taedas ardentes accipit , celerior est in cursu continuo , quam ille , qui tradit ; ita melior imperator novus , qui accipit exercitum , quam ille , qui decedit : prop- terea quod desatigatus cursor integro facem , hic peritus imperator imperito exercitum tradit.* Hoc sine simili fatis plane , et perspicue , et probabiliter dici potuit , hoc modo : *Minus bonos imperatores a melioribus exercitum accipere solere : sed ornandi causa simile sumtum est , ut orationi dignitas quaedam compararetur.* Dictum est autem per contrarium . Nam tunc similitudo sumitur per contrarium , cum ei rei , quam nos probamus , aliquam rem negamus esse similem , ut paulo ante , cum de cursoribus disserebamus. Per negationem dicetur , probandi causa , hoc modo : *Neque equus indomitus , quamvis natura bene compositus sit , idoneus potest esse ad eas utilitates , quae desiderantur ab equo ; neque homo indoctus , quamvis sit ingeniosus , ad virtutem potest pervenire.* Hoc probabilius factum est , quod magis est verisimile , non posse virtutem sine doctrina comparari ; quoniam ne equus quidem indomitus idoneus possit esse. ergo sumtum est probandi causa . Dictum est autem per negationem . id enim perspi-  
47 cuum est de primo similitudinis verbo. Sumetur et , apertius dicendi causa , similitudo per brevitatem , hoc modo : *In amicitia gerenda , sicut in certamine currendi , non ita convenit exerceri , ut , quoad ne-*

*cessē sit, pervenire possis: sed ut productus studio, et viribus, ultra facile procurras.* Nam hoc simile est, ut apertius intelligatur, mala ratione facere, qui reprehendant eos, qui, verbi causa, post mortem amici liberos eius custodian, propterea quod in cursore tantum velocitatis esse oporteat, ut effera-  
tur usque ad finem: in amico tantum benevolen-  
tiae, ut ultra, quam amicus sentire possit, pro-  
currat amicitiae studio. Dictum autem simile est per  
brevitatem. non enim ita, ut in ceteris rebus, res  
ab re separata est, sed utraque res coniuncte et  
confuse comparata. Ante oculos ponendi negotiū  
causa sumetur similitudo, cum dicetur per colla-  
tionem, sic: *Uti citharoedus, cum prodierit optime  
vestitus, palla inaurata indutus, cum chlamyde pur-  
purea, coloribus variis intexta, et cum corona aurea,  
magnis fulgentibus gemmis illuminata, citharam te-  
nens exornatissimam, auro et ebore distinctam, ipse  
praeterea forma et specie sit et statura apposita ad digni-  
tatem; si, cum magnam populo commoverit his rebus  
exspectationem, repente silentio factō, vocem emittat  
acerbissimam cum turpissimo corporis motu; quo me-  
lius ornatus et magis fuerit exspectatus, eo magis de-  
risus et contemnius, eiicitur: ita si quis in excelso loco,  
et in magnis ac locupletibus copiis collocatus, fortunae  
muneribus, et naturae commodis omnibus abundabit;  
si virtutis, et artium, quae virtutis magistrae sunt,  
egebit; quo magis ceteris rebus copiosus erit, et in-  
lustris [ et exspectatus ], eo vehementius derisus et con-  
temptus, ex omni conventu bonorum eiicietur.* Hoc  
simile, exornatione utriusque rei, et alterius iner-  
tiae artificis, alterius stultitia simili ratione collata,  
sub aspectum omnium rem subiecit. Dictum autem 48  
est per collationem, propterea, quod proposita  
similitudine, paria sunt omnia relata.

In similibus observare oportebit diligenter, ut, cum rem afferamus similem, cuius rei causa similitudinem attulerimus, verba quoque ad similitudinem habeamus accommodata. Id est huiusmodi : *Ut hirundines aestivo tempore praesto sunt, frigore pulsae recedunt.* Ex eadem similitudine nunc per translationem verba sumimus : *Ita falsi amici sereno vitae tempore praesto sunt; simulatque hiemem fortunae viderint, devolant omnes.* Sed inventio similium facilis erit, si quis sibi omnes res animatas et inanimatas, mutas et loquentes, feras et mansuetas, terrestres et coelestes et maritimas, artificio, casu, natura comparatas, usitatas atque inusitatas, frequenter ante oculos poterit ponere, et ex his aliquam venari similitudinem, quae aut ornare, aut docere, aut apertiores rem facere, aut ponere ante oculos possit. Non enim res tota toti rei necesse est similis sit, sed ad ipsum, ad quod conseretur, similitudinem habeat oportet.

49 Exemplum est alicuius facti, aut dicti [praeteriti], cum certi auctoris nomine propositio. Id sumitur iisdem de causis, quibus similitudo. Rem ornatorem facit, cum nullius rei, nisi dignitatis, causa sumitur : apertiores, cum id, quod sit obscurius, magis dilucidum reddit : probabiliorem, cum magis verisimilem facit : ante oculos ponit, cum exprimit omnia perspicue, ut res prope dicam manu tentari possit. Uniuscuiusque generis singula subiecisset exempla, nisi exemplum, quod genus esset, in expolitione demonstrasssemus, et causas sumendi in similitudine aperuisssemus. Quare noluimus, neque pauca, quo minus intelligeretur, neque, re intellecta, plura conscribere.

Imago est formae cum forma cum quadam similitudine collatio. Haec sumitur aut laudis, aut vi-

superationis causa. Laudis causa, sic : *Ibat in proelium, corpore tauri validissimi, impetu leonis acer- rimi similis.* Vituperationis, ut in odium, aut in invidiam, aut in contemtionem adducat. Ut in odium, hoc modo : *Iste quotidie per forum medium, tanquam iubatus draco, serpit, dentibus aduncis, aspectu venenato, spiritu rabido, circumspetans huc et illuc, si quem reperiat, cui aliquid mali faucibus afflare, [ore attingere,] dentibus inficere, lingua aspergere possit.* Ut in invidiam adducat, hoc modo : *Iste, qui divitias suas iactat, sicut Gallus e Phrygia, aut ariolus quispiam, depresso et oneratus auro, clamat, et deierat.* Ut in contemtionem adducat, sic : *Iste, qui tanquam cochlea, abscondens et retentans se se tacitus, cum domo sua totus, ut comedatur, aufertur.*

Effictio est, cum exprimitur et effingitur verbis corporis cuiuspiam forma, quod satis sit ad intelligendum, hoc modo : *Hunc dico, iudices, rubrum, brevem, incurvum, canum, subcrispum, caesum, cui sane magna est in mento cicatrix; si quo modo potest vobis in memoriam redire.* Habet haec exornatio cum utilitatem, si quem velis demonstrare : tum venustatem, si breviter et dilucide facta est. Notatio est, cum alicuius natura certis describitur signis, quae, sicuti notae quaedam, naturae sunt attributa. Ut si velis non divitem, sed ostentatorem pecuniae describere ; *Iste, inquies, iudices, qui, se dici divitem, putat esse praeclarum, primum nunc videte, quo vultu nos intueatur. nonne vobis videatur dicere : Darem, si mihi molesti non essetis? cum vero sinistra mentum sublevat, existimat se gemmae nitore & auri splendore aspectus omnium praestringere.* Cum puerum respicit hunc unum, quem ego novi, (vos non arbitror novisse,) alio nomine appellat,

deinde alio atque alio : *Heus tu , inquit , veni San-*  
*nio , ne quid isti barbari turbent : ut ignoti , qui au-*  
*dunt , unum putent eligi de multis : ei dicit in au-*  
*rem , aut ut domi lectuli sternantur , aut ab avunculo*  
*rogetur Aethiops , qui ad balneas veniat , aut astur-*  
*coni locus ante ostium suum detur , aut aliquod fragile*  
*falsae choragium gloriae comparetur. Deinde exclam-*  
*mat , ut omnes audiant : Videto , ut diligenter nume-*  
*retur , si potest , ante noctem. Puer , qui iam bene*  
*hominis naturam novit , Tu illo plures mittas oportet , inquit , si*  
*hodie vis transnumerari. Age , inquit , duc tecum Libanum & Sosiam. Sane. Deinde casu*  
*veniunt hospites homini , qui istum splendide , dum*  
*peregrinaretur , receperant . ex ea re homo hercle sane*  
*conturbatur : sed tamen a vitio naturae non recedit.*  
*Bene , inquit , facitis , cum venitis : sed rectius fecissetis , si ad me domum recta abiissetis. Id fecissetis , inquit illi , si domum novissetis. At istud quidem*  
*facile fuit undelibet invenire. Verum ite mecum. Se-*  
*quuntur illi. Sermo interea huius consumitur omnis*  
*in ostentatione. Quaerit , in agris cuiusmodi frumenta*  
*sint : negat , se , quia villaे incensae sint , accedere posse , nec aedificare etiam nunc audere ; tametsi in*  
*Tusculano quidem coepi insanire , & in iisdem funda-*  
51 *mentis aedificare. Dum haec loquitur , venit in aedes*  
*quasdam , in quibus sodalitum erat eodem die futu-*  
*rum : quo iste pro notitia domini aedium ingreditur cum*  
*hospitibus. Hic , inquit , habito. perspicit argentum ,*  
*quod erat expositum , triclinium stratum probat. acce-*  
*dit servulus : dicit homini clam , dominum iam ventu-*  
*rum , si velit exire. Itane ? inquit , eamus hospites ;*  
*frater venit ex Salerno : ego illi obviam pergam :*  
*vos huc decuma venitote. Hospites discedunt. Iste se*  
*raptim domum suam coniicit : illi decuma , quo ius-*  
*serat , veniunt. quaerunt hunc. reperiunt , domus cuia*

fit : in diversorium derisi conferunt sese. Vident hominem postera die : narrant , expositulant , accusant . ait iste , eos similitudine loci deceptos , angiporto toto deerasse : se contra valetudinem suam ad noctem multam exspectasse . Sannioni puer negotium dederat , ut vasa , vestimenta , pueros corrogaret . servulus non inurbanus satis strenue & concinne comparat : iste hospites domum deducit . Ait se aedes maximas cuidam amico ad nuptias commodasse . nunciat puer , argentum repeti ( pertimuerat enim , qui commodarat ) . Apagete , inquit , aedes commodavi , familiam dedi : argentum quoque vult ? tametsi hospites habeo , tamen utatur licet , nos Samiis delectabimur . Quid ego , quae deinde efficiat , narrem ? eiusmodi est hominis natura , ut , quae singulis diebus efficiat gloria atque ostentatione , ea vix annuo sermone enarrare possim . Huiusmodi notationes , quae describunt , quid consentaneum sit uniuscuiusque naturae , vehementer habent magnam delectationem . totam enim naturam cuiuspiam ponunt ante oculos , aut gloriosi , ut nos , exempli causa , cooperamus , aut invidi , aut timidi , aut avari , ambitiosi , amatoris , luxuriosi , furis , quadruplatoris : denique cuiusvis studium protrahi potest in medium tali notatione .

Sermocinatio est , cum alicui personae sermo attribuitur , et is exponitur cum ratione dignitatis , hoc pacto : Cum militibus urbs redundaret , & omnes timore oppressi domi continerentur , venit iste cum sago , gladio succinctus , tenens iaculum : quinque adolescentes hominem simili ornatu subsequuntur . irrumpit in aedes subito , deinde magna voce , Ubi est iste beatus , inquit , aedium dominus ? quin mihi praesto sit ? quid tacetis ? Hic alii omnes stupidi timore obmutuerunt . Uxor illius infelicissimi cum maximo fletu ad istius pedes abiecit sese . Parce , inquit , & per ea , quae tibi

*dulcissima sunt in vita, miserere nostri: noli extingue exstinctos. Fer mansuete fortunam. nos quoque suimus beati: nosce te esse hominem. At ille: Quin illum mihi datis, ac vos auribus meis opplorare definitis? non abibit. Illi nuntiatur interea venisse istum, & clamore maximo mortem minari. Quod simul ut audivit, Heus, inquit, Gorgia, pedissequi puerorum, absconde pueros: defende: fac, ut incolumes ad adolescentiam perducas. Vix haec dixerat, cum ecce iste praefato, Sedes, inquit, audax? non vox mea tibi vitam ademit? exple inimicitias meas, & iracundiam saturam tuo sanguine. Ille cum magno spiritu, metuebam, inquit, ne plane vicitus essem. nunc video: in iudicio mecum contendere non vis, ubi superari turpissimum, & superare pulcherrimum est: interficere me vis. occidar equidem, sed viclus non peribo. At iste, In extremo vitae tempore etiam sententiose loqueris? neque ei, quem vides dominari, vis supplicare? Tum mulier, immo quidem ille rogat & supplicat: sed tu, quaequo, commovere; & tu, per deos, inquit, hunc examplexare. dominus est; vicit hic te, vince tu nunc animum. Cur non definis, inquit, uxor, loqui, quae me digna non sunt? tace, &, quae curanda sunt, cura. tu cessas mihi vitam, tibi omnem bene vivendi spem mea morte eripere? Iste mulierem repulit ab se lamentantem: illi, nescio quid incipienti dicere, quod dignum videlicet illius virtute esset, gladium in latere defixit. Puto in hoc exemplo datos esse unicuique sermones ad dignitatem accommodatos: quod oportet in hoc genere observare. Sunt item sermocinationes consequentes hoc genus: Nam quid putamus illos dicturos, si hoc iudicaveritis? nonne hac omnes utentur oratione? deinde subiicere sermonem.*

53 Conformatio est, cum aliqua, quae non adest,

persona confingitur, quasi adsit, aut cum res muta, aut informis, sit eloquens et formata, et ei oratio attribuitur ad dignitatem accommodata, aut actio quaedam, hoc pacto: *Quodsi nunc haec urbs invictissima vocem mittat, non hoc pacto loquatur?* Ego illa plurimis tropaeis ornata, triumphis ditata certissimis, clarissimis locupletata victoriis, nunc vestris seditionibus, o cives, vexor: quam dolis malitiosa Carthago, viribus probata Numantia, disciplinis erudita Corinthus labefactare non potuit, eam patiemini nunc ab homunculis deterrimis proteri atque conculcari? Item, *Quodsi nunc L. ille Brutus reviviscat, & hic ante pedes vestros adsit, non hac utatur oratione?* Ego reges eieci; vos tyrannos introducitis: ego libertatem, quae non erat, peperi; vos partam servare non vultis: ego capitum mei periculo patriam liberavi; vos liberi sine periculo esse non curatis? Haec conformatio, licet in plures res mutas atque inanimas transferatur, proficit tamen plurimum in amplificationis partibus et commiseratione.

Significatio est, quae plus in suspicione relinquit, quam positum est in oratione. ea sit per exuberationem, ambiguum, consequentiam, abscissionem, similitudinem. Per exuberationem, cum plus dictum est, quam patitur veritas, augendae suspicionis causa, sic: *Hic de tanto patrimonio tam cito testam, qua sibi petat ignem, non reliquit.* Per ambiguum, cum verbum potest in duas pluresve sententias accipi, sed accipitur in eam partem, quam vult is, qui dixit: ut de eo si dicas, qui multas hereditates adierit, *Prospice tu, qui plurimum cernis.* Ambigua quemadmodum vitanda sunt, quae obscuram reddunt orationem, ita haec consequenda, quae conficiunt huiusmodi significationem. Ea reperientur facile, si noverimus et animadverterimus verborum ancipi-

tes aut multiplices potestates. Per consequentiam significatio fit, cum res, quae sequuntur aliquam rem, dicuntur, ex quibus tota res relinquitur in suspicione, ut si falsamentarii filio dicas: *Quiesce tu, cuius pater cubito se emungere solebat.* Per abscissionem, si, cum incipimus aliquid dicere, prae-  
dicimus, et ex eo, quod iam diximus, satis re-  
linquitur suspicionis, sic: *Qui ista forma et aetate nuper alienae domui... nolo plura dicere.* Per similitudinem, cum aliqua re simili allata, nihil amplius dicimus, sed ex ea significamus, quid sentiamus, hoc modo: *Noli, Saturnine, nimium populi frequentia fretus esse. inulti iacent Gracchi.* Haec exornatio plurimum festivitatis habet interdum, et dignitatis: sinit enim quiddam, tacito oratore, ipsum auditorem suspicari.

Brevitas est res ipsis tantummodo verbis necessaria expedita, hoc modo: *Lemnum praeteriens cepit: inde Thasi praesidium reliquit: post urbem in Bithynia sustulit: inde appulsus in Helleponsum, statim potitur Abydo.* Item, *Modo consul, quondam tribunus, deinde primus erat civitatis.* Tum, *Proficiscitur in Asiam, deinde exsul et hostis est dilatus, post imperator, postremo consul factus est.* Habet paucis comprehensa brevitas multarum rerum expeditionem. Quare adhibenda saepe est, cum aut res non egent longae orationis, aut tempus non finit commorari.

55 Demonstratio est, cum ita res verbis exprimitur, ut geri negotium, et res ante oculos esse videatur. Id fieri poterit, si, quae ante, et post, et in ipsa re facta erunt, comprehendemus, aut si a rebus consequentibus, aut a circumstantibus non recedemus, hoc modo: *Quod simul atque Gracchus prospexit, fluctuare populum, verentem, ne ipse*

auctoritate senatus commotus a sententia desisteret , iubet advocari concessionem. Iste interea scelere & malis cogitationibus redundans , evolat ex templo Iovis , & sudans , oculis ardentibus , erecto capillo , contorta toga , cum pluribus aliis ire celerius coepit. Illi praeco faciebat audientiam : hic subsellium quoddam calce premens , dextra pedem defringit , & alios hoc idem iubet facere. Cum Gracchus deos inciperet precari , cursim isti impetum faciunt : ex aliis aliquique partibus convolant : atque e populo unus , fuge , inquit , Tiberi , fuge. non vides ? respice , inquam. Deinde vaga multitudo , subito timore perterrita , fugere coepit. At iste spumans ex ore scelus , anhelans ex intimo pectore crudelitatem , contorquet brachium ; & dubitanti Graccho , quid esset , neque tamen locum , in quo consiliterat , relinquenti , percutit tempus. Ille nulla voce delabens , insita virtute concidit tacitus. Iste viri fortissimi miserando sanguine adspersus , quasi facinus praeclarissimum fecisset , circumspectans & hilariis sceleratam gratulantibus manum porrigena , in templum Iovis contulit sese. Haec exornatio plurimum prodest in amplificanda et commiseranda re , huiusmodi enarrationibus. statuit enim totam rem , et prope ponit ante oculos.

Omnis rationes honestandae elocutionis studiose 56 collegimus , in quibus , Herenni , si te diligenter exercueris , et gravitatem , et dignitatem , et suavitatem habere in dicendo poteris , ut oratorie plane loquaris : ne nuda atque inornata inventio vulgari sermone efferatur. Nunc identidem nosmet ipsi nobis instemus. res enim communis agitur , ut frequenter et assidue consequamur artis rationem studio et exercitatione : quod alii cum molestia tribus de causis maxime faciunt ; aut si , cum quibus libenter exerceantur , non habent ; aut si sibi diffidunt ; aut si nesciunt ,

quam viam sequi debeat: quae a nobis absunt omnes difficultates. Nam et simul libenter exercemur propter amicitiam, cuius initium cognatio fecit, cetera philosophiae ratio confirmavit: et nobis non diffidimus, propterea quod et aliquantulum processimus, et alia meliora sunt, quae multo intentius petimus in vita, ut, etiam si non pervenerimus in dicendo, quo volumus, parva pars vitae perfectissimae desideretur: et viam quam sequamur, habemus, propterea quod in his libris nihil praeteritum est rhetoricae praeceptionis. Demonstratum est enim, quomodo res in omnibus generibus causarum inveniri oporteret: dictum est, quo pacto eas disponere conveniret: traditum est, qua ratione esset pronuntiandum: praeceptum est, qua via meminisse possemus: demonstratum est, quibus modis perfecta elocutio compararetur. Quae si exsequimur, acute et cito reperiemus, distincte et ordinate disponemus, graviter et venuste pronuntiabimus, firme et perpetuo meminerimus, ornate et suaviter eloquemur. Ergo amplius in arte rhetorica nihil est. Haec omnia adipiscemur, si rationes praeceptionis diligentia consequemur exercitationis.

---

M. TULLII CICERONIS  
RHETORICORUM  
SEU DE  
INVENTIONE RHETORICA  
LIBRI DUO  
QUI RELIQUI SUNT EX QUATUOR.



M. TULLII  
 CICERONIS  
 DE  
 INVENTIONE RHETORICA  
 LIBER PRIMUS.

---

ARGUMENTUM L. I.

Differit Tullius primo de eloquentiae insigni in omni vita ac republica utilitate et abusu, quomodo inventa sensim ac paulatim, exulta et perfecta sit, accedente arte scilicet ac ratione, quae eam certis regulis ac legibus adstringeret. Addit deinde, de eloquentiae officio et fine, materia, et partibus; quarum quinque facit, inventionem, dispositionem, elocutionem, memoriam, pronuntiationem. De inventione ergo, quae prima pars est, fuse suscipit dicere, et qualis esse in omni causarum constitutione tum conjecturali, tum definitiva, tum generali debeat. Tandem exordiorum, narrationum, partitionum, confirmationum, refutationum, conclusionum, praecepta ac regulas ponit, earumque cum virtutes, tum vitia, et usum demonstrat.

**S**aepe et multum hoc mecum cogitavi, bonine et mali plus attulerit hominibus et civitatibus copia dicendi, ac summum eloquentiae studium. nam cum et nostrae reipublicae detrimenta considero, et maximarum civitatum veteres animo calamitates

colligo, non minimam video per disertissimos homines invectam partem incommodorum. cum autem res ab nostra memoria, propter vetustatem, remotas, ex literarum monumentis repetere instituo; multas urbes constitutas, plurima bella restineta, firmissimas societas, sanctissimas amicitias intelligo cum animi ratione, tum facilius eloquentia comparatas. Ac me quidem diu cogitantem, ratio ipsa in hanc potissimum sententiam dicit, ut existimem, sapientiam sine eloquentia parum prodesse civitatibus, eloquentiam vero sine sapientia nimium obesse plerumque, prodesse nunquam. Quare si quis, omisis rectissimis atque honestissimis studiis rationis et officii, consumit omnem operam in exercitatione dicendi, is inutilis sibi, perniciosus patriae civis alitur; qui vero ita se armat eloquentia, ut non oppugnare commoda patriae, sed pro his propugnare possit, is mihi vir et suis, et publicis rationibus utilissimus, atque amicissimus civis fore videtur.

- 2 Ac si volumus huius rei, quae vocatur eloquentia, sive artis, sive studii, sive exercitationis cuiusdam, sive facultatis a natura profectae considerare principium; reperiemus id ex honestissimis causis natum, atque ab optimis rationibus profectum.
- 2 Nam fuit quoddam tempus, cum in agris homines passim bestiarum modo vagabantur, et sibi vietu fero vitam propagabant; nec ratione animi quidquam, sed pleraque viribus corporis administrabant. nondum divinae religionis, non humani officii ratio colebatur: nemo nuptias viderat legitimas:

non certos quisquam adspicerat liberos : non , ius  
aequabile quid utilitatis haberet , acceperat. Ita ,  
propter errorem atque inscientiam , caeca ac te-  
meraria dominatrix animi cupiditas , ad se explen-  
dam viribus corporis abutebatur , perniciosissimis  
satellitibus. Quo tempore quidam , magnus videli-  
cer vir et sapiens , cognovit , quae materia esset ,  
et quanta ad maximas res opportunitas in animis  
hominum , si quis eam posset elicere , et praeci-  
piendo meliorem reddere : qui dispersos homines  
in agris , et in tectis silvestribus abditos , ratione  
quadam compulit unum in locum et congregavit ,  
et eos in unamquamque rem inducens utilem atque  
honestam , primo propter insolentiam reclamantes ,  
deinde propter rationem atque orationem studiosius  
audientes , ex feris et immanibus , mites reddidit et  
mansuetos. Ac mihi quidem videtur hoc nec tacita ,  
nec inops dicendi sapientia perficere potuisse , ut  
homines a consuetudine subito converteret , et ad  
diversas vitae rationes traduceret. Age vero , ur-  
bibus constitutis , ut fidem colere , et iustitiam re-  
tinere discerent , et aliis parere sua voluntate con-  
suescerent , ac non modo labores excipiendo  
communis commodi causa , sed etiam vitam a-  
mittendam existimarent : qui tandem fieri potuit ,  
nisi homines ea , quae ratione invenissent , eloquen-  
tia persuadere potuissent ? Profecto nemo , nisi  
gravi ac suavi commotus oratione , cum viribus  
plurimum posset , ad ius voluisse sine vi descen-  
dere : ut , inter quos posset excellere , cum iis se  
pateretur aequari , et sua voluntate a iucundissima

consuetudine recederet , quae praesertim iam naturae vim obtineret propter vetustatem. Ac primo quidem sic et nata , et progressa longius eloquentia videtur ; et item postea maximis in rebus pacis et belli cum summis hominum utilitatibus esse versata. Postquam vero commoditas quaedam , prava virtutis imitatrix , sine ratione officii , dicendi copiam consecuta est ; tum ingenio freta malitia , perversere urbes , et vitas hominum labefactare assuevit.

3 Atque huius quoque exordium mali , quoniam principium boni diximus , explicemus.

4 Verisimillimum mihi videtur , quodam tempore neque in publicis rebus infantes et insipientes homines solitos esse versari , nec vero ad privatas causas magnos ac disertos homines accedere : sed cum a summis viris maximae res administrarentur , arbitror alios fuisse non incallidos homines , qui ad parvas controversias privatorum accederent. quibus in controversiis cum saepe a mendacio contra verum homines stare consuescerent , dicendi affiduitas aluit audaciam , ut necessario superiores illi propter iniurias civium resistere audacibus , et opitulari suis quisque necessariis cogerentur. Itaque cum in dicens saepe par , nonnunquam etiam superior visus esset is , qui , omisso studio sapientiae , nihil sibi praeter eloquentiam comparasset , fiebat , ut et multitudinis et suo iudicio dignus , qui rempublicam gereret , videretur. Hinc nimirum non iniuria , cum ad gubernacula reipublicae temerarii atque audaces homines accesserant , maxima ac miserrima naufragia fiebant. Quibus rebus tantum

odii atque invidiae suscepit eloquentia, ut homines ingeniosissimi, quasi ex aliqua turbida tempestate in portum, sic ex seditiosa et tumultuosa vita se in studium aliquod traderent quietum. Quare mihi videntur postea cetera studia recta atque honesta, per otium concelebrata ab optimis, enituisse: hoc vero a plerisque eorum desertum obsoleuisse eo tempore, quo multo vehementius erat retinendum, et studiosius adaugendum. Nam quo 5 indignius rem honestissimam et rectissimam violabat stultorum et improborum temeritas et audacia, summo cum reipublicae detimento; eo studiosius et illis resistendum fuit, et reipublicae consulendum. Quod nostrum illum non fugit Catonem, neque 4 Laelium, neque horum (vere dicam) discipulum Africanum, neque Gracchos Africani nepotes: quibus in hominibus erat summa virtus, et summa virtute amplificata auctoritas, et, quae his rebus ornamento, et reipublicae praefidio esset, eloquentia. Quare, meo quidem animo, nihilo minus eloquentiae studendum est, et si ea quidam et privatim, et publice perverse abutuntur: sed eo quidem vehementius, ne mali magno cum detimento bonorum, et communi omnium pernicie, plurimum possint: cum praesertim hoc unum sit, quod ad omnes res, et privatas et publicas, maxime pertineat; hoc tuta, hoc honesta, hoc illustris, hoc eodem vita iucunda fiat. Nam hinc ad rempublicam plurima commoda veniunt, si moderatrix omnium rerum praefecta est sapientia. hinc ad ipsos, qui eam adepti sunt,

laus, honos, dignitas confluit : hinc amicis quoque eorum certissimum ac tutissimum praesidium comparatur. Ac mihi quidem videntur homines, cum multis rebus humiliores et infirmiores sint, hac re maxime bestiis praestare, quod loqui possunt. Quare praeclarum mihi quiddam videtur adeptus is, qui, qua re homines bestiis praestent, ea in re hominibus ipsis antecellat. Hoc si forte non natura modo, neque exercitatione conficitur; verum etiam artificio quodam comparatur; non alienum est videre, quid dicant ii, qui quaedam eius rei praecepta nobis reliquerunt. Sed antequam de praceptoribus oratoriis dicamus, videtur dicendum de genere ipsius artis, de officio, de fine, de materia, de partibus. nam his rebus cognitis, facilius et expeditius uniuscuiusque animus ipsam rationem ac viam artis considerare poterit.

¶ Civilis quaedam ratio est, quae multis et magnis ex rebus constat. eius quaedam magna et ampla pars est artificiosa eloquentia, quam rhetoricam vocant. nam neque cum iis sentimus, qui civilem scientiam eloquentia non putant indigere; et ab iis, qui eam putant omnem rhetoris vi et artificio contineri, magnopere dissentimus. quare hanc oratoriam facultatem in eo genere ponemus, ut eam civilis scientiae partem esse dicamus. Officium autem eius facultatis videtur esse, dicere apposite ad persuasione: finis, persuadere dictione. inter officium autem et finem hoc interest, quod in officio, quid fieri; in fine, quid officio conveniat, consideratur: Ut medici officium dicimus esse, curare ad sanandum.

apposite; finem, sanare curatione: item oratoris quid officium, et quid finem esse dicamus, intelligemus, cum id, quod facere debet, officium esse dicemus: illud, cuius causa facere debet, finem appellabimus.

Materiam artis eam dicimus, in qua omnis ars, et ea facultas, quae conficitur ex arte, versatur: Ut si medicinae materiam dicamus morbos ac vulnera, quod in his omnis medicina versetur: item, quibus in rebus versatur ars, et facultas oratoria, eas res materiam artis rhetoricae nominamus. Has autem res, alii plures, alii pauciores existimaverunt. Nam Gorgias Leontinus, antiquissimus fere rhetor, omnibus de rebus oratorem optime posse dicere existimavit. Hic infinitam et immensam huic artificio materiam subiicere videtur. Aristoteles autem, qui huic arti plurima adiumenta atque ornamenta subministravit, tribus in generibus rerum versari rhetoris officium putavit, demonstrativo, deliberativo, iudicali. Demonstrativum est, quod tribuitur in alicuius certae personae laudem aut virtuperationem: deliberativum, quod positum in disceptatione, et consultatione civili, habet in se sententiae dictio[n]em: iudiciale, quod positum in iudicio, habet in se accusationem et defensionem, aut petitionem et recusationem. Et, quemadmodum nostra quidem fert opinio, oratoris ars et facultas in hac materia tripartita versari existimanda est. Nam Hermagoras quidem, nec quid dicat, attenedere, nec quid polliceatur, intelligere videtur; qui oratoris materiam in causam et in quaestionem dividat. Causam esse dicit rem, quae habeat in se

controversiam in dicendo positam cum personarum certarum interpositione ; quam nos quoque oratori dicimus esse attributam. nam tres ei partes , quas ante diximus , supponimus , iudiciale , deliberativam , demonstrativam. Quae<sup>7</sup> questionem autem eam appellat , quae habeat in se controversiam in dicendo positam , sine certarum personarum interpositione , ad hunc modum : Ecquid sit bonum praeter honestatem ? verine sint sensus ? quae sit mundi forma ? Quas quae<sup>9</sup> stiones procul ab oratoris officio remotas , facile omnes intelligere existimamus. Nam , quibus in rebus summa ingenia philosophorum plurimo cum labore consumta intelligimus , eas , sicut aliquas parvas res , oratori attribuere , magna amentia videtur. Quodsi magnam in his Hermagoras habuisset facultatem , studio et disciplina comparatam , videretur fretus sua scientia , falsum quiddam constituisse de oratoris officio , et non quid ars , sed quid ipse posset , exposuisse. nunc vero ea vis est in homine , ut ei multo rhetorica<sup>7</sup> citius quis ademerit , quam philosophiam concesserit. Neque eo dico , quod eius ars , quam edidit , mihi mendoſissime scripta videatur : nam satis in ea videtur ex antiquis artibus ingeniose et diligenter electas res collocasse , et nonnihil ipse quoque novi protulisse : verum oratori minimum est de arte loqui , quod hic fecit ; multo maximum ex arte dicere ; quod eum minime potuisse , omnes videmus. Quare materia quidem nobis rhetoricae videtur ea , quam Aristoteli visam esse diximus ; partes autem hae , quas plerique dixerunt , inven-

to , dispositio , elocutio , memoria , pronuntiatio . Inventio est excogitatio rerum verarum , aut verisimilium , quae causam probabilem reddant : dispositio est rerum inventarum in ordinem distributio : elocutio est idoneorum verborum , et sententiarum ad inventionem accommodatio : memoria est firma animi rerum ac verborum ad inventionem perceptio : pronuntiatio est , ex rerum et verborum dignitate , vocis et corporis moderatio . Nunc his rebus breviter constitutis , eas rationes , quibus ostendere possimus genus , et officium , et finem huius artis , aliud in tempus differemus . nam et multorum verborum indigent , et non tantopere ad artis descriptionem et praecepta tradenda pertinent . Eum autem , qui artem rhetoricae scribat , de duabus reliquis rebus , de materia artis , ac partibus scribere oportere existimamus . Ac mihi quidem videtur coniuncte agendum de materia ac partibus . Quare inventio , quae princeps est omnium partium , potissimum in omni causarum genere , qualis debeat esse , consideretur .

Omnis res , quae habet in se , positam in dictione 8 aut disceptatione , aliquam controversiam , aut facti , aut nominis , aut generis , aut actionis continet quaestionem . Eam igitur quaestionem , ex qua causa nascitur , constitutionem appellamus . Constitutio est prima conflictio causarum ex depulsione intentionis profecta , hoc modo : Fecisti : non feci , aut iure feci . Cum facti controversia est , quoniam coniecturis causa firmatur , constitutio coniecturalis appellatur . Cum autem nominis , quia

vis vocabuli definienda verbis est , constitutio definitiva nominatur. Cum vero , qualis sit res , quaeritur , quia et de vi , et de genere negotii controversia est , constitutio generalis vocatur. At cum causa ex eo pendet , quod non aut is agere videtur , quem oportet , aut non cum eo , quicum oportet , aut non apud quos , quo tempore , qua lege , quo crimine , qua poena oportet , translativa dicitur constitutio ; quia actio , translationis et commutationis indigere videtur. Atque harum aliquam in omne causae genus incidere necesse est . nam in quam rem non inciderit , in ea nihil esse poterit controversiae. quare eam ne causam quidem convenit putari.

- 11 Ac facti quidem controversia , in omnia tempora potest distribui. nam quid factum sit , potest quaeri , hoc modo : Occideritne Aiacem Ulysses. Et quid fiat , hoc modo : Bonone animo sint erga populum Romanum Fregellani. Et quid futurum sit , hoc modo : Si Carthaginem reliquerimus incolumem , num quid sit incommodi ad rempublicam perventurum. Nominis controversia est , cum de facto convenit , et quaeritur , id quod factum est , quo nomine appelletur. Quo in genere necesse est [ ideo nominis ] esse controversiam , [ non quod de re ipsa non conveniat ] non quod de facto non constet , sed quod id , quod factum sit , aliud alii videatur esse , et idcirco alias alio nomine id appellat. Quare in huiusmodi generibus definienda res erit verbis , et breviter describenda : ut , si quis sacrum ex privato surripuerit , utrum fur , an sacrilegus

sit iudicandus. nam id cum quaeritur , necesse erit definire utrumque , quid sit fur , quid sacrilegus , et sua descriptione ostendere , alio nomine illam rem , de qua agitur , appellari oportere , atque adversarii dicant.

Generis est controversia , cum et quid factum sit ,<sup>9</sup> convenit , et quo id factum nomine appellari oporteat , constat : et tamen , quantum , et cuiusmodi , et omnino quale sit , quaeritur , hoc modo : Iustum , an iniustum : utile , an inutile ; et omnia , in quibus , quale sit id , quod factum est , quaeritur , sine ulla nominis controversia. Huic generi Hermagoras partes quatuor supposuit , deliberativam , demonstrativam , iuridicalem , negotialem. quod eius , ut nos putamus , non mediocre peccatum , reprehendendum videtur ; verum brevi , ne aut , si taciti praeterierimus , sine causa non secuti eum putemur ; aut , si diutius in hoc constiterimus , moram atque impedimentum reliquis paeceptis intulisse videamur. Si deliberatio et demonstratio genera sunt causarum , non possunt recte partes alicuius generis causae putari. Eadem enim res alii genus esse , alii pars potest : eidem genus esse et pars non potest. Deliberatio autem , et demonstratio , genera sunt causarum. nam aut nullum causae genus est , aut iudiciale solum , aut et iudiciale , et demonstrativum , et deliberativum. Nullum dicere causae esse genus , cum causas esse multas dicat , et in eas paecepta det , amentia est : unum autem iudiciale solum esse qui potest , cum deliberatio et demonstratio , neque ipsae similes inter se sint , et ab judiciali

genere plurimum dissideant, et suum quaeque finem habeat, quo referri debeat? relinquitur ergo, ut omnia tria genera sint causarum. Deliberatio igitur, et demonstratio, non possunt recte partes alicuius generis causae putari. Male igitur eas generalis constitutionis partes esse dixit.

10 Quod si generis causae partes non possunt recte putari, multo minus recte partis causae partes putabuntur. Pars autem causae, constitutio est omnis. non enim causa ad constitutionem, sed constitutio ad causam accommodatur. Sed demonstratio et deliberatio, generis causae partes non possunt recte putari, quod ipsa sunt genera: multo igitur minus recte partis eius, quod hic dicit, partes putabuntur. Deinde si constitutio, et ipsa, et pars constitutionis eius quaelibet, intentionis depulsio est; quae intentionis depulsio non est, ea nec constitutio, nec pars constitutionis est. At si, quae intentionis depulsio non est, ea nec constitutio, nec pars constitutionis est; demonstratio et deliberatio, neque constitutio, nec pars constitutionis est. Si igitur constitutio, et ipsa, et pars eius, intentionis depulsio est; deliberatio et demonstratio, neque constitutio, neque pars constitutionis est. Placet autem ipsi, constitutionem intentionis esse depulsionem: placeat igitur oportet, demonstrationem et deliberationem non esse constitutionem, nec partem constitutionis. Atque hoc eadem urgetur, sive constitutionem, primam causae accusatoris confirmationem dixerit, sive defendantis primam depreciationem. nam eum eadem omnia incommoda sequentur.

Deinde coniecturalis causa non potest simul ex eadem parte, eodem in genere, et coniecturalis esse et definitiva. Rursus nec definitiva causa potest simul ex eadem parte, eodem in genere, et definitiva esse et translativa. Et omnino nulla constitutio, nec pars constitutionis, potest simul et suam habere, et alterius in se vim continere: ideo quod unaquaeque ex se, et ex sua natura, simpliciter consideratur: altera assumta, numerus constitutionum duplicatur, non vis constitutionis augetur. At deliberativa causa simul ex eadem parte, eodem in genere, et conjecturalem, et generalem, et definitivam et translativam solet habere constitutionem, et unam aliquando, et plures nonnunquam. ergo ipsa nec constitutio est, nec pars constitutionis. Idem in demonstratione solet usu evenire. Genera igitur, ut ante diximus, haec causarum putanda sunt, non partes alicuius constitutionis. Haec ergo constitutio, quam generalem nominamus, partes nobis videtur duas habere, iuridicalem, et negotialem. Iuridicalis est, in qua aequi et iniqui natura, praemii aut poenae ratio quaeritur: negotialis est, in qua, quid iuris ex civili more, et aequitate sit, consideratur: cui diligentiae praeesse apud nos iuris-consulti existimantur. Ac iuridicalis quidem ipsa in duas distribuitur partes, absolutam et assumtivam. Absoluta est, quae ipsa in se continet iuris et iniuriae quaestionem: assumtiva, quae ipsa ex se nihil firmi dat ad recusationem; foris autem aliquid defensionis assument. Eius partes sunt quatuor, concessio, remotio criminis, relatio criminis, comparatio. Concessio est,

cum reus non id , quod factum est , defendit , sed ut ignoscatur , postulat . Haec in duas partes dividitur , purgationem et deprecationem . Furgatio est , cum factum conceditur , culpa removetur . Haec partes habet tres , imprudentiam , casum , necessitatem . Deprecatio est , cum et peccasse et consulto peccasse reus se confitetur , et tamen , ut ignoscatur , postulat : quod genus perraro potest accidere . Remotio criminis est , cum id crimen , quod infertur , ab se et ab sua culpa , vi et potestate in alium reus removere conatur . id dupliciter fieri poterit , si aut causa , aut factum in alium transferetur . Causa transfertur , cum aliena dicitur vi et potestate factum : factum autem , cum aliis aut debuisse , aut potuisse facere dicitur . Relatio criminis est , cum ideo iure factum dicitur , quod aliquis ante iniuria lacessierit . Comparatio est , cum aliud aliquod alicuius factum rectum aut utile contenditur , quod ut fieret , illud , quod arguitur , dicitur esse commissum .

<sup>16</sup> In quarta constitutione , quam translativam nominamus , eius constitutionis est controversia , cum aut quem , aut quicum , aut quomodo , aut apud quos , aut quo iure , aut quo tempore agere oporteat , quaeritur , aut omnino aliquid de commutatione , aut confirmatione actionis agitur . Huius constitutionis Hermagoras inventor esse existimatur , non quo non usi sint ea veteres oratores saepe multi , sed quia non animadverterint artis scriptores eam superiores , nec retulerint in numerum constitutionum . Post autem ab hoc inventam multi reprehenderunt , quos non tam imprudentia falli pu-

tamus, (res enim perspicua est,) quam invidia  
atque obtrectatione quadam impediri. Et constitutio- 12  
nes quidem, et earum partes exposuimus: exem-  
pla autem cuiusque generis tunc commodius expo-  
sitiuri videmur, cum in unumquodque eorum argu-  
mentorum copiam dabimus. nam argumentandi ratio  
dilucidior erit, cum et ad genus, et ad exemplum  
causae statim poterit accommodari.

Constitutione causae reperta, statim placet con- 17  
siderare, utrum causa sit simplex, an iuncta; et si  
iuncta erit, utrum sit ex pluribus quaestionibus  
iuncta, an ex aliqua comparatione. Simplex est,  
quae absolutam in se continet unam quaestionem,  
hoc modo: Corinthiis bellum indicamus, an non?  
Coniuncta ex pluribus quaestionibus, in qua plura  
quaeruntur, hoc pacto: Utrum Carthago diruatur,  
an Carthaginiensibus reddatur, an eo colonia dedu-  
catur. Ex comparatione, in qua per contentionem,  
utrum potius, aut quid potissimum sit, quaeritur,  
ad hunc modum: Utrum exercitus in Macedoniam  
contra Philippum mittatur, qui sociis sit auxilio,  
an teneatur in Italia, ut quam maximae contra Han-  
nibalem copiae sint. Deinde considerandum est,  
in ratione, an in scripto sit controversia. nam scripti  
controversia est ea, quae ex scriptionis genere nasci-  
tur. Eius autem genera, quae sunt separata a con- 13  
stitutionibus, quinque sunt. nam cum verba ipsa vi-  
dentur cum sententia scriptoris dissidere, tum inter  
se duae leges, aut plures discrepare, tum id, quod  
scriptum est, duas aut plures res significare: tum ex  
eo, quod scriptum est, aliud quoque, quod non

scriptum est , inveniri : tum vis verbi , quasi in definitiva constitutione , in quo posita sit , quaeri . Quare primum genus , de scripto et sententia ; secundum , ex contrariis legibus ; tertium , ambiguum ; quartum , ratiocinativum ; quintum , definitivum nominamus .

18 Ratio autem est , cum omnis quaestio non in scriptione , sed in aliqua argumentatione consistit .

At tum , considerato genere causae , et cognita constitutione , cum , simplexne an coniuncta sit , intellecteris , et , scripti an rationis habeat controversiam , videris ; deinceps erit videndum , quae quaestio , quae ratio , quae iudicatio , quod firmamentum causae sit : quae omnia a constitutione proficiuntur oportet . Quaestio est ea , quae ex confictione causarum gignitur controversia , hoc modo : Non iure fecisti : iure feci . Causarum autem haec est conflictio , in qua constitutio constat . ex ea igitur nascitur controversia , quam quaestionem dicimus , hoc modo : Iurene fecerit ? Ratio est , quae continet causam , quae si sublata sit , nihil in causa controversiae relinquetur , hoc modo , ut docendi causa in facili et pervulgato exemplo consistamus : Orestes si accusetur matricidii , nisi hoc dicat , Iure feci ; illa enim patrem meum occiderat : non habet defensionem . qua sublata , omnis quoque controversia sublata sit . Ergo eius causae ratio est , quod illa Agamemnonem occiderit . Iudicatio est , quae ex infirmatione , et confirmatione rationis nascitur controversia . nam sit ea nobis exposita ratio , quam paulo ante exposuimus . Illa enim , inquit , patrem meum occiderat . At non , inquit adversa-

rius, abs te filio matrem necari oportuit. potuit enim sine tuo scelere illius factum puniri. Ex 14 hac deductione rationis, illa summa nascitur controversia, quam iudicationem appellamus. ea est huiusmodi: Rectumne fuerit, ab Oreste matrem occidi, cum illa Orestis patrem occidisset. Firmamentum est firmissima argumentatio defensoris, et appositissima ad iudicationem: ut si vellet Orestes dicere, eiusmodi animum matris suae fuisse in patrem suum, in se ipsum ac sorores, in regnum, in famam generis et familiae, ut ab ea poenas liberi sui potissimum petere debuerint. Et in ceteris quidem constitutionibus ad hunc modum iudicationes reperiuntur: in coniecturali autem constitutione, quia ratio non est, (factum enim non conceditur,) non potest ex deductione rationis nasci iudicatio. Quare necesse est eandem esse quaestionem et iudicationem: ut, factum est, non est factum; factumne sit? Quot autem in causa constitutiones, aut earum partes erunt, totidem necesse erit quaestiones, rationes, iudicationes, firmamenta reperiri.

His omnibus in causa repertis, tum denique singulae partes totius causae considerandae sunt. nam non ut quidque dicendum primum, ita primum animadvertisendum videtur: ideo quod illa, quae prima dicuntur, si vehementer velis congruere, et cohaerere cum causa, ex eis ducas oportet, quae post dicenda sunt. Quare cum iudicatio, et ea, quae ad iudicationem oportet inveniri argumenta, diligenter erunt artificio reperta, cura et cogitatio-

ne pertractata ; tum denique ordinandae sunt ceterae partes orationis. Hae partes sex esse omnino nobis videntur ; exordium , narratio , partitio , confirmatio , reprehensio , conclusio. Nunc quoniam exordium princeps omnium esse debet , nos quoque primum in rationem exordiendi praecepta dabimus.

15 Exordium est oratio animum auditoris idonee  
20 comparans ad reliquam dictionem : quod eveniet ,  
si eum benevolum , attentum , docilem fecerit.  
quare qui bene exordiri causam volet , eum necesse  
est genus suae causae diligenter ante cognoscere.  
Genera causarum sunt quinque , honestum , admirabile , humile , anceps , obscurum. Honestum cau-  
sae genus est , cui statim sine oratione nostra au-  
ditoris favet animus : admirabile , a quo alienatus  
est animus eorum , qui audituri sunt : humile , quod  
negligitur ab auditore , et non magnopere atten-  
dendum videtur : anceps , in quo aut iudicatio du-  
bia est ; aut causa , et honestatis , et turpitudinis  
particeps , ut et benevolentiam pariat , et offendio-  
nem : obscurum , in quo aut tardi auditores sunt ,  
aut difficilioribus ad cognoscendum negotiis causa  
implicata est. Quare quoniam tam diversa sunt ge-  
nera causarum , exordiri quoque dispari ratione in  
unoquoque genere necesse est. Igitur exordium in  
duas partes dividitur , in principium et insinua-  
tionem. Principium est oratio , perspicue et protinus  
perficiens auditorem benevolum , aut docilem , aut  
attentum. Insinuatio est oratio quadam dissimulatione  
et circuitione obscure subiens auditoris animum.

21 In admirabili genere causae , si non omnino in-

festi auditores erunt , principio benevolentiam comparare licebit. si erunt vehementer ab alienati , confugere necesse erit ad insinuationem. nam ab iratis si perspicue pax et benevolentia petitur ; non modo ea non invenitur , sed augetur atque inflammatur odium. In humili autem genere causae , contumelionis tollendae causa , necesse erit attentum efficere auditorem. Anceps genus causae , si dubiam iudicationem habebit , ab ipsa iudicatione exordendum est. si autem partem turpitudinis et partem honestatis habebit , benevolentiam captare oportet , ut in genus honestum causa translata videatur. Cum autem erit honestum causae genus , vel præteriri principium poterit , vel , si commodum fuerit , aut a narratione incipiemus , aut a lege , aut ab aliqua firmissima ratione nostrae dictio : si uti principio placebit , benevolentiae partibus utendum est , ut id , quod est , augeatur. In obscuro causae genere , per principium dociles auditores efficere oportebit. Nunc , quoniam , quas res exordio 16 confidere oporteat , dictum est ; reliquum est , ut ostendatur , quibus quaeque res rationibus confici possit.

Benevolentia quatuor ex locis comparatur : ab 22 nostra , ab adversariorum , ab iudicium persona , ab ipsa causa. Ab nostra , si de nostris factis et officiis sine arrogantia dicemus : si crimina illata , et aliquas minus honestas suspiciones iniectas diluemus : si , quae incommoda acciderint , aut quae instent difficultates , proferemus : si prece , et obsecratione humili , ac supplici utemur. Ab aduersa-

riorum autem , si eos aut in odium , aut in invidiam , aut in contemtionem adducemus. In odium adducentur , si quod eorum spurce , superbe , crudeliter , malitiose factum proferetur : in invidiam , si vis eorum , potentia , divitiae , cognatio , pecuniae proferentur , atque eorum usus arrogans et intolerabilis ; ut his rebus magis videantur , quam causae suae confidere : in contemtionem adducentur , si eorum inertia , negligentia , ignavia , desidiosum studium , et luxuriosum otium proferetur. Ab auditorum persona benevolentia captabitur , si res ab his fortiter , sapienter , mansuete gestae proferentur , ut ne qua assentatio nimia significetur : et si de his , quam honesta existimatio , quantaque eorum iudicii et auctoritatis exspectatio sit , ostendetur : ab ipsis rebus , si nostram causam laudando extollemus , adversariorum causam per contemtionem <sup>23</sup> nem deprimemus. Attentos autem faciemus , si demonstrabimus , ea , quae dicturi erimus , magna , nova , incredibilia esse , aut ad omnes , aut ad eos , qui audiunt , aut ad aliquos illustres homines , aut ad deos immortales , aut ad summam rempublicam pertinere ; et si pollicebimur , nos brevi nostram causam demonstraturos , atque exponemus iudicationem , aut iudicationes , si plures erunt. Dociles auditores faciemus , si aperte et breviter summam causae exponemus ; hoc est , in quo consistat controversia . nam et cum docilem velis facere , simul attentum facias oportet. nam is maxime docilis est , qui attentissime est paratus audire.

17 Nunc insinuationes quemadmodum tractari con-

veniat, deinceps dicendum videtur. Insinuatione igitur utendum est, cum admirabile genus causae est, hoc est, ut ante diximus, cum animus auditoris infestus est. Id autem tribus ex causis fit maxime; si aut inest in ipsa causa quaedam turpitudo, aut si ab iis, qui ante dixerunt, iam quiddam auditori persuasum videtur, aut eo tempore locus dicendi datur, cum iam illi, quos audire oportet, defessi sunt audiendo. nam ex hac quoque re non minus, quam ex primis duabus, in oratore non-nunquam animus auditoris offenditur. Si causae <sup>24</sup> turpitudo contrahet offensionem; aut pro eo homine, in quo offenditur, alium hominem, qui diligitur, interponi oportet: aut pro re, in qua offenditur, aliam rem, quae probatur: aut pro re hominem, aut pro homine rem, ut ab eo, quod odit, ad id, quod diligit, auditoris animus traducatur, et dissimulare id te defensurum, quod existimeris defensurus: deinde, cum iam mitior factus erit auditor, ingredi pedetentim in defensionem, et dicere, ea, quae indignentur adversarii, tibi quoque indigna videri; deinde, (cum lenieris eum, qui audiet,) demonstrare, nihil eorum ad te pertinere, et negare te quidquam de adversariis esse dicturum, neque hoc, neque illud: ut neque aper-te laedas eos, qui diliguntur, et tamen id obscure faciens, quoad possis, alienes ab eis auditorum voluntatem: et aliquorum iudicium simili de re, aut auctoritatem proferre imitatione dignam: deinde aut eandem, aut consimilem, aut maiorem, aut minorem agi rem in praesentia demonstrare. Sin oratio <sup>25</sup>

adversariorum fidem videbitur auditoribus fecisse ; id quod ei , qui intelligit , quibus rebus fides fiat , facile erit cognitu ; oportet aut de eo , quod adversarii sibi firmissimum putarint , et maxime ii , qui audierint , probarint , primum te dicturum polliceri , aut ab adversarii dicto exordiri , et ab eo potissimum , quod ille nuperrime dixerit : aut dubitatione uti , quid primum dicas , aut cui potissimum loco respondeas , cum admiratione . Nam auditor cum eum , quem adversarii perturbatum putant oratione , videt animo firmissimo contra dicere paratum , plerumque se potius temere assensisse , quam illum sine causa confidere arbitratur . Sin auditoris studium defatigatio abalienavit a causa , te brevius , quam paratus fueris , esse dicturum , commodum est polliceri ; non imitaturum adversarium . Sin res dabit , non inutile est , ab aliqua re nova aut ridicula incipere , aut ex tempore quae nata sit ; quod genus , strepitum , acclamationem : aut iam parata , quae vel apogum , vel fabulam , vel aliquam contineat irrisiōnēm : aut , si rei dignitas adimet iocandi facultatem , aliquid triste , novum , horribile , statim non incommodum est iniicere . nam ut cibi satietas et fastidium aut subamara aliqua re relevatur , aut dulci mitigatur ; sic animus defessus audiendo , aut admiratione integratur , aut risu novatur .

18 Ac separatim quidem , quae de principio et insinuatione dicenda videbantur , haec fere sunt . Nunc quiddam breviter & communiter de utroque praeciendū videtur . Exordium sententiarum et

gravitatis plurimum debet habere , et omnino omnia , quae pertinent ad dignitatem , in se continere , propterea quod id optime faciendum est , quod oratorem auditori maxime commendet : splendoris , et festivitatis , et concinnitudinis minimum , propterea quod ex his suspicio quaedam apparationis atque artificiosae diligentiae nascitur : quae maxime orationi fidem , oratori adimit auctoritatem . Vitia vero haec sunt certissima exordiorum , 26 quae summopere vitare oportebit ; vulgare , commune , commutabile , longum , separatum , translatum , contra praecepta . Vulgare est , quod in plures causas potest accommodari , ut convenire videatur : commune , quod nihilo minus in hanc , quam in contrariam partem causae , potest convenire : commutabile , quod ab adversario potest , leviter mutatum , ex contraria parte dici : longum , quod pluribus verbis , aut sententiis , ultra quam satis est , producitur : separatum , quod non ex ipsa causa ductum est , nec , sicut aliquod membrum , annexum orationi : translatum est , quod aliud conficit , quam causae genus postulat : ut si quis docilem faciat auditorem , cum benevolentiam causa desiderat : aut si principio utatur , cum insinuationem res postulat . Contra praecepta est , quod nihil eorum efficit , quorum causa de exordiis praecepta traduntur : hoc est , quod eum , qui audit , neque benevolum , neque attentum , neque docilem efficit : aut , quo profecto nihil peius est , ut contra sit , facit . Ac de exordio quidem satis dictum est .

Narratio est rerum gestarum , aut ut gestarum , ex- 19

<sup>27</sup> positio. Narrationum tria sunt genera. unum genus est, in quo ipsa causa, et omnis ratio controversiae continetur : alterum , in quo digressio aliqua extra causam aut criminacionis , aut similitudinis , aut delectacionis non alienae ab eo negotio , quo de agitur , aut amplificationis causa , interponitur. Tertium genus est remotum a civilibus causis , quod delectacionis causa , non inutili cum exercitatione , dicitur et scribitur. Eius partes sunt duae , quarum altera in negotiis , altera in personis maxime versatur. Ea , quae in negotiorum expositione posita est , tres habet partes , fabulam , historiam , argumentum. Fabula est , in qua nec verae , nec verisimiles res continentur ; cuiusmodi est :

*Angues ingentes alites , iuncti iugo.*

Historia est gesta res , ab aetatis nostrae memoria remota : quod genus , Appius indixit Carthaginensibus bellum. Argumentum est ficta res , quae tamen fieri potuit. Huiusmodi apud Terentium :

*Nam is postquam exceſſit ex ephebis , Sofia.*

Illa autem narratio , quae versatur in personis , eiusmodi est , ut in ea simul cum rebus ipsis personarum sermones et animi perspici possint , hoc modo :

*Venit ad me saepe clamitans : Quid agis , Micio ?*

*Cur perdis adolescentem nobis ? cur amat ?*

*Cur potat ? cur tu his rebus sumtum suggeris ?*

*Vestitu nimio indulges , nimium ineptus es.*

*Nimium ipse durus est praeter aequumque & bonum.*

Hoc in genere narrationis multa inesse debet festivitas , confecta ex rerum varietate , animorum

dissimilitudine , gravitate , lenitate , spe , metu , suspicione , desiderio , dissimulatione , errore , misericordia , fortunae commutatione , insperato incommodo , subita laetitia , iucundo exitu rerum . Verum haec ex his , quae postea de elocutione praecipientur , ornamenta sumentur .

Nunc de narratione ea , quae causae continet <sup>28</sup> expositionem , dicendum videtur . Oportet igitur eam tres habere res : ut brevis , ~~ut~~ aperta , ut probabilis sit . Brevis erit , si , unde necesse est , inde initium sumetur , et non ab ultimo repetetur , et si cuius rei satis erit summam dixisse , eius partes non dicentur . nam saepe satis est , quid factum sit , dicere ; non ut enarres , quemadmodum sit factum : et si non longius , quam quod scitu opus est , in narrando procedetur : et si nullam in rem aliam transibitur : et si ita dicetur , ut nonnunquam ex eo , quod dictum sit , id , quod dictum non sit , intelligatur : et si non modo id , quod obest , verum etiam id , quod nec obest , nec adiuvat , praeteribitur : et si semel unumquodque dicetur : et si non ab eo , in quo proxime desitum erit , deinceps incipietur . Ac multos imitatio decipit brevitatis , ut , cum se breves putent esse , longissimi sint : cum dent operam , ut res multas breviter dicant , non ut omnino paucas res dicant , et non plures , quam necesse sit . Nam plerisque breviter dicere videtur , qui ita dicit : Accessi ad aedes , puerum evocavi : respondit : quae fui dominum : domi negavit esse . Hic , tametsi tot res brevius non potuit dicere , tamen , quia satis fuit dixisse , domi negavit esse , fit rerum multitu-

dine longus. Quare hoc quoque in genere vitanda  
est brevitatis imitatio , et non minus rerum non  
necessariarum , quam verborum multitudine super-  
29 sedendum est. Aperta autem narratio poterit esse ,  
si , ut quidque primum gestum erit , ita primum  
exponetur , et rerum ac temporum ordo servabi-  
tur , ut ita narrentur , ut gestae res erunt , aut ut  
potuisse geri videbuntur. Hic considerandum erit ,  
ne quid perturbate , ne quid contorte dicatur , ne  
quam in aliam rem transeatur , ne ab ultimo repe-  
tatur , ne ad extremum prodeatur , ne quid , quod  
ad rem pertineat , praetereatur : et omnino , quae  
praecepta de brevitate sunt , hoc quoque in gene-  
re sunt conservanda. nam saepe res parum est in-  
tellecta longitudine *magis* , quam obscuritate narra-  
tionis. Ac verbis quoque dilucidis utendum est :  
quo de genere dicendum est in praeceptis elocuti-  
21 onis. Probabilis erit narratio , si in ea videbuntur  
inesse ea , quae solent apparere in veritate ; si per-  
sonarum dignitates servabuntur ; si causae factorum  
existabunt ; si fuisse facultates faciundi videbuntur ;  
si tempus idoneum ; si spatii satis ; si locus oppor-  
tunus ad eandem rem , qua de re narrabitur , fu-  
isse ostendetur ; si res et ad eorum , qui agent , na-  
turam , et ad vulgi morem , et ad eorum , qui au-  
dient , opinionem accommodabitur. Ac veri quidem  
30 similis ex his rationibus esse poterit. Illud autem  
praeterea considerare oportebit , ne aut , cum ob-  
fit narratio , aut cum nihil profit , tamen interpo-  
natur ; aut non loco , aut non , quemadmodum  
causa postulat , narretur. Obest tum , cum ipsius

rei gestae expositio magnam excipit offensionem , quam argumentando , et causam agendo leniri oportebit. Quod cum acciderit , membratim oportebit partes rei gestae dispergere in causam , et ad unamquamque confestim rationem accommodare , ut vulneri praesto medicamentum sit , et odium statim defensio mitiget. Nihil prodest narratio tunc , cum aut ab adversariis re exposita , nostra nihil interest , iterum aut alio modo narrare : aut cum ab iis , qui audiunt , ita tenetur negotium , ut nostra nihil intersit eos alio pacto docere. Quod cum acciderit , omnino narratione supercedendum est. Non loco dicitur , cum non in ea parte orationis collocatur , in qua res postulat : quo de genere agemus tum , cum de dispositione dicemus. nam hoc ad dispositionem pertinet. Non quemadmodum causa postulat , narratur , cum aut id , quod adversario prodest , dilucide et ornate exponitur , aut id quod ipsum adiuvat , obscure dicitur , et negligenter. Quare , ut hoc vitium vitetur , omnia torquenda sunt ad commodum suaee causae , contraria , quae praeteriri poterunt , praetereundo ; quae illius erunt , leviter attingendo , sua diligenter et enodate narrando. Ac de narratione quidem satis dictum videtur : deinceps ad partitionem transeamus.

Recte habita in causa partitio , illustrem et per- 22 spicuam totam efficit orationem. Eius partes duae 31 sunt , quarum utraque magnopere ad aperiendam causam , et ad constituendam pertinet controversiam. Una pars est , quae , quid cum adversariis conveniat , et quid in controversia relinquatur , ostend-

dit : ex qua certum quiddam designatur auditori , in quo animum debeat habere occupatum. Altera est , in qua rerum earum , de quibus erimus dicturi , breviter expositio ponitur distributa : ex qua conficitur , ut certas animo res teneat auditor , quibus dictis intelligat fore peroratum. Nunc utroque genere partitionis quemadmodum conveniat uti , breviter dicendum videtur. Quae partitio , quid conveniat , aut quid non conveniat , ostendit ; haec debet illud , quod convenit , inclinare ad suae causae commodum , hoc modo : Interfectam matrem esse a filio , convenit mihi cum adversariis. Item contra : Interfectum esse a Clytaemnestra Agamemnonem , convenit. nam hic uterque et id posuit , quod conveniebat , et tamen suae causae commodo consuluit. Deinde , quid controversiae sit , ponendum est in iudicationis expositione : quae quemadmodum inveniretur , ante dictum est. Quae autem partitio rerum distributam continet expositionem , haec habere debet brevitatem , absolutionem , paucitatem. Brevitas est , cum , nisi necessarium , nullum assumitur verbum. Haec in hoc genere idcirco utilis est , quod rebus ipsis , et partibus causae , non verbis , neque extraneis ornamentiis animus auditoris tenendus est. Absolutio est , per quam omnia , quae incident in causam , genera , de quibus dicendum est , amplectimur. in qua partitione videndum est , ne aut aliquod genus utile relinquatur , aut fero extra partitionem , id quod vitiosissimum ac turpissimum est , inferatur. Paucitas in partitione servatur , si genera ipsa rerum ponuntur , neque permixte cum

partibus implicantur. Nam genus est, quod plures partes amplectitur, ut animal. Pars est, quae subest generi, ut equus. Sed saepe eadem res alii genus, alii pars est. Nam homo, animalis pars est; Thebani aut Troiani, genus. Haec ideo diligentius in- 23 ducitur praescriptio, ut aperte intellecta generali partitione, paucitas generum in partitione servari possit. Nam qui ita partitur, Ostendam, propter cupiditatem, et audaciam, et avaritiam adversariorum, omnia incommoda ad rempublicam pervenisse; is non intellexit, in partitione, exposito genere, partem se generis admisuisse. Nam genus est, omnium nimirum libidinum, cupiditas: eius autem generis sine dubio pars est avaritia.

Hoc igitur vitandum est, ne, cuius genus posueris, eius, sicuti diversam aliquam ac dissimilem, partem ponas in eadem partitione. Quod si quod in genus plures incident partes, id cum in prima partitione causae erit simpliciter expositum, distribuetur eo tempore commodissime, cum ad ipsum ventum erit, explicandum in causae dictione post partitionem. Atque illud quoque pertinet ad paucitatem, ne aut plura, quam satis est, demonstratos nos dicamus, hoc modo: Ostendam, adversarios, quod arguimus, et potuisse facere, et voluisse, et fecisse: nam fecisse ostendere satis est: aut, cum in causa partitio nulla sit, et cum simplex quiddam agatur, tamen utamur distributione: id quod perraro potest accidere. Ac sunt alia quoque praecepta partitionum, quae ad hunc usum oratorium non tantopere pertineant; quae ver-

santur in philosophia , ex quibus haec ipsa transstulimus , quae convenire videbantur , quorum nihil in ceteris artibus inveniebamus. Atque his de partitione praecepsis , in omni dictione meminisse oportebit , ut et prima quaeque pars , ut exposita est in partitione , sic ordine transfigatur : et omnibus explicatis , peroratum sit , hoc modo , ut ne quid posterius praeter conclusionem inferatur. Partitur apud Terentium breviter et commode senex in Andria , quae cognoscere libertum velit :

*Eo pacto , & gnati vitam , & consilium meum  
Cognosces , & quid facere in hac re te velim.*

Itaque quemadmodum in partitione proposuit , ita narrat , primum gnati vitam :

*Nam is postquam excessit ex ephebis , Sosia ,  
Liberius vivendi fuit potestas.*

Deinde suum consilium :

*Et nunc id operam do.*

Deinde quid Sosiam velit facere , id quod postremum posuit in partitione , postremum dicit :

*Nunc tuum est officium.*

Quemadmodum igitur hic et ad primam quamque partem primum accessit , et omnibus absolutis , finem dicendi fecit , sic nobis placet , et ad singulas partes accedere , et omnibus absolutis , perorare. Nunc de confirmatione deinceps , ita ut ordo ipse postulat , praecipiendum videtur.

24 Confirmatio est , per quam argumentando , no-  
strae causae fidem , et auctoritatem , et firmamen-  
tum adiungit oratio. Huius partis certa sunt praec-

repta , quae in singula causarum genera dividentur. Verumtamen non incommodum videtur , quandam silvam atque materiam universam ante permistam et confusam exponere omnium argumentationum : post autem tradere , quemadmodum unumquodque genus causae , omnibus hinc argumentandi rationibus tractis , confirmare oporteat.

Omnis res argumentando confirmantur , aut ex eo , quod personis , aut ex eo , quod negotiis est attributum. Ac personis has res attributas putamus , nomen , naturam , vietum , fortunam , habitum , affectionem , studia , consilia , facta , casus , orationes. Nomen est , quod unicuique personae attribuitur , quo suo quaeque proprio et certo vocabulo appellatur. Naturam ipsam definire difficile est : partes autem eius enumerare eas , quarum indigemus ad hanc praceptionem , facilius est. Hae autem partim divino , partim mortali in genere versantur. Mortalium autem pars in hominum , pars in bestiarum genere numeratur. Atque hominum genus et in sexu consideratur , virile an muliebre sit ; et in natione , patria , cognatione , aetate. Natione , Graius an Barbarus ; patria , Atheniensis an Lacedaemonius ; cognatione , quibus maioribus , quibus consanguineis ; aetate , puer an adolescens , natu grandior an senex. Praeterea commoda et incommoda considerantur ab natura data animo aut corpori , hoc modo : valens an imbecillus ; longus an brevis ; formosus an deformis ; velox an tardus sit ; acutus an hebetior ; memor an oblivious : comis , officiosus , pudens , patiens , an contra. Et omnino , quae a natura data

animo et corpori , in natura consideranda sunt. nam  
quae industria comparantur , ad habitum pertinent ,  
25 de quo posterius dicendum est. In vietu considerare  
oportet , apud quos , et quo more , et cuius arbitratu  
sit educatus , quos habuerit artium liberalium magi  
stros , quos vivendi praeceptores , quibus amicis uta  
tur , quo in negotio , quaestu , artificio sit occupa  
tus : quo modo rem familiarem administret , qua  
consuetudine domestica sit. In fortuna quaeritur ,  
servus sit , an liber : pecuniosus , an tenuis : priva  
tus , an cum potestate : si cum potestate , iure an in  
iuria : felix , clarus , an contra : quales liberos habeat.  
Ac si de non vivo quaeretur , etiam quali morte sit af  
fectus , erit considerandum. Habitum autem appella  
mus , animi aut corporis constantem et absolutam  
aliqua in re perfectionem ; ut virtutis , aut artis per  
ceptionem alicuius , aut quamvis scientiam. et item  
corporis aliquam commoditatem , non natura da  
tam , sed studio industriaque partam. Affectio est ,  
animi aut corporis ex tempore , aliqua de causa , com  
mutatio , ut laetitia , cupiditas , metus , molestia ,  
morbus , debilitas , et alia , quae genere in eodem re  
periuntur. Studium est animi assidua et vehemens ad  
aliquam rem applicata magna cum voluntate occu  
patio , ut philosophiae , poeticae , geometriæ , lite  
rarum. Consilium est aliquid faciendi , aut non fa  
ciendi ( vere ) excogitata ratio. Facta autem , et ca  
sus , et orationes tribus ex temporibus considerabun  
tur; quid fecerit , aut quid ipsi acciderit , aut quid dixe  
rit ; aut quid faciat , quid ipsi accidat , quid dicat ; aut  
quid facturus sit , quid ipsi casurum sit , qua sit usurus

oratione. Ac personis quidem haec videntur esse attributa.

Negotiis autem quae sunt attributa, partim sunt 26 continentia cum ipso negotio, partim in gestione 37 negotii considerantur, partim adiuncta negotio sunt, partim gestum negotium consequuntur. Continentia cum ipso negotio sunt ea, quae semper affixa esse videntur ad rem, neque ab ea possunt separari. Ex his prima est brevis complexio totius negotii, quae summam continet facti, hoc modo: Parentis occisio, patriae proditio. deinde causa eius summae, per quam, et quamobrem, et cuius rei causa factum sit, quaeritur: deinde ante rem gestam quae facta sunt, continenter usque ad ipsum negotium: deinde, in ipso gerendo negotio quid actum sit: deinde, quid postea factum sit.

In gestione autem negotii, qui locus secundus erat 38 de iis, quae negotiis attributa sunt, quaeritur locus, tempus, occasio, modus, facultates. Locus consideratur, in quo res gesta sit, ex opportunitate, quam videatur habuisse ad negotium administrandum. Ea autem opportunitas quaeritur ex magnitudine, intervallo, longinquitate, propinquitate, solitudine, celebritate, natura ipsius loci, et vicinitate totius regionis. Ex his etiam attributionibus: facer an profanus, publicus an privatus, alienus an ipsius, de quo agitur, locus sit an fuerit. Tempus 39 est, id quo nunc utimur, (nam ipsum quidem generaliter definire difficile est,) pars quaedam aeternitatis, cum alicuius annui, menstrui, diurni, nocturne spatii certa significatione. In hoc et quae pree-

terierint , considerantur ; et eorum ipsorum , quae propter vetustatem obsoleverint , ut incredibilia videantur , et iam in fabularum numerum reponantur ; et quae iam diu gesta , et a memoria nostra remota , tamen faciant fidem , vere tradita esse , quod eorum monumenta certa in literis existent ; et quae nuper gesta sint , quae scire plerique possint ; et item quae instant in praesentia , et quae maxime fiant , et quae consequantur . In quibus potest considerari , quid oc-  
cius , et quid serius futurum sit . Et item communi-  
ter in tempore perspiciendo longinquitas eius est  
consideranda . nam saepe oportet commetiri cum  
tempore negotium , et videre , potueritne aut mag-  
nitudo negotii , aut multitudo rerum in eo transigi  
tempore . Consideratur autem tempus et anni , et  
mensis , et diei , et noctis , et vigiliae , et horae , et in  
27 aliqua parte alicuius horum . Occasio est pars tempo-  
ris , habens in se alicuius rei idoneam faciendi , aut  
non faciendi opportunitatem . quare cum tempore  
hoc differt . nam genere quidem utrumque idem esse  
intelligitur : verum in tempore spatium quodammodo  
declaratur , quod in annis , aut in anno , aut in  
aliqua anni parte spectatur : in occasione , ad spatium  
temporis , faciendi quaedam opportunitas intelligi-  
tur adiuncta . quare cum genere idem sit , fit aliud ,  
quod parte quadam , et specie , ut diximus , differat .  
Haec distribuitur in tria genera , publicum , commu-  
ne , singulare . Publicum est , quod civitas universa  
aliqua de causa frequentat , ut ludi , dies festus , bel-  
lum . Commune , quod accidit omnibus eodem fere  
tempore , ut messis , vindemia , calor , frigus . Singu-

Iare autem est , quod aliqua de causa priyatim solet alicui accidere , ut nuptiae , sacrificium , funus , convivium , somnus . Modus est , in quo , quemadmo- 41 dum , et quo animo factum sit , quaeritur . Eius partes sunt , prudentia et imprudentia . Prudentiae ratio quaeritur ex iis , quae clam , palam , vi , persuasione fecerit : imprudentia autem in purgationem conferatur , cuius partes sunt inscientia , casus , necessitas ; et in affectionem animi , hoc est , molestiam , iracundiam , amorem , et cetera , quae in simili genere versantur . Facultates sunt , aut quibus facilius fit , aut sine quibus aliquid confici non potest .

Adiunctum autem negotio id intelligitur , quod maius , et quod minus , et quod simile erit ei negotio , quo de agitur , et quod aequum magnum , et quod contrarium , et quod disparatum , et genus , et pars , et eventus . Maius et minus , et aequum magnum , ex 42 vi , et ex numero , et ex figura negotii , sicut ex statuta corporis , consideratur . Simile autem ex specie comparabili , aut ex conferenda atque assimilanda natura iudicatur . Contrarium est , quod positum in genere diverso , ab eodem , cui contrarium esse dicitur , plurimum distat , ut frigus calori , vitae mors . Disparatum autem est id , quod ab aliqua re per oppositionem negationis separatur , hoc modo : sapere et non sapere . Genus est , quod partes alias amplectitur , ut cupiditas . Pars est , quae subest generi , ut amor , avaritia . Eventus est alicuius exitus negotii , in quo quaeri solet , quid ex quaue re evenierit , eveniat , eventurum sit . Quare hoc in genere , ut commodius , quid eventurum sit , ante

animo colligi possit , quid quaque ex re soleat evenire , considerandum est , hoc modo : Ex arrogantia odium , ex insolentia arrogantia.

43 Quarta autem pars est ex iis , quas negotiis dicebamus esse attributas , consecutio . In hac eae res quaeruntur , quae gestum negotium consequuntur : primum , quod factum est , quo id nomine appellari conveniat : deinde , eius facti qui sint principes et inventores , qui denique auctoritatis eius et inventio- nis comprobatores atque aemuli : deinde , ecquae ea de re , aut eius rei sit lex , consuetudo , actio , iudicium , scientia , artificium : deinde , natura eius evenire vulgo soleat , an insolenter et raro : postea , homines id sua auctoritate comprobare , an offendi in his consueverint ; et cetera , quae factum aliquod similiter confessim , aut ex intervallo solent consequi . Deinde postremo attendendum est , num quae res ex iis rebus , quae sunt positae in partibus honestatis , aut utilitatis , consequantur : de quibus in delibera- tivo genere causae distinctius erit dicendum . Ac negotiis quidem fere res eae , quas commemoravimus , sunt attributae .

49 Omnis autem argumentatio , quae ex iis locis ,  
 44 quos commemoravimus , sumetur , aut probabilis , aut necessaria debet esse . Etenim , ut breviter describamus , argumentatio videtur esse inventum ex aliquo genere , rem aliquam aut probabiliter ostendens , aut necessarie demonstrans . Necessarie demonstrantur ea , quae aliter ac dicuntur , nec fieri , nec probari possunt , hoc modo : Si peperit , cum viro concubuit . Hoc genus argumentandi , quod in

necessaria demonstratione versatur : maxime tractatur in dicendo aut per complexionem , aut per enumerationem , aut per simplicem conclusionem . Complexio est , in qua , utrum concederis , re-<sup>45</sup> prehenditur , ad hunc modum : Si improbus est , cur uteris ? si probus , cur accusas ? Enumeration est , in qua , pluribus rebus expositis , et ceteris infirmatis , una reliqua necessario confirmatur , hoc pacto : Necesse est aut inimicitiarum causa ab hoc esse occisum , aut metus , aut spei , aut aliquius amici gratia , aut , si horum nihil est , ab hoc non esse occisum : nam sine causa maleficium susceptum esse non potest . Sed neque inimicitiae fuerunt , nec metus ullus , nec spes ex morte illius alicuius commodi , neque ad amicum huius aliquem mors illius pertinebat . relinquitur igitur , ut ab hoc non sit occisus . Simplex autem conclusio ex necessaria consecutione conficitur , hoc modo : Si vos me istud eo tempore fecisse dicitis , ego autem eo ipso tempore trans mare fui : relinquitur , ut id , quod dicitis , non modo non fecerim , sed ne potuerim quidem facere . Atque hoc diligenter videre oportebit , ne quo pacto genus hoc refelli possit , ut ne confirmatio modum in se argumentationis solum habeat , et quandam similitudinem necessariae conclusionis , verum ipsa argumentatio ex necessaria ratione consistat .

Probabile autem est id , quod fere fieri solet , <sup>46</sup> aut quod in opinione positum est , aut quod habet in se ad haec quandam similitudinem , sive id falsum est , sive verum . In eo genere , quod fere so-

let fieri , probabile huiusmodi est : Si mater est ,  
diligit filium : si avarus est , negligit iusiurandum.  
In eo autem , quod in opinione positum est , huius-  
modi sunt probabilia : Impiis apud inferos poenas  
esse praeparatas ; eos , qui philosophiae dent ope-  
30 ram , non arbitrari deos esse. Similitudo autem in  
contrariis et paribus , et in iis rebus , quae sub  
eandem cadunt rationem , maxime spectatur. In  
contrariis , hoc modo : Nam si iis , qui impruden-  
tes laeserunt , ignosci convenit , iis , qui necessa-  
47 rio profuerunt , haberi gratiam non oportet. Ex  
pari , sic : Nam ut locus sine portu , navibus esse  
non potest tutus : sic animus sine fide , stabilis ami-  
cis non potest esse. In iis rebus , quae sub eandem  
rationem cadunt , hoc modo probabile considera-  
tur : Nam si Rhodiis turpe non est portorium  
locare , ne Hermacreonti quidem turpe est condu-  
cere. Haec tum vera sunt , hoc pacto : Quoniam  
cicatrix est , fuit vulnus ; tum verisimilia , hoc mo-  
do : Si multus erat in calceis pulvis , ex itinere eum  
venire oportebat.

Omne autem , ( ut certas quasdam in partes di-  
stribuamus , ) probabile , quod sumitur ad argumen-  
tationem , aut signum est , aut credibile , aut iudica-  
48 tum , aut comparabile. Signum est , quod sub sen-  
sum aliquem cadit , et quiddam significat , quod ex  
ipso profectum videtur , quod aut ante fuerit , aut  
in ipso negotio , aut post sit consecutum , et tamen  
indiget testimonii et gravioris confirmationis ; ut  
cruor , fuga , pallor , pulvis , et quae his sunt simi-  
lia. Credibile est , quod sine ullo teste , auditoris

opinione firmatur, hoc modo: Nemo est, qui non liberos suos incolumes et beatos esse cupiat. Iudicatum est, res assensione, aut auctoritate, aut iudicio alicuius, aut aliquorum comprobata. Id tribus in generibus spectatur, religioso, communi, approbato. Religiosum est, quod iurati legibus iudicarunt. Commune est, quod omnes vulgo probarunt, et secuti sunt, huiusmodi: ut maioribus natu assurgatur, ut supplicum misereatur. Approbatum est, quod homines, cum dubium esset, quale haberi oporteret, sua constituerunt auctoritate: velut Gracchi patris factum, quem populus Romanus eo, quod insidente collega in censura nihil egisset, post censuram consulem fecit. Comparabile autem est, quod in rebus diversis similem aliquam rationem continet. Eius partes sunt tres: imago, collatio, exemplum. Imago est oratio demonstrans corporum, aut naturarum similitudinem. Collatio est oratio, rem cum re ex similitudine conferens. Exemplum est, quod rem auctoritate, aut casu alicuius hominis, aut negotii confirmat, aut infirmat. Horum exempla et descriptiones in praecepsis elocutionis cognoscuntur. Ac fons quidem confirmationis, ut facultas tulit, apertus est, nec minus dilucide, quam rei natura ferebat, demonstratus est. Quemadmodum autem quaeque constitutio, et pars constitutionis, et omnis controversia, sive in ratione, sive in scripto versetur, tractari debeat, et quae in quasque argumentationes convenient, singillatim in secundo libro de unoquoque genere dicemus. In praefentia tantummodo numeros, et

modos, et partes argumentandi confuse et permixte dispersimus: post discrete et electe in genus quodque causae, quid cuique conveniat, ex hac copia digeremus.

10 Atque inveniri quidem omnis ex his locis argumentatio poterit: inventam exornari, et certas in partes distingui et suavissimum est, et summe necessarium, et ab artis scriptoribus maxime neglectum. quare et de ea praceptione nobis in hoc loco dicendum visum est, ut ad inventionem argumenti, absolutio quoque argumentandi adiungeretur. Et magna cum cura et diligentia locus hic omnis considerandus est, quod non solum rei magna utilitas est, sed praecipiendi quoque summa difficultas.

31 Omnis igitur argumentatio aut per inductionem tractanda est, aut per ratiocinationem. Inductio est oratio, quae rebus non dubiis captat assensionem eius, quicum instituta est; quibus assensionibus facit, ut illi dubia quaedam res, propter similitudinem earum rerum, quibus assenfit, probetur: velut apud Socraticum Aeschinem demonstrat Socrates, cum Xenophontis uxore, et cum ipso Xenophonte Aspasiam locutam: Dic mihi, quaeſo, Xenophontis uxor, si vicina tua melius habeat aurum, quam tu habes, utrum illius an tuum malis? Illius, inquit. Quid si vestem, et ceterum ornatum muliebrem pretii maioris habeat, quam tu habes, tuumne an illius malis? Illius vero, respondit. Age, inquit, si virum illa meliorem habeat, quam tu habes, virumne tuum an illius malis? Hic mulier erubuit. Aspasia autem cum ipso

Xenophonte sermonem instituit. Quaeso, inquit, Xenophon, si vicinus tuus equum meliorem habeat, quam tuus est; tuumne equum malis, an illius? Illius, inquit. Quid si fundum meliorem habeat, quam tu habes, utrum tandem fundum habere malis? Illum, inquit, meliorem scilicet. Quid si uxorem meliorem habeat, quam tu habes, utram malis? Atque hic Xenophon quoque ipse tacuit. Post Aspasia: Quoniam uterque vestrum, inquit, id mihi solum non respondit, quod ego solum audire volueram, egomet dicam, quid uterque cogiter. nam et tu mulier optimum virum mavis habere, et tu Xenophon uxorem habere lectissimam maxime vis. Quare, nisi hoc perfeceritis, ut neque vir melior, neque femina lector in terris sit, profecto id semper, quod optimum putabitis esse, multo maxime requiretis, ut et tu maritus sis quam optimae mulieris, et haec quam optimo viro nupta sit. Hic cum rebus non dubiis esset assensum, factum est propter similitudinem, ut etiam illud, quod dubium videbatur, si quis separatim quaereret, id pro certo, propter rationem rogandi, concederetur. Hoc modo sermonis 53 plurimum Socrates usus est, propterea quod nihil ipse afferre ad persuadendum volebat, sed ex eo, quod sibi ille dederat, quicum disputabat, aliquid confidere malebat, quod ille ex eo, quod iam concessisset, necessario approbare deberet. Hoc in genere praecipiendum nobis videtur, primum, ut illud, quod inducemus per similitudinem, eiusmodi sit, ut sit necesse concedi. nam ex quo postulabimus nobis illud, quod dubium sit, concedi, du-

bium esse id ipsum non oportebit. Deinde illud, cuius confirmandi causa fiet induc<sup>tio</sup>, videndum est, ut simile iis rebus sit, quas res, quasi non dubias, ante induxerimus. nam ante aliquid nobis concessum esse, nihil proderit, si ei dissimile erit id, cuius causa illud concedi primum voluerimus. Deinde non intelligatur, quo spectent illae primae inductiones, et ad quem sint exitum perventurae. Nam qui videt, si ei rei, quam primo rogetur, recte assenserit, illam quoque rem, quae sibi dispiceat, esse necessario concedendam, plerumque aut non respondendo, aut male respondendo longius procedere rogationem non finit. Quare ratione rogationis imprudens ab eo, quod concessit, ad id, quod non vult concedere, deducendus est. Extremum autem aut taceatur oportet, aut concedatur, aut negetur. Si negabitur, aut ostendenda est similitudo earum rerum, quae ante concessae sunt, aut alia utendum inductione. Si concedetur, concludenda est argumentatio. Si tacebitur, aut elicienda est responsio; aut, quoniam taciturnitas imitatur confessionem, pro eo, ac si concessum sit, concludere oportebit argumentationem. Ita fit hoc genus argumentandi tripartitum. Prima pars ex similitudine constat una, pluribusve. Altera ex eo, quod concedi volumus, cuius causa similitudines adhibitae sunt. Tertia ex conclusione, quae aut confirmat concessionem, aut, 33 quid ex ea conficiatur, ostendit. Sed quia non sat alicui videbitur dilucide demonstratum, nisi quod ex civili causarum genere exemplum subiecerimus: videtur huiusmodi quoque utendum exemplo, non 55

quo praeceptio differat; aut aliter hoc in sermone, atque in dicendo sit utendum: sed ut eorum voluntati satisfiat, qui, quod aliquo in loco viderint, alio in loco, nisi demonstratum est, nequeunt cognoscere. Ergo in hac causa, quae apud Graecos est pervagata, quod Epaminondas, Thebanorum imperator, ei, qui sibi ex lege praetor successerat, exercitum non tradidit, et cum paucos ipse dies contra legem exercitum tenuisset, Lacedaemonios funditus vicit, poterit accusator argumentatione uti per inductionem, cum scriptum legis contra sententiam defendat, ad hunc modum: Si, iudices, id,<sup>56</sup> quod Epaminondas ait legis scriptorem sensisse, adscribat ad legem, et addat exceptionem hanc, *Extra quam si quis reipublicae causa exercitum non tradiderit*, patiemini? non opinor, Quod si vosmet ipsi, quod a vestra religione et sapientia remotissimum est, istius honoris causa hanc eandem exceptionem, iniussu populi, ad legem adscribi iubeatis, populus Thebanus id patieturne fieri? profecto non patietur. Quod ergo adscribi ad legem nefas est, id sequi, quasi adscriptum sit, rectum vobis videatur? Novi vestram intelligentiam, non potest ita videri, iudices. Quod si literis corrigi neque ab illo, neque a vobis scriptoris voluntas potest; videte ne multo indignius sit, id re et iudicio vestro mutari, quod ne verbo quidem commutari potest. Ac de inductione quidem satis in praesentia dictum videtur. Nunc deinceps ratiocinationis vim et naturam con-<sup>57</sup> sideremus.

Ratiocinatio est oratio ex ipsa re probabile ali- 34

quid eliciens , quod expositum et per se cognitum , sua se vi et ratione confirmet. Hoc de genere qui diligentius considerandum putaverunt , cum idem usu dicendi sequerentur , paululum in praecipiendi ratione dissenserunt. nam partim quinque eius partes esse dixerunt , partim non plus , quam in tres partes posse distribui putaverunt. Eorum controversiam non incommodum videtur cum utrorumque ratione exponere. nam et brevis est , et non eiusmodi , ut alteri prorsus nihil dicere potentur , et locus hic nobis in dicendo minime negligendus videtur.

- 58 Qui putant in quinque distribui partes oportere , aiunt , primum convenire exponere summam argumentationis , ad hunc modum : Melius accurantur , quae consilio geruntur , quam quae sine consilio administrantur. Hanc primam partem numerant : eam deinceps rationibus variis , et quam copiosissimis verbis approbari putant oportere , hoc modo : Dominus ea , quae ratione regitur , omnibus instructior est rebus , et apparatiōnē , quam ea , quae temere et nullo consilio administratur. Exercitus is , cui praepositus est sapiens et callidus imperator , omnibus partibus commodius regitur , quam is , qui stultitia et temeritate alicuius administratur. Eadem navigii ratio est. nam navis optime cursum conficit
- 59 ea , quae scientissimo gubernatore utitur. Cum propositio sit hoc pacto approbata , et duae partes transierint ratiocinationis , tertia in parte aiunt , quod ostendere velis , id ex vi propositionis oportere assumere , hoc pacto : Nihil autem omnium

rerum melius, quam omnis mundus, administratur. Huius assumptionis quarto in loco aliam porro inducunt approbationem, hoc modo: Nam et signorum ortus et obitus definitum quendam ordinem servant, et annuae commutationes, non modo quadam ex necessitate semper eodem modo fiunt; verum ad utilitates quoque rerum omnium sunt accommodatae, et diurnae nocturnaeque vicissitudines, nulla in re unquam mutatae quidquam nocuerunt. Quae signo sunt omnia, non mediocri quodam consilio naturam mundi administrari. Quinto inducunt loco complexionem eam, quae aut id infert solum, quod ex omnibus partibus cogitur, hoc modo: Consilio igitur mundus administratur: aut unum in locum cum conduxit breviter propositionem et assumptionem, adiungit, quod ex his conficiatur, ad hunc modum: Quod si melius geruntur ea, quae consilio, quam quae sine consilio administrantur: nihil autem omnium rerum melius administratur, quam omnis mundus; consilio igitur mundus administratur. Quinquepartitam igitur hoc pacto putant esse argumentationem. Qui autem tripartitam esse 35 dicunt, ii non aliter putant tractari oportere argu- 60 mentionem, sed partitionem horum reprehendunt, negant enim neque a propositione, neque ab assumptione approbationes earum separari oportere, neque propositionem absolutam, neque assumptionem sibi perfectam videri, quae approbatione confirmata non sit. Quare quas illi duas partes numerent, propositionem et approbationem, sibi unam partem videri, propositionem: quae si approbata non

sit, propositio non sit argumentationis. Item, quae ab illis assumtio, et assumptionis approbatio dicatur, eadem sibi assumptionem solam videri. Ita fit, ut eadem ratione argumentatio tractata, aliis tripartita, aliis quinquepartita videatur. quare evenit, ut res non tam ad usum dicendi pertineat,  
61 quam ad rationem praceptionis. Nobis autem commodior illa partitio videtur esse, quae in quinque partes distributa est, quam omnes ab Aristotele et Theophrasto profecti, maxime secuti sunt. Nam quemadmodum illud superius genus argumentandi, quod per inductionem sumitur, maxime Socrates et Socratici tractaverunt: sic hoc, quod per rationationem expolitur, summe est ab Aristotele, atque a Peripateticis, et Theophrasto frequentatum; deinde a rhetoribus iis, qui elegantissimi atque artificiosissimi putati sunt. Quare autem nobis illa magis partitio probetur, dicendum videtur, ne temere secuti putemur: et breviter dicendum, ne in huiusmodi rebus diutius, quam ratio praecipiendi postulet, commoremur.

36 Si quadam in argumentatione satis est uti propositione, et non oportet adiungere approbationem propositioni; quadam autem in argumentatione infirma est propositio, nisi adiuncta sit approbatio; separatum quiddam est a propositione approbatio. Quod enim et adiungi et separari ab aliquo potest, id non potest idem esse, quod est id, ad quod adiungitur, et a quo separatur: est autem quaedam argumentatio, in qua propositio non indiget approbatione; et quaedam, in qua nihil valet sine

approbatione, ut ostendemus: separata est igitur a propositione approbatio. Ostendetur autem id, quod polliciti sumus, hoc modo: Quae propositio in se quiddam continet perspicuum, et quod constare inter omnes necesse est, hanc velle approbare et firmare nihil attinet. Ea est huiusmodi:  
Si, quo die ista caedes Romae facta est, ego Athenis eo die fui, interesse in caede non potui. Hoc quia perspicue verum est, nihil attinet approbari. Quare assumi statim oportet, hoc modo: Fui autem Athenis eo die. Hoc si non constat, indiget approbationis: qua inducta, complexio consequetur. Est igitur quaedam propositio, quae non indiget approbatione. nam esse quandam, quae indigeat, quid attinet ostendere, quod cuivis facile perspicuum est? Quod si ita est, ex hoc, et ex eo, quod proposueramus, hoc conficitur, separatum esse quiddam a propositione approbationem. Si autem ita est, falsum est non esse plus, quam tripartitam argumentationem. Simili modo liquet,<sup>64</sup> alteram quoque approbationem separatam esse ab assumptione. si quadam in argumentatione satis est uti assumptione, et non oportet adiungere approbationem assumptioni; quadam autem in argumentatione infirma est assumptio, nisi adiuncta sit approbatio: separatum quiddam est extra assumptionem approbatio. Est autem argumentatio quaedam, in qua assumptio non indiget approbationis; quaedam autem, in qua nihil valet sine approbatione, ut ostendemus. separata est igitur ab assumptione approbatio. Ostendemus autem id, quod polliciti

65 sumus, hoc modo: Quae perspicuum omnibus veritatem continet assumptio, nihil indiget approbationis. ea est huiusmodi: Si oportet sapere, dare operam philosophiae convenit. Haec propositio indiget approbationis. non enim perspicua est, neque constat inter omnes, propterea quod multi nihil prodessent philosophiam, plerique etiam obesse arbitrantur. Assumptio perspicua est haec: Oportet autem sapere. Hoc quia ipsum ex re perspicitur, et verum esse intelligitur, nihil attinet approbari. Quare statim concludenda est argumentatio. Est ergo assumptio quaedam, quae approbationis non indiget. nam quandam indigere perspicuum est. separata est igitur ab assumptione approbatio. Falsum ergo est, non esse plus quam tripartitam argumentationem. Atque ex his illud iam perspicuum est,  
37 66 esse quandam argumentationem, in qua neque propositio, neque assumptio indigeat approbationis, huiusmodi, ut certum quiddam, et breve, exempli causa, ponamus: Si summo opere sapientia petenda est, summo opere stultitia vitanda est: summo autem opere sapientia petenda est: summo igitur opere stultitia vitanda est. Hic et assumptio, et propositio perspicua est. quare neutra quoque indiget approbatione. Ex hisce omnibus illud perspicuum est, approbationem tum adiungi, tum non adiungi. Ex quo cognoscitur, neque in propositione, neque in assumptione contineri approbationem, sed utramque suo loco positam, vim suam, tanquam certam et propriam, obtinere. Quod si ita est, commode partiti sunt illi, qui in quinque partes distribuerunt argumentationem.

Quinque sunt igitur partes eius argumentationis,<sup>67</sup> quae per ratiocinationem tractatur: Propositio, per quam locus is breviter exponitur, ex quo vis omnis oportet emanet ratiocinationis: Propositonis approbatio, per quam id, quod breviter expositum est, rationibus affirmatum, probabilius et apertius fit: Assumptio, per quam id, quod ex propositione ad ostendendum pertinet, assumitur: Assumptionis approbatio, per quam id, quod assumptum est, rationibus firmatur: Complexio, per quam id, quod conficitur ex omni argumentatione, breviter exponitur. Quae plurimas habet argumentatio partes, ea constat ex his quinque partibus. Secunda est quadripartita. Tertia tripartita. Dein bipartita; quod in controversia est. De una quoque parte potest alicui videri posse consistere. Eo-<sup>38</sup> rum igitur, quae constant, exempla ponemus:<sup>68</sup> horum, quae dubia sunt, rationes afferemus. Quinquepartita argumentatio est huiusmodi: Omnes leges, iudices, ad commodum reipublicae referre oportet, et eas ex utilitate communi, non ex scriptione, quae in literis est, interpretari. Ea enim virtute et sapientia maiores nostri fuerunt, ut in legibus scribendis nihil sibi aliud, nisi salutem atque utilitatem reipublicae proponerent. neque enim ipsi, quod obesset, scribere volebant: et, si scripissent, cum esset intellectum, repudiatum iri legem intelligebant. Nemo enim leges legum causa salvas esse vult, sed reipublicae, quod ex legibus omnes rempublicam optime putant administrari. Quam ob rem igitur leges servari oportet, ad eam causam

scripta omnia interpretari convenit: hoc est, quoniam reipublicae servimus, et reipublicae commodo atque utilitate leges interpretemur. Nam ut ex medicina nihil oportet putare proficisci, nisi quod ad corporis utilitatem spectet, quoniam eius causa est instituta; sic a legibus nihil convenit arbitrari, nisi quod reipublicae conducat, proficisci, quoniam eius causa sunt comparatae. Ergo in hoc quoque iudicio definite literas legis perscrutari, et legem, ut aequum est, ex utilitate reipublicae considerate. Quid enim magis utile Thebanis fuit, quam Lacedaemonios opprimi? Cui rei magis Epaminondam, Thebanorum imperatorem, quam victoriae Thebanorum, consulere decuit? Quid hunc tanta Thebanorum gloria, tam claro atque exornato tropaeo carius atque antiquius habere convenit? Scripto videlicet legis omisso, scriptoris sententiam considerare debebat. Atque hoc quidem satis consideratum est, nullam esse legem, nisi reipublicae causa scriptam. Summam igitur amentiam esse existimabat, quod scriptum esset reipublicae salutis causa, id non ex reipublicae salute interpretari. Quod si leges omnes ad utilitatem reipublicae referri convenit, hic autem saluti reipublicae profuit; profecto non potest eodem facto et communibus fortunis consuluisse, et 39 legibus non obtemperasse. Quatuor autem partibus 70 constat argumentatio, cum aut proponimus, aut assumimus sine approbatione. Id facere oportet, cum aut propositio ex se intelligitur, aut assumptio perspicua est, et nullius approbationis indiget. Propositionis approbatione praeterita, quatuor ex par-

tibus argumentatio tractatur ad hunc modum : Iudices, qui ex lege iurati iudicatis, legibus obtemperare debetis. Obtemperare autem legibus non potestis, nisi id, quod scriptum est in lege, sequamini. quod enim certius legis scriptor testimonium voluntatis suae relinquere potuit, quam, quod ipse magna cum cura atque diligentia scripsit? Quod si literae non exstant, magnopere eas requireremus, ut ex his scriptoris voluntas cognosceretur; nec tamen Epa-  
minondae permitteremus, ne si extra iudicium quidem esset, ut is nobis sententiam legis interpretaretur, nedum nunc istum patiamur, cum praefato lex sit, non ex eo, quod apertissime scriptum est, sed ex eo, quod suae causae convenit, scriptoris voluntatem interpretari. Quod si vos, iudices, legibus obtemperare debetis, et id facere non potestis, nisi, quod scriptum est in lege, sequamini, quid causae est, quin istum contra legem fecisse iudicetis? Af-  
sumptionis autem approbatione praeterita, quadripartita sic fiet argumentatio : Qui saepenumero nos per fidem fefellerunt, eorum orationi fidem habere non debemus. Si quid enim perfidia illorum detrimenti acceperimus, nemo erit, praeter nosmetipso, quem iure accusare possimus. Ac primo quidem decipi incommodum est: iterum, stultum: tertio, turpe. Carthaginenses autem persaepe iam nos fefellerunt. Summa igitur amentia est in eorum fide spem habere, quorum perfidia toties deceptus sis. Utraque ap-  
probatione praeterita tripartita fit, hoc pa&to: Aut metuamus Carthaginenses oportet, si incolumes eos reliquerimus; aut eorum urbem diruamus. Ac me-

tuere quidem non oportet. Restat igitur, ut urbem diruamus.

- 40 Sunt autem, qui putent, nonnunquam posse complexione supersederi, cum id perspicuum sit, quod conficiatur ex ratiocinatione. quod si fiat, bipartitam quoque fieri argumentationem, hoc modo: Si peperit, virgo non est: peperit autem. Hic satis esse dicunt proponere et assumere: quoniam perspicuum sit, quod conficiatur, complexionis rem non indigere. Nobis autem videtur et omnis ratiocinatio concludenda esse; et illud vitium, quod illis displaceat, magnopere vitandum, ne, quod perspicuum fit, id in complexionem inferamus. Hoc autem fieri poterit, si complexionum genera intelligentur. Nam aut ita complectemur, ut in unum conducamus propositionem et assumptionem, hoc modo: Quod si leges omnes ad utilitatem reipublicae referri convenient, hic autem saluti reipublicae profuit; profecto non potest eodem facto, et saluti communi consuluisse, et legibus non obtemperasse. Aut ita, ut ex contrario sententia conficiatur, hoc modo: Summa igitur amentia est, in eorum fide spem habere, quorum perfidia toties deceptus sis. Aut ita, ut id solum, quod conficitur, inferatur, ad hunc modum: Urbem igitur diruamus. Aut, ut id, quod eam rem, quae conficitur, sequatur, necesse est. Id est huiusmodi: Si peperit, cum viro concubuit: peperit autem. Conficitur hoc: Concubuit igitur cum viro. Hoc si nolis inferre, et inferas id, quod sequitur: Fecit igitur incestum; et concluseris argumentationem, et perspiciam fugeris complexionem. Quare in longis ar-

gumentationibus, ex conductionibus, aut ex contrario complecti oportet: in brevibus id solum, quod conficitur, exponere: in iis, in quibus exitus perspicuus est, consecutione uti. Si qui autem ex una quoque parte putabunt constare argumentationem, poterunt dicere, saepe satis esse hoc modo argumentationem facere: Quoniam peperit, cum viro concubuit. nam hoc nullius neque approbationis, neque assumptionis, vel eius approbationis, neque complexionis indigere. Sed nobis ambiguitate nominis videntur errare. nam argumentatio nomine uno res duas significat, ideo, quod et inventum aliquam in rem probabile, aut necessarium, argumentatio vocatur, et eius inventi artificiosa expolitio. Quando 75 igitur proferent aliquid huiusmodi: Quoniam peperit, cum viro concubuit: inventum proferent, non expolitionem. nos autem de expolitionis partibus loquimur. Nihil igitur ad hanc rem ratio illa pertinebit: 41 atque hac distinctione, alia quoque, quae videbuntur officere huic partitioni, propulsabimus, si qui aut assumptionem aliquando tolli posse putent, aut propositionem. Quae si quid habet probabile, aut necessarium, quoquo modo commoveat auditorem necesse est. Quod si solum spectaretur, ac nihil, quo pacto tractaretur id, quod excogitatum esset, referret: nequaquam inter summos oratores et mediocres interesse existimaretur. Variare autem orationem 76 magnopere oportebit. nam omnibus in rebus similitudo est satietatis mater. Id fieri poterit, si non similiter semper ingrediamur in argumentationem. Nam primum omnium generibus ipsis distin-

guere convenit orationem, hoc est, tum inductione uti, tum ratiocinatione. Deinde in ipsa argumentatione non semper a propositione incipere, nec semper quinque partibus abuti, neque eadem ratione partitiones expolire: sed tum ab assumptione incipere licet, tum ab approbatione alterutra, tum utraque, tum hoc, tum illo genere complexionis uti. Id ut perspiciatur, aut scribamus, aut in quolibet exemplo de iis, quae proposita sunt, hoc idem exerceamus, ut quam facile factu sit.

77 Ac de partibus quidem argumentationis satis nobis dictum videtur. Illud autem volumus intelligi, nos probe tenere, aliis quoque rationibus tractari argumentationes in philosophia multis et obscuris, de quibus certum est artificium constitutum. Verum illa nobis abhorrire ab usu oratorio videntur. Quae pertinere autem ad dicendum putamus, ea nos commodius, quam ceteros, attendisse, non affirmamus; perquisitus et diligentius conscripsisse pollicemur. Nunc, ut instituimus proficisci, ordine ad reliqua pergemus.

42 Reprehensio est, per quam argumentando ad-  
78 versariorum confirmatio diluitur, aut infirmatur [aut allevatur]. Haec fonte inventionis eodem ute-  
tur, quo utitur confirmatio, propterea quod, qui-  
bus ex locis aliqua res confirmari potest, iisdem  
potest ex locis infirmari. nihil enim considerandum  
est in his omnibus inventionibus, nisi id, quod per-  
sonis, aut negotiis attributum est. Quare inven-  
tionem, et argumentationum expolitionem, ex illis,

quae ante praecepta sunt, hanc quoque in partem orationis transferri oportebit. Verumtamen, ut quaedam praeeptio detur huius quoque partis, exponemus modos reprehensionis; quos qui observabunt, facilius ea, quae contra dicentur, diluere aut infirmare poterunt.

Omnis argumentatio reprehenditur, si aut ex <sup>79</sup> iis, quae sumta sunt, non conceditur aliquod unum plurave: aut, his concessis, complexio confici ex his negatur: aut si genus ipsum argumentationis vitiosum ostenditur: aut si contra firmam argumentationem, alia aequa firma, aut firmior ponitur. Ex iis, quae sumuntur, aliquid non conceditur, cum aut id, quod credibile dicunt, negatur esse eiusmodi: aut quod comparabile putant, dissimile ostenditur: aut iudicatum aliam in partem traducitur, aut omnino iudicium improbatum: aut, quod signum esse adversarii dixerunt, id eiusmodi negatur esse, aut si complexio, aut ex una, aut ex utraque parte reprehenditur, aut si enumeratio falsa ostenditur, aut si simplex conclusio falsi aliquid continere demonstratur. Nam omne, quod sumitur ad argumentandum, sive pro probabili, sive pro necessario, necesse est sumatur ex his locis, ut ante ostendimus. Quod pro credibili sumtum erit, id infirmabitur, si aut perspicue falsum erit, hoc modo: <sup>43</sup> 80 Nemo est, qui non pecuniam, quam sapientiam malit. Aut ex contrario quoque credibile aliquid habebit, hoc modo: Quis est, qui non officii cupidior sit, quam pecuniae? Aut erit omnino

incredibile, ut si quis, quem constet esse avarum, dicat, alicuius mediocris officii causa, se maximam pecuniam neglexisse. Aut si, quod in quibusdam rebus, aut hominibus accidit, id omnibus dicatur usu evenire, hoc pacto: Qui pauperes sunt, iis antiquior officio pecunia est. Qui locus desertus est, in eo caedem factam esse oportet. In loco celebri homo occidi qui potuit? Aut si id, quod raro fit, fieri omnino negetur: ut Curio pro Fulvio: Nemo potest uno aspectu, 81 neque praeteriens, in amorem incidere. Quod autem pro signo sumetur, id ex iisdem locis, quibus confirmatur, infirmabitur. Nam in signo, primum verum esse ostendi oportet: deinde eius esse rei signum proprium, qua de re agitur, ut cruentum caedis: deinde factum esse, quod non oportuerit; aut non factum, quod oportuerit: postremo scisse eum, de qua quaeritur, eius rei legem et consuetudinem. nam eae res sunt signo attributae: quas diligentius aperiemus, cum separatim de ipsa coniecturali constitutione dicemus. Ergo horum unumquodque in reprehensione, aut non esse signo, aut parum magno esse, aut a se potius, quam ab adversariis stare, aut omnino falso dici, aut in aliam quoque suspicionem duci posse, 44 demonstrabitur. Cum autem pro comparabili ali- 82 quid inducetur, quoniam id per similitudinem maxime tractatur, in reprehendendo conveniet, simile id negare esse, quod conferetur ei, quicum conferetur. id fieri poterit, si demonstrabitur diversum esse genere, natura, vi, magnitudine, tem-

pore, loco, persona, opinione : ac si, quo in numero illud, quod per similitudinem afferetur, et quo in loco hoc genus, cuius causa afferetur, haberi conveniat, ostendetur. Deinde, quid res cum re differat, demonstrabitur : ex quo docebimus, aliud de eo, quod comparabitur, et de eo, quicum comparabitur, existimari oportere. Huius facultatis maxime indigemus, cum ea ipsa argumentatio, quae per inductionem tractatur, erit reprehendenda. Sin iudicatum aliquod inferetur, quoniam id ex his locis maxime firmatur : laude eorum, qui iudicarunt ; similitudine eius rei, qua de agitur, ad eam rem, qua de iudicatum est, et commemorando, non modo non esse reprehensum iudicium, sed ab omnibus approbatum ; et demonstrando, difficilius et maius fuisse id iudicatum, quod afferatur, quam id, quod infest : ex contrariis locis, si res aut vera, aut verisimilis permittet, infirmari oportebit. Atque erit observandum diligenter, ne nihil ad id, quo de agatur, pertineat id, quod iudicatum sit : et videntur, ne ea res proferatur, in qua sit offendit, ut de ipso, qui iudicarit, iudicium fieri videatur. Oportet autem animadvertere, ne, cum aliter <sup>33</sup> multa sint iudicata, solitarium aliquod, aut rarum iudicatum afferatur. nam his rebus auctoritas iudicati maxime potest infirmari. Atque ea quidem, quae quasi probabilia sumentur, ad hunc modum tentari oportebit. Quae vero sicuti necessaria in- <sup>45</sup> ducentur, ea si forte imitabuntur modo necessariam argumentationem, neque erunt eiusmodi, sic

reprehendantur. Primum complexio, quae, utrum concesseris, debet tollere, si vera est, nunquam reprehendetur; sin falsa, duobus modis, aut conversione, aut alterius partis confirmatione. Conversione, hoc modo:

*Nam si veretur, quid eum accuses, qui est probus?  
Sin inverecundum animi ingenium possidet,  
Quid eum accuses, qui id parvi auditu existimet?*

Hic, sive vereri dixeris, sive non vereri, concedendum hoc putat, ut neget esse accusandum. Quod conversione sic reprehendetur: Immo vero accusandus est. Nam si veretur, accuses: non enim parvi auditu aestimabit. Sin inverecundum animi ingenium possidet, tamen accuses. non enim §4 probus est. Alterius autem partis confirmatione, hoc modo reprehendetur: Verum si veretur, accusatione tua correctus, ab errato recedet. Enumeratione vitiosa intelligitur, si aut praeteritum quiddam dicemus, quod velimus concedere, aut infirmum aliquid annumeratum, quod aut contra dici possit, aut causa non sit, quare non honeste possimus concedere. Praeteritum quiddam in eiusmodi enumerationibus: Quoniam habes istum equum, aut emeris oportet, aut hereditate possideas, aut munere acceperis, aut domi tibi natus sit, aut, si horum nihil est, surripueris necesse est: sed neque emisti, neque hereditate venit, neque domi natus est, neque donatus est: necesse est ergo §5 surripueris. Hoc commode reprehendetur, si dici possit ex hostibus equus esse captus, cuius praedae

fectio non venierit : quo illato , infirmatur enumeratio ; quoniam id sit inductum , quod praeteritum sit in enumeratione. Altero autem modo 46 reprehendetur , si aut contra aliquid dicetur : hoc est , si , exempli causa , ut in eodem versemur , poterit ostendi hereditate venisse. aut si extremum illud non erit turpe concedere ; ut si quis , cum dixerint adversarii : aut insidias facere voluisti , aut amico morem gessisti , aut cupiditate elatus es ; amico se morem gessisse fateatur. Sim- 86 plex autem conclusio reprehendetur , si id , quod sequitur , non videatur necessario cum eo , quod antecessit , cohaerere. Nam hoc quidem , Si spiritum dicit , vivit ; Si dies est , lucet ; eiusmodi est , ut cum priore necessario posterius cohaerere videatur. Hoc autem , Si mater est , diligit ; Si aliquando peccavit , nunquam corrigetur ; sic conveniet reprehendi , ut demonstretur non necessario cum priore posterius cohaerere. Hoc genus , et cetera necessaria , et omnino omnis argumentatio , et eius reprehensio maiorem quandam vim continet , et latius patet , quam hic exponitur : sed eius artificii cognitio huiusmodi est , ut non ad huius artis partem aliquam adiungi possit , sed ipsa separatim longi temporis , et magnae atque arduae cogitationis indigeat. quare illa nobis alio tempore atque ad aliud institutum , si facultas erit , explicabuntur. Nunc his praeceptionibus rhetorum ad usum oratorium contentos nos esse oportebit. Cum igitur ex iis , quae sumuntur , aliquid non conceditur , sic infirmabitur. Quum autem , his concessis , com- 47

Et plexio ex his non conficitur, haec erunt consideranda: num aliud conficiatur, aliud dicatur, hoc modo: Si, quum quis dicat se profectum esse ad exercitum, contraque eum quis velit hac argumentatione uti: Si venis ad exercitum, a tribunis militaribus visus es; non es autem ab his visus; non es igitur profectus ad exercitum. Hic cum concesseris propositionem et assumptionem, complexio est infirmando. Aliud enim, quam concessus gebatur, illatum est. Ac nunc quidem, quo facilius res cognosceretur, perspicuo et grandi vitio praeditum posuimus exemplum: sed saepe obscurius positum vitium pro vero probatur, cum aut parum memineris, quid concesseris, aut ambiguum aliquid pro certo concesseris. Ambiguum si concesseris ex ea parte, quam ipse intellexeris, eam partem si adversarius ad aliam partem per complexionem velit accommodare; demonstrare oportebit, non ex eo, quod ipse concesseris, sed ex eo, quod ille sumferit, confici complexionem, ad hunc modum: Si pecuniae indigetis, pecuniam non habetis: si pecuniam non habetis, pauperes estis: indigetis autem pecuniae; mercaturaenim, nisi ita esset, operam non daretis: pauperes igitur estis. Hoc sic reprehenditur: Cum dicebas, Si indigetis pecuniae, pecuniam non habetis; hoc intelligebam, Si propter inopiam in egestate estis, pecuniam non habetis; & idcirco concedebam: cum autem hoc sumebas, Indigetis autem pecuniae; illud accipiebam, Vultis autem pecuniae plus habere. Ex quibus concessionibus non conficitur hoc,

Pauperes igitur estis : conficeretur autem , si tibi primo quoque hoc concessissim , Qui pecuniam maiorem vellet habere , eum pecuniam non habere . Saepe autem oblitum putant , quid concesseris , et 48 idcirco id , quod non conficitur , quasi conficiatur ,<sup>89</sup> in conclusione infertur , hoc modo : Si ad illum hereditas veniebat , verisimile est , ab illo esse necatum . Deinde hoc approbant plurimis verbis . post assumunt , Ad illum autem hereditas veniebat . Deinde infertur , Ille igitur occidit . Id ex iis , quae sumferant , non conficitur . Quare observare diligenter oportet , et quid sumatur , et quid ex his conficiatur .

Ipsum autem genus argumentationis , vitiosum his de causis ostendetur , si aut in ipso vitium erit , aut si non ad id , quod instituitur , accommodabitur . Atque in ipso vitium erit , si omnino totum falsum erit , si commune , si vulgare , si leve , si remotum , si mala definitio , si controversum , si perspicuum , si non concessum , si turpe , si offendit , si contrarium , si inconstans , si adversum . Falsum est , in quo perspicue mendacium est , hoc modo : Non potest esse sapiens , qui pecuniam negligit . Socrates autem pecuniam negligebat . non igitur sapiens erat . Commune est , quod nihilo magis ab adversariis , quam a nobis facit , hoc modo : Idcirco , iudices , quia veram causam habebam , brevi peroravi . Vulgare est , quod in aliam quoque rem non probabilem , si nunc concessum sit , transferri possit , hoc modo : Si veram causam non haberet , vobis se , iudices ,

non commisisset. Leve est, quod aut post tempus dicitur, hoc modo: Si in mentem venisset, non commisisset: aut si perspicue rem turpem levi tegeret vult defensione, hoc modo:

*Cum te expetebant omnes, florentissimo  
Regno reliqui: nunc desertum ab omnibus,  
Summo periclo, sola ut restituam, paro.*

49 Remotum est, quod ultra quam satis est, petitur,  
91 hoc modo: Quod si non P. Scipio Corneliam filiam Ti. Graccho collocasset, atque ex ea duos Gracchos procreasset, tantae seditiones natae non essent. quare hoc incommodum Scipioni adscribendum videtur. Huiusmodi est illa quoque conquestio:

*Utinam ne in nemore Pelio securibus  
Caesa cecidisset abieagna ad terram trabes!*

Longius enim repetita est, quam res postulabat. Mala definitio est, cum aut communia describit, hoc modo: Seditiosus est is, qui malus atque inutilis est civis. nam hoc non magis seditiosi, quam ambitiosi, quam calumniatoris, quam alicuius improbi hominis vim describit. Aut falsum quiddam dicit, hoc pacto: Sapientia est pecuniae quaerendae intelligentia. Aut aliquid non grave, nec magnum continens, sic: Stultitia est immensae gloriae cupiditas. Est haec quidem stultitia, sed ex parte quadam, non ex omni genere, definita. Controversum est, in quo ad dubium demonstrandum, dubia causa affertur, hoc modo:

*Eho tu, dii, quibus est potestas motus superum  
atque inferum,*

*Pacem inter se conciliant, conferunt concordiam.*

Per spicium est, de quo non est controversia: ut, <sup>92</sup> si quis, cum Orestem accuset, planum faciat, ab eo matrem esse occisam. Non concessum est, cum id, quod augetur, in controversia est, ut, si quis, cum Ulyssem accuset, in hoc maxime commoretur: Indignum esse, ab homine ignavissimo virum fortissimum, Aiacem, necatum. Turpe est, quod aut eo loco, in quo dicitur; aut eo homine, qui dicit; aut eo tempore, quo dicitur; aut iis, qui audiunt; aut ea re, qua de agitur, indignum, propter inhonestam rem, videtur. Offensum est, quod eorum, qui audiunt, voluntatem laedit: ut, si quis apud equites Romanos, cupidos iudicandi, Caepionis legem iudicariam laudet. Contrarium <sup>50</sup> est, quod contra ea dicitur, quae ii, qui audiunt, <sup>93</sup> fecerunt: ut, si quis apud Alexandrum Macedonem contra aliquem urbis expugnatorem diceret, nihil esse crudelius, quam urbes diruere, cum ipse Alexander Thebas diruisset. Inconstans est, quod ab eodem de eadem re, diverse dicitur: ut, si quis, cum dixerit, qui virtutem habeat, eum nullius rei ad bene vivendum indigere, neget postea sine bona valetudine posse bene vivere: aut, se amico adesse propter benevolentiam; sperare enim aliquid commodi ad se per venturum. Adversum est, <sup>94</sup> quod ipsi causae aliqua ex parte officit: ut si quis hostium vim, et copias, et felicitatem augeat, cum ad pugnandum milites adhortetur: si non ad

id, quod instituitur, accommodabitur aliqua pars argumentationis, horum aliquo in vitio reperiatur: si plura pollicitus pauciora demonstrabit; aut, si, cum totum debebit ostendere, de parte aliqua loquatur, hoc modo: Mulierum genus avarum est; nam Eriphyle auro viri vitam vendidit: aut, si non id, quod accusabitur, defendet: ut, si quis, cum ambitus accusabitur, manu se fortem esse defendet; ut Amphion apud Euripidem, item apud Pacuvium, qui, vituperata musica, sapientiam laudat: aut si res ex hominis vitio vituperabitur, ut, si quis doctrinam ex alicuius docti vitiis reprehendat: aut, si quis, cum aliquem volet laudare, de felicitate eius, non de virtute dicat: aut, si quis rem cum re ita comparabit, ut alteram se non putet laudare, nisi alteram vituperarit: aut si alteram ita laudet, ut alterius non faciat mentionem: aut si, cum de certa re quaeretur, de communi instituetur oratio: ut, si quis, cum aliqui deliberent, bellum gerant, an non, pacem laudet omnino, non illud bellum inutile esse demonstret: aut, si ratio alicuius rei reddetur falsa, hoc modo: Pecunia bonum est, propterea quod ea maxime vitam beatam efficit: aut si infirma, ut Plautus,

*Amicum castigare ob meritam noxiam,  
Immune est facinus; verum in aetate utile  
Et conducibile: nam ego amicum hodie meum  
Concastigabo pro commerita noxia,  
Invitus, ni me id invitet ut faciam fides:*

aut eadem, hoc modo: Maximum malum est ava-

ritia ; multos enim magnis incommodis affecit pecuniae cupiditas : aut parum idonea , hoc modo : Maximum bonum est amicitia ; plurimae enim delectationes sunt in amicitia. Quartus modus erat 51 reprehensionis , per quem contra firmam argumentationem , aequum firma aut firmior ponebatur. Hoc genus in deliberationibus maxime versabitur , cum aliquid , quod contra dicatur , aequum esse concedimus ; sed id , quod nos defendimus , necessarium esse demonstramus : aut cum id , quod illi defendant , utile esse fateamur ; quod nos dicamus , demonstremus esse honestum. Ac de reprehensione haec quidem existimavimus esse dicenda. Deinceps nunc de conclusione ponemus.

Hermagoras digressionem deinde , tum postremam conclusionem ponit. In hac autem digressione ille putat oportere quandam inferri orationem , a causa , atque a iudicatione ipsa remotam , quae aut sui laudem , aut adversarii vituperationem contineat , aut in aliam causam ducat , ex qua conficiat aliquid confirmationis , aut reprehensionis , non argumentando , sed augendo per quandam amplificationem. Hanc si quis partem putarit orationis , sequatur Hermagoram licebit. Nam et augendi , et laudandi , et vituperandi praecepta a nobis partim data sunt , partim suo loco dabuntur. Nobis autem non placet , hanc partem in numero reponi , quod de causa digredi , nisi per locum communem , displicet ; quo de genere posterius est dicendum. Laudes autem et vituperationes non separatim placet tractari , sed in ipsis argumentatio-

nibus esse implicitas. Nunc de conclusione dicemus.

52 Conclusio est exitus et determinatio totius orationis. haec habet partes tres, enumerationem, indignationem, conquestionem. Enumeratione est, per quam res disperse et diffuse dictae, unum in locum coguntur, et reminiscendi causa, unum sub aspectum subiiciuntur. Haec si semper eodem modo tractabitur, perspicue ab omnibus artificio quodam tractari intelligetur: sin varie fiet, et hanc suspicionem, et fatietatem vitare poterit. Quare tum oportebit ita facere, ut plerique faciunt propter facilitatem, singillatim unamquamque rem attingere, et ita omnes transfire breviter argumentationes: tum autem id, quod difficilius est, dicere, quas partes exposueris in partitione, de quibus te pollicitus sis dicturum, et reducere in memoriam, quibus rationibus unamquamque partem confirmaris: tum ab iis, qui audiunt, quaerere, quid sit, quod sibi velle debeant demonstrari, hoc modo: Illud docuimus, illud planum fecimus. Ita simul et in memoriam redibit auditor, et putabit nihil esse praeterea, quod beat desiderare. Atque in his generibus (ut ante dictum est) tum tuas argumentationes transfire separatim, tum id, quod artificiosius est, cum tuis contrarias coniungere; et cum tuam argumentationem dixeris, tum, contra eam quod afferebatur, quemadmodum dilueris, ostendere. Ita per brevem comparationem, auditoris memoria et de confirmatione, et de reprehensione redintegrabitur. Atque haec aliis actionis quoque

modis variare oportebit. Nam cum ex tua persona enumerare possis, ut, quid, et quo quidque loco dixeris, admoneas: tum vero personam, aut rem aliquam inducere, et enumerationem ei totam attribuere. Personam hoc modo: Nam si legis scriptor exsistat, et quaerat a vobis, quid dubitatis, quid possitis dicere, cum vobis hoc et hoc sit demonstratum. Atque hic, item ut in nostra persona, licebit alias singillatim transfire omnes argumentationes; alias ad partitiones singula genera referre; alias ab auditore, quid desideret, quaerere; alias haec facere per comparationem suarum et contrariarum argumentationum. Res <sup>100</sup> autem inducetur, si alicui rei huiusmodi, legi, loco, urbi, monumento attribuetur oratio per enumerationem, hoc modo: Quid si leges loqui possent? nonne haec apud vos quererentur? Quidnam amplius desideratis, iudices, cum vobis hoc et hoc planum factum sit? In hoc quoque genere omnibus eisdem modis uti licebit. Commune autem praeceptum hoc datur ad enumerationem, ut ex unaquaque argumentatione, quoniam tota iterum dici non potest, id eligatur, quod erit gravissimum, et unumquodque quam brevissime transeatur; ut memoria, non oratio renovata videatur.

Indignatio est oratio, per quam conficitur, ut <sup>53</sup> in aliquem hominem magnum odium, aut in rem gravis offendio concitetur. In hoc genere illud primum intelligi volumus, posse omnibus ex locis iis, quos in confirmandi praeceptis posuimus, tractari

indignationem. nam ex iis rebus , quae personis atque negotiis attributae sunt , quaevis amplificationes et indignationes nasci possunt : sed tamen ea , quae separatim de indignatione praecipi possunt , consideremus. Primus locus sumitur ab auctoritate , quum commemoramus , quantae curae res ea fuerit diis immortalibus , aut eis , quorum auctoritas gravissima debeat esse. Qui locus sumetur ex fortibus , ex oraculis , vatibus , ostentis , prodigiis , responsis , et similibus rebus ; item ex maioribus nostris , regibus , civitatibus , gentibus , hominibus sapientissimis , senatu , populo , legum scriptoribus. Secundus locus est , per quem , illa res ad quos pertineat , cum amplificatione , per indignationem , ostenditur , an ad omnes , aut ad maiorem partem , quod atrocissimum est ; aut ad superiores , quales sunt ii , quorum ex auctoritate indignatio sumitur , quod indignissimum est ; aut ad pares animo , fortuna , corpore , quod iniquissimum est ; aut ad inferiores , quod superbissimum est. Tertius locus est , per quem quaerimus , quidnam sit eventurum , si idem ceteri faciant : et simul ostendimus , huic si concessum sit , multos aemulos eiusdem audaciae futuros : ex quo , quid mali sit eventurum , demonstrabimus. Quartus locus est , per quem demonstramus , multos alacres exspectare , quid statuatur , ut ex eo , quod uni concessum sit , sibi quoque tali de re quid liceat , intelligere possint. Quintus locus est , per quem ostendimus , ceteras res perperam constitutas , intellecta veritate , commutatas corrigi posse : hanc

esse rem , quae si sit semel iudicata , neque alio  
commutari iudicio , neque ulla potestate corrigi  
possit. Sextus locus est , per quem consulto et de  
industria factum esse demonstratur , et illud adiun-  
gitur , voluntario maleficio veniam dari non opor-  
tere : imprudentiae concedi nonnunquam conve-  
nire. Septimus locus est , per quem indignamur ,  
quod tetrum , crudele , nefarium , tyrannicum  
factum esse dicamus , per vim , per manum opu-  
lentam ; quae res ab legibus et ab aequabili iure  
remotissima fit. Octavus locus est , per quem de- 54  
monstramus , non vulgare , neque factitatum esse ,<sup>103</sup>  
ne ab audacissimis quidem hominibus , id malefi-  
cium , de quo agitur : atque id a feris quoque ho-  
minibus , et a barbaris gentibus , et immanibus  
bestiis remotum esse. Haec erunt , quae in paren-  
tes , liberos , coniuges , consanguineos , supplices ,  
~~crudeliter~~ facta dicentur ; et deinceps si qua pro-  
ferantur in maiores natu , in hospites , in vicinos ,  
in amicos , in eos , quibuscum vitam egeris , in  
eos , apud quos educatus sis , in eos , a quibus eru-  
ditus , in mortuos , in miseros et misericordia dig-  
nos , in homines claros , nobiles et honore usos ,  
in eos , qui neque laedere alium , nec se defendere  
potuerint , ut in pueros , senes , mulieres : quibus  
omnibus acriter excitata indignatio , sumnum in  
eum , qui violarit horum aliquid , odium commo-  
vere poterit. Nonus locus est , per quem cum aliis ,<sup>104</sup>  
quae constat esse peccata , hoc , quo de quaestio  
est , comparatur ; et ita per contentionem , quanto  
atrocius et indignius sit illud , quo de agitur , often-

ditur. Decimus locus est, per quem omnia, quae in negotio gerendo acta sunt, quaeque post negotium consecuta sunt, cum uniuscuiusque indignatione et criminatione colligimus, et rem verbis quam maxime ante oculos eius, apud quem dicitur, ponimus, ut id, quod indignum est, perinde illi videatur indignum, ac si ipse interfuerit, ac praefens viderit. Undecimus locus est, per quem ostendimus, ab eo factum, a quo minime oportuerit, et a quo, si alius faceret, prohiberi conveniret. Duodecimus locus est, per quem indignamur, quod nobis hoc primis acciderit, nec alicui unquam usū evenerit. Tertiusdecimus locus est, 105 si cum iniuria contumelia iuncta demonstratur, per quem locum in superbiam et arrogantiam odium concitatur. Quartusdecimus locus est, per quem petimus ab iis, qui audiunt, ut ad suas res nostras iniurias referant: si ad pueros pertinebit, de liberis suis cogitent: si ad mulieres, de uxoribus: si ad senes, de patribus aut parentibus. Quintusdecimus locus est, per quem dicimus, inimicis quoque et hostibus ea, quae nobis acciderint, indigna videri solere. Et indignatio quidem his fere de locis gravissime sumetur.

55 Conquestionis autem huiusmodi de rebus partes 106 petere oportebit. Conquestio est oratio, auditorum misericordiam captans. in hac primum animum auditoris mitem et misericordem confidere oportet, quo facilius conquestione commoveri possit. Id locis communibus efficere oportebit, per quos fortunae vis in omnes, et hominum infirmitas osten-

ditur : qua oratione habita graviter et sententiose, maxime demittitur animus hominum, et ad misericordiam comparatur ; cum in alieno malo suam infirmitatem considerabit. Deinde primus locus est <sup>107</sup> misericordiae, per quem, quibus in bonis fuerint, et nunc quibus in malis sint, ostenditur. Secundus, qui in tempora tribuitur, per quem, quibus in malis fuerint, et sint, et futuri sint, demonstratur. Tertius, per quem unumquodque deploratur incommodum, ut in morte filii, pueritiae deleetatio, amor, spes, solatium, educatio, et, si qua simili in genere, quolibet de incommodo per conquestionem dici poterunt. Quartus, per quem res turpes, et humiles, et illiberales proferentur, et indignae aetate, genere, fortuna, pristino honore, beneficiis ; quas passi perpersuive sint. Quintus est, per quem omnia ante oculos singillatim incomoda ponentur, ut videatur is, qui audit, videre, et re quoque ipsa, quasi adsit, non verbis solum, ad misericordiam ducatur. Sextus, per quem praeter spem in miseriis <sup>108</sup> demonstratur esse ; et, cum aliquid exspectaret, non modo id non adeptus esse, sed in summas miserias incidisse. Septimus, per quem ad ipsos, qui audiunt, similem casum convertimus, et petimus, ut de suis liberis, aut parentibus, aut aliquo, qui illis carus debeat esse, nos cum videant, recordentur. Octavus, per quem aliquid dicitur esse factum, quod non oportuerit, aut non factum, quod oportuerit, hoc modo : Non affui, non vidi, non postremam eius vocem audivi, non

extremum eius spiritum excepti. Item , inimicorum in manibus mortui est , hostili in terra turpiter iacuit insepultus , a feris diu vexatus ,  
109 communi quoque honore in morte caruit. Nonus , per quem oratio ad mutas et expertes animi res refertur : ut , si ad equum , domum , vestem , sermonem alicuius accommodes , quibus animus eorum , qui audiunt et aliquem dilexerunt , vehementer commovetur. Decimus , per quem inopia , infirmitas , solitudo demonstratur. Undecimus , per quem aut liberorum , aut parentum , aut sui corporis sepeliendi , aut alicuius eiusmodi rei commendatio fit. Duodecimus , per quem disiunctio deploratur ab aliquo , cum diducaris ab eo , qui cum libentissime vixeris , ut a parente , filio , fratre , familiari. Tertiusdecimus , per quem cum indignatione conquerimur , quod ab iis , a quibus minime conveniat , male tractemur , propinquis , amicis , quibus beneficerimus , quos adiutores fore putaverimus , aut a quibus indignum sit , ut ser-  
16 vis , libertis , clientibus , supplicibus. Quartusdecimus , qui per obsecrationem sumitur : in quo orantur modo illi , qui audiunt , humili et supplicioratione , ut misereantur. Quintusdecimus , per quem non nostras , sed eorum , qui cari nobis debent esse , fortunas conqueri nos demonstramus. Sextusdecimus est , per quem animum nostrum in alios misericordem esse ostendimus. et tamen amplum , et excelsum , et patientem incommodorum esse , et futurum esse , si quid acciderit , demonstramus. nam saepe virtus et magnificentia , in quo

gravitas et auctoritas est, plus proficit ad misericordiam commovendam, quam humilitas et obsecratio. Commotis autem animis, diutius in conuestione morari non oportebit. Quemadmodum enim dixit rhetor Apollonius, *lacrima nihil citius arescit*. Sed quoniam et satis videmur de omnibus partibus orationis dixisse, et huius voluminis magnitudo longius processit; quae sequuntur deinceps, in secundo libro dicemus.

---

M. TULLII  
CICERONIS  
DE  
INVENTIONE RHETORICA  
LIBER SECUNDUS.

---

## ARGUMENTUM L. II.

Quod in libro primo de reprehensione & confirmatione non satis distincte et accurate, sed disperse dixerat, hoc libro certos reprehendendi & confirmandi locos in singula causarum genera tradere fuscipit c. 3. Itaque docet quomodo confirmationes reprehensionesque tractandae sint in iudiciali genere et constitutione conjecturali, qui loci cum ab auctore sint tum ab reo adhibendi: item in constitutione definitiva et translativa; in generali porro, cui negotialis & iuridicilis subiectae tanquam formae sunt; in scripti controversiis; in genere deliberativo, quod cum ab honesto, tum ab utili argumenta ducit; denique in demonstrativo.

**C**Rotoniatae quondam, cum florerent omnibus copiis, & in Italia cum primis beati numeraren-

tur, templum Iunonis, quod religiosissime colebant, egregiis picturis locupletare voluerunt. Itaque Heracleotem Zeuxin, qui tum longe ceteris excellere pictoribus existimabatur, magno pretio conductum adhibuerunt. Is et ceteras complures tabulas pinxit, quarum nonnulla pars usque ad nostram memoriam propter fani religionem remansit: et, ut excellentem muliebris formae pulchritudinem muta in sese imago contineret, Helenae se pingere simulacrum velle dixit: quod Crotoniatae, qui eum muliebri in corpore pingendo plurimum aliis praestare saepe accepissent, libenter audierunt. putaverunt enim, si, quo in genere plurimum posset, in eo magnopere elaborasset, egredium sibi opus illo in fano relicturum. Neque tum eos illa opinio fecellit. Nam Zeuxis illico quaesivit ab eis, quasnam virgines formosas haberent. Illi autem statim hominem deduxerunt in palaestram, atque ei pueros ostenderunt multos, magna praeditos dignitate. Etenim quodam tempore Crotoniatae multum omnibus corporum viribus et dignitatibus antesteterunt, atque honestissimas ex gymnico certamine victorias domum cum maxima laude retulerunt. Cum puerorum igitur formas et corpora magno hic opere miraretur: Horum, inquiunt illi, sorores sunt apud nos virgines. quare, qua sint illae dignitate, potes ex his suspicari. Praebete igitur mihi, quaeso, inquit, ex ipsis virginibus formosissimas, dum pingo id, quod pollicitus sum vobis, ut mutum in simulacrum ex animali exemplo veritas transferatur. Tum Cro-

natae, publico de consilio, virgines unum in locum  
conduxerunt, et pictori, quas vellet, eligendi po-  
testatem dederunt. Ille autem quinque de legit; qua-  
rum nomina multi poetae memoriae tradiderunt,  
quod eius essent iudicio probatae, qui verissimum  
pulchritudinis habere iudicium debuisset. neque enim  
putavit, omnia, quae quaereret ad venustatem, uno in  
corpore se reperire posse; ideo quod nihil, simplici in  
genere, omni ex parte perfectum natura expolivit.  
itaque, tanquam ceteris non sit habitura quod lar-  
giatur, si uni cuncta concederit, aliud alii commo-  
di, aliquo adiuncto incommodo, muneratur.

Quod quoniam nobis quoque voluntatis accedit, 2  
ut artem dicendi perscriberemus, non unum ali- 4  
quod proposuimus exemplum, cuius omnes partes  
quocunque essent in genere, exprimendae nobis  
necessario viderentur: sed, omnibus unum in lo-  
cum coactis scriptoribus, quod quisque commo-  
dissime praecipere videbatur, excerptimus, et ex  
variis ingenii excellentissima quaeque libavimus.  
Ex his enim, qui nomine et memoria digni sunt,  
nec nihil optime, nec omnia praeclarissime quis-  
quam dicere nobis videbatur. quapropter stultitia  
visa est, aut a bene inventis alicuius recedere, si  
quo in vitio eius offenderemur, aut ad vitia quo-  
que eius accedere, cuius aliquo bene pracepto  
duceremur. Quod si in ceteris quoque studiis a 5  
multis eligere homines commodissimum quodque,  
quam sese uni alicui certo vellent addicere, minus  
in arrogantia offenderent; non tantopere in vitiis  
perseverarent; aliquanto levius ex inscientia labo-

rarent. Ac si par in nobis huius artis, atque in illo picturae, scientia fuisset, fortasse magis hoc suo in genere opus nostrum, quam ille in sua pictura nobilis eniteret. Ex maiore enim copia nobis, quam illi, fuit exemplorum eligendi potestas. Ille una ex urbe, et ex eo numero virginum, quae tum erant, eligere potuit: nobis omnium, quicunque fuerunt, ab ultimo principio huius praceptio-nis usque ad hoc tempus, expositis copiis, quodcunque placeret, eligendi potestas fuit.

6 Ac veteres quidem scriptores artis, usque a prin-cipe illo atque inventore Tisia repetitos, unum in locum conduxit Aristoteles, et nominatim cuius-que pracepta magna conquisita cura perspicue conscripsit, atque enodata diligenter exposuit: at tantum inventoribus ipsis suavitate et brevitate di-cendi praestitit, ut nemo illorum pracepta ex ipso-rum libris cognoscat, sed omnes, qui, quod illi praecipient, velint intelligere, ad hunc, quasi ad quendam multo commodiorem explicatorem, re-7 vertantur. Atque hic quidem ipse, et sese ipsum no-bis, et eos, qui ante se fuerant, in medio posuit, ut et ceteros, et seipsum per se cognosceremus: ab hoc autem qui profecti sunt, quamquam in maximis philosophiae partibus operaे plurimum consumserunt, sicut et ipse, cuius instituta seque-bantur, fecerat; tamen permulta nobis pracepta dicendi reliquerunt. Atque alii quoque alio ex fonte praceptores dicendi emanaverunt, qui item per-multum ad dicendum, si quid ars proficit, opitulati sunt. nam fuit tempore eodem, quo Aristo-

teles, magnus et nobilis rhetor Isocrates: cuius ipsius quam constet esse artem, non invenimus. Disci-<sup>s</sup> pulorum autem atque eorum, qui protinus ab hac sunt disciplina profecti, multa de arte praecepta reperimus. Ex his duabus diversis sicuti familiis, quarum altera cum versaretur in philosophia, nonnullam rhetoricae quoque artis sibi curam assumebat, altera vero omnis in dicendi erat studio et praeceptione occupata, unum quoddam est conflatum genus a posterioribus, qui ab utrisque ea, quae commode dici videbantur, in suas artes contulerunt: quos ipsos simul, atque illos superiores, nos nobis omnes, quoad facultas tulit, proposuimus, et ex nostro quoque nonnihil in commune contulimus. Quod si ea, quae in his libris exponuntur, tantopere eligenda fuerunt, quanto studio electa sunt, profecto neque nos, neque alios industriae nostrae poenitebit. Sin autem temere aliquid alicuius praeteriisse, aut non satis eleganter secuti videbimur, docti ab aliquo, facile et libenter sententiam commutabimus. Non enim parum cognosse, sed in parum cognito stulte et diu perseverasse, turpe est: propterea quod alterum communis hominum infirmitati, alterum singulari uniuscuiusque vitio est attributum. Quare nos quidem sine ulla affirmatione, simul quaerentes, dubitanter unumquodque dicemus, ne, dum parvulum hoc consequimur, ut satis commode haec perscripsisse videamur, illud amittamus, quod maximum est, ut ne cui rei temere atque arroganter affenserimus. Verum hoc quidem nos, et in hoc tempore, et in omni vita studiose, quoad facultas feret,

consequemur. Nunc autem , ne longius oratio progressa videatur , de reliquis , quae praecipienda videntur esse , dicemus.

11 Igitur primus liber , exposito genere huius artis , et officio , et fine , et materia , et partibus , genera controversiarum , et inventiones , et constitutiones , et iudicationes continebat : deinde partes orationis , et in eas omnes omnia paecepta. Quare cum in eo ceteris de rebus distinctius dictum sit , disperse autem de confirmatione et de reprehensione : nunc certos confirmandi et reprehendendi in singula causarum genera locos tradendos arbitramur. Et quia , quo pacto tractari conveniret argumentationes , in libro primo non indiligerter expositum est , hic tantum ipsa inventa unamquamque in rem exponentur , simpliciter , sine ulla exornatione , ut ex hoc inventa ipsa , ex superiori autem expolitio inventorum petatur. Quare haec , quae nunc praecipientur , ad confirmationis et reprehensionis partes referre oportebit.

4 Omnis et demonstrativa , et deliberativa , et iudicialis causa , necesse est in aliquo eorum , quae ante exposita sunt , constitutionis genere , uno pluribusve , versetur. Hoc quamquam ita est , tamen cum communiter quaedam de omnibus praecipi possint , separati quoque aliae sunt cuiusque generis , et diversae paeceptiones. Aliud enim laus aut vituperatio , aliud sententiae dictio , aliud accusatio , aut recusatio , confidere debet. In iudiciis , quid aequum sit , queritur : in demonstrationibus , quid honestum : in deliberationibus , ut nos arbitramur , quid honestum sit , et quid utile. nam ceteri utilitatis modo finem

in suadendo et in dissuadendo exponi oportere arbitriati sunt. Quorum igitur generum fines et exitus diversi sunt, eorum pracepta eadem esse non possunt. Neque nunc hoc dicimus, non easdem incidere constitutiones: veruntamen oratio quaedam ex ipso fine et ex genere causae nascitur, quae pertineat ad vitae aliquius demonstrationem, aut ad sententiae dictio-<sup>13</sup> nem. Quare nunc in exponendis controversiis, in iudiciali genere causarum et praceptorum versabimur. Ex quo pleraque in cetera quoque causarum genera, simili implicata controversia, nulla cum difficultate transferentur: post autem separati de reliquis dicemus.

Nunc ab conjecturali constitutione proficiscemur; <sup>14</sup> cuius exemplum sit hoc expositum: In itinere quidam proficiscentem ad mercatum quendam, et secum aliquantum nummorum ferentem, est consecutus. cum hoc, ut fere fit, in via sermonem contulit: ex quo factum est, ut illud iter familiarius facere vellent. quare, cum in eandem tabernam devertisserint, simul coenare, et in eodem loco somnum capere voluerunt. Coenati discubuerunt ibidem. Caupo autem ( nam ita dicitur post inventum, cum in alio maleficio deprehensus esset ) cum illum alterum, videlicet qui nummos haberet, animadvertisset: noctu, postquam illos arctius, ut fit, ex lassitudine dormire sensit, accessit, et alterius eorum, qui sine nummis erat, gladium propter appositorum e vagina eduxit, et illum alterum occidit, nummos abstulit, gladium cruentum in vaginam recondidit, ipse sese in lectum suum recepit.

15 Ille autem , cuius gladio occisio erat facta , multo ante lucem surrexit , comitem suum inclamavit semel et saepius. illum somno impeditum non respondere existimavit : ipse gladium , et cetera , quae secum attulerat , sustulit , solus profectus est. Caupo non multo post conclamavit , hominem esse occisum , et cum quibusdam deversoribus illum , qui ante exierat , consequitur. in itinere hominem comprehendit , gladium eius e vagina educit , reperit cruentum : homo in urbem ab illis deducitur , ac reus fit. In hac intentio est criminis , Occidisti. Depulsio , Non occidi. Ex quibus constitutio est. Quæstio eadem in coniecturali , quae iudicatio , Occideritne.

5 Nunc exponemus locos , quorum pars aliqua in  
16 omnem coniecturalem incidit controversiam. Hoc autem et in horum locorum expositione , et in ceterorum , oportebit attendere , non omnes in omnem causam convenire. Ut enim omne nomen ex aliquibus , non ex omnibus literis scribitur : sic omnem in causam non omnis argumentorum copia , sed eorum necessaria pars aliqua conveniet. Omnis igitur , ex causa , ex persona , ex facto ipso , coniectura capienda est.

17 Causa distribuitur in impulsionem , et in ratiocationem. Impulsio est , quae sine cogitatione per quandam affectionem animi facere aliquid hortatur , ut amor , iracundia , aegritudo , violentia , et omnino omnia , in quibus animus ita videtur affectus fuisse , ut rem perspicere cum consilio et cura non potuerit : et id , quod fecit , impetui quodam animi

potius, quam cogitatione fecerit. Ratiocinatio autem 18 est diligens et considerata faciendi aliquid, aut non faciendi excogitatio. Ea dicitur interfuisse tum, cum aliquid faciendum, aut non faciendum, certa de causa vitasse, aut secutus esse animus videtur, ut, si amicitiae quid causa factum dicetur, si inimici ulciscendi, si metus, si gloriae, si pecuniae, si denique, ut omnia generatim amplectamur, alicuius retinendi, augendi, adipiscendive commodi, aut contra reiiciendi, deminuendi, devitandive incommodi causa. nam horum in genus alterutrum illa quoque incident, in quibus aut incommodum aliquod maioris vitandi incommodi causa, aut maioris adipiscendi commodi suscipitur: aut commodum aliquod maioris adipiscendi commodi, aut maioris vitandi incommodi, praeteritur.

Hic locus sicut aliquod fundamentum est huius 19 constitutionis. nam nihil factum esse cuiquam probatur, nisi aliquid, quare factum sit, ostenditur. Ergo accusator, cum aliquid impulsione factum esse dicet, illum impetum, et quandam commotionem animi, affectionemque verbis et sententiis amplificare debebit, et ostendere, quanta vis amoris sit, quanta animi perturbatio ex iracundia fiat, aut ex aliqua causa earum, qua impulsum aliquem id fecisse dicet. Hic et exemplorum commemoratione, qui simili impulsu aliquid commiserint, et similitudinum collatione, et ipsius animi affectionis explicatione, curandum est, ut non mirum videatur, si quod ad facinus tali perturbatione commotus animus accesserit. Cum autem non 6

20 impulsione , verum ratiocinatione aliquem commisisse quid dicet , quid commodi sit securus , aut quid incommodi fuderit , demonstrabit , et id augebit quam maxime poterit , ut , quoad eius fieri possit , idonea quam maxime causa ad peccandum hortata videatur . Si gloriae causa ; quantam gloriam consecuturam existimarit . item si dominationis , si pecuniae , si amicitiae , si inimicitiarum ; et omnino quidquid erit , quod causae fuisse dicet , id  
21 summe augere debebit . Et hoc eum magnopere considerare oportebit , non quid in veritate modo , verum etiam vehementius , quid in opinione eius , quem arguet , fuerit . Nihil enim refert , non fuisse , aut non esse aliquid commodi , aut incommodi , si ostendi potest , ei visum esse , qui arguatur . Nam opinio dupliciter fallit homines ; cum aut res aliismodi est , ac putatur , aut non is eventus est , quem arbitrati sunt . Res aliismodi est tum , cum aut id , quod bonum est , malum putant : aut contra , quod malum est , bonum : aut quod nec malum est , nec bonum , malum , aut bonum : aut quod malum , aut bonum est , nec malum , nec  
22 bonum . Hoc intellecto , si quis negabit , ullam esse pecuniam , fratri aut amici vita , aut denique officio antiquiorem , aut suaviorem , non erit hoc accusatori negandum . nam in eum culpa , et summum odium transferetur , qui id , quod tam vere et pie dicetur , negabit . Verum illud dicendum erit , illi non esse ita visum : quod sumi oportet ex iis , quae ad personam pertinent , de  
7 quo post dicendum est . Eventus autem tum fallit ,

cum aliter accidit, atque ii, qui arguuntur, arbitrii esse dicuntur: ut, si quis dicatur alium occidisse, ac voluerit, quod aut similitudine, aut suspicione, aut demonstratione falsa deceptus sit: aut eum necasse, cuius testamento non sit heres, quod eius testamento se heredem arbitratus sit. Non enim ex eventu cogitationem spectari oportere; sed qua cogitatione et spe ad maleficium profectus sit, considerare; et quo animo quid quisque faciat, non quo casu utatur, ad rem pertinere. In hoc autem loco, caput illud erit accusatori, si demonstrare poterit, alii nemini causam fuisse faciendi: secundarium, si tantam, aut tam idoneam nemini. Sin fuisse aliis quoque causa faciendi videbitur; aut potestas aliis defuisse demonstranda est, aut facultas, aut voluntas. Potestas, si aut nescisse, aut non affuisse, aut confidere aliquid non potuisse dicetur. Facultas, si ratio, adiutores, adiumenta, et cetera, quae ad rem pertinebunt, defuisse alicui demonstrabuntur. Voluntas, si animus a talibus factis vacuus, et integer esse dicetur. Postremo, quas ad defensionem rationes reo dabimus, iis accusator ad alios ex culpa eximendos abutetur. Verum id brevi faciendum est, et in unum multa sunt eonducenda, ut ne alterius defendendi causa hunc accusare, sed huius accufandi causa defendere alterum videatur. Atque accusatori quidem haec fere sunt in causa facienda, et consideranda. Defensor autem ex contrario primum impulsionem aut nullam fuisse dicet, aut, si fuisse concedet, extenuabit, et parvulam quandam

fuisse demonstrabit, aut non ex ea solere huiusmodi facta nasci docebit. Quo et erit in loco demonstrandum, quae vis et natura eius sit affectionis, qua impulsus aliquid reus commisisse dicetur: in quo et exempla, et similitudines erunt proferenda, et ipsa diligenter natura eius affectionis quam lenissime quietissimam ad partem explicanda, ut et res ipsa a facto crudeli et turbulentio ad quoddam mitius et tranquillius traducatur, et oratio tamen ad animum eius, qui audiet, et ad animi quandam intimum sensum accommodetur. Ratiocinationis autem suspiciones infirmabit, si aut commodum nullum fuisse, aut parvum, aut aliis magis fuisse, aut nihilo sibi magis, quam aliis, aut incommodum sibi maius, quam commodum dicet: ut nequaquam fuerit illius commodi, quod expetitum dicatur, magnitudo, aut cum eo incommodo, quod acciderit, aut cum illo periculo, quod subeat, comparanda: qui omnes loci similiter in incommodi quoque vitatione tractabuntur. Sin accusator dixerit, eum id esse secutum, quod ei visum sit commodum, aut id fugisse, quod putarit esse incommodum, quamquam in falsa fuerit opinione: demonstrandum erit defensori, neminem tanta esse stultitia, qui tali in re possit veritatem ignorare. Quod si id concedatur, illud non concessum iri; ne dubitasse quidem hunc, quid eius iuris esset, sed id, quod falsum fuerit, sine ulla dubitatione pro falso, quod verum, pro vero probasse. Quod si dubitaverit, summae fuisse amentiae, dubia spe impulsum, certum in periculum se committere. Quemadmo-

dum autem accusator, cum ab aliis culpam demonstrabit, defensoris locis utetur: sic iis locis, qui accusatori dati sunt, utetur reus, cum in alios ab se crimen volet transferre.

Ex persona autem coniectura capietur, si eae res, quae personis attributae sunt, diligenter considerabuntur, quas omnes in primo libro exposuimus. nam et de nomine nonnunquam aliquid suspicionis nascitur. Nomen autem cum dicimus, cognomen quoque intelligatur oportet. De hominis enim certo et proprio vocabulo agitur: ut, si dicamus, idcirco aliquem Caldum vocari, quod temerario et repentinio consilio sit: aut si, ea re hominibus Graecis imperitis verba dedisse, quod Clodius, aut Caelius, aut Mucius, vocarentur. Et de natura licet aliquantulum ducere suspicionis. omnia enim haec, vir, an mulier; huius an illius civitatis sit; quibus sit maioribus, quibus consanguineis, qua aetate, quo animo, quo corpore, quae naturae sunt attributa, ad aliquam coniecturam faciendam pertinebunt. Et ex vietu multae trahuntur suspiciones, cum, quemadmodum, et apud quos, et a quibus educatus et eruditus sit, quaeritur, et quibuscum vivat, qua ratione vitae, quo more domestico vivat. Et ex fortuna saepe argumentatio nascitur, cum servus an liber, pecuniosus an pauper, nobilis an ignobilis, felix an infelix, privatus an in potestate sit, aut fuerit, aut futurus sit, consideratur: aut denique aliquid eorum quaeritur, quae fortunae esse attributa intelliguntur. Habitus autem, quoniam in aliqua perfecta et constanti animi aut corporis absolutione consistit,

quo in genere est virtus , scientia , et quae contra-  
ria sunt ; res ipsa , causa posita , docebit , ecquid hic  
quoque locus suspicionis ostendat. Nam affectionis  
quidem ratio perspicuam solet p[re]fe[re]re gerere con-  
iecturam , ut amor , iracundia , molestia : propte-  
rea quod et ipsorum vis intelligitur , et quae res  
harum aliquam rem consequantur , faciles cognitu-

31 s[unt]. Studium autem quoniam est assidua et vehe-  
mens ad aliquam rem applicata magna cum vo-  
luntate occupatio , facile ex eo ducetur argumenta-  
tio , quam res ipsa desiderabit in causa. Item ex  
consilio sumetur aliquid suspicionis. nam consilium  
est , aliquid faciendi , non faciendive excogitata ra-  
tio. Iam facta , et casus , et orationes , quae sunt  
omnia (ut in confirmationis p[re]ceptis dictum est )  
in tria tempora distributa , facile erit videre , ecquid  
afferant ad conjecturam confirmandam suspicionis.

10 Ac personis quidem res eae sunt attributae , ex  
32 quibus omnibus unum in locum coactis , accusato-  
ris erit improbatione hominis uti. nam causa facti  
parum firmitudinis habet , nisi animus eius , qui  
insimulatur , in eam suspicionem adducatur , ut a  
tali culpa non videatur abhorruisse. Ut enim ani-  
mum alicuius improbare nihil attinet , cum causa ,  
quare peccaverit , non intercessit : sic causam pec-  
cati intercedere leve est , si animus nulli minus ho-  
nestae rationi affinis ostenditur. Quare vitam eius ,  
quem arguit , ex ante factis accusator improbare  
debet , et ostendere , si quo in pari ante pec-  
cato convictus sit. Sed id non poterit , si quam in  
similem ante suspicionem venerit , ac maxime , si

fieri poterit, simili aliquo in genere eiusdem modi causa aliqua commotum peccasse, aut in aequa magna re, aut in maiore, aut in minore: ut si, quem pecunia dicat inductum fecisse, possit demonstrare aliqua in re eius aliquid factum avarum. Item in 33 omni causa naturam, aut victum, aut studium, aut fortunam, aut aliquid eorum, quae personis attributa sunt, ad eam causam, qua commotum peccasse dicet, adiungere, atque ex dispari quoque genere culparum, si ex pari sumendi facultas non erit, improbare animum adversarii oportebit: ut si avaritia inductum arguas fecisse, et avarum eum, quem accuses, demonstrare non possis; aliis affinem esse vitiis doceas, et ex ea re non esse mirandum, qui in illa re turpis, aut cupidus, aut petulans fuerit, hac quoque in re eum delinquisse. Quantum enim de honestate et auctoritate eius, qui arguitur, detrac-tum est, tantundem de facultate totius est defensio-nis diminutum. Si nulli affinis poterit vitio reus ante 34 admisso demonstrari; locus inducetur ille, per quem hortandi iudices erunt, ut veterem famam hominis, nihil ad rem putent pertinere. nam eum ante ce-lasse, nunc manifesto teneri: quare non oportere hanc rem ex superiori vita spectari, sed superio-rem vitam ex hac re improbari, et aut potesta-tem ante peccandi non fuisse, aut causam. aut, si haec dici non poterunt, dicendum erit illud ex-tremum, non esse mirum, si nunc primum delinquerit. nam necesse est, eum, qui velit peccare, aliquando primum delinquere. Sin vita ante acta ignorabitur, hoc loco praeterito, et cur praeter-

eatur, demonstrato, argumentis accusationem statim confirmare oportebit.

11 Defensor autem primum, si poterit, debebit vi-  
35 tam eius, qui insimulabitur, quam honestissimam demonstrare. Id faciet, si ostendet aliqua eius nota et communia officia: quod genus, in parentes, cognatos, amicos, affines, necessarios: etiam quae magis rara et eximia sunt, si ab eo cum magno aliquo labore, aut periculo, aut utraque re, cum necesse non esset, officii causa, aut in rempublicam, aut in parentes, aut in aliquos eorum, qui modo exposti sunt, factum aliquid esse dicet: deinde si nihil deliquisse, nulla cupiditate impeditum ab officio recessisse. quod eo confirmatius erit, si, cum potestas impune aliquid faciendi minus honeste fuisse dicetur, voluntas ei faciendi demonstrabitur ab-  
36 fuisse. Hoc autem ipsum genus erit eo firmius, si eo ipso in genere, quo arguetur, integer antea fuisse demonstrabitur: ut si, cum avaritiae causa fecisse arguatur, minime omni in vita pecuniae cupidus fuisse doceatur. Hic illa magna cum gravitate inducetur indignatio, iuncta conquestioni, per quam miserum facinus esse, et indignum demonstrabitur, cum animus omni in vita fuerit a vitiis remotissimus, eam causam putare, quae homines audaces in fraudem rapere soleat, castissimum quoque hominem ad peccandum potuisse impellere; aut iniquum esse, et optimo cuique perniciosissimum, non vitam honeste actam tali in tempore quam plurimum prodeesse, sed subita ex criminatione, quae confungi quamvis facile possit,

non ex ante acta vita , quae neque ad tempus fинги ,  
neque ullo modo immutari possit , facere iudicium .  
Sin autem in ante acta vita aliquae turpitudines 37  
erunt ; aut falso venisse in eam existimationem  
dicentur , aut ex aliquorum invidia , aut obrecta-  
tione , aut falsa opinione , aut imprudentiae , necessi-  
tudini , aut persuasioni adolescentiae , aut alicui  
non malitiosae animi affectioni attribuentur , aut  
dissimili in genere vitiorum , ut animus non om-  
nino integer , sed a tali culpa remotus esse videa-  
tur . Ac si nullo modo vitae turpitudo , aut infa-  
mia leniri poterit oratione ; negare oportebit de  
vita eius , et moribus quaeri , sed de eo crimine ,  
quo de arguatur : quare , ante factis omissis , illud ,  
quod instet , agi oportere .

Ex facto autem ipso suspiciones ducentur , si 12  
totius administratio negotii ex omnibus partibus 38  
pertentabitur : atque hae suspiciones partim ex  
negotio separatim , partim communiter ex perso-  
nis atque ex negotio proficiscentur . Ex negotio  
duci poterunt , si eas res , quae negotiis attribu-  
tae sunt , diligenter considerabimus . Ex iis igitur  
in hanc constitutionem convenire videntur genera  
eorum omnia , partes generum pleraque . Videre 39  
igitur primum oportebit , quae sint continentia cum  
ipso negotio , hoc est , quae ab re separari non  
possunt . Quo in loco satis erit diligenter conside-  
rare , quid sit ante rem factum , ex quo spes per-  
ficiendi nata , et faciendi facultas quaesita videa-  
tur ; quid in ipsa re gerenda ; quid postea con-  
secutum sit . Deinde ipsius est negotii gestio per-

tractanda. nam hoc genus earum rerum , quae negotio attributae sunt , secundo in loco nobis est 40 expositum. Hoc ergo in genere spectabitur locus , tempus , occasio , facultas : quorum uniuscuiusque vis diligenter in confirmationis praceptis explicata est. Quare , ne aut hic non admenuisse , aut ne eadem iterum dixisse videamur , breviter demonstrabimus , quid quaque in parte considerari oporteat. In loco igitur opportunitas , in tempore longinquitas , in occasione commoditas ad faciendum idonea , in facultate copia et potestas earum rerum , propter quas aliquid facilius sit , aut sine quibus omnino confici non potest , consideranda est. 41 Deinde videndum est , quid adiunctum sit negotio , hoc est , quid maius , quid minus , quid aequum magnum sit , quid simile : ex quibus coniectura quaedam ducitur , si , quemadmodum res maiores , minores , aequum magnae , similesque agi soleant , diligenter considerabitur. Quo in genere eventus quoque videndus erit , hoc est , quid ex unaquaque re soleat evenire , magnopere considerandum est ; ut metus , laetitia , titubatio. Quarta autem pars erat ex iis , quas negotiis dicebamus esse attributas , consecutio. In ea quaeruntur ea , quae gestum negotium confessim , aut ex intervallo consequuntur. In qua videbimus ecquae consuetudo sit , ecquae actio , ecquod eius rei artificium sit , aut usus , aut exercitatio , hominum aut approbatio , aut offendio ; ex quibus nonnunquam elicetur aliquid suspicionis.

13 Sunt autem aliquae suspiciones , quae commu-

niter et ex negotiorum , et ex personarum attributionibus sumuntur. nam et ex fortuna , et ex natura , et ex victu , studio , factis , casu , orationibus , consilio , et ex habitu animi , aut corporis pleraque pertinent ad easdem res , quae rem credibilem , aut incredibilem facere possunt , et cum facti suspicione iunguntur. Maxime enim quaeri <sup>43</sup> oportet in hac constitutione , primum potueritne aliquid fieri : deinde ecquo ab alio potuerit : deinde facultas , de qua ante diximus : deinde utrum id facinus sit , quod poenitere fuerit necesse : item quod spem celandi non haberet : deinde necessitudo ; in qua , num necesse fuerit id aut fieri , aut ita fieri , quaeritur. Quorum pars ad consilium pertinet , quod personis attributum est , ut in ea causa , quam exposuimus. Ante rem erit , quod in itinere se tam familiariter applicaverit , quod sermonis causam quaesiverit , quod simul deverterit , coenarit. In re , nox , somnus. Post rem , quod solus exierit , quod illum tam familiarem comitem tam aequo animo reliquerit , quod cruentum gladium habuerit. Horum pars ad consilium <sup>44</sup> pertinet. Quaeritur enim , utrum videatur diligenter ratio faciendi esse habita et excogitata , an ita temere , ut non verisimile sit , quemquam tam temere ad maleficium accessisse. In quo quaeritur , num quo alio modo commodius potuerit fieri , vel a fortuna administrari. Nam saepe , si pecuniae , si adiumenta , si adiutores desint , facultas fuisse faciendi non videtur. Hoc modo si diligenter attendamus , apta inter se esse intelligi-

mus haec , quae negotiis , et illa , quae personis sunt attributa.

Hic neque facile est , neque necessarium distinguerre , ut in superioribus partibus , quo pacto quidque accusatorem , et quomodo defensorem tractare oporteat. Non necessarium , propterea quod , causa posita , quid in quamque conveniat , res ipsa docebit eos , qui non omnia hic se inventuros putabunt , sed [ ad ea , quae pracepta sunt , comparationis ] modo quandam in commune 45 mediocrem intelligentiam conferent : non facile autem , quod et infinitum est tot de rebus utramque in partem singillatim de unaquaque explicare , et alias aliter haec in utramque partem causae so-  
14 lent convenire. Quare considerare haec , quae exposuimus , oportebit. Facilius autem ad inventio- nem animus incedet , si gesti negotii et suam , et adversarii narrationem saepe et diligenter per- tractabit , et quod quaeque pars suspicionis habe- bit , eliciens , considerabit , quare , quo consilio , qua spe perficiendi quidque factum sit : cur hoc modo potius , quam illo : cur ab hoc potius , quam ab illo : cur nullo adiutore , aut cur hoc : cur nemo sit conscientius , aut cur sit , aut cur hic sit : cur hoc ante factum sit : cur hoc ante factum non sit : cur hoc in ipso negotio : cur hoc post negotium : aut quid factum de industria , aut quid rem ipsam consecutum sit : constetne oratio aut cum re , aut ipsa secum : hoc huiusne rei sit signum , an illius , an et huius et illius , et utrius potius : quid factum sit , quod non oportuerit ,

aut non factum, quod oportuerit. Cum animus <sup>46</sup> hac intentione omnes totius negotii partes considerabit, tum illi ipsi in medium conservati loci procedent, de quibus ante dictum est: et cum ex singulis, tum ex coniunctis argumenta certa nascentur. quorum argumentorum pars probabili, pars necessario in genere versabitur. Accedunt autem ad coniecturam saepe quaestiones, testimonia, rumores: quae omnia uterque simili via praceptorum torquere ad suae causae commodum debebit. Nam et ex quaestione suspicione, et ex testimonio, et ex rumore aliquo pari ratione, ut ex causa, et ex persona, et ex facto duci oportebit.

Quare nobis et ii videntur errare, qui hoc genus suspicionum, artificii non putant indigere, et ii, qui aliter hoc de genere, ac de omni coniectura praecipiendum putant. Omnis enim iisdem ex locis coniectura sumenda est. nam et eius, qui in quaestione aliquid dixerit, et eius, qui in testimonio, et ipsius rumoris causa, et veritas ex iisdem attributionibus reperietur. Omni autem in causa pars argumentorum est adiuncta ei causae solum, quae dicetur, et ab ipsa ita ducta, ut ab ea separatim in omnes eiusdem generis causas transferri non satis commode possit: pars autem est pervagatior, et aut in omnes eiusdem generis, aut in plerasque causas accommodata. Haec ergo <sup>15</sup> argumenta, quae transferri in multas causas pos- <sup>48</sup> sunt, locos communes nominamus. nam locus communis aut certae rei quandam continet amplificationem: ut si quis hoc velit ostendere,

eum , qui parentem necarit , maximo suppicio esse dignum ; quo loco , nisi perorata et probata causa , non est utendum : aut dubiae , quae ex contrario quoque habeat probabiles rationes argumentandi : ut suspicionibus credi oportere , et contra , suspicionibus credi non oportere. Ac pars locorum communium , per indignationem , aut per conquestionem inducitur , de quibus ante dictum est ; pars per aliquam probabilem utraque ex parte 49 rationem. Distinguitur autem oratio atque illustratur maxime , raro inducendis locis communibus , et aliquo loco , iam certioribus illis auditoribus , et argumentis confirmatis. Nam et tum conceditur commune quiddam dicere , cum diligenter aliquis proprius causae locus tractatus est , et auditoris animus aut renovatur ad ea , quae restant , aut omnibus iam dictis exfuscitatur. Omnia enim ornamenta elocutionis , in quibus et suavitatis et gravitatis plurimum consistit , et omnia , quae in inventione verborum et sententiarum aliquid habent dignitatis , in communes locos conferuntur. 50 Quare , non ut causarum , sic oratorum quoque multorum communes loci sunt. nam nisi ab iis , qui multa exercitatione magnam sibi verborum et sententiarum copiam comparaverint , tractari non poterunt ornate , et graviter , quemadmodum natura ipsorum desiderat. Atque hoc sit nobis dictum communiter de omni genere locorum communium. Nunc exponemus , in conjecturalem constitutionem qui loci communes incidere soleant : suspicionibus credi oportere . et non oportere :

rumoribus credi oportere , et non oportere : testibus credi oportere , et non oportere : quaestinibus credi oportere , et non oportere : vitam ante actam spectari oportere , et non oportere : eiusdem esse , qui in illa re peccarit , et hoc quoque admisisse , et non esse eiusdem : maxime spectari causam oportere , et non oportere. Atque hi quidem , et si qui eiusmodi ex proprio argumento communes loci nascentur , in contrarias partes deducentur. Certus autem locus est accusatoris , per quem auget facti atrocitatem ; et alter , per quem negat malorum misereri oportere : defensoris , per quem calumnia accusatorum cum indignatione ostenditur ; et per quem cum conquestione misericordia captatur. Hi , et ceteri omnes loci communes , ex iisdem praeceptis sumuntur , quibus ceterae argumentationes : sed illae , tenuius , et acutius , et subtilius tractantur ; hi autem gravius , et ornatius , et cum verbis , tum etiam sententiis excellentibus. in illis enim finis est , ut id , quod dicitur , verum esse videatur : in his , tametsi hoc quoque videri oportet , tamen finis est amplitudo. Nunc ad aliam constitutionem transeamus.

Cum est nominis controversia , quia vis vocabuli definienda verbis est , constitutio definitiva dicitur. Eius generis exemplo nobis posita sit haec causa : C. Flaminius is , qui consul rempublicam male gessit bello Punico secundo , cum tribunus plebis esset , invito senatu , et omnino contra voluntatem omnium optimatum , per seditionem ad populum legem agrariam ferebat. Hunc pater suus

concilium plebis habentem de templo deduxit : arcessitur maiestatis. Intentio est , Maiestatem minuisti , quod tribunum plebis de templo deduxisti. Depulsio est , Non minui maiestatem. Quaestio est , Maiestatemne minuerit. Ratio , in filium enim quam habebam potestatem , ea usus sum. Rationis infirmatio : At enim , qui patria potestate , hoc est , privata [ quadam ] tribunitiam [ potestatem ] hoc est , populi potestatem infirmat , minuit is maiestatem. Iudicatio est : Minuatne is maiestatem , qui in tribunitiam potestatem patria potestate utatur. Ad hanc iudicationem argumentationes omnes affirri oportebit.

53 Ac ne quis forte arbitretur , nos non intelligere , aliam quoque incidere constitutionem in hanc causam ; eam nos partem solam sumimus , in quam praecepta nobis danda sunt. Omnibus autem partibus hoc in libro explicatis , quivis omni in causa , si diligenter attendet , omnes videbit constitutiones , et earum partes , et controversias , si quae forte in eas incident. Nam de omnibus prescribemus. Primus ergo accusatoris locus est , eius nominis , cuius de vi quaeritur , brevis , et aperta , et ex hominum opinione definitio , hoc modo : Maiestatem minuere , est de dignitate , aut amplitudine , aut potestate populi , aut eorum , quibus populus potestatem dedit , aliquid derogare. Hoc si breviter expositum , pluribus verbis est et rationibus confirmandum , et ita esse , ut descripseris , ostendendum. Postea ad id , quod definieris , factum eius , qui accusabitur , adiungere oportebit .

et ex eo , quod ostenderis esse; verbi causa, Maiestatem minuere; docere, adversarium maiestatem minuisse, et hunc locum totum communi loco confirmare , per quem ipsius facti atrocitas , aut indignitas , aut omnino culpa cum indignatione augatur. Post erit infirmando adversiorum descrip- 54 tio. Ea autem infirmabitur , si falsa demonstrabitur. Hoc ex opinione hominum sumetur , cum , quemadmodum , et quibus in rebus homines in consuetudine scribendi , aut sermocinandi eo verbo uti soleant , considerabitur. Item infirmabitur , si turpis , aut inutilis esse ostendetur eius descriptio- nis approbatio , et si , quae incommoda consecutura sint , eo concessso , ostendetur. id autem ex honestatis et utilitatis partibus sumetur , de quibus in deliberationis paeceptis exponemus. Et si cum definitione nostra adversiorum definitionem conferemus , et nostram , veram , honestam , utilem esse demonstrabimus ; illorum , contra. Quaeremus 55 autem res , aut maiori , aut minori , aut pari in negotio similes , ex quibus affirmetur nostra descriptio. Iam si 18 res plures erunt definienda: ut , si quaeratur , Fur sit , an sacrilegus , qui vasa ex privato sacra surripuerit ; erit utendum pluribus definitionibus : deinde simili ratione causa tractanda. Locus autem communis in eius malitiam , qui non modo rerum , verum etiam verborum potestatem sibi arrogare conetur , ut et faciat quod velit , et id , quod fecerit , quo velit nomine appellat. Deinde defensoris primus locus est , item nominis brevis , et aperta , et ex opinione hominum descriptio ,

hoc modo : Maiestatem minuere , est aliquid de republica , cum potestate non habeas , administrare . Deinde huius confirmatio similibus et exemplis , et rationibus . Postea sui facti ab illa definitione separatio . Deinde locus communis , per quem <sup>56</sup> facti utilitas , aut honestas adaugetur . Deinde sequitur adversariorum definitionis reprehensio , quae iisdem ex locis omnibus , quos accusatori praescripsimus , conficitur : et cetera post eadem praeter communem locum inducentur . Locus autem communis erit defensoris is , per quem indignabitur , accusatorem sui periculi causa , non res solum convertere , verum etiam verba commutare conari . Nam illi quidem communes loci , qui aut calumniae accusatorum demonstrandae , aut misericordiae captandae , aut facti indignandi , aut a misericordia deterrendi causa sumuntur , ex periculi magnitudine , non ex caufae genere , ducuntur . Quare non in ommem causam , sed in omne caufae genus incidunt . Eorum mentionem in coniecturali constitutione fecimus . Inductione autem , cum causa postulabit , utemur .

<sup>19</sup> Cum autem actio translationis aut commutationis indigere videtur , quod non aut is agit , quem oportet , aut cum eo , quicum oportet , aut apud quos , qua lege , qua poena , quo crimine , quo tempore oportet , constitutio translativa appellatur . Huius nobis exempla permulta opus sunt , si singula translationum genera quaeramus : sed quia ratio praeceptorum similis est , exemplorum multitudine supersedendum est . Atque in nostra quidem

consuetudine multis de causis fit , ut rarius incident translationes. nam et praetoriis exceptionibus multae excluduntur actiones , et ita ius civile habemus constitutum , ut causa cadat is , qui non , quemadmodum oportet , egerit. Quare in iure ple-<sup>58</sup> rumque versantur. Ibi enim et exceptiones postulantur , et quodammodo agendi potestas datur , et omnis conceptio privatorum iudiciorum constituitur. In ipsis autem iudiciis rarius incident , et tamen si quando incident , eiusmodi sunt , ut per se minus habeant firmitudinis ; confirmantur autem assumta alia aliqua constitutione : ut in quodam iudicio , cum benefici cuiusdam nomen esset delatum , et , quia parricidii causa subscripta esset , extra ordinem esset acceptum , cum in accusacione alia quaedam crimina testibus et argumentis confirmarentur , parricidii autem solum mentio facta esset : defensor in hoc ipso multum oportet et diu consistat : cum de nece parentis nihil demonstratum sit , indignum facinus esse , ea poena afficer eum , qua parricidae afficiuntur : id autem , si damnetur , fieri necesse esse , quoniam et id causae subscriptum , et ex ea re nomen extra ordinem sit acceptum. Ea igitur poena si affici reum oporteat , damnari quoque non oportere , quoniam ea poena damnationem necessario consequatur. Hic defensor <sup>59</sup> poenae commutationem ex translativo genere inducendo , totam infirmabit accusationem. Verumtamen ceteris quoque criminibus defendendis conjecturali constitutione translationem confirmabit. Exemplum autem translationis in causa nobis po- <sup>20</sup>

fitum sit huiusmodi : Cum ad vim faciendam quidam armati venissent , armati contra praefato fuerunt , et cuidam equiti Romano quidam ex armatis resistenti , gladio manum praecidit . Agit is , cui manus praecisa est , iniuriarum postulat is , qui cum agitur , a praetore exceptionem , *Extra quam*  
60 *in reum capit is praeiudicium fiat*. Hic is , qui agit , iudicium purum postulat : ille , quicum agitur , exceptionem addi , ait , oportere . Quaestio est , Excipiendum sit , an non . Ratio , Non enim oportet , in recuperatorio iudicio , eius maleficii , de quo inter sicarios quaeritur , praeiudicium fieri . Infirmatio rationis , Eiusmodi sunt iniuriae , ut de his indignum sit non primo quoque tempore iudicari . Iudicatio , Atrocitas iniuriarum satisne causae sit , quare , dum de ea iudicetur , de aliquo maiore maleficio , de quo iudicium comparatum sit , praeiudicetur . atque exemplum quidem hoc est . In omni autem causa ab utroque quaeri oportebit , a quo , et per quos , et quo modo , et quo tempore aut agi , aut iudicari , aut quid statui de ea  
61 re conveniat . Id ex partibus iuris , de quibus post dicendum est , sumi oportebit , et ratiocinari , quid in similibus rebus fieri soleat , et videre , utrum malitia aliud agatur , aliud simuletur , an stultitia , an necessitudine , quod alio modo agi non possit , an occasione agendi sic sit iudicium aut actio constituta , an recte , sine ulla re eiusmodi res agatur . Locus autem communis contra eum , qui translationem inducit ; fugere iudicium ac poenam , quia causae diffidat . A translatione

autem ; omnium fore perturbationem , si non ita res agantur , et in iudicium veniant , quo pacto oporteat ; hoc est , si aut cum eo agatur , qui cum non oporteat , aut alia poena , alio crimine , alio tempore : atque hanc rationem ad perturbationem iudiciorum omnium pertinere. Tres igitur eae constitutiones , quae partes non habent , ad hunc modum tractabuntur. Nunc generalem constitutionem , et partes eius consideremus.

Cum et facto , et facti nomine concessio , neque <sup>21</sup> ulla actionis illata controversia , vis et natura , et <sup>62</sup> genus negotii ipsius quaeritur ; constitutionem generalem appellamus. Huius primas esse partes duas nobis videri diximus , negotialem , et iuridicalem . Negotialis est , quae in ipso negotio iuris civilis habet implicatam controversiam. Ea est huiusmodi : Quidam pupillum heredem fecit ; pupillus autem ante mortuus est , quam in suam tutelam venisset. De hereditate ea , quae pupillo venit , inter eos , qui patris pupilli heredes secundi sunt , et inter agnatos pupilli controversia est. Possessio herendum secundorum est. Intentio est agnatorum , Nostra pecunia est , de qua is , cuius agnati sumus , testatus non est. Depulsio est , Immo nostra , qui heredes secundi testamento patris sumus. Quaestio est , Utrorum sit ? Ratio est , Pater enim et sibi , et filio testamentum scripsit , dum is pupillus esset. Quare , quae filii fuerunt , testamento patris nostra fiant necesse est. Infirmatio est rationis , Immo pater sibi scripsit , et secundum heredem non filio , sed sibi iussit esse. Quare , praeterquam quod ipsius

fuit , testamento illius vestrum esse non potest. Iudicatio , Possitne quisquam de filii pupilli retestari : an heredes secundi , ipsius patrisfamilias ,  
63 non filii quoque eius pupilli heredes sint ? Atque hoc non alienum est , quod ad multa pertineat , ne aut nusquam , aut usquequaque dicatur , hic admonere. Sunt causae , quae plures habent rationes in simplici constitutione : quod fit , cum id , quod factum est , aut quod defenditur , pluribus de causis rectum , aut probabile videri potest , ut in hac ipsa causa. Supponatur enim ab heredibus haec ratio , Unius enim pecuniae plures , dissimilibus de causis , heredes esse non possunt , nec unquam factum est , ut eiusdem pecuniae aliis testamento ,  
64 alias lege heres esset : infirmatio haec erit , Non est una pecunia , propterea , quod altera iam erat pupilli adventitia ; cuius heres non , illo tempore , testamento quisquam scriptus erat , si quid pupillo accidisset : et de altera , patris etiam nunc mortui voluntas plurimum valebat , quae iam mortuo pupillo suis heredibus concedebat. Iudicatio est , Unane pecunia fuerit : ac , si hac erunt usi infirmatione , Posse plures esse unius pecuniae heredes dissimilibus de causis ; de eo ipso iudicatio nascitur , Possintne eiusdem pecuniae plures dissimili-  
22 bus generibus esse heredes. Ergo una in constitutione intellectum est , quomodo et rationes , et rationum infirmationes , et praeterea iudicationes plures fiant.

65 Nunc huius generis praecepta videamus. Utrisque , aut etiam omnibus , si plures ambigent , ius

ex quibus rebus constet, est considerandum. Initium ergo eius ab natura ductum videtur: quae-dam autem ex utilitatis ratione aut perspicua no-bis, aut obscura, in consuetudinem venisse: post autem, approbata quaedam, aut a consuetudine aut a vero utilia visa, legibus esse firmata: ac naturae quidem ius esse, quod nobis non opinio, sed quaedam innata vis afferat, ut religionem, pietatem, gratiam, vindicationem, observantiam, veritatem. Religionem, eam, quae in metu et <sup>66</sup> caerimonia deorum sit, appellant: pietatem, quae erga patriam, aut parentes, aut alios sanguine coniunctos officium conservare moneat: gratiam, quae in memoria, et remuneratione officiorum, et honoris, et amicitarum, observantiam teneat: vindicationem, per quam, vim, et contumeliam, defendendo, aut ulciscendo, propulsamus a nobis, et a nostris, qui nobis esse cari debent, et per quam peccata punimus: observantiam, per quam aetate, aut sapientia, aut honore, aut aliqua dignitate antecedentes veremur, et colimus: veri-tatem, per quam damus operam, ne quid aliter, quam confirmaverimus, fiat, aut factum aut fu-turum sit. Ac naturae quidem iura minus ipsa quae-<sup>67</sup> runtur ad hanc controversiam, quod neque in hoc civili iure versantur, et a vulgari intelligentia re-motiora sunt: ad similitudinem vero aliquam, aut ad rem amplificandam saepe sunt inferenda. Consuetudinis autem ius esse putatur id, quod voluntate omnium sine lege vetustas comprobarit. in ea autem iura sunt quaedam ipsa iam certa

propter vetustatem. quo in genere et alia sunt multa , et eorum multo maxima pars , quae praetores edicere consueverunt. Quaedam autem genera iuris , iam certa , consuetudine facta sunt : quod genus pactum , par , iudicatum. Pactum est , quod inter aliquos convenit , quod iam ita iustum putatur , ut iure praestari dicatur. Par , quod in omnes aequabile est. Iudicatum , de quo iam ante sententia alicuius , aut aliquorum constitutum est. Iam iura legitima ex legibus cognosci oportebit. His ergo ex partibus iuris , quidquid aut ex ipsa re , aut ex simili , aut ex maiore minoreve nasci videbitur , attendere , atque elicere pertentando unamquamque partem iuris oportebit. Locorum autem communium , quoniam ( ut ante dictum est ) duo sunt genera , quorum alterum dubiae rei , alterum certae continet amplificationem , quid ipsa causa det , et quid augeri per communem locum possit et oporteat , considerabitur. Nam certi , qui in omnes incident , loci , praescribi non possunt : in plerisque fortasse ab auctoritate iurisconsultorum , et contra auctoritatem dici oportebit. Attendum est autem et in hac , et in omnibus , num quos locos communes , praeter eos , quos exposuimus , ipsa res ostendat. Nunc iuridicale genus et partes eius consideremus.

23 Iuridicallis est , in qua aequi et iniqui natura , et  
69 praemii aut poenae ratio quaeritur. Huius partes sunt duae , quarum alteram absolutam , assumtivam alteram nominamus. Absoluta est , quae ipsa in se , non ut negotialis implicite et abcondite , sed pa-

tentius et expeditius recti et non recti quaestionem continet. Ea est huiusmodi: Cum Thebani Lace-daemonios bello superavissent, et fere mos esset Grais, cum inter se bellum gessissent, ut ii, qui vicissent, tropaeum aliquod in finibus statuerent, victoriae modo in praesentia declarandae causa, non ut in perpetuum belli memoria maneret; aeneum statuerunt tropaeum. Accusantur apud Amphiëtyonas, id est, apud commune Graeciae concilium. Intentio est, Non oportuit. Depulsio est, Oportuit. Quaestio est, Oportueritne. Ratio est, Eam enim ex bello gloriam virtute peperimus, ut eius aeterna insignia posteris nostris relinquere vellemus. Infirmatio est, Attamen aeternum inimicitarum monumentum Graios de Grais statuere non oportet. Iudicatio est, Cum summae virtutis celebrandae causa Graii de Grais aeternum inimicitarum monumentum statuerint, rectene, an contra fecerint. *Hanc* ideo rationem subiecimus, ut hoc causae genus ipsum, de quo agimus, cognosceretur. Nam si eam supposuissimus, qua fortasse usi sunt: Non enim iuste, neque pie bellum gessistis; in relationem criminis delaberemur, de qua post loquemur. Utrumque autem causae genus in hanc causam incidere perspicuum est. In hanc argumentationes ex iisdem locis sumendae sunt, atque in causam negotialem, qua de ante dictum est. Locos autem communes et ex causa ipsa, si quid inerit indignationis aut conquestionis, et ex iuris utilitate, et natura multos et graves sumere licet, et oportebit, si causae dignitas videbitur postulare. Nunc assumtivam partem iuridicialis consideremus. 24

Affumtiva igitur tum dicitur, cum ipsum ex se factum probari non potest; aliquo autem foris adiuncto argumento defenditur. Eius partes sunt quatuor; comparatio, relatio criminis, remotio criminis, concessio. Comparatio est, cum aliquod factum, quod per se ipsum non sit probandum, et ex eo, cuius id causa factum est, defenditur. Ea est huiusmodi: Quidam imperator, cum ab hostibus circumfideretur, neque effugere ullo modo posset, depactus est cum eis, ut arma et impedimenta relinquaret, milites educeret: itaque fecit: armis et impedimentis amissis, praeter spem milites conservavit. Accusatur maiestatis. Incurrit huc definitio. Sed nos hunc locum, de quo agimus, consideremus. Intentio est, Non oportuit arma et impedimenta relinquere. Depulsio est, Oportuit. Quaestio est, Oportueritne? Ratio est, Milites enim omnes periissent. Infirmatio est, aut coniecturalis, Non periissent: aut altera coniecturalis, Non ideo fecisti. Ex quibus sunt iudications, Periissentne? et, Ideone fecerit? aut haec comparativa, cuius nunc indigemus, At enim satius fuit amittere milites, quam arma et impedimenta hostibus concedere. Ex qua iudicatio nascitur, Cum omnes perituri milites essent, nisi ad hanc pactionem venissent, utrum satius fuerit amittere milites, an ad hanc conditionem venire? Hoc causae genus ex his locis tractari oportebit, et adhibere ceterarum quoque constitutionum rationem atque praecepta; ac maxime coniecturis faciendis infirmare illud, quod cum eo, quod criminidabitur, ii, qui accusabuntur, comparabunt. Id

fiet , si aut id , quod dicent defensores futurum fuisse , nisi id factum esset , quo de facto iudicium est , futurum fuisse negabitur : aut si alia ratione , et aliam ob causam , ac dicet se reus fecisse , demonstrabitur esse factum . Eius rei confirmatio , et item contraria de parte infirmatio ex coniecturali constitutione sumetur . Sin autem certo nomine maleficii vocabitur in iudicium , sicut in hac causa ( nam maiestatis arcessitur , ) definitione et definitionis praeceptis uti oportebit . Atque hoc quidem plerumque in genere <sup>25</sup> accedit , ut et coniectura et definitione utendum sit . Sin aliud quoque aliquod genus incidet , eius generis praecepta licebit huc pari ratione transferre . nam accusatori maxime est in hoc elaborandum , ut id ipsum factum , propter quod sibi reus concedi putat oportere , quam plurimis infirmis rationibus . quod facile est , si quam plurimis constitutionibus aggreditur id improbare . Ipsa autem <sup>75</sup> comparatio , separata a ceteris generibus controversiarum , sic ex sua vi considerabitur , si illud , quod comparabitur , aut non honestum , aut non utile , aut non necessarium fuisse , aut non tantopere utile , aut non tantopere honestum , aut non tantopere necessarium demonstrabitur . Deinde oportet accusatorem , illud , quod ipse arguat , ab eo , quod defensor comparat , separare . Id autem faciet , si demonstrabit , non ita fieri solere , neque oportere , neque esse rationem , quare hoc propter hoc fiat , ut , propter salutem militum , ea , quae salutis causa comparata sunt , hostibus tradantur . Postea comparare oportebit cum beneficio maleficium , et om-

nino id, quod arguitur, cum eo, quod factum ab  
defensore laudatur, aut faciendum fuisse demonstra-  
bitur, contendere, et hoc extenuando, maleficii  
magnitudinem simul adaugere. Id fieri poterit, si  
demonstrabitur, honestius, utilius, magis necessa-  
rium fuisse id, quod vitarit reus, quam illud,  
76 quod fecerit. Honesti autem, et utilis, et necessarii  
vis et natura in deliberationis praceptis cognosce-  
tur. Deinde oportebit ipsam illam comparativam  
iudicationem exponere, tanquam causam delibe-  
rativam, et de ea ex deliberationis praceptis dein-  
ceps dicere. Sit enim haec iudicatio, quam ante ex-  
posuimus: Cum omnes perituri milites essent, nisi  
ad hanc pactionem venissent, utrum satius fuerit  
perire milites, an ad hanc pactionem venire. Hoc  
ex locis deliberationis, quasi aliquam in consultatio-  
26 nem res veniat, tractari oportebit. Defensor au-  
tem, quibus in locis ab accusatore aliae constitu-  
tiones erunt inductae, in iis ipse quoque ex iisdem  
constitutionibus defensionem comparabit: ce-  
teros autem omnes locos, qui ad ipsam compara-  
77 tionem pertinebunt, ex contrario tractabit. Loci  
communes erunt, accusatoris, in eum, qui cum  
de facto turpi aliquo, aut inutili, aut utroque fa-  
teatur, quaerat tamen aliquam defensionem, et facti  
inutilitatem, aut turpitudinem cum indignatione pro-  
ferre: defensoris, nullum factum inutile, neque  
turpe, neque item utile, neque honestum putari o-  
portere, nisi, quo animo, quo tempore, qua de causa  
factum sit, intelligatur: qui locus ita communis est,  
ut bene tractatus in hac causa, magno ad persua-

dendum momento futurus sit : et alter locus , per quem magna cum amplificatione , beneficii magnitudo ex utilitate , aut honestate , aut facti necessitudine demonstratur : et tertius , per quem res expressa <sup>78</sup> verbis , ante oculos eorum , qui audiunt , ponitur , ut ipsi se quoque idem facturos fuisse arbitrentur , si sibi illa res , atque ea faciendi causa per idem tempus accidisset.

Relatio criminis est , cum reus id , quod arguitur , confessus , alterius se inductum peccato , iure fecisse demonstrat. Ea est huiusmodi : Horatius occisis tribus Curiatibus , et duobus amissis fratribus , dominum se victor recepit. Is animadvertisit sororem suam de fratum morte non laborantem : sponsi autem nomen appellantem identidem Curiatis cum gemitu et lamentatione . indigne passus , virginem occidit . accusatur. Intentio est , Iniuria sororem occidisti . Depulsio est , iure occidi. Quaestio est , Iurene oc- <sup>79</sup> ciderit. Ratio est , Illa enim hostium mortem lugebat , fratum negligebat ; me et populum Romanum vicisse moleste ferebat. Infirmitatio est , Tamen a fratre indemnata necari non oportuit. Ex qua iudicatio fit : Cum Horatia fratum mortem negligeret , hostium lugeret , fratri et populi Romani victoria non gauderet , oportueritne eam a fratre indemnata necari ? Hoc in genere causae primum si <sup>27</sup> quid ex ceteris dabitur constitutionibus , sumi oportebit , sicut in comparatione praeceptum est : postea si qua facultas erit , per aliquam constitutionem illum , in quem crimen transfertur , defendere : deinde , levius esse , quod in alterum peccatum <sup>80</sup>

reus transferat , quam quod ipse suscepert : postea translationis partibus uti , et ostendere , a quo , et per quos , et quo modo , et quo tempore aut agi , aut iudicari , aut statui de ea re convenerit ; ac simul ostendere , non oportuisse ante supplicium , quam iudicium , interponere . Tum leges quoque et iudicia demonstranda sunt , per quae potuerit id peccatum , quod sponte sua reus punitus sit , moribus et iudicio vindicari . Deinde negare debet , audiri oportere id , quod in eum criminis conferatur , de quo is ipse , qui conferat , iudicium fieri noluerit : et id , quod iudicatum non sit , pro infecto haberi oportere : postea impudentiam demonstrare eorum , qui eum nunc apud iudices accusent , quem sine iudicibus ipsi condemnarint : et de eo iudicium faciant , de quo iam ipsi supplicium sumserint . Postea perturbationem iudicii futuram dicemus , et iudices longius , quam potestatem habeant , progressuros , si simul et de reo , et de eo , quem reus arguat , iudicarint : deinde , hoc si constitutum sit , ut peccata homines peccatis , et iniurias iniuriis ulciscantur , quantum incommode- rum consequatur : ac si idem facere ipse , qui nunc accuset , voluisse , ne hoc quidem ipso quidquam opus fuisse iudicio : si vero ceteri quoque idem faciant , omnino iudicium nullum futurum . Postea demonstrabitur , ne , si iudicio quidem illa damnata es- set , in quam id crimen ab reo conferatur , potuisse hunc ipsum de illa supplicium sumere : quare esse indignum , eum , qui ne de damnata quidem poenas sumere potuisset , de ea supplicium sumisse , quae

ne adducta quidem sit in iudicium. Deinde postulabit, ut legem, qua lege fecerit, proferat. Deinde quemadmodum in comparatione praecipiebamus, ut illud quod comparabitur, extenuaretur ab accusatore quam maxime: sic in hoc genere oportebit illius culpam, in quem crimen transferetur, cum huius maleficio, qui se iure fecisse dicat, comparare. Postea demonstrandum est, non esse illud eiusmodi, ut ob id hoc fieri convenerit. Extrema est, ut in comparatione, assumptio iudicationis, et de ea per amplificationem ex deliberationis praceptis dictio. Defensor autem, quae per alias constitutiones in- 28 ducentur, ex iis locis, qui traditi sunt, infirmabit: 83 ipsam autem relationem comprobabit, primum augendo eius, in quem refert crimen, culpam et audaciam, et quam maxime per indignationem, si res feret, iuncta conquestione, ante oculos ponendo. Postea levius demonstrando reum punitum, quam fit ille promeritus, et suum supplicium cum illius iniuria conferendo. Deinde oportebit eos locos, qui ita erunt ab accusatore tractati, ut refelli, et contrariam in partem converti possint, quo in genere sunt tres extremi, contrariis rationibus infirmare. Illa autem acerrima accusatorum crimina- 84 tio, per quam perturbationem fore omnium iudiciorum demonstrant, si de indemnato supplicii sumendi potestas data sit, levabitur, primum si eiusmodi demonstrabitur iniuria, ut non modo viro bono, verum omnino homini libero videatur non fuisse toleranda: deinde ita perpicua, ut ne ab ipso quidem, qui fecisset, in dubium vocaretur: deinde

eiusmodi , ut in eam is maxime debuerit animadvertere , qui animadverterit ; ut non tam rectum , non tam fuerit honestum , in iudicium illam rem pervenire , quam eo modo , atque ab eo vindicari , quomodo et a quo sit vindicata : postea sic rem fuisse apertam , ut iudicium de ea re fieri nihil attinuerit.

85 Atque hic demonstrandum est rationibus , et rebus similibus , permultas ita atroces , et perspicuas res esse , ut de his non modo non necesse sit , sed ne utile quidem , quam mox iudicium fiat , exspectare . Locus communis accusatoris in eum , qui cum id , quod arguitur , negare non possit , tamen aliquid sibi spei comparet ex iudiciorum perturbatione . Atque hic utilitatis iudiciorum demonstratio , et de eo conquestio , qui supplicium dederit indemnatus ; in eius autem , qui sumserit , audaciam et crudelitatem , indignatio . Ab defensore , in eius , quem ultus sit , audaciam sui conquestione : rem non ex nomine ipsius negotii , sed ex consilio eius , qui fecerit , et causa , et tempore considerari oportere : quid mali futurum sit , aut ex iniuria , aut ex fcelere alicuius , nisi tanta , et tam perspicua audacia ab eo , ad cuius famam , aut ad parentes , aut ad liberos pertinuerit , aut ad aliquam rem , quam caram esse omnibus , aut necesse est , aut oportet esse , fuerit vindicata .

29 Remotio criminis est , cum eius intentio facti , quod ab adversario infertur , in aliud , aut in aliud demovetur . Il fit bipartito . nam tum causa , 87 tum res ipsa removetur . Causae remotionis hoc nobis exemplo sit : Rhodii quosdam legarunt

Athenas. Legatis quaestores sumtum , quem oportebat dari , non dederunt. Legati profecti non sunt. Accusantur. Intentio est , Proficisci oportuit. Depulsio est , Non oportuit. Quaestio est , Oportueritne. Ratio est , Sumtus enim , qui de publico dari solet , is ab quaestore non est datus. Infirmitatio est , Vos tamen id , quod publice vobis datum erat negotii , confidere oportebat. Iudicatio est , Cum iis , qui legati erant , sumtus , qui de publico debebatur , non daretur , oportueritne eos confidere nihilominus legationem. Hoc in genere primum , sicut in ceteris , si quid aut ex coniecturali , aut ex alia constitutione sumi possit , videre oportebit. Deinde pleraque et ex comparatione , et ex relatione criminis in hanc quoque causam convenire poterunt. Accusator autem illum , cuius culpa 89 id factum reus dicet , primum defendet , si poterit : si minus poterit , negabit , ad hoc iudicium , illius , sed huius , quem ipse accuset , culpam pertinere. Postea dicet , suo quemque officio consulere oportere : nec , si ille peccasset , hunc oportuisse peccare : deinde si ille deliquerit , separatim illum , sicut hunc , accusari oportere , et non cum huius defensione coniungi illius accusationem. Defensor autem cum cetera , si qua ex aliis incident constitutionibus , pertractarit , de ipsa remotione sic argumentabitur. Primum cuius acciderit culpa , demonstrabit : deinde , cum id aliena culpa accidisset , ostendet se aut non potuisse , aut non debuisse id facere , quod accusator dicat oportuisse : quod non potuerit , ex utilitatis partibus , in qui-

bus est necessitudinis vis implicata : quod non debuerit , ex honestate considerabitur. De utroque distinctius in deliberativo genere dicetur. Deinde omnia facta esse ab reo , quae in ipsius fuerint potestate ; quod minus , quam convenerit ,  
factum sit , culpa id alterius accidisse. Deinde in alterius culpa exponenda demonstrandum est , quantum voluntatis et studii fuerit in ipso : et id signis confirmandum huiusmodi , ex cetera diligentia , ex ante factis , aut dictis ; atque hoc ipsi utile fuisse facere , inutile autem non facere , et cum cetera vita magis hoc fuisse consentaneum , quam quod propter alterius culpm non fecerit. Si autem non in hominem certum , sed in rem aliquam causa demovebitur , ut in hac eadem re , si quaestor mortuus esset , et idcirco legatis pecunia data non esset ; accusatione alterius , et culpae depulsione deonta , ceteris similiter uti locis oportebit , et ex concessionis partibus , quae convenient , assumere :  
de quibus post nobis dicendum erit. Loci autem communes iidem utrisque fere , qui superioribus assumtivis , incident : hi tamen certissimi : accusatoris , facti indignatio ; defensoris , cum in alio culpa sit , in ipso non sit , suppicio se affici non oportere.

Ipsius autem rei fit remotio , cum id , quod datur criminis , negat neque ad se , neque ad officium suum reus pertinuisse : nec , si quid in eo delictum sit , sibi attribui oportere. Id genus causae est huiusmodi : In eo foedere , quod factum est quondam cum Samnitibus , quidam ado-

lescens nobilis porcam sustinuit iussu imperatoris. Foedere autem ab senatu improbatō, et imperatore Samnitibus dedito, quidam in senatu eum quoque dicit, qui porcam tñuerit, dedi oportere. Intentio est, Dedi oportet. Depulsio est, Non 92 oportet. Quaestio est, Oporteatne? Ratio est, Non enim meum fuit officium, nec mea potestas, cum et id aetatis, et privatus essem, et esset summa cum auctoritate et potestate imperator, qui videret, ut satis honestum foedus feriretur. Infirmitatio est, At enim quoniam tu particeps factus es in turpissimo foedere summae religionis, dedi te convenit. Iudicatio est, Cum is, qui potestatis nihil habuerit, iussu imperatoris in foedere, et in tanta religione interfuerit, dedendus sit hostibus, necne? Hoc genus causae cum superiore hoc differt, quod in illo concedit se reus oportuisse facere id, quod fieri dicat accusator oportuisse, sed alicui rei, aut homini causam attribuit, quae voluntati suae fuerit impedimento, sine concessionis partibus. nam earum maior quaedam vis est; quod paulo post intelligetur. in hoc au- 93 tem non accusare alterum, nec culpam in alium transferre debet, sed demonstrare, eam rem nihil ad se, neque ad potestatem, neque ad officium suum pertinuisse aut pertinere. Atque in hoc genere hoc accidit novi, quod accusator quoque saepe ex remotione criminationem conficit. Ut, si quis eum accuset, qui, cum praetor esset, in expeditionem ad arma populum vocarit, cum consules aedescent. Nam ut in superiore exemplo reus

ab suo officio et a sua potestate factum demovebat ; sic in hoc ab eius officio ac potestate , qui accusatur , ipse accusator factum removendo , hac 94 ipsa ratione confirmat accusationem. In hac ab utroque ex omnibus honestatis , et utilitatis partibus , exemplis , signis , ratiocinando , quid cuiusque officii , iuris , potestatis sit , quaeri oportebit , et fueritne ei , quo de agitur , id iuris , officii , potestatis attributum , necne. Locos autem communes ex ipsa re , si quid indignationis ac conquestionis habebit , sumi oportebit.

31 Concessio est , per quam non factum ipsum probatur ab reo : sed ut ignoscatur , id petitur. cuius partes sunt duae , purgatio et deprecatio. Purgatio est , per quam eius , qui accusatur , non factum ipsum , sed voluntas defenditur. Ea habet partes 95 tres , imprudentiam , casum , necessitudinem. Imprudentia est , cum scisse aliquid is , qui arguitur , negatur : ut apud quosdam lex erat , Ne quis Diana vitulum immolaret. nautae quidam , cum adversa tempestate in alto iactarentur , voverunt , si eo portu , quem conspiciebant , potiti essent , ei deo , qui ibi esset , se vitulum immolatus. Casu erat in eo portu fanum Diana eius , cui vitulum immolari non licebat. Imprudentes legis , cum exissent , vitulum immolaverunt. Accusantur. Intentio est , Vitulum immolasti ei deo , cui non licebat. Depulsio est in concessione posita. Ratio est , Nescivi non licere. Infirmatio est , Tamen , quoniam fecisti quod non licebat , ex lege supplicio dignus es. Iudicatio est , Cum id fecerit , quod

non oportuerit, et id non oportere nescierit, sitne supplicio dignus? Casus autem inferetur in con-<sup>96</sup>cessione, cum demonstrabitur aliqua fortunae vis voluntati obstatisse, ut in hac: Cum Lacedaemoniis lex esset, ut, hostias nisi ad sacrificium quod-dam redemtor praebuisset, capitale esset; hostias is, qui redemerat, cum sacrificii dies instaret, in urbem ex agro coepit agere. tum subito magnis commotis tempestatibus fluvius Eurotas is, qui propter Lacedaemonem fluit, ita magnus et ve-hemens factus est, ut eo traduci victimae nullo modo possent. Redemtor, suae voluntatis ostendae causa, hostias constituit omnes in litore, ut, qui trans flumen essent, videre possent. Cum omnes studio eius subitam fluminis magnitudinem scirent fuisse impedimento, tamen quidam capitis arcessierunt. Intentio est, Hostiae, quas debuisti, ad sacrificium praesto non fuerunt. Depulsio est, concessio. Ratio, Flumen enim subito accrevit, et ea re traduci non potuerunt. Infirmatio est, Tamen, quoniam, quod lex iubet, factum non est, supplicio dignus es. Iudicatio est, Cum in ea re redemtor contra legem fecerit, qua in re stu-dio eius subita fluminis obliterit magnitudo, sup-plicione dignus sit? Necessitudo autem infertur, <sup>32</sup> cum vi quadam reus id, quod fecerit, fecisse de-fenditur, hoc modo: Lex est apud Rhodios, ut, si qua rostrata in portu navis deprehensa sit, pu-blicetur. Cum magna in alto tempestas esset; vis ventorum, invitis nautis, Rhodiorum in portum navim coegit. Quaestor navim populi vocat. Na-

vis dominus negat publicari oportere. Intentio est, Rostrata navis in portu deprehensa est. Depulsio est, concessio. Ratio, Vi et necessario sumus in portum coacti. Infirmatio est, Navim ex lege tam  
men populi esse oportet. Iudicatio est, Cum ro-  
stratam navim in portu deprehensam lex publica-  
rit, cumque haec navis, invitis nautis, vi tem-  
pestatis in portum coniecta sit; oporteatne eam  
99 publicari. Horum trium generum idcirco unum in  
locum contulimus exempla, quod similis in ea  
praeceptio argumentorum traditur. Nam in his  
omnibus primum, si quid res ipsa dabit faculta-  
tis, conjecturam induci ab accusatore oportebit,  
ut id, quod voluntate factum negabitur, consul-  
to factum, suspicione aliqua demonstretur: deinde  
inducere definitionem necessitudinis, aut casus,  
aut imprudentiae, et exempla ad eam definitio-  
nem adiungere, in quibus imprudentia fuisse vi-  
deatur, aut casus, aut necessitudo, et ab his id,  
quod reus inferat, separare, [ id est, ostendere  
dissimile, ] quod levius, facilius, non ignorabile,  
non fortuitum, non necessarium fuerit: postea  
demonstrare, potuisse vitari; et hac ratione pro-  
videri potuisse, si hoc, aut illud fecisset; aut  
ne sic fecisset, praecaveri: et definitionibus ostendere,  
non hanc imprudentiam, aut casum, aut  
necessitudinem, sed inertiam, negligentiam, fatui-  
100 tatem nominari oportere. Ac si qua necessitudo  
turpiditudinem videbitur habere, oportebit per loco-  
rum communium implicationem redarguentem de-  
monstrare, quidvis perpeti, mori denique satius

fuisse, quam eiusmodi necessitudini obtemperare. Atque tum ex his locis, de quibus in negotiali parte dictum est, iuris et aequitatis naturam oportebit quaerere, et quasi in absoluta iuridicali, per se hoc ipsum ab rebus omnibus separatim considerare. Atque hoc in loco, si facultas erit, exemplis uti oportebit, quibus in simili excusatione non sit ignotum: et contentione, magis illis ignoscendum fuisse: et ex deliberationis partibus, turpe aut inutile esse concedi eam rem, quae ab adversario commissa sit; permagnum esse et magno futurum detimento, si ea res ab iis, qui potestatem habent vindicandi, neglecta sit. Defensor autem conversis omnibus his partibus 33 poterit uti. Maxime autem in voluntate defendenda commorabitur, et in ea re adaugenda, quae voluntati fuerit impedimento: et se plus, quam fecerit, facere non potuisse: et in omnibus rebus voluntatem spectari oportere: et se convinci non posse, quod non absit a culpa: et ex suo nomine communem hominum infirmitatem posse damnari. Deinde nihil indignius esse, quam eum, qui culpa careat, suppicio non carere. Loci autem communes accusatoris, unus in confessione, et alter, quanta potestas peccandi relinquatur, si semel institutum sit, ut non de facto, sed de facti causa quaeratur: defensoris, conquestio calamitatis 102 eius, quae non culpa, sed vi maiore quadam acciderit, et de fortunae potestate, et hominum infirmitate, et uti suum animum, non eventum considerent. In quibus omnibus conquestionem

suarum aerumnarum , et crudelitatis adversariorum indignationem inesse oportebit. Ac neminem mirari conveniet , si aut in his , aut in aliis exemplis scripti quoque controversiam adiunctam videbit. Quo de genere post erit nobis separatim dicendum , propterea quod quaedam genera causarum , simpliciter et ex sua vi considerantur : quae-  
dam autem sibi aliud quoque aliquod controver-  
<sup>103</sup> siae genus assumunt. Quare omnibus cognitis , non erit difficile in unamquamque causam transferre , quod ex eo quoque genere conveniet : ut in his exemplis concessionis inest omnibus scripti controversia ea , quae ex scripto et sententia nominatur : sed quia de concessione loquebamur , in eam praecepta dedimus. Alio autem loco de scripto et sententia dicemus. Nunc in alteram concessionis partem considerationem intendemus.

**34** Deprecatio est , in qua non defensio facti , sed <sup>104</sup> ignoscendi postulatio continetur. Hoc genus vix in iudicio probari potest , ideo quod concessio peccato , difficile est ab eo , qui peccatorum vindex esse debet , ut ignoscat , impetrare. Quare parte eius generis , cum causam non in eo constitueris , uti licebit. Ut si pro aliquo claro , aut forti viro , cuius in rempublicam multa sint beneficia , dixeris ; possis , cum videaris non uti depreciatione , uti tamen , ad hunc modum : Quod si , iudices , hic pro suis beneficiis , pro suo studio , quod in vos habuit semper , tali suo tempore , multorum suorum recte factorum causa , uni delicto ut ignosceretis postularet , tam dignum

vestra mansuetudine, quam virtute huius esset, iudices, a vobis hanc rem, hoc postulante, impetrari. Deinde augere beneficia licebit, et iudices per locum communem ad ignoscendi voluntatem deducere. Quare hoc genus, quamquam in iudiciis <sup>105</sup> non versatur, nisi quadam ex parte: tamen quia et pars ipsa inducenda nonnunquam est, et in senatu, aut in consilio saepe omni in genere tractanda, in id quoque paecepta ponemus. Nam in senatu, et in consilio de Syphace diu deliberatum est; et de Q. Numitorio Puilo apud L. Opimum, et eius consilium diu dictum est. Et magis in hoc quidem ignoscendi, quam cognoscendi postulatio valuit. nam semper animo bono se in populum Romanum fuisse non tam facile probabat, cum conjecturali constitutione uteretur, quam ut, propter posterius beneficium, sibi ignosceretur, cum depreciationis partes adiungeret. Oportebit igitur eum, <sup>35</sup> qui sibi ut ignoscatur, postulabit, commemorare, <sup>106</sup> si qua sua poterit beneficia, et si poterit, ostendere, ea maiora esse, quam haec, quae deliquerit, ut plus ab eo boni quam mali profectum esse videatur: deinde maiorum suorum beneficia, si qua existabunt, proferre: deinde ostendere, non odio, neque crudelitate fecisse, quod fecerit, sed aut stultitia, aut impulsu alicuius, aut aliqua honesta aut probabili causa: postea polliceri, et confirmare, se et hoc peccato doctum, et beneficio eorum, qui sibi ignoverint, confirmatum, omni tempore a tali ratione absfuturum: deinde spem ostendere, aliquo se in loco, magno iis, qui sibi con-

107 cesserint, usui futurum: postea, si facultas erit, se, aut consanguineum, aut iam a maioribus in primis amicum esse demonstrabit; et amplitudinem suae voluntatis, et nobilitatem generis eorum, qui se salvum velint, et dignitatem ostendere, et cetera ea, qua personis ad honestatem et amplitudinem sunt attributa, cum con questione, sine arrogancia, in se esse demonstrabit, ut honore potius aliquo, quam ullo supplicio dignus esse videatur: deinde ceteros proferre, quibus maiora delicta concessa sint. Ac multum proficiet, si se misericordem in potestate, et propensum ad ignoscendum fuisse ostendet. Atque ipsum illud peccatum erit extenuandum, ut quam minimum obfuisse videatur; et aut turpe, aut inutile demonstrandum, tali de 108 homine supplicium sumere. Deinde locis communibus misericordiam captare oportebit ex iis praecipitis, quae in primo libro sunt exposita. Adversarius autem malefacta augebit: nihil imprudenter, sed omnia ex crudelitate et malitia facta dicet: ipsum immisericordem, superbum fuisse: et, si poterit, ostendet, semper inimicum fuisse, et amicum fieri nullo modo posse. Si beneficia proferet: aut aliqua de causa facta, non propter benevolentiam demonstrabit; aut postea odium esse acre suscep tum; aut illa omnia maleficiis esse deleta; aut leviora beneficia, quam maleficia; aut, cum beneficiis honos habitus sit, pro maleficio poenam sumi oportere. Deinde turpe esse, aut inutile, ignosci.

109 Deinde, de quo ut potestas esset, saepe optarint, in eum potestate non uti, summam esse fluitiam;

et cogitare oportere , quem animum in eum , vel quale odium habuerint. Locus autem communis erit , indignatio maleficii ; et alter , eorum misereri oportere , qui propter fortunam , non propter malitiam in miseriis sint. Quoniam igitur in generali constitutione tamdiu propter eius partium multitudinem commoramus , ne forte varietate et dissimilitudine rerum diductus alicuius animus in quendam errorem deferatur : quid etiam nobis ex eo genere restet , et quare restet , admonendum videtur.

Iuridicalem causam esse dicebamus , in qua aequi et iniqui natura , praemii aut poenae ratio quaeretur. Eas causas , in quibus de aequo et iniquo 37 quaeritur , exposuimus. Restat nunc , ut de praemio et <sup>110</sup> de poena explicemus. Sunt enim multae causae , quae ex praemii alicuius petitione constant. nam et apud iudices de praemio saepe accusatorum quaeritur , et a senatu , aut a consilio aliquod praemium saepe petitur. Ac neminem conveniet arbitrari , nos , cum aliquod exemplum ponamus , quod in senatu agatur , ab iudicali genere exemplorum recedere. Quidquid enim de homine probando , aut improbando dicitur , cum ad eam dictionem sententiarum quoque ratio accommodetur , id non , et si per sententiae dictionem agitur , deliberativum est : sed quia de homine statuitur , iudiciale est habendum. Omnino autem qui diligenter omnium causarum vim et naturam cognoverit , cum genere , tum etiam forma eas intelliget dissidere. Ceteris autem partibus aptas inter se omnes , et aliam in aliam

111 implicatam videbit. Nunc de praemiis consideremus.  
L. Licinius Crassus consul quosdam in citeriore Gallia,  
nullo illustri, neque certo duce, neque eo nomine, ne-  
que numero praeditos, ut digni essent, qui hostes po-  
puli Romani dicerentur; quod tamen excursionibus  
et latrociniis infestam provinciam redderent, consec-  
tatus est, et confecit: Romam redit: triumphum ab  
senatu postulat. Hic, ut et in deprecatione, nihil ad  
nos attinet, rationibus et confirmationibus rationum  
supponendis, ad iudicationem pervenire: propterea  
quod, nisi alia quoque incidet constitutio, aut pars  
constitutionis, simplex erit iudicatio, et in quaestio-  
ne ipsa continebitur. In deprecatione, huiusmodi, O-  
porteatne poena affici? In hac, huiusmodi, Opor-  
teatne praemium dari? Nunc ad praemii quaestio-  
38 nem appositos locos exponemus. Ratio igitur praemii  
quatuor est in partes distributa; in beneficia, in  
hominem, in praemii genus, in facultates. Beneficia  
ex sua vi, ex tempore, ex animo eius, qui fecit, ex  
casu considerantur. Ex sua vi quaerentur hoc mo-  
do: magna, an parva; facilia, an difficilia; singula-  
ria sint, an vulgaria; vera, an falsa quadam ex ra-  
tione honestentur: ex tempore autem, si tum, cum  
indigeremus; cum ceteri non possent, aut nollent  
opitulari; si tum, cum spes deseruisset: ex animo,  
si non sui commodi causa, sed eo consilio fecit om-  
nia, ut hoc confidere posset: ex casu, si non for-  
tuna, sed industria factum videbitur, aut si indu-  
stria fortuna obstitisset. In hominem autem; qui-  
bus rationibus vixerit, quid sumtus in eam rem  
aut laboris insumferit; ecquid aliquando tale fe-

cerit; num alieni laboris, aut deorum bonitatis praemium sibi postulet; num aliquando ipse talis ob causam praemio aliquem affici negarit oportere; aut num iam satis pro eo, quod fecerit, honos habitus sit; aut num necesse fuerit ei facere id, quod fecerit; aut num huiusmodi sit factum, ut, nisi fecisset, suppicio dignus esset, non, quia fecerit, praemio; aut num ante tempus praemium petat, et spem incertam certo venditet pretio; aut num, quo supplicium aliquod vitet, eo praemium postulet, uti de se praeiudicium factum esse videatur. In praemii autem genere, 39 quid, et quantum, et quamobrem postuletur, et quo, et quanto quaeque res praemio digna sit, considerabitur: deinde, apud maiores quibus hominibus, et quibus de causis talis honos sit habitus, quaeretur: deinde, ne is honos nimium perva- 114 getur. Atque hic eius, qui contra aliquem praemium postulantem dicet, locus erit communis, Praemia virtutis et officii sancta et casta esse oportere, neque ea aut cum improbis communicari, aut in mediocribus hominibus pervulgari: et alter, Minus homines virtutis cupidos fore, virtutis praemio pervulgato; quae enim rara, et arcta sint, ea ex praemio pulcra et iucunda hominibus videri: et tertius, Si existant, qui apud maiores nostros ob egregiam virtutem tali honore dignati sunt, nonne de sua gloria, cum pari praemio tales homines affici videant, delibari putent? et eorum enumeratio, et cum eis, quos contra dicat, comparatio. Eius autem, qui praemium petet, facti

sui amplificatio, et eorum, qui praemio affecti sunt,  
115 cum suis factis contentio. Deinde ceteros a virtutis studio repulsum iri, si ipse praemio non sit affectus. Facultates autem considerantur, cum aliquod pecuniarum praemium postulatur: in quo utrum copia sit agri, vectigalium, pecuniae, an penuria, consideratur. Loci communes, Facultates augere, non minuere oportere, et Impudentem esse, qui pro beneficio non gratiam, verum mercedem postulet: contra autem de pecunia ratiocinari, sordidum esse, cum de gratia referenda deliberetur; et se non pretium pro facto, sed honorem [ ita ut factitatum sit ] pro beneficio postulare. Ac de constitutionibus quidem satis dictum est: nunc de iis controversiis, quae in scripto versantur, dicendum videtur.

40 In scripto versatur controversia, cum ex scriptio-  
116 nis ratione aliquid dubii nascitur. Id sit ex ambiguo, ex scripto et sententia, ex contrariis legibus, ex ratiocinatione, ex definitione. Ex ambiguo autem nascitur controversia, cum quid senserit scriptor, obscurum est, quod scriptum duas pluresve res significat, ad hunc modum: Paterfamilias, cum filium heredem faceret, vasorum argenteorum centum pondo uxori suae sic legavit: *Heres meus uxori meae vasorum argenteorum pondo centum, quae volet, dato.* Post mortem eius vas magnifica, et pretiosa caelata petit a filio mater. ille se, quae ipse vellet, debere dicit. Primum, si fieri poterit, demonstrandum est, non esse ambigu scriptum; propterea quod omnes in consuetudine sermonis sic uti soleant eo verbo uno

pluribusve in eam sententiam , in quam is , qui dicet , accipiendum esse demonstrabit . Deinde ex superiore et ex inferiore scriptura docendum , id , quod quaeratur , fieri perspicuum . Quare si ipsa separatim ex se verba considerentur , omnia , aut pleraque , ambigua visum iri . Quae autem ex omni considerata scriptura perspicua fiant , haec ambigua non oportere existimari . Deinde , qua in sententia scriptor fuerit , ex ceteris eius scriptis , factis , dictis , animo , atque vita eius sumi oportebit , et eam ipsam scripturam , in qua inerit illud ambiguum , de quo quaeritur , totam omnibus ex partibus pertinare , si quid , aut ad id appositorum sit , quod nos interpretemur , aut ei , quod adversarius intelligat , adversetur . Nam facile , quid verisimile sit eum voluisse , qui scripsit , ex omni scriptura , et ex persona scriptoris , atque iis rebus , quae personis attributae sunt , considerabitur . Deinde erit demon-  
strandum , si quid ex ipsa re dabitur facultatis , id , quod adversarius intelligat , multo minus commode fieri posse , quam id , quod nos accipimus , quod illius rei neque administratio , neque exitus ullus existet ; nos quod dicamus , facile et commode transfigi posse . ut in hac lege ( nihil enim prohibet fictam exempli loco ponere , quo facilius res intelligatur ) *Meretrix coronam auream ne habeto . si habuerit , publica esto , contra eum , qui meretricem publicari dicat ex lege oportere , possit dici , neque administrationem esse ullam publicae meretricis , neque exitum legis in meretrice publicanda . at in auro publicando et administrationem et exitum*

41 facilem esse, et incommodi nihil inesse. Ac dili-  
119 genter illud quoque attendere oportebit, num,  
illo probato, quod adversarius intelligat, utilior  
res, aut honestior, aut magis necessaria, a scriptore  
neglecta videatur. Id fiet, si id, quod nos demon-  
strabimus, honestum, aut utile, aut necessarium  
demonstrabimus: et, si id, quod ab adversariis di-  
cetur, minime eiusmodi dicemus esse. Deinde si in  
lege erit ex ambiguo controversia, dare operam  
oportebit, ut de eo, quod adversarius intelligat,  
120 alia in lege cautum esse doceatur. Per multum au-  
tem proficiet, illud demonstrare, quemadmodum  
scripsisset, si id, quod adversarius accipiat, fieri,  
aut intelligi voluisse: ut in hac causa, in qua de  
vasis argenteis quaeritur, possit mulier dicere, ni-  
hil attinuisse adscribi, *quae volet*, si heredis volun-  
tati permitteret. eo enim non adscripto, nihil inesse  
dubitacionis, quin heres, quae ipse vellet, daret.  
Amentiam igitur fuisse, cum heredi vellet cavere,  
id adscribere, quo non adscripto, nihilominus he-  
121 redi caveretur. Quare hoc genere magnopere tali-  
bus in causis uti oportebit: si hoc modo scripsisset,  
isto verbo usus non esset, non isto loco verbum  
istud collocasset. Nam ex his sententia scriptoris ma-  
xime perspicitur. Deinde quo tempore scriptum  
sit, quaerendum est, ut, quid eum voluisse in eius-  
modi tempore verisimile sit, intelligatur. Post ex  
deliberationis partibus: quid utilius, et quid hone-  
stius, et illi ad scribendum, et his ad comprobandum  
sit, demonstrandum: et ex his, si quid amplificatio-  
nis dabitur, communibus utrosque locis uti oportebit.

Ex scripto et sententia controversia consistit : 42  
cum alter verbis ipsis, quae scripta sunt, utitur;  
alter ad id, quod scriptorem sensisse dicet, om-  
nem adiungit dictio[n]em. Scriptoris autem senten- 122  
tia ab eo, qui sententia se defendet, tum semper  
ad idem spectare, et idem velle demonstrabitur:  
tum aut ex facto, aut ex eventu aliquo ad tem-  
pus id, quod instituit, accommodabitur. Semper  
ad idem spectare, hoc modo: Paterfamilias cum  
liberorum nihil haberet, uxorem autem haberet,  
in testamento ita scripsit: *Si mihi filius genitus  
unus, pluresve, is mihi heres esto.* Deinde quae asso-  
lent. Postea, *Si filius ante moritur, quam in tu-  
telam suam venerit, tu mihi, dicebat, secundus he-  
res esto.* Filius non est natus. ambigunt agnati cum  
eo, qui est heres, si filius ante, quam in suam  
tutelam veniat, mortuus sit. In hoc genere non 123  
potest hoc dici, ad tempus, aut ad eventum ali-  
quem sententiam scriptoris oportere accommodari;  
propterea, quod ea sola demonstratur, qua fretus  
ille, qui contra scriptum dicit, suam esse heredi-  
tam defensit. Alterum autem genus est eorum,  
qui sententiam inducunt. in quo non simplex vo-  
luntas scriptoris ostenditur, quae in omne tempus,  
et in omne factum idem valeat: sed ex quodam  
facto, aut eventu ad tempus interpretanda dicitur.  
Ea partibus iuridicalis assumtivae maxime sustine-  
tur. Nam tum inducitur comparatio, ut in eum,  
qui, cum lex aperiri portas noctu vetaret, ape-  
ruit quodam in bello, et auxilia quaedam in op-  
pidum recepit, ne ab hostibus oppimerentur, si

foris essent , quod prope muros hostes castra ha-  
124 berent : tum relatio criminis , ut in eo milite ,  
qui , cum communis lex omnium hominem occi-  
dere vetaret , tribunum [ militum ] suum , qui  
vim sibi afferre conaretur , occidit : tum remotio  
criminis , ut in eo , qui , cum lex , quibus diebus  
in legationem proficisceretur , praestituerat , quia  
sumtum quaestor non dedit , profectus non est : tum  
concessio per purgationem , et per imprudentiam ,  
ut in vituli immolatione : et per vim , ut in navi  
rostrata : et per casum , ut in Eurotae fluminis  
magnitudine. Quare aut ita sententia inducetur ,  
ut unum quiddam voluisse scriptor demonstretur :  
aut sic , ut in eiusmodi re et tempore , hoc voluisse  
doceatur.

43 Ergo is , qui scriptum defendit , his locis ple-  
125 rumque omnibus , maiore autem parte semper po-  
terit uti. Primum scriptoris collaudatione , et loco  
communi , nihil eos , qui iudicent , nisi id , quod  
scriptum sit , spectare oportere : et hoc eo magis ,  
si legitimum scriptum proferetur , id est , aut lex  
ipsa , aut ex lege aliquid. Postea quod vehementissi-  
mum est , facti , aut intentionis adversariorum cum  
ipso scripto contentione , quid scriptum sit , quid  
factum , quid iuratus iudex : quem locum multis mo-  
dis variare oportebit. Tum ipsum secum admiran-  
tem , quidnam contra dici possit : tum ad iudicis of-  
ficium revertentem , et ab eo quaerentem , quid  
praeterea audire , aut exspectare debeat : tum ipsum  
adversarium , quasi intentantis loco , producendo ,  
hoc est , interrogando , utrum scriptum neget esse

eo modo , an ab se contra factum esse , aut contra contendi neget : utrum negare ausus sit , se dicere desitum. Si neutrum neget , et contra tamen dicat : <sup>126</sup> nihil esse , quo hominem impudentiorem quisquam se visurum arbitretur. In hoc ita commorari conveniet , quasi nihil praeterea dicendum sit , et quasi contra dici nihil possit , saepe id , quod scriptum est , recitando ; saepe cum scripto factum adversarii confligendo ; atque interdum acriter ad iudicem ipsum revertendo. Quo in loco iudici demonstrandum est , quid iuratus sit , quid sequi debeat : duabus de causis iudicem dubitare oportere , si aut scriptum sit obscurum , aut neget aliquid adversarius : cum et scriptum <sup>44</sup> aperte sit , et adversarius omnia confiteatur , tum iudicem legi parere , non interpretari legem oportere. Hoc loco confirmato , tum diluere ea , quae contra dici poterant , oportebit. Contra autem dicetur , si aut prorsus aliud sensisse scriptor , et scripsisse aliud demonstrabitur : ut in illa de testamento , quam possumus , controversia , aut causa assumtiva inferetur , • quamobrem scripto non potuerit , aut non oportuerit obtemperari. Si aliud sensisse scriptor , aliud <sup>128</sup> scripsisse dicetur , is , qui scripto utetur , hoc dicet , non oportere de eius voluntate nos argumentari , qui , ne id facere possemus , indicium nobis reliquerit suae voluntatis : multa incommoda consequi , si instituatur , ut a scripto recedatur. nam et eos , qui aliquid scribant , non existimaturos , id , quod scripserint , ratum futurum : et eos , qui iudicent , certum , quod sequantur , nihil habituros , si semel a scripto recedere consueverint. Quod si voluntas

scriptoris conservanda sit, se, non adversarios, a voluntate eius stare. nam multo proprius accedere ad scriptoris voluntatem eum, qui ex ipsius eam literis interpretetur, quam illum, qui sententiam scriptoris non ex ipsius scripto spectet, quod ille suae voluntatis quasi imaginem reliquerit, sed domesticis suspicionibus perscrutetur. Sin causam afferet is, qui a sententia stabit, primum erit contra dicendum: quam absurdum, non negare contra legem fecisse, sed quare fecerit, causam aliquam invenire: deinde conversa omnia esse: ante solitos esse accusatores iudicibus persuadere, affinem esse alicuius culpae eum, qui accusaretur: causam proferre, quae eum ad peccandum impulisset: nunc ipsum reum causam afferre, quare deliquerit. Deinde hanc inducere partitionem, cuius in singulas 130 partes multae convenient argumentationes: primum nulla in lege ullam causam contra scriptum accipi convenire: deinde si in ceteris legibus conveniat, hanc esse huiusmodi legem, ut in ea non oporteat: postremo si in hac quoque lege oporteat, hanc 45 quidem causam accipi minime oportere. Prima pars his fere locis confirmabitur: scriptori neque ingenium, neque operam, neque ullam facultatem defuisse, quo minus posset aperte perscribere id, quod cogitaret: non fuisse ei grave, nec difficile, eam causam excipere, quam adversarii proferant, si quidquam excipiendum putasset: consuesse eos, 131 qui leges scribant, exceptionibus uti. Deinde oportet recitare leges cum exceptionibus scriptas, et maxime videre, si qua in ea ipsa lege, qua de

agitur, sit exceptio aliquo in capite, aut apud eundem legis scriptorem, quo magis eum probetur fuisse exceptum, si quid excipiendum putaret: et ostendere, causam accipere, nihil aliud esse, nisi legem tollere: ideo quod, cum semel causa consideretur, nihil attineat eam ex lege considerare, quippe quae in lege scripta non sit. Quod si sit institutum; omnibus causam dari et potestatem peccandi, cum intellexerint, vos ex ingenio eius, qui contra legem fecerit, non ex lege, in quam iurati sitis, rem iudicare: deinde et ipsis iudicibus iudicandi, et ceteris civibus vivendi rationes perturbatum iri, si semel a legibus recessum sit: nam et iudices neque <sup>132</sup> quid sequantur, habituros, si ab eo, quod scriptum sit, recedant: neque, quo pacto in aliis improbare possint, quod contra legem iudicarint: et ceteros cives, quid agant, ignoraturos, si ex suo quisque consilio, et ex ea ratione, quae in mentem, aut in libidinem venerit, non ex communi praescripto civitatis unamquamque rem administrarit: postea quaerere ab iudicibus ipsis, quare in alienis detineantur negotiis: cur reipublicae munere impediantur, cum saepius suis rebus et commodis servire possint: cur in certa verba iurent: cur certo tempore convenient, certo discedant: nihil quisquam afferat causae, quo minus frequenter operam reipublicae det, nisi quae causa in lege excepta sit: an se legibus obstrictos in tantis molestiis esse aequum censem, adversarios nostros leges negligeare concedant: deinde item quaerere ab iudicibus, <sup>133</sup> si eius causae, propter quam se reus contra legem

fecisse dicat , exceptionem ipse in lege adscribat , passurine sint : postea hoc , quod faciat , indignius et impudentius esse , quam si adscribat : age porro , quid si ipsi velint iudices adscribere : passurusne sit populus ? atque hoc esse indignius , quam rem verbo et literis mutare non possint , eam re ipsa , et iudicio maxime , commutare : deinde indignum esse de lege aliquid derogari , aut legem abrogari , aut aliqua ex parte commutari , cum populo cognoscendi , et probandi , aut improbandi potestas nulla fiat : hoc ipsis iudicibus invidiosissimum futurum : non hunc locum esse , neque hoc tempus legum corrigendarum : apud populum hoc , et per populum agi convenire : quod si nunc id agant , velle se scire , qui lator sit , qui sint accepturi : se actiones videre et dissuadere velle : quod si haec cum summe inutilia , tum multo turpisssima sint ; legem , cuiuscemodi sit , in praesentia conservari ab iudicibus , post , si displiceat , a populo corrigi convenire : deinde , si scriptum non existaret , magnopere quaereremus : neque isti , ne si extra periculum quidem esset , crederemus . nunc cum scriptum sit , amentiam esse , eius qui peccarit potius , quam legis ipsius verba cognoscere . His et huiusmodi rationibus ostenditur , causam extra scriptum accipi non oportere . Secunda pars est , in qua est ostenden-

134 dum , si in ceteris legibus oporteat , in hac non oportere . Hoc demonstrabitur , si lex aut ad res maximas , utilissimas , honestissimas , religiosissimas videbitur pertinere : aut inutile , aut turpe , aut nefas esse tali in re non diligentissime legi obtemperare :

aut ita lex diligenter perscripta demonstrabitur , ita cautum unaquaque de re , ita quod oportuerit , exceptum , ut minime conveniat quidquam in tam diligenti scriptura praeteritum arbitrari. Tertius locus est ei , qui pro scripto dicet , maxime necessarius , per quem ostendat oportet , si conveniat causam contra scriptum accipi , eam tamen minime oportere , quae ab adversariis afferatur. Qui locus idcirco est huic necessarius , quod semper is , qui contra scriptum dicit , aequitatis aliquid afferat oportet. nam summa impudentia sit , eum , qui contra quam quod scriptum sit , aliquid probare velit , non aequitatis praesidio id facere conari. Si quid igitur ex hac ipsa accusator deroget , omnibus partibus iustius et probabilius accusare videatur. Nam superior oratio hoc omnis faciebat , ut iudices , etiamsi nollent , necesse esset ; haec autem , etiamsi necesse non esset , ut vellent contra iudicare. Id autem fiet , si , quibus ex locis culpa demonstrabitur non esse in eo , qui comparatione , aut remotione , aut relatione criminis , aut concessionis partibus se defendit , ( de quibus ante , ut potuimus , diligenter perscrispimus ) de his locis , quae res postulabit , ad causam adversariorum improbandam transfere mus : aut causae et rationes afferentur , quare , et quo consilio ita sit in lege , aut in testamento scriptum ; ut sententia quoque , et voluntate scriptoris , non ipsa solum scripturae causa confirmatum esse videatur : aut aliis quoque constitutionibus factum coarguetur.

Contra scriptum autem qui dicet , primum eum 47

138 inducit locum, per quem aequitas causae demonstretur: aut ostendet, quo animo, quo consilio, qua de causa fecerit: et, quamcunque causam assumet, assumptionis partibus se defendet, de quibus ante dictum est. Atque hoc in loco cum diutius commoratus, sui facti rationem et aequitatem causae exornaverit, tum ex his locis fere contra adversarios dicet oportere causas accipi. Demonstrabit, nullam esse legem, quae aliquam rem inutilem, aut iniuriam fieri velit: omnia suppicia, quae a legibus profiscantur, calpae ac malitiae vindicandae causa  
139 constituta esse: scriptorem ipsum, si existat, factum hoc probaturum: et idem ipsum, si ei talis res accidisset, facturum fuisse: et ea re legis scriptorem certo ex ordine iudices, certa aetate praeditos constituisse, ut essent, non qui scriptum suum recitarent, quod quivis puer facere posset, sed qui cogitationem assequi possent, et voluntatem interpretari: deinde illum scriptorem, si scripta sua stultis hominibus, et barbaris iudicibus committeret, omnia summa diligentia perscripturum fuisse: nunc vero, quod intelligeret, quales viri iudicaturi essent, idcirco eum, quae perspicua videret esse, non adscripsisse: neque enim vos scripti sui recitatores, sed voluntatis interpretes fore putavit: postea querere ab adversariis, quid si hoc fecissem? quid si hoc accidisset? eorum aliquid, in quibus aut causa sit honestissima, aut necessitudo certissima; tumne accusaretis? Atqui hoc lex nusquam exceptit. Non ergo omnia scriptis, sed quaedam, quae perspicua sint, tacitis exceptionibus caveri:

deinde nullam rem neque legibus, neque scriptura  
ulla, denique ne in sermone quidem quotidiano at-  
que imperiis domesticis recte posse administrari, si  
unusquisque velit verba spectare, et non ad vo-  
luntatem eius, qui verba habuerit, accedere: deinde <sup>48</sup>  
ex utilitatis et honestatis partibus ostendere, quam <sup>141</sup>  
inutile, aut quam turpe sit id, quod adversarii dicant  
fieri oportuisse, aut oportere: et id, quod nos fece-  
rimus, aut postulemus, quam utile, aut quam ho-  
nestum sit: deinde leges nobis caras esse non propter  
literas, quae tenues et obscurae notae sint volun-  
tatis, sed propter earum rerum, quibus de scriptum  
est, utilitatem, et eorum, qui scripserint, sapien-  
tiā et diligentiam: postea, quid sit lex, descri-  
bere, ut ea videatur in sententiis, non in verbis  
consistere: et iudex is videatur legi obtemperare,  
qui sententiam eius, non qui scripturam sequatur:  
deinde, quam indignum sit, eodem affici suppli-  
cio eum, qui propter aliquod scelus et audaciam  
contra legem fecerit, et eum, qui honesta, aut ne-  
cessaria de causa, non ab sententia, sed ab lite-  
ris legis recesserit: atque his, et huiusmodi ratio-  
nibus, et accipi causam, et in hac lege accipi,  
et eam causam, quam ipse afferat, oportere ac-  
cipi demonstrabit. Et quemadmodum ei dicebamus, <sup>142</sup>  
qui a scripto diceret, hoc fore utilissimum, si quid  
de aequitate ea, quae cum adversario staret, deroga-  
gasset: sic huic, qui contra scriptum dicet, plu-  
rimum proderit, ex ipsa scriptura aliquid ad suam  
causam convertere, aut ambigue aliquid scriptum  
ostendere: deinde ex illo ambiguo eam partem,

quae sibi profit , defendere , aut verbi definitionem inducere , et illius verbi vim , quo urgeri videatur , ad suae causae commodum traducere , aut ex scripto non scriptum aliquod inducere per ratiocinationem , de qua post dicemus. Quacunque autem in re , quamvis leviter probabili , scripto ipso se defendenterit , etiam cum aequitate causa abundabit , necessario multum proficiet , ideo quod , si id , quo ntitur adversariorum causa , subduxerit , omnem illam eius vim et acrimoniam lenierit ac diluerit. Loci autem communes ceteri ex assumptionis partibus in utramque partem convenient. Praeterea eius , qui a scripto dicet , leges ex se , non ex eius , qui contra commiserit , utilitate spectari oportere , et legibus antiquius haberi nihil oportere. Contra scriptum , leges in consilio scriptoris , et utilitate communi , non in verbis consistere. Quam indignum sit , aequitatem literis urgeri , quae voluntate eius , qui scripserit , defendatur.

49 Ex contrariis autem legibus controversia nascitur ,  
 144 cum inter se duae videntur leges , aut plures discrepare , hoc modo : Lex est , *Qui tyrannum occiderit , Olympioniarum praemium capito , et quam volet sibi rem a magistratu deposito , et magistratus ei concedito.* Et altera lex , *Tyranno occiso , quinque eius proximos cognatione , magistratus necato.* Alexandrum , qui apud Pheraeos in Thessalia tyrannidem occuparat , uxor sua , cui Thebe nomen fuit , noctu , cum simul cubaret , occidit. Haec filium suum , quem ex tyranno habebat , sibi in praemii loco depositum . Sunt , qui ex lege puerum occidi dicant oportere.

Res in iudicio est. In hoc genere utramque in partem iidem loci , atque eadem praecepta convenient , ideo quod uterque suam legem confirmare , contraria infirmare debebit. Primum igitur leges oportet contendere , considerando , utra lex ad maiores , hoc est , ad utiliores , ad honestiores ac magis necessarias res pertineat. ex quo conficitur , ut , si leges duae , aut si plures , aut , quotquot erunt , conservari non possint , quia discrepant inter se; ea maxime conservanda putetur , quae ad maximas res pertinere videatur : deinde , utra lex posterius lata sit : nam postrema quaeque gravissima est : deinde utra lex iubeat aliquid , utra permittat. nam id , quod imperatur , necessarium : illud , quod permittitur , voluntarium est. deinde in utra lege , si non obtemperatum sit , poena afficiatur , aut in utra maior poena statuatur : nam maxime conservanda est ea , quae diligentissime sancta est. deinde utra lex iubeat , utra vetet : nam saepe ea , quae vetat , quasi exceptione quadam corrigere videtur illam , quae iubet. deinde , utra lex de genere omni ; utra de parte quadam ; utra communiter in plures ; utra in aliquam certam rem scripta videatur : nam quae in partem aliquam , et quae in certam quandam rem scripta est , promptius ad causam accedere videntur , et ad iudicium magis pertinere. deinde , ex lege utrum statim fieri necesse sit : utrum habeat aliquam moram et sustentationem : nam id , quod statim faciendum sit , perfici prius oportet. deinde operam dare , ut sua lex ipso scripto videatur niti : contraria autem aut per anbiguum , aut per ratioci-

nationem , aut per definitionem induci; quo sanctius et firmius id videatur esse , quod apertius scriptum sit. deinde suae legis ad scriptum , ipsam sententiam quoque adiungere , contrariam legem item ad aliam sententiam traducere , ut , si fieri poterit , ne discrepare quidem videantur inter se. postremo facere , si causa dabit facultatem , ut nostra ratione ultraque lex conservari videatur ; adversariorum ratione , altera sit necessario negligenda. Locos autem communes , et quos ipsa causa det , videre oportebit , et ex utilitatis et honestatis amplissimis partibus sumere , demonstrantem per amplificationem , ad utram potius legem accedere oporteat.

50 Ex ratiocinatione nascitur controversia , cum ex  
<sup>148</sup> eo , quod uspiam est , ad id , quod nusquam scriptum est , pervenitur hoc pacto : Lex est , *Si furiosus est , agnatorum gentiliunque in eo pecuniaque eius potestas esto.* Et lex , *Paterfamilias uti super familia pecuniaque sua legaverit , ita ius esto.* Et lex , *Si paterfamilias intestato moritur , familia pecuniaque eius agnatorum gentiliumque esto.* Quidam iudicatus est parentem occidisse. ei statim , quod effugiendi potestas non fuit , ligneae soleae in pedes inductae sunt : os autem obvolutum est folliculo et praeligatum : deinde est in carcerem deductus , ut ibi esset tantisper , dum culeus , in quem coniectus in profluentem deferretur , compararetur. Interea quidam eius familiares in carcerem tabulas afferunt , et testes adducunt : heredes , quos ipse iubet , scribunt : tabulae obsignantur. De illo post suppli- cium sunitur. Inter eos , qui heredes in tabulis

Scripti sunt, et inter agnatos, de hereditate controversia est. Hic certa lex, quae testamenti faciendi iis, qui in eo loco sint, adimat potestatem, nulla profertur. Ex ceteris legibus, et quae hunc ipsum supplicio huiusmodi afficiunt, et quae ad testamenti faciendi potestatem pertinent, per rationationem veniendum est ad eiusmodi rationem, ut quaeratur, habueritne testamenti faciendi potestatem. Locos autem communes hoc in genere argumentandi, hos, et huiusmodi quosdam esse arbitramur: primum, eius scripti, quod proferas, laudationem et confirmationem: deinde eius rei, qua de quaeratur, cum eo, de quo constat, collationem eiusmodi, ut id, de quo quaeritur, rei, de qua constet, simile esse videatur: postea admirationem per contentionem, qui fieri possit, ut, qui hoc aequum esse concedat, illud neget, quod aut aequius, aut eodem sit in genere: deinde idcirco hac de re nihil esse scriptum, quod, cum de illa esset scriptum, de hac re is, qui scribebat, neminem dubitaturum arbitratus sit: po-  
stea multis in legibus multa esse praeterita, quae idcirco praeterita nemo arbitretur, quod ex ceteris, de quibus scriptum sit, intelligi possint: deinde aequitas rei demonstranda est, ut in iuridicali absoluta. Contra autem qui dicet, similitudinem infirmare debebit: quod faciet, si demonstrabit, illud, quod conferatur, ab eo, cui conferatur, diversum esse genere, natura, vi, magnitudine, tempore, loco, persona, opinione: si, quo in numero illud, quod per similitudinem afferatur, et quo in loco illud, cuius causa affertur, haberi conveniat, ostendetur: deinde, quid res cum

¶ re differat, demonstrabitur, ut non idem videatur de utraque existimari oportere. Ac, si ipse quoque poterit ratiocinationibus uti, iisdem ratiocinationibus, quibus ante dictum est, utetur: si non poterit, negabit oportere quidquam, nisi quod scriptum sit, considerare: [ periclitari omnia iura, si similitudines accipientur: nihil esse pene, quod non alteri simile esse videatur, ] multis dissimilibus rebus, in unamquamque rem tantum singulas esse leges: omnia posse inter se vel similia, vel dissimilia demonstrari. Loci communes a ratiocinatione, oportere coniectura ex eo, quod scriptum sit, ad id, quod non sit scriptum, pervenire: et neminem posse omnes res per scripturam amplecti, sed eum commodissime scribere, qui curet, ut quaedam ex quibusdam intelligantur: contra ratiocinationem, huiuscemodi: coniecturam divinationem esse, et stulti scriptoris esse, non posse omnibus de rebus cavere, quibus velit.

§ I. Definitio est, cum in scripto verbum aliquod est positum, cuius de vi quaeritur, hoc modo: Lex, *Qui in adversa tempestate navim reliquerint, omnia amittunt*: eorum *navis & onera sunt*, qui in navi remanserint. Duo quidam, cum iam in alto navigarent, et cum eorum alterius navis, alterius onus esset, naufragum quendam natantem, et manus ad se tendentem animadverterunt: misericordia commoti, navim ad eum applicaverunt: hominem ad se sustulerunt. Postea aliquanto, ipsos quoque tempestas vehementius iactare coepit, usque adeo, ut dominus navis, cum idem gubernator esset, in scapham confugeret, et inde funiculo, qui a puppi

religatus scapham annexam trahebat, navim quoad posset, moderaretur; ille autem, cuius merces erant, in gladium ibidem incumberet. Hic ille naufragus ad gubernaculum accessit, et navi, quoad potuit, est opitulatus. Sedatis autem fluctibus, et tempestate iam commutata, navis in portum pervenitur. Ille autem, qui in gladium incubuerat, leviter saucius facile est ex vulnere recreatus. Navim cum onere, horum trium suam quisque esse dicit. Hic omnes scripto ad causam accedunt, et ex nominis vi nascitur controversia. nam et relinquere navem, et remanere in navi, denique navis ipsa quid sit, definitionibus quaeritur. Iisdem autem ex locis omnibus, quibus definitiva constitutio, tractabitur.

Nunc, expositis iis argumentationibus, quae in 155 iudiciale causarum genus accommodantur, deinceps in deliberativum genus et demonstrativum, argumentandi locos et praecepta dabimus, non quo non in aliqua constitutione omnis semper causa versetur; sed quia proprii tamen harum causarum quidam loci sunt, non a constitutione separati, sed ad fines horum generum accommodati. Nam placet, in judiciali genere finem esse aequitatem, hoc est, partem quandam honestatis. in deliberativo autem Aristoteli placet utilitatem, nobis et honestatem, et utilitatem. in demonstrativo, honestatem. Quare in hoc quoque genere causae quaedam argumentationes communiter, ac similiter tractabuntur: quaedam separatius ad finem, quo referri omnem orationem oportet, adiungentur. Atque uniuscuiusque constitutionis exemplum supponere non

gravaremur , nisi illud videremus , quemadmodum res obscurae dicendo fierent apertiores ; sic res aper-  
tas , obscuriores fieri oratione . Nunc ad delibera-  
tionis paecepta pergamus .

52 Rerum expetendarum tria genera sunt : par au-  
tem numerus vitandarum ex contraria parte . Nam  
est quiddam , quod sua vi nos allicit ad se se , non  
emolumento captans aliquo , sed trahens sua digni-  
tate : quod genus virtus , scientia , veritas est . A-  
liud autem non propter suam vim et naturam , sed  
propter fructum , atque utilitatem , petendum : quod  
genus pecunia est . Est porro quiddam ex horum  
partibus iunctum , quod et sua vi , et dignitate nos  
inductos dicit , et pae se quandam gerit utilita-  
tem , quo magis expetatur , ut amicitia , bona exi-  
stimatio . Atque ex his horum contraria facile , ta-  
centibus nobis , intelligentur . Sed ut expeditius ra-  
tio tradatur , ea , quae posuimus , brevi nomina-  
buntur . Nam in primo genere quae sunt , honesta  
appellabuntur . quae autem in secundo , utilia . haec  
autem tertia , quia partem honestatis continent , et  
quia maior est vis honestatis , iunctae res omnino  
ex dupli genere intelligentur : sed in meliorem  
partem vocabuli conferantur , et honesta nominen-  
tur . Ex his illud conficitur , ut appetendarum rerum  
partes sint , honestas et utilitas ; vitandarum , tur-  
pitudo et inutilitas . His igitur duabus rebus duae res  
grandes sunt attributae , necessitudo et affectio : qua-  
rum altera ex vi , altera ex re et personis consi-  
deratur . de utraque post apertius perscribemus .  
Nunc honestatis rationes primum explicemus .

Quod aut totum, aut aliqua ex parte propter 53  
se petitur, honestum nominabimus. Quare cum 159  
eius duae partes sint, quarum altera simplex, altera  
iuncta sit, simplicem prius consideremus. Est igitur  
in eo genere omnes res una vi atque uno nomine am-  
plexa virtus. nam virtus est animi habitus, naturae  
modo, rationi consentaneus. quamobrem omnibus  
eius partibus cognitis, tota vis erit simplicis ho-  
nestatis considerata. Habet igitur partes quatuor:  
prudentiam, iustitiam, fortitudinem, temperantiam.  
Prudentia est rerum bonarum, et malarum, neu-  
trarumque scientia. Partes eius, memoria, intelli-  
gentia, providentia. Memoria est, per quam ani-  
mus repetit illa, quae fuerunt. Intelligentia est, per  
quam ea perspicit, quae sunt. Providentia est, per  
quam futurum aliquid videtur ante quam factum  
sit. Iustitia est habitus animi, communi utilitate  
conservata, suam cuique tribuens dignitatem. Eius  
initium est ab natura profectum: deinde quaedam  
in consuetudinem ex utilitatis ratione venerunt:  
postea res ab natura profectas, et ab consuetudine  
probatas, legum metus et religio sanxit. Natura 161  
ius est, quod non opinio genuit, sed quaedam in-  
nata vis inferuit, ut religionem, pietatem, gra-  
tiam, vindicationem, observantiam, veritatem.  
Religio est, quae superioris cuiusdam naturae (quam  
divinam vocant) curam caerimoniamque afferit: pie-  
tas, per quam sanguine coniunctis, patriaeque benevo-  
lis officium et diligens tribuitur cultus: gratia, in qua  
amicitarum et officiorum alterius memoria et remu-  
nerandi voluntas continetur: vindicatio, per quam

vis et iniuria, et omnino omne, quod obfuturum est, defendendo, aut ulciscendo propulsatur: observantia, per quam homines aliqua dignitate antecedentes, cultu quodam et honore dignantur: veritas, per quam immutata ea, quae sunt, aut ante 162 54 fuerunt, aut futura sunt, dicuntur. Consuetudine ius est, quod aut leviter a natura tractum aluit, et maius fecit usus, ut religionem: aut si quid eorum, quae ante diximus, ab natura profectum, maius factum propter consuetudinem videmus, aut quod in morem vetustas vulgi approbatione perduxit: quod genus, pactum, par, iudicatum. Pactum est, quod inter aliquos convenit: par, quod in omnes aequabile est: iudicatum, de quo alicuius, aut aliquorum iam sententiis constitutum est. Lege ius est, quod in eo scripto, quod populo expositum est, 163 ut observet, continetur. Fortitudo est considerata periculorum susceptio, et laborum perpeffio. Eius partes, magnificentia, fidentia, patientia, perseverantia. Magnificentia est rerum magnarum, et excelsarum cum animi ampla quadam et splendida propositione agitatio, atque administratio: fidentia est, per quam magnis et honestis in rebus multum ipse animus in se fiduciae certa cum spe collocavit: patientia est honestatis, aut utilitatis causa, rerum arduarum, ac difficilium voluntaria, ac diu- 164 turna perpeffio: perseverantia est in ratione bene considerata stabilis et perpetua permancio. Temperantia est rationis in libidinem, atque in alias non rectos impetus animi, firma et moderata dominatio. Eius partes sunt, continentia, clementia, mo-

destia. Continentia est , per quam cupiditas , consilii gubernatione regitur : clementia , per quam animi , temere in odium alicuius concitati invectio , comitate retinetur : modestia , per quam pudor honestus , caram et stabilem comparat auctoritatem. Atque haec omnia propter se solum , ut nihil adiungatur emolumenti , petenda sunt. quod ut demonstretur , neque ad hoc nostrum institutum pertinet , et a brevitate praecipiendi remotum est. Propter <sup>165</sup> se autem vitanda sunt , non ea modo , quae his contraria sunt , ut fortitudini ignavia , et iustitiae iniustitia : verum etiam illa , quae propinqua videntur et finitima esse , absunt autem longissime : quod genus fidentiae contrarium , est diffidentia , et ea re vitium est : audacia non contrarium , sed appositorum est ac propinquum , et tam  
men vitium est. Sic unicuique virtuti finitimum vitium reperietur , aut certo iam nomine appellatum ; ut audacia , quae fidentiae ; pertinacia , quae perseverantiae finitima est ; superstitionis , quae religioni propinqua est : aut sine ullo certo nomine. Quae omnia item uti contraria rerum bonarum , in rebus vitandis reponemus. Ac de eo quidem genere honestatis , quod omni ex parte propter se petitur , satis dictum est.

Nunc de eo , in quo utilitas quoque adiungitur , quod tamen honestum vocamus , dicendum <sup>166</sup> videtur. Sunt igitur multa , quae nos cum dignitate , tum fructu quoque suo ducunt : quo in genere est gloria , dignitas , amplitudo , amicitia. Gloria est frequens de aliquo fama cum laude :

dignitas , alicuius honesta , et cultu , et honore , et verecundia digna auctoritas : amplitudo , potentiae , aut maiestatis , aut aliquarum copiarum magna abundantia : amicitia , voluntas erga aliquem rerum bonarum , illius ipsius causa , quem  
167 diligit , cum eius pari voluntate. Hic , quia de civilibus causis loquimur , fructus ad amicitiam adiungimus , ut eorum quoque causa petenda videatur : ne forte , qui nos de omni amicitia dicere existiment , reprehendere incipient . quamquam sunt , qui propter utilitatem modo petendam putent amicitiam : sunt qui propter se solum : sunt qui propter se , et utilitatem . quorum quid verissime constituatur , aliis locus erit considerandi . Nunc hoc sic ad usum oratorium relinquatur , utramque propter rem amicitiam esse expeten-  
168 dam. Amicitarum autem ratio , quoniam partim sunt religionibus iunctae , partim non sunt , et quia partim veteres sunt , partim novae , partim ab illorum , partim ab nostro beneficio profectae , partim utiliores , partim minus utiles ; ex causarum dignitatibus , ex temporum opportunitatibus , ex officiis , ex religionibus , ex vetustatibus habebi-  
156 tur. Utilitas autem aut in corpore posita est , aut in extraneis rebus : quarum tamen rerum multo maxima pars ad corporis commodum revertitur , ut in republica quaedam sunt , quae ( ut sic dicam ) ad corpus pertinent civitatis , ut agri , portus , pecunia , classes , nautae , milites , iocii ; quibus rebus incolumitatem ac libertatem retinent civitates : alia vero , quae iam quiddam magis

amplum , et minus necessarium conficiunt , ut urbis egregia exornatio atque amplitudo , ut quae-dam excellens pecuniae magnitudo , amicitiarum ac societatum multitudo . Quibus rebus non illud <sup>169</sup> solum conficitur , ut salvae et incolumes , verum etiam , ut amplae atque potentes sint civitates . Quare utilitatis duae partes videntur esse , incolumentas et potentia . Incolumentas est salutis tuta atque integra conservatio : potentia est ad sua conservanda , et alterius obtinenda , idonearum rerum facultas . Atque in iis omnibus , quae ante dicta sunt , quid difficulter fieri et quid facile fieri possit , oportet considerare . Facile fieri id dicimus , quod sine magno , aut sine ullo labore , sumtu , molestia , quam brevissimo tempore confici potest . Difficile autem fieri , quod quamquam laboris , sumtus , molestiae , longinquitatis indiget , atque aut omnes , aut pluriimas , aut maximas causas habet difficultatis ; tamen , his suscepitis difficultatibus , compleri , atque ad exitum perduci potest .

Quoniam ergo de honestate , et de utilitate diximus , nunc restat , ut de iis rebus , quas his attributas esse dicebamus , necessitudine et affectione , perscribamus . Puto igitur esse hanc necessitu- <sup>170</sup> dinem , cui nulla vi resisti potest ; quae neque mutari , neque leniri potest . Atque , ut apertius hoc sit , exemplis licet vim rei , qualis et quanta sit , cognoscamus . Uri posse flamma ligneam materiam necesse est . Corpus mortale aliquo tempore interire necesse est ; atque ita necesse , ut vis postulat ea , quam modo describebamus , necessitati-

dinis , cui nulla vi resisti potest , quae neque mutari , neque leniri potest. Huiusmodi necessitudines , cum in dicendi rationes incident , recte necessitudines appellabuntur : sin aliquae res incident difficiles , in illa superiori , possitne fieri , quae-  
171 stione considerabimus. Atque etiam hoc mihi videor videre , esse quasdam cum adiunctione necessitudines , quasdam simplices et absolutas. Nam aliter dicere solemus ; Necesse est Casilinenses se dedere Annibali : aliter autem , Necesse est Casilinum venire in Annibalis potestatem. illic , in superiore , adiunctionio est haec , nisi si malunt fame perire : si enim id malunt , non est necesse : hoc inferius non item , propterea quod , sive velint Casilinenses se dedere , sive famem perpeti atque ita perire , necesse est Casilinum venire in Annibalis potestatem. Quid igitur perficere potest haec necessitudinis distributio ? Prope dicam , plurimum , cum is locus necessitudinis videbitur incurrire. Nam cum simplex erit necessitudo , nihil erit quod multa dicamus , cum eam nulla ratione lenire possumus : cum autem ita necesse erit , ut aliquid effugere , aut adipisci velimus , tum adiunctionio illa quid habeat utilitatis , aut quid honestatis , erit considerandum. Nam si velis attendere , ( ita tamen , ut id quaeras , quod conveniat ad usum civitatis ,) reperias nullam esse rem , quam facere necesse sit , nisi propter aliquam causam , quam adiunctionem nominamus : pariter autem esse multas res necessitudinis , ad quas similis adiunctionis accedit . quod genus , ut homines mortales

necessae est interire , sine adiunctione : ut cibo  
utantur , non necessae est , nisi cum illa exceptione ,  
Extra quam , si nolint fame perire. Ergo , ut <sup>173</sup>  
dixi , illud , quod adiungitur , semper , cuiusmodi  
sit , erit considerandum. nam omni tempore id  
pertinebit , ut [ ad honestatem ] hoc modo expo-  
nenda necessitudo sit : Necesse est , si honeste vo-  
lumus vivere : necesse est , si incolumes volumus  
esse : necesse est , si sine incommodo volumus  
vivere. Ac summa quidem necessitudo videtur <sup>58</sup>  
esse honestatis : huic proxima , incolumentatis :  
tertia ac levissima , commoditatis : quae cum his  
nunquam poterit duabus contendere. Hasce autem <sup>174</sup>  
inter se saepe necesse est comparari , ut , quam-  
quam praestet honestas incolumentati , tamen , utri  
potissimum consulendum sit , deliberetur. cuius rei  
certum quoddam praescriptum videtur in perpe-  
tuum dari posse. Nam , qua in re fieri poterit ,  
ut , cum incolumentati consuluerimus , quod sit in  
praesentia de honestate delibatum , virtute aliquando  
et industria recuperetur , incolumentatis ratio vide-  
bitur habenda : cum autem id non poterit , ho-  
nestatis. Ita in eiusmodi quoque re , cum incolu-  
mentati videbimur consulere , vere poterimus di-  
cere , nos honestatis rationem habere , quoniam  
sine incolumentate eam nullo tempore possimus  
adipisci. Qua in re vel concedere alteri , vel ad  
conditionem alterius descendere , vel in praesentia  
quiescere , atque aliud tempus exspectare oportet.  
In commoditatis vero ratione , modo illud <sup>175</sup>  
attendatur , dignane causa videatur ea , quae ad

utilitatem pertinebit, quare aut de magnificentia, aut de honestate quiddam derogetur. Atque in hoc loco mihi caput illud videtur esse, ut quaeramus, quid sit illud, quod si adipisci, aut effugere velimus, aliqua res nobis sit necessaria, hoc est, quae sit adiunctio, ut proinde, uti quaeque res erit, laboremus, et gravissimam quamque causam vehementissime necessariam iudicemus.

<sup>376</sup> Affectio est quaedam ex tempore, aut ex negotiorum eventu aut administratione, aut hominum studio, commutatio rerum, ut non tales, quales ante habitae sint, aut plerumque haberi soleant, habendae videantur esse: ut, ad hostes transire turpe videtur esse; at non illo animo, quo Ulysses transiit: et pecuniam in mare deiicerere, inutile; at non eo consilio, quo Aristippus deiecit. Sunt igitur res quaedam ex tempore, et ex consilio, non ex sua natura considerandae: quibus in omnibus, quid tempora petant, aut quid personis dignum sit, considerandum est: et non quid, sed quo quidque animo, quicum, quo tempore, quamdiu fiat, attendendum est. His ex partibus ad sententiam dicendam, locos sumi oportere arbitramur.

<sup>379</sup> Laudes autem, et vituperationes ex his locis sumentur, qui loci personis sunt attributi, de quibus ante dictum est. Sin distributius tractare quis volet, partiatur in animum, et corpus, et extrarias res licebit. Animi est virtus, cuius de partibus paulo ante dictum est: corporis, valetudo, dignitas, vires, velocitas: extriae, honos, pecunia, affinitas, genus, amici,

<sup>177</sup>

patria , potentia , et cetera , quae simili esse in genere intelligentur. Atque in his , id , quod in omnia valet , valere oportebit : contraria quoque , et quae , et qualia sint , intelligentur. Videre <sup>178</sup> autem in laudando et in vituperando oportebit , non tam quae in corpore , aut in extraneis rebus habuerit is , de quo agetur , quam quo pacto his rebus usus sit. nam fortunam quidem et laudare , stultitia , et vituperare , superbia est : animi autem , et laus honesta , et vituperatio vehemens est. Nunc quoniam omne in causae genus argumentandi ratio tradita est , de inventione , prima ac maxima parte rhetoricae , satis dictum videtur. Quare , quoniam et una pars ad exitum hunc ab superiore libro perducta est , et hic liber non parum continet literarum , quae restant , in reliquis dicemus.



M. TULLII CICERONIS  
DE  
PARTITIONE ORATORIA  
DIALOGUS.



M. TULLII CICERONIS  
 DE  
 PARTITIONE ORATORIA  
 DIALOGUS.

*Cicero filius, & Cicero pater, loquentes inducuntur.*

ARGUMENTUM.

Hic libellus est quoddam compendium eorum, quae in libris ceteris oratoriis fuse docet. Omnem autem dicendi doctrinam in tres partes distribuit, in oratoris vim, orationem et quaestionem. Ad vim requirit inventionem, collocationem, elocutionem, et memoriam, cum pronuntiatione, a c. 37. Orationis partes facit exordium, narrationem, confirmationem et conlusionem, a c. 8-17. De quaestionibus cum infinitis tum finitis, atque adeo de generibus causarum et constitutionibus agit a c. 18. usque ad finem.

**Filius.** *S*tudeo, mi pater, Latine ex te audire ea, quae mihi tu de ratione dicendi Graece tradidisti; si modo tibi est otium, et si vis. *Pater.* An est, mi Cicero, quod ego malim, quam te quam doctissimum esse? Otium autem primum summum est, quoniam aliquando Roma exeundi potestas data est: deinde ista tua studia vel maximis occupationibus meis anteferrem libenter. *Filius.* Visne igitur, ut tu me Graece soles ordine interrogare, sic ego te vicissim eisdem de rebus Latine interrogem? *Pater.* Sane, si placet. sic enim

et ego te meminisse intelligam , quae accepisti : et  
3 tu ordine audies , quae requires. *Filius.* Quot in  
partes distribuenda est omnis doctrina dicendi ? *Pater.*  
In tres. *Filius.* Cedo quas ? *Pater.* Primum in ip-  
sam vim oratoris , deinde in orationem , tum in  
quaestionem. *Filius.* In quo est ipsa vis ? *Pater.*  
In rebus , et verbis. Sed et res , et verba , inven-  
nienda sunt , et collocanda. Proprie autem in re-  
bus invenire , in verbis eloqui dicitur. Collocare  
autem , et si est commune , tamen ad inveniendum  
refertur. Vox , motus , vultus , atque omnis actio ,  
eloquendi comes est , earumque rerum omnium  
4 custos est memoria. *Filius.* Quid ? orationis quot  
sunt partes ? *Pater.* Quatuor. earum duae valent  
ad rem docendam , narratio et confirmatio. ad  
impellendos animos duae , principium et peroratio.  
*Filius.* Quid ? Quaestio quasnam habet partes ?  
*Pater.* Infinitam , quam consultationem appello :  
2 et definitam , quam causam nomino. *Filius.* Quo-  
5 niam igitur invenire primum est oratoris , quid  
quaeret ? *Pater.* Ut inveniat , quemadmodum fidem  
faciat eis , quibus voler persuadere , et quemad-  
modum motum eorum animis afferat. *Filius.* Qui-  
bus rebus fides fit ? *Pater.* Argumentis , quae du-  
cuntur ex locis , aut in re ipsa insitis , aut assum-  
tis. *Filius.* Quos vocas locos ? *Pater.* Eos , in  
quibus latent argumenta. *Filius.* Quid est argu-  
mentum ? *Pater.* Probabile inventum ad faciendam  
6 fidem. *Filius.* Quomodo igitur duo genera ista di-  
vidis ? *Pater.* Quae sine arte putantur , ea re-  
mota appello , ut testimonia. *Filius.* Quid insita ?

*Pater.* Quae inherent in ipsa re. *Filius.* Testimoniorum quae sunt genera ? *Pater.* Divinum, et humanum. divinum, ut oracula, ut auspicia, ut vaticinationes, ut responsa sacerdotum, haruspicum, coniectorum. humanum, quod spectatur ex auctoritate, et ex voluntate, et ex oratione, aut libera, aut expressa : in quo insunt scripta, pacta, promissa, iurata, quaesita. *Filius.* Quae sunt quae dicis insita ? *Pater.* Quae infixae sunt rebus ipsis, ut definitio, ut contrarium, ut ea, quae sunt ipsis contrariove eius aut similia, aut dissimilia, aut consentanea, aut dissentanea : ut ea, quae sunt quasi coniuncta, aut ea, quae sunt quasi pugnantia inter se : aut earum rerum, de quibus agitur, causae : aut causarum eventus, id est, quae sunt effecta de causis, ut distributio-nes, ut genera partium, generumve partes, ut primordia rerum et quasi praecurrentia, in quibus inest aliquid argumenti : ut rerum contentio-nes, quid maius, quid par, quid minus sit, in quibus aut naturae rerum, aut facultates compa-rantur. *Filius.* Omnibusne igitur ex his locis argu-<sup>3</sup>menta sumemus ? *Pater.* Immo vero scrutabimur et quaeremus ex omnibus : sed adhibebimus iudi-cium, ut levia semper reiiciamus, nonnunquam etiam communia praetermittamus, et non necessa-ria. *Filius.* Quoniam de fide respondisti, volo au-dire de motu. *Pater.* Loco quidem quaeris, sed planius quod vis explicabitur, cum ad orationis ipsius quaestionumque rationem venero.

*Filius.* Quid sequitur igitur ? *Pater.* Cum inve-

neris, collocare. cuius in infinita quaestione, ordo est idem fere, quem exposui, locorum: in definita autem adhibenda sunt illa etiam, quae ad motum animorum pertinent. *Filius.* Quomodo igitur ista explicas? *Pater.* Habeo communia praecepta fidem faciendi et commovendi. Quoniam fides est firma opinio: motus autem, animi incitatio aut ad voluptatem, aut ad molestiam, aut ad metum, aut ad cupiditatem: (tot enim sunt motus genera, partes plures generum singulorum:) omnem collocationem ad finem accommodo quaestio[n]is. Nam est in proposito finis, fides: in causa et fides, et motus. Quare cum de causa dixero, in qua est propositum, de utroque dixero.  
 10 *Filius.* Quid habes igitur de causa dicere? *Pater.* Auditorum eam genere distingui. Nam aut auscultator est modo qui audit, aut disceptator, id est, rei sententiaeque moderator: ita, ut aut delectetur, aut statuat aliquid. Statuit autem aut de praeteritis, ut iudex: aut de futuris, ut senatus. Sic tria sunt genera, iudicii, deliberationis, exornationis: quae, quia in laudationes maxime confertur, proprium habet iam ex eo nomen. *Filius.*  
 11 4 Quas res sibi proponet in ipsis tribus generibus orator? *Pater.* Delectionem in exornatione: in iudicio, aut saevitiam, aut clementiam iudicis: in suasione autem, aut spem, aut reformatiōnem deliberantis. *Filius.* Cur igitur exponis hoc loco genera controversiarum? *Pater.* Ut rationem collocandi ad finem cuiusque accommodem. *Filius.*  
 12 12 Quoniam tandem modo? *Pater.* Quia, quibus in

Orationibus delectatio finis est , varii sunt ordines collocandi . Nam aut temporum servantur gradus , aut generum distributiones : aut a minoribus ad maiora adscendimus , aut a maioribus ad minora delabimur : aut haec inaequali varietate distinguimus , cum parva magnis , simplicia coniunctis , obscura dilucidis , laeta tristibus , incredibilia probabilibus inteximus , quae in exornationem cadunt omnia . *Filius*. Quid ? in deliberatione quid spectas ? *Pater*. Principia , vel non longa , vel saepe nulla . Sunt enim ad audiendum qui deliberant , sua causa parati . Nec multum sane saepe narrandum est . Est enim narratio aut praeteritarum rerum , aut praesentium : fusio autem , futurarum . Quare ad fidem et ad motum adhibenda est omnis oratio . *Filius*. Quid ? in iudiciis : quae est collocatio ? *Pater*. Non eadem accusatoris et rei : quod accusator rerum ordinem prosequitur , et singula argumenta , quasi hasta in manu collocata , vehementer proponit , concludit acriter , confirmat tabulis , decretis , testimoniis , accuratiisque in singulis commoratur : perorationisque praecepsit , quae ad incitandos animos valent , et in reliqua oratione paululum degrediens de cursu dicendi , utitur , et vehementius in perorando . Est enim propositum , ut iratum efficiat iudicem . *Filius*. Quid faciendum est contra reo ? *Pater*. Omnia longe se-<sup>15</sup> cus . Sumenda principia ad benevolentiam conciliandam . Narrationes aut amputandae , quae laedunt : aut relinquendae , si totae sunt molestae . Firmamenta ad fidem posita , aut per se diluenda ,

aut obscuranda , aut digressionibus obruenda. Perorationes autem ad misericordiam conferendae. *Filius.* Semperne igitur ordinem collocandi , quem volumus , tenere possumus ? *Pater.* Non sane. Nam auditorum aures moderantur oratori prudenti et provido ; et quod respiciunt , immutandum est.

- <sup>16</sup> *Filius.* Expone deinceps , quae ipsius orationis verborumque praecepta sint. *Pater.* Unum igitur genus est eloquendi sua sponte fusum : alterum versum , atque mutatum. Prima vis est in simplicibus verbis : in coniunctis secunda. Simplicia invenienda sunt : coniuncta , collocanda sunt. Et simplicia verba partim nativa sunt , partim reperta. Nativa ea , quae significata sunt sensu : reperta , quae ex his facta sunt , et novata aut similitudine , aut imitatione , aut inflexione , aut adiunctione verborum. Atque etiam est haec distinctio in verbis : altera , natura : tractatione , altera. natura , ut sint alia sonantiora , graviora , laeviora , et quodammodo nitidiora : alia contra. tractatione autem , cum aut propria sumuntur rerum vocabula , aut addita ad nomen , aut nova , aut prisca , aut ab oratore modificata et inflexa quodammodo : qualia sunt ea , quae transferuntur , aut immutantur , aut ea , quibus tanquam abutimur , aut ea , quae obscuramus , quae incredibiliter tollimus , quaeque mirabilius , quam sermonis consuetudo patitur , ornamus. *Filius.* Habeo de simplicibus verbis : nunc de coniunctione quaero. *Pater.* Numeri quidam sunt in coniunctione ser-

vandi, consecutioque verborum. Numeros aures ipsae metiuntur, ne aut non compleas verbis, quod proposueris, aut redundes. Consecutio autem, ne generibus, numeris, temporibus, personis, casibus perturbetur oratio. Nam, ut in simplicibus verbis, quod non est Latinum: sic in coniunctis, quod non est consequens, vituperandum est. Communia autem simplicium coniuncto-<sup>19</sup> ruinque sunt haec quinque quasi lumina, dilucidum, breve, probabile, illustre, suave. Dilucidum fit usitatis verbis, propriis, dispositis, aut circumscriptione conclusa, aut intermissione, aut concisione verborum. Obscurum autem, aut longitudine, aut contractione orationis, aut ambiguitate, aut inflexione atque immutatione verborum. Brevitas autem conficitur simplicibus verbis: semel unaquaque re dicenda: nulli rei, nisi, ut dilucide dicas, serviendo. Probabile autem genus est orationis, si non nimis est comtum atque ex-politum, si est auctoritas et pondus in verbis, si sententiae vel graves, vel aptae opinionibus hominum et moribus. Illustris autem oratio est, si <sup>20</sup> et verba gravitate delecta ponuntur, et translata, et superlata, et ad nomen adiuncta, et duplicata, et idem significantia, atque ab ipsa actione atque imitatione rerum non abhorrentia. Est enim haec pars orationis, quae rem constitutat pene ante oculos. Is enim maxime sensus attingitur: sed ceteri tamen, et maxime mens ipsa moveri potest. Sed quae dicta sunt de oratione dilucida, cadunt in hanc illustrem omnia. Est enim plus aliquanto il-

lustre , quam illud dilucidum. altero fit , ut intel-  
ligamus , altero vero , ut videre videamur. Suave  
autem genus erit dicendi , primum elegantia et  
iucunditate verborum sonantium et laevium : deinde  
coniunctione , quae neque asperos habeat con-  
cursus , neque disiunctos atque hiantes : et fit cir-  
cumscripta non longo anfractu , sed ad spiritum  
vocis apto , habeatque similitudinem aequalitatem  
que verborum , tum ex contrariis sumta verbis :  
crebra crebris , paria paribus respondeant , rela-  
taque ad idem verbum : et geminata , atque du-  
plicata , vel etiam saepius iterata ponantur : con-  
structioque verborum tum coniunctionibus copule-  
tur , tum dissolutionibus relaxetur. Fit etiam suau-  
vis oratio , cum aliquid aut invisum , aut inauditi-  
um , aut novum dicas. Delectat enim quidquid  
est admirabile , maximeque movet ea , quae mo-  
tum aliquem animi miscet , oratio : quaeque signi-  
ficat oratoris ipsius amabiles mores : qui expri-  
muntur , aut significando iudicio ipsius ex animo  
humano ac liberali , aut inflexione sermonis , cum  
aut augendi alterius , aut minuendi sui causa , alia  
dici ab oratore , alia existimari videntur , idque  
comitate fieri magis , quam vanitate. Sed multa  
sunt suavitatis praecepta , quae orationem aut ma-  
gis obscuram , aut minus probabilem faciant. Ita-  
que etiam hoc loco nobis est ipsis , quid causa  
postulet , iudicandum. *Filius.* Reliquum est igitur ,  
ut dicas de conversa oratione atque mutata.  
*Pater.* Est itaque id genus totum situm in commu-  
nicatione verborum : quae simplicibus in verbis ita

tractatur, ut aut ex verbo dilatetur, aut in verbum contrahatur oratio: ex verbo, cum aut proprium, aut idem significans, aut factum verbum in plura verba diducitur: ex oratione, cum aut definitio ad unum verbum revocatur, aut assumta verba removentur, aut in circuitus diriguntur, aut in coniunctione fit unum verbum ex duobus. In coniunctis autem verbis triplex adhiberi potest commutatio, non verborum, sed ordinis tantummodo: ut, cum semel dictum sit directe, sicut natura ipsa tulerit, invertatur ordo, et idem quasi sursum versus retroque dicatur; deinde idem intercise atque permiste. Eloquendi autem exercitatio maxime in hoc toto convertendi genere versatur.

*Filius.* Actio igitur sequitur, ut opinor. *Pater.* <sup>25</sup> Est ita: quae quidem oratori et cum rerum et cum verborum momentis commutanda maxime est. Facit enim et dilucidam orationem, et illustrem, et probabilem, et suavem, non verbis, sed varietate vocum, motu corporis, vultu, quae plurimum valebunt, si cum orationis genere consentient, eiusque vim ac varietatem subsequentur.

*Filius.* Num quidnam de oratore ipso restat? <sup>26</sup> *Pater.* Nihil sane, praeter memoriam, quae est gemina literaturae quodammodo, et in dissimili genere persimilis. Nam ut illa constat ex notis litterarum, et ex eo, in quo imprimuntur illae notae: sic confectio memoriae, tanquam cera, locis utitur, et in his imagines, ut literas, collocat.

*Filius.* Quoniam igitur vis oratoris omnis ex- <sup>28</sup>

posita est , quid habes de orationis paeceptis di-  
27 cere ? *Pater.* Quatuor esse eius partes : quarum  
prima et postrema ad motum animi valet. is enim  
initiis est et perorationibus concitandus. Secunda ,  
narratio : et tertia , confirmatio , fidem facit ora-  
tioni. Sed amplificatio quamquam habet proprium  
locum , saepe etiam primum , postremum quidem  
fere semper , tamen reliquo in cursu orationis ad-  
hibenda est , maximeque cum aliquid aut confir-  
matum est , aut reprehensum. Itaque ad fidem quoque  
vel plurimum valet. Est enim amplificatio vehe-  
mens quaedam argumentatio , ut illa docendi cau-  
28 fa sit , haec coimmovandi. *Filius.* Perge igitur or-  
dine quatuor mihi istas partes explicare. *Pater.*  
Faciam , et a principiis primum ordiar. quae qui-  
dem ducuntur aut ex personis , aut ex rebus ip-  
sis. Sumuntur autem trium rerum gratia : ut amice ,  
ut intelligenter , ut attente audiamur. Quorum pri-  
mus locus est in personis nostris , disceptatorum ,  
adversariorum : e quibus initia benevolentiae con-  
cilianda comparantur , aut meritis nostris , aut  
dignitate , aut aliquo genere virtutis , et maxime  
liberalitatis , officii , iustitiae , fidei ; contrariisque  
rebus in adversarios conferendis , et cum iis , qui  
disceptant , aliqua coniunctionis aut causa aut spe  
significanda : et , si in nos aliquod odium offen-  
siove collata sit , tollenda ea minuendave , aut di-  
luendo , aut extenuando , aut compensando , aut  
29 deprecando. Intelligenter autem ut audiamur , et  
attente , a rebus ipsis ordendum est. Sed facilime  
auditor discit , et , quid agatur , intelligit , si com-

plectare a principio genus naturamque causae , si definias , si dividas , si neque prudentiam eius impediā confusione partium , nec memoriam multitudine : quaeque mox de narratione dilucida dicentur , eadem etiam huc poterunt recte referri . Ut attente autem audiamur , trium rerum aliqua <sup>30</sup> consequemur . Nam aut magna quaedam propnemus , aut necessaria , aut coniuncta cum ipsis , apud quos res agetur . Sit autem hoc etiam in praceptis , ut , si quando tempus ipsum , aut res , aut locus , aut interventus alicuius , aut interpolation , aut ab adversario dictum aliquod , et maxime in perorando , dederit occasionem nobis aliquam , ut dicamus aliquid ad tempus apte , ne derelinquamus : et , quae suo loco de amplificatione dicemus , multa ex his poterunt ad principiorum praecepta transferri .

*Filius.* Quid ? in narratione quae tandem conservanda sunt ? *Pater.* Quoniam narratio est rerum <sup>31</sup> explicatio , et quaedam quasi sedes ac fundatum constituendae fidei , ea sunt in ea servanda maxime , quae etiam in reliquis fere dicendi partibus : quae partim sunt necessaria , partim assumta ad ornandum . Nam ut dilucide probabiliterque narremus , necessarium est : sed assumimus etiam suavitatem . Ergo ad dilucide narrandum eadem illa superiora explicandi et illustrandi praecepta repetemus , in quibus est brevitas : eaque saepissime in narratione laudatur , de qua supra dictum est . Probabilis autem erit , si personis , si temporibus , si locis ea , quae narrabuntur , consentient : si cuius-

que facti et eventi causa ponetur : si testata dici videbuntur , si cum hominum opinione , auctoritate , si cum lege , cum more , cum religione coniuncta : si probitas narrantis significabitur , si antiquitas , si memoria , si orationis veritas , et vitae fides. Suavis autem narratio est , quae habet admirationes , exspectationes , exitus inopinatos , interpositos motus animorum , colloquia personarum , dolores , iracundias , metus , laetitias , cupiditates. Sed iam ad reliqua pergamus.

33 *Filius.* Nempe ea sequuntur , quae ad faciendam fidem pertinent. *Pater.* Ita est : quae quidem in confirmationem et reprehensionem dividuntur. Nam in confirmando , nostra probare volumus : in reprehendendo , redarguere contraria. Quoniam igitur omne , quod in controversiam venit , id aut sit , necne sit , aut quid sit , aut quale sit quaeritur : in primo conjectura valet , in altero 34 definitio , in tertio ratio. *Filius.* Teneo istam distributionem. Nunc conjecturae locos quaero. *Pater.* In verisimilibus , et in propriis rerum notis posita est tota. Sed appellemus docendi gratia verisimile , quod plerumque ita fiat : ut , adolescentiam proclivorem esse ad libidinem. Propriae autem notae argumentum , quod nunquam aliter fit , certumque declarat , ut fumus ignem. Verisimilia reperiuntur ex partibus et quasi membris narrationis. ea sunt in personis , in locis , in temporibus , in factis , in eventis , in rerum ipsarum negotiorumque naturis. In personis naturae primum spectantur , valetudinis , figure , virium , aetatis , ma-

rium, seminarum : atque haec quidem in corpore : animi autem, aut quemadmodum affecti sint, virtutibus, vitiis, artibus, inertiis ; aut quemadmodum commoti, cupiditate, metu, voluptate, molestia. Atque haec quidem in natura spectantur. In fortuna, genus, amicitiae, liberi, propinqui, affines, opes, honores, potestates, divitiae, libertas, et ea, quae sunt iis contraria. In locis <sup>36</sup> autem et illa naturalia, maritimi an remoti a mari : plani an montuosi : laeves an asperi : salubres an pestilentes : opaci an aprici : et illa fortuita, culti an inculti : celebres an deserti : coaedificati an vasti : obscuri an rerum gestarum vestigiis nobilitati : consecrati an profani. In temporibus autem, praesentia, et praeterita, et futura cernuntur. <sup>37</sup> in his ipsis, vetusta, recentia, instantia, paulo post, aut aliquando futura. Insunt etiam in temporibus illa, quae temporis quasi naturam notant, ut hiems, ver, aestas, autumnus : aut anni tempora, ut mensis, ut dies, ut nox, hora, tempestas ; quae sunt naturalia : fortuita autem, sacrificia, festi dies, nuptiae. Iam facta et eventus aut consilii <sup>38</sup> sunt, aut imprudentiae ; quae est aut in casu, aut in quadam animi permotione : casu, cum aliter cecidit, ac putatum sit : permotione, cum aut oblivio, aut error, aut metus, aut aliqua cupiditatis causa permovit. Est etiam in imprudentia necessitas ponenda. Rerum autem bonarum et malorum tria sunt genera. nam aut in animis, aut in corporibus, aut extra esse possunt. Huius igitur materiae, ad argumentum subiectae, perlustrandae

animo partes erunt omnes , et ad id , quod age-  
 39 tur , ex singulis coniectura capienda. Est etiam ge-  
 nus argumentorum aliud , quod ex facti vestigiis  
 sumitur , ut telum , crux , clamor editus , titubatio ,  
 permutatio coloris , oratio inconstans , tremor , et  
 eorum aliquid , quod sensu percipi possit : etiam si  
 praeparatum aliquid , si communicatum cum ali-  
 40 quo , si postea visum , auditum , indicatum. Ve-  
 risimilia autem partim singula movent suo ponde-  
 re , partim , etiam si videntur esse exigua per se ,  
 multum tamen , cum sunt coacervata , proficiunt.  
 atque in his verisimilibus insunt nonnunquam  
 etiam certae rerum et propriae notae. Maximam  
 autem facit fidem ad similitudinem veri , primum  
 exemplum ; deinde introducta rei similitudo : fa-  
 bula etiam nonnunquam , etsi est incredibilis , ta-  
 men homines commovet.

12 *Filius.* Quid ? definitionis quae ratio est et quae  
 41 via ? *Pater.* Non dubium est id quidem , quin de-  
 finitio genere declaretur , et proprietate quadam ,  
 aut etiam communium frequentia , ex quibus , pro-  
 prium quid sit , eluceat. Sed quoniam de propriis  
 oritur plerumque magna dissensio , definiendum  
 est saepe ex contrariis , saepe etiam ex dissimili-  
 bus , saepe ex paribus. Quamobrem descriptiones  
 quoque sunt in hoc genere saepe aptae , et enu-  
 meratio consequentium , in primisque commovet  
 explicatio vocabuli ac nominis.

42 *Filius.* Sunt exposita iam fere ea , quae de facto ,  
 quaeque de facti appellatione quaeruntur. Nempe  
 igitur ea restant , quae , cum factum constet , et

nomen, qualia sint vocatur in dubium. *Pater.* Est ita, ut dicis. *Filius.* Quae sunt igitur in eo genere partes? *Pater.* Aut iure factum, depellendi aut ulciscendi doloris gratia, aut pietatis, aut pudicitiae, aut religionis, aut patriae nomine, aut denique necessitate, inficitia, casu. Nam quae motu <sup>43</sup> animi et perturbatione facta sine ratione sunt, ea defensionem contra crimen, in legitimis iudiciis, non habent, in liberis disceptationibus habere possunt. Hoc in genere, in quo, quale sit, quaeritur, ex controversia, iure, et rectene actum sit, quaeri solet: quorum disputatio ex locorum descriptione sumenda est. *Filius.* Agesis ergo, quoniam in confirmationem et reprehensionem diversas orationis fidem, et dictum de altero est: expone nunc de reprehendendo. *Pater.* Aut totum est negandum, quod in argumentatione aduersarius sumferit, si dictum aut falsum esse possit docere; aut redarguenda ea, quae pro verisimilibus sumta sint: primum dubia sumta esse pro certis: deinde etiam in perspicue falsis eadem posse dici: tum ex iis, quae sumferit, non effici, quod velit. Accedere autem oportet ad singula. sic universa frangentur. Commemoranda sunt etiam exempla, quibus simili in disputatione creditum non sit: conquerenda conditio communis periculi, si ingenii hominum criminorum sit exposita vita innocentium.

*Filius.* Quoniam, unde inveniuntur quae ad fidem pertinent, habeo, quemadmodum in dicens <sup>45</sup> do singula tractentur, exspecto. *Pater.* Argumen-

tationem quaerere videris , quae est argumenti explicatio : quae sumta ex iis locis , qui sunt expositi , conficienda et distinguenda dilucide est.

<sup>46</sup> *Filius.* Plane istuc ipsum desidero. *Pater.* Est ergo ( ut supra dictum est ) explicatio argumenti , argumentatio : sed ea conficitur , cum sumiseris aut non dubia , aut probabilia , ex quibus id efficias , quod aut dubium , aut minus probabile per se videtur. Argumentandi autem duo sunt genera , quorum alterum ad fidem directo spectat ; alterum se inflectit ad motum. Dirigitur , cum proposuit aliquid , quod probaret , sumissetque ea , quibus niteretur : atque his confirmatis , ad propositum retulit , atque conclusit. Illa autem altera argumentatio , quasi retro et contra , prius sumit , quae vult , eaque confirmat : deinde id , quod propoundendum fuit , permotis animis iacit ad extremum.

<sup>47</sup> Est autem illa varietas in argumentando , et non iniucunda distinctio : ut , cum interrogamus nosmet ipsi , aut percontamur , aut imperamus , aut optamus , quae sunt cum aliis compluribus sententiarum ornamenta. Vitare autem similitudinem poterimus , non semper a proposito ordientes : et si non omnia disputando confirmabimus , breviterque interdum , quae erunt satis aperta , poneamus : quodque ex his efficietur , si id apertum sit , non habebimus necesse semper concludere.

<sup>48</sup> *Filius.* Quid ? illa , quae sine arte appellantur , quae iamdudum assunta dixisti , ecquonam modo , ecquonam loco artis indigent ? *Pater.* Illa vero indigent : nec eo dicuntur sine arte , quod

ita sunt, sed quod ea non parit oratoris ars, sed foris ad se delata, tamen arte tractat, et maxime in testibus. Nam et de toto genere testimoniis,<sup>49</sup> quam id sit infirmum, saepe dicendum est: et argumenta, rerum esse propria: testimonia, voluntatum: utendumque est exemplis, quibus testibus creditum non sit; et de singulis testibus, si natura vani, si leves, si cum ignominia, si spe, si metu, si iracundia, si misericordia impulsi, si praemio, si gratia adducti: comparandique superiore cum auctoritate testimoniis, quibus tamen creditum non sit. Saepe etiam quaestioni-<sup>50</sup> bus resistendum est, quod et dolorem fugientes multi in tormentis ementiti persaepe sunt, morisque maluerunt falsum fatendo, quam verum insitiando dolere. Multi etiam suam vitam neglexerunt, ut eos, qui his cariores, quam ipsi sibi essent, liberarent: alii autem aut natura corporis, aut consuetudine dolendi, aut metu suppli-<sup>51</sup> cii, ac mortis, vim tormentorum pertulerunt: alii ementiti sunt in eos, quos oderant. Atque haec exemplis firmando sunt. Neque est obscurum, quin<sup>52</sup> (quoniam in utramque partem sunt exempla, et item ad coniecturam faciendam loci) in contrariis contraria sint sumenda. Atque etiam incurrit alia quaedam in testibus et in quaestionibus ratio. Saepe enim ea, quae dicta sunt, si aut ambigue, aut inconstanter, aut incredibiliter dicta sunt, aut etiam aliter ab alio dicta, subtiliter reprehenduntur.

*Filius.* Extrema tibi pars restat orationis, quae<sup>53</sup> posita in perorando est, de qua sane velim audire.<sup>54</sup>

*Pater.* Facilius est explicatio perorationis. nam est divisa in duas partes, amplificationem, et enumerationem. Augendi autem et hic est proprius locus in perorando: et in cursu ipso orationis declinationes ad amplificandum dantur, confirmata re aliqua, aut reprehensa. Est igitur amplificatio, gravior quaedam affirmatio, quae motu animorum conciliet in dicendo fidem. Ea et verborum genere conficitur, et rerum. Verba ponenda sunt, quae vim habeant illustrandi, nec ab usu sint abhorrentia, gravia, plena, sonantia, iuncta, facta, cognominata, non vulgata, superlata, imprimitaque translata, nec in singulis verbis, sed in continentibus soluta, quae dicuntur sine coniunctione, ut plura videantur. Augent etiam relata verba, iterata, duplicata, et ea, quae ascendunt gradatim ab humilioribus verbis ad superiora: omninoque semper quasi naturalis et non explanata oratio, sed gravibus referta verbis, ad augendum accommodator. Haec igitur in verbis; quibus actionis vocis, vultus, et gestus congruens, et apta ad animos permovendos, accommodanda est. Sed et in verbis, et in actione causa erit tenenda, et pro re agenda. nam haec, quia videntur perabsurda, cum graviora sunt, quam causa fert; diligenter, 16 quid quemque deceat, iudicandum est. Rerum amplificatio sumitur eisdem ex locis omnibus, quibus illa, quae dicta sunt ad fidem: maximeque definitiones valent congregatae, et consequentium frequentatio, et contrariarum, et dissimilium, et inter se pugnantium rerum conflictio: et causae,

et ea , quae sunt de causis orta , maximeque similitudines et exempla : fictae etiam personae : muta denique loquantur , omninoque ea sunt adhibenda , si causa patitur , quae magna habentur : quorum est duplex genus. Alia enim natura magna 54 videntur , alia usu : natura , ut coelestia , ut divina , ut ea , quorum obscurae causae , ut , in terris mundoque admirabilia quae sunt : ex quibus similibusque , si attendas , ad augendum permulta suppetunt : usu , quae videntur hominibus aut prodesse , aut obesse vehementius : quorum sunt genera ad amplificandum tria. Nam aut caritate moventur homines , ut deorum , ut patriae , ut parentum : aut amore , ut fratrum , ut coniugum , ut liberorum , ut familiarium : aut honestate , ut virtutum , maximeque earum , quae ad communionem hominum et liberalitatem valent. Ex iis et cohortationes sumuntur ad ea retinenda : et in eos , a quibus ea violata sunt , odia incitantur , et miseratio nascitur. Proprius locus est augendi , in 17 his rebus aut amissis , aut amittendi periculo. nihil 57 est enim tam miserabile , quam ex beato miser. Et hoc totum quidem moveat , si bona ex fortuna quis cadat : et , a quorum caritate divellatur : quae amittat , aut amiserit : in quibus malis sit , futurusve sit , exprimatur breviter. Cito enim arescit lacryma , praesertim in alienis malis. nec quidquam in amplificatione nimis enucleandum est. minuta est enim omnis diligentia. hic autem locus grandia requirit. Illud iam est iudicii , quo quaque in causa 58 genere utamur augendi. In illis enim causis , quae

ad delectationem exornantur , ii loci tractandi sunt , qui movere possunt exspectationem , admirationem , voluptatem : in cohortationibus autem , bonorum ac malorum enumerationes et exempla valent plurimum. In iudiciis accusatori fere , quae ad iracundiam ; reo plerumque , quae ad misericordiam pertinent. Nonnunquam tamen accusator misericordiam 59 movere debet , et defensor iracundiam. Enumeratio reliqua est , nonnunquam laudatori , suasori non saepe , accusatori saepius , quam reo , necessaria. Huius tempora duo sunt , si aut memoriae diffidas eorum , apud quos agas , vel intervallo temporis , vel longitudine orationis : aut frequentatis firmamentis orationis , et breviter expositis , vim est 60 habitura causa maiorem. Et reo rarius utendum est , quod ponenda sunt contraria ; quorum dissolutio in brevitate lucebit , aculei pungent. Sed erit in enumeratione vitandum , ne ostentatio memoriae suscepta videatur esse puerilis. id effugiet , qui non omnia minima repetet , sed brevia singula attin gens , pondera rerum ipsa comprehendet.

18 *Filius.* Quoniam et de ipso oratore , et de oratione dixisti , expone eum mihi nunc , quem ex tribus extremum proposuisti , quaestionis locum. *Pater.* Duo sunt , ut initio dixi , quaestionum genera : quorum alterum , finitum temporibus et personis , causam appello : alterum infinitum , nullis neque personis , neque temporibus notatum , propositum voco. Sed est consultatio quasi pars cauae quaedam et controversiae. inest enim infinitum in definito , et ad illud tamen referuntur omnia.

Quamobrem prius de proposito dicamus : cuius <sup>62</sup> genera sunt duo , cognitionis alterum ; eius scientia est finis , ut , verine sint sensus : alterum actionis ; quod refertur ad efficiendum quid , ut , si quaeratur , quibus officiis amicitia colenda sit. Rursus superioris genera sunt tria : sit , necne : quid sit : quale sit. Sit , necne , ut , ius in natura sit , an in more : quid autem sit ; sitne ius id , quod maiori parti sit utile : quale autem sit ; iuste vivere , sit , necne , utile. Actionis autem duo sunt genera : <sup>63</sup> unum , ad persequendum aliquid , aut declinandum ; ut , quibus rebus adipisci gloriam possis , aut quomodo invidia vitetur : alterum , quod ad aliquod commodum usumque refertur ; ut , quemadmodum sit respublica administranda , aut , quemadmodum in paupertate vivendum. Rursus autem <sup>64</sup> ex cognitionis consultatione , ubi , sit ; necne sit , aut fuerit , futurumve sit , quaeritur , unum genus est quaestionis , possitne aliquid effici ? ut , cum quaeritur , ecquisnam perfecte sapiens esse possit ? alterum , quemadmodum quidque fiat ; ut , quoniam pacto virtus pariatur , naturane , an ratione , an usu ? Cuius generis sunt omnes , in quibus , ut in obscuris naturalibusque quaestionibus , causae rationesque rerum explicantur. Illius autem generis , <sup>65</sup> in quo , quid sit id , de quo agitur , quaeritur , duo sunt genera : quorum in altero disputandum est , aliud , an idem sit , ut pertinacia et perseverantia : in altero autem , descriptio generis alicuius , et quasi imago exprimenda est , ut , qualis sit avarus , aut quid sit superbia. Tertio autem in genere , in <sup>66</sup>

quo , quale fit , quaeritur , aut de honestate , aut de utilitate , aut de aequitate dicendum est. De honestate sic : ut , Honestumne sit pro amico periculum aut invidiam subire. De utilitate autem sic : ut , Sitne utile , in republica administranda versari. De aequitate vero sic : ut , Sitne aequum , amicos cognatis anteferre. Atque in hoc eodem genere , in quo , quale fit , quaeritur , exoritur aliud quoddam disputandi genus. Non enim simpliciter solum quaeritur , quid honestum sit , quid utile , quid aequum , sed etiam ex comparatione , quid honestius , quid utilius , quid aequius : atque etiam , quid honestissimum , quid utilissimum , quid aequissimum : cuius generis illa sunt , quae praestantissima sit dignitas vitae. Atque ea quidem , quae dixi , cognitionis sunt omnia. Restant actionis : cuius alterum est praecipiendi genus , quod ad rationem officii pertinet : ut , quemadmodum colendi sint parentes : alterum autem ad sedandos animos , et oratione sanandos , ut in consolandis moeroribus , ut in iracundia comprimenda , aut in timore tollendo , aut in cupiditate minuenda. Cui quidem generi contrarium est disputandi genus ad eosdem illos animi motus , quod in amplificanda oratione saepe faciendum est , vel gignendos , vel concitandos. Atque haec fere est partitio consultationum.

20 *Filius.* Cognovi : sed quae ratio sit in his inventi et disponendi , requiro. *Pater.* Quid ? tu aliamne censes , et non eandem , quae est exposta , ut ex eisdem locis ad fidem et ad inveniendum ducantur omnia ? Collocandi autem quae

est exposita in aliis ratio , eadem hoc transfertur.

Cognita igitur omni distributione propositarum consultationum , causarum genera restant omnino. <sup>69</sup> Et earum quidem forma duplex est : quarum altera delectationem seciat aurum : alterius , ut obtineat , probet , et efficiat quod agit , omnis est suscepta contentio. Itaque illud superius , exornatio dicitur : quod cum latum genus esse potest , sane que varium , unum ex eo delegimus , quod ad laudandos claros viros suscipimus , et ad improbos vituperandos. Genus enim nullum est orationis , quod aut uberior ad dicendum , aut utilius civitatibus esse possit , aut in quo magis orator in cognitione virtutum vitiorumque versetur. Reliquum autem genus causarum , aut in provisione posteri temporis , aut in praeteriti disceptatione versatur : quorum alterum deliberationis est , alterum iudicij. Ex qua partitione tria genera causarum existent : <sup>70</sup> unum , quod a meliori parte , laudationis est appellatum : deliberationis alterum ; tertium iudiciorum. Quamobrem de primo primum , si placet , disputemus. *Filius.* Mihi vero placet.

*Pater.* Ac laudandi vituperandique rationes , quae <sup>21</sup> non ad bene dicendum solum , sed etiam ad honeste vivendum valent , exponam breviter , atque a principiis exordiar et laudandi et vituperandi. Omnia enim sunt profecto laudanda , quae con- <sup>71</sup> iuncta cum virtute sunt : et quae cum vitiis , vituperanda. Quamobrem finis alterius est honestas , alterius turpitudo. Conficitur autem genus hoc distinctionis , narrandis exponendisque factis , sine ullis

argumentationibus, ad animi motus leniter tractandos magis, quam ad fidem faciendam aut confirmandam accommodate. Non enim dubia firmanter, sed ea, quae certa, aut pro certis posita sunt, augentur. Quamobrem ex iis, quae ante dicta sunt, et narrandi, et augendi praecepta re-  
72 petentur. Et, quoniam in his causis omnis ratio fere ad voluptatem auditoris et ad delectationem refertur, utendum erit iis in oratione singulorum verborum insignibus, quae habent plurimum suavitatis: id est, ut factis verbis, aut vetustis, aut translatiſ frequenter utainur, et in ipsa constructione verborum, ut paria paribus, et similia similibus saepe referantur: ut contraria, ut geminata, ut circumscripta numeroſe, non ad similitudinem versuum, sed ad explendum aurium sen-  
73 sum, apto quodam quasi verborum modo. Adhibendaque frequentius etiam illa ornamenta rerum sunt, sive quae admirabilia et nec opinata, sive significata monstris, prodigiis, et oraculis: sive quae videbuntur ei, de quo agimus, accidisse di- vina atque fatalia. Omnis enim exspectatio eius, qui audit, et admiratio, et improvisi exitus, ha-  
22 bent aliquam in audiendo voluptatem. Sed quoniam  
74 in tribus generibus bona malave versantur, exter- nis, corporis, et animi; prima sunt externa, quae ducuntur a genere: quo breviter modice que laudato, aut, si erit infame, praetermisso; si humile, vel praeterito, vel ad augendam eius, quem laudes, gloriam, tracto; deinceps, si res patietur, de fortunis erit et facultatibus dicendum.

postea de corporis bonis ; in quibus quidem , quae virtutem maxime significat , facillime forma laudatur. Deinde est ad facta veniendum , quorum collocatio triplex est. aut enim temporum servandus est ordo , aut in primis recentissimum quodque dicendum , aut multa et varia facta in propria virtutum genera sunt digerenda. Sed hic locus virtutum atque vitiorum latissime patens , ex multis et variis disputationibus nunc in quandam angustam et brevem concludetur. Est igitur vis virtutis duplex. <sup>76</sup> aut enim scientia cernitur virtus , aut actione. Nam , quae prudentia , quae calliditas , quaeque gravissimo nomine sapientia appellatur , haec scientia pollet una. Quae vero moderandis cupiditatibus , regendisque animi motibus laudatur , eius est munus in agendo : cui temperantiae nomen est. Atque illa prudentia in suis rebus , domestica ; in publicis , civilis appellari solet. Temperantia autem in suas <sup>77</sup> itidem res , et in communes distributa est , duobusque modis in rebus commodis discernitur ; et ea , quae absunt , non expetendo , et ab iis , quae in potestate sunt , abstinentio. In rebus autem incommodis est itidem duplex. nam quae venientibus malis obstat , fortitudo ; quae , quod iam adest , tolerat et perfert , patientia nominatur. Quae autem haec uno genere complectitur , magnitudo animi dicitur : cuius est liberalitas , in usu pecuniae : simulque altitudo animi , in capiendis incommodis , et maxime iniuriis : et omne , quod est eius generis , grave , sedatum , non turbulentum. In communione autem quae posita pars est , iustitia dici-

tur, eaque erga deos, religio, erga parentes, pietas, vulgo autem bonitas: creditis in rebus fides, in moderatione animadvertisendi lenitas, amicitia in benevolentia nominatur. Atque hae quidem virtutes cernuntur in agendo. Sunt autem aliae quasi ministrae comitesque sapientiae: quarum altera, quae sint in disputando vera atque falsa, quibusque positis quid sequatur, distinguit et iudicat: quae virtus omnis in ratione scientiaque disputandi sita est: altera autem oratoria. Nihil enim est aliud eloquentia, nisi copiose loquens sapientia: quae ex eodem hausta genere, quo illa, quae in disputando est, uberior est atque latior, et ad motus animorum, vulgique sensus accommodatior. Cuius vero virtutum omnium, dedecus fugiens, laudemque maxime consequens, verecundia est. Atque hi sunt fere quasi quidam habitus animi, sic affecti et constituti, ut sint singuli inter se proprio virtutis genere distincti: a quibus ut quaeque res gesta est, ita sit honesta necessaria, summeque laudabilis. Sunt autem alii quidam perfecti animi habitus, ad virtutem quasi praeculti, et praeparati rectis studiis et artibus: ut, in suis rebus, studia literarum, ut numerorum ac sonorum, ut mensurae, ut siderum, ut equorum, ut venandi, ut armorum: in communibus, propensiora studia in aliquo genere virtutis praecipue colendo, aut divinis rebus deserviendo, aut parentibus, amicis, hospitibus, praecipue atque insigniter diligendis. Atque haec quidem virtutum. Vitiorum autem sunt genera contraria. Cernenda autem sunt diligenter,

ne fallant ea nos vitia, quae virtutem videntur imitari. nam et prudentiam malitia, et temperantiam immanitas in voluptatibus aspernandis, et magnitudinem animi superbia in animis extollendis, et despicientia in contemnendis honoribus, et liberalitatem effusio, et fortitudinem audacia imitatur, et patientiam duritia immanis, et iustitiam acerbitas, et religionem supersticio, et lenitatem mollitia animi, et verecundiam timiditas, et illam disputandi prudentiam concertatio captatioque verborum, et hanc orationis vim inanis quaedam profluentia loquendi. Studiis autem bonis similia videntur ea, quae sunt in eodem genere nimia. Quamobrem omnis vis laudandi vituperandique ex 82 his sumetur virtutum vitiorumque partibus: sed in toto quasi contextu orationis haec erunt illustranda maxime, quemadmodum quisque generatus, quemadmodum educatus, quemadmodum institutus moratusque fuerit: et, si quid cui magnum aut incredibile acciderit, maximeque si id divinitus accidisse potuerit videri: tum quod quisque senserit, dixerit, gesserit, ad ea, quae proposita sunt, virtutum genera accommodabuntur, ex illicque iisdem inveniendi locis causae rerum, et eventus, et consequentia requirentur. Neque vero mors eorum, quorum vita laudabitur, silentio praeteriri debet, si modo quid erit animadverendum, aut in ipso genere mortis, aut in iis rebus, quae post mortem erunt consecutae.

*Filius.* Accepi ista, didicique breviter, non solum quemadmodum laudarem alterum, sed etiam 83

quemadmodum emiterer, ut possem ipse iure laudari. Videamus igitur deinceps, in sententia dicenda quam viam, et quae praecepta teneamus.

*Pater.* Est igitur in deliberando finis utilitas, ad quem omnia ita referuntur in consilio dando, sententiaque dicenda, ut illa prima sint suasori, aut dissuasori videnda, quid aut possit fieri, aut non possit, et quid aut necesse sit, aut non necesse. Nam et, si quid effici non potest, deliberatio tollitur, quamvis utile sit: et, si quid necesse est, (necesse autem id est, sine quo salvi liberive esse non possumus,) id est reliquis, et honestatibus in

84 civili ratione, et commodis anteponendum. Cum autem quaeritur, quid fieri possit, videndum etiam est, quam facile possit. nam quae perdifficilia sunt, perinde habenda saepe sunt, ac si effici non possint. Et cum de necessitate attendemus, etsi aliquid non necessarium videbitur, videndum tamen erit, quam sit magnum. Quod enim permagni interest,

85 pro necessario saepe habetur. Itaque cum constet hoc genus causarum ex suasione et dissuasione; suasori proponitur simplex ratio: si et utile est, et fieri potest, fiat. Dissuasori duplex: una, si non utile est, ne fiat; altera, si fieri non potest, ne suscipiatur. Sic suasori utrumque docendum est,

86 dissuasori alterum infirmare sat est. Quare quoniam in his versatur omne consilium duobus, de utilitate ante dicamus, quae in discernendis bonis malisque versatur. Bonorum autem partim necessaria sunt, ut vita, pudicitia, libertas, ut liberi, coniuges, germani, parentes: partim non necessaria;

quorum alia sunt per se expetenda, ut ea, quae sita sunt in officiis atque virtutibus: alia, quod aliquid commodi efficiunt, ut opes et copiae. Eorum autem, quae propter se expetuntur, partim honestate ipsa, partim commoditate aliqua expetuntur: honestate, ea, quae profiscuntur ab iis virtutibus, de quibus paulo ante est dictum; quae sunt laudabilia ipsa per se: commoditate autem aliqua, quae sunt in corporis aut in fortunae bonis expetenda. quorum alia sunt quasi cum honestate coniuncta, ut honos, ut gloria: alia diversa, ut vires, forma, valetudo, nobilitas, divitiae, clientelae. Est etiam quaedam quasi materies subiecta honestati: quae maxime spectatur in amicitiis. amicitiae autem caritate et amore cernuntur. nam cum deorum, tum parentum, patriaeque cultus, eorumque hominum, qui aut sapientia, aut opibus excellunt, ad caritatem referri solet. Coniuges autem, et liberi, et fratres, et alii, quos usus familiaritasque coniunxit, quamquam etiam caritate ipsa, tamen amore maxime continentur. In his igitur rebus cum bona sint, facile est intellectu, quae sint contraria. Quodsi semper optima tenere possemus, haud sane, quoniam quidem ea perspicua sunt, consilio multum egeremus. Sed quia temporibus, quae vim habent maximam, persaepe evenit, ut utilitas cum honestate certet, earumque rerum contentio plerumque deliberationes efficit: ne aut opportuna propter dignitatem, aut honesta propter utilitatem relinquantur, ad hanc difficultatem explicandam praecepta referamus. Et

quoniam non ad veritatem solum , sed etiam ad opiniones eorum , qui audiunt , accommodanda est oratio : hoc primum intelligamus , hominum duo esse genera ; alterum indoctum et agreste , quod anteferat semper utilitatem honestati ; alterum humanum et politum , quod rebus omnibus dignitatem anteponat. Itaque huic generi laus , honor , gloria , fides , iustitia , omnisque virtus : illi autem alteri , quaestus , emolumentum , fructusque proponitur. Atque etiam voluptas , quae maxime est inimica virtuti , bonique naturam fallaciter imitando adulterat , quam immanissimus quisque acer-  
26 rime sequitur , neque solum honestis rebus , sed etiam necessariis anteponit , in suadendo , cum ei generi hominum consilium des , saepe sane lau-  
91 danda est. Et illud videndum , quanto magis ho-  
mines mala fugiant , quam sequantur bona . nam neque honesta tam expetunt , quam devitant tur-  
pia. Quis enim honorem , quis gloriam , quis lau-  
dem , quis ullum decus tam unquam expetat , quam ignominiam , infamiam , contumeliam , dedecus  
fugiat ? quarum rerum dolor gravis est. Est genus hominum ad honestatem natum , malo cultu pra-  
visque opinionibus corruptum. quare in cohortando atque suadendo propositum quidem nobis erit illud , ut doceamus , qua vi bona consequi ,  
92 malaque vitare possimus : sed apud homines bene institutos plurimum de laude et de honestate dice-  
mus : maximeque ea virtutum genera tractabimus , quae in communi hominum utilitate tuenda au-  
gendaque versantur. Sin apud indoctos imperito-

que dicemus ; fructus , emolumenta , voluptates , vitationesque dolorum proferantur : addantur etiam contumeliae atque ignominiae. Nemo enim est tam agrestis , quem non , si ipsa minus honestas , contumelia tamen et dedecus magnopere moveat. Quare , quod ad utilitatem spectet , ex iis , quae dicta sunt , reperietur : quid autem possit effici , <sup>93</sup> necne , in quo etiam , quam facile possit , quamque expeditat , quaeri solet , maxime ex causis iis , quae quamque rem efficient , est videndum. Causarum autem genera sunt plura. Nam sunt aliae , quae ipsae conficiunt ; aliae , quae vim aliquam ad conficiendum afferunt. Itaque illae superiores , conficientes vocentur : hae reliquae ponantur in eo genere , ut sine his confici non possit. Conficiens autem causa alia est absoluta et perfecta per se ; alia aliquid adiuvans , et efficiendi socia quedam : cuius generis vis varia est , et saepe aut maior , aut minor , ut et illa , quae maximam vim habet , sola saepe causa dicatur. Sunt autem aliae causae , quae aut propter principium , aut propter exitum , confidentes vocantur. Cum autem quaeritur , quid sit optimum factu ; aut utilitas , aut spes efficiendi ad assentiendum impellit animos. Et , quoniam de utilitate iam diximus , <sup>27</sup> de efficiendi ratione dicamus. Quo toto genere , <sup>95</sup> quibuscum , et contra quos , quo tempore , aut quo loco , aut quibus facultatibus armorum , pecuniae , sociorum , earumve rerum , quae ad quamque rem efficiendam pertinent , possimus uti , requirendum est. Neque solum ea sunt , quae nobis

suppetant, sed etiam illa, quae aduersentur, vindenda. Et, si ex contentione procliviora erunt nostra; non solum effici posse quae suademus, erit persuadendum: sed curandum etiam, ut illa facilia, proclivia, iucunda videantur. Dissuadentibus autem, aut utilitas labefactanda est, aut efficiendi difficultates efferendae, neque aliis ex praceptis, sed iisdem ex suasionis locis. Uterque vero ad augendum habeat exemplorum aut recentium, quo notiora sint, aut veterum, quo plus auctoritatis habeant, copiam. Maximeque sit in hoc genere meditatus, ut possit vel utilia ac necessaria saepe honestis, vel haec illis anteferre. Ad commovendos autem animos maxime proficient, si incitandi erunt, huiusmodi sententiae, quae aut ad explendas cupiditates, aut ad odium satiandum, aut ad ulciscendas iniurias pertinebunt. Sin autem reprimendi; de incerto statu fortunae, dubiusque eventis rerum futurarum, et retinendis suis fortunis, si erunt secundae: sin autem adversae, de periculo commonendi. Atque hi quidem sunt perorationis loci. Principia autem in sententiis dicendis brevia esse debent. non enim supplex, ut ad iudicem, venit orator, sed hortator, atque auctor. Quare proponere, qua mente dicat, quid velit, quibus de rebus dicturus sit, debet, hortarique ad se breviter dicentem audiendum. Tota autem oratio, simplex, et gravis, et sententiis debet ornatior esse, quam verbis.

**28 Filius.** Cognovi iam laudationis et suasionis logos. nunc, quae iudiciis accommodata sint, ex-

specto ; idque nobis genus restare unum puto.  
*Pater.* Reête intelligis. Atque eius quidem generis  
 finis est aequitas ; quae non simpliciter spectatur ,  
 sed ex comparatione nonnunquam : ut , cum de  
 verissimo accusatore disputatur , aut cum heredita-  
 tis sine lege , aut sine testamento , petitur posses-  
 sio : in quibus causis quid aequius , aequissimum  
 ve sit , quaeritur : quas ad causas facultas petitur  
 argumentationum ex iis , de quibus mox dicetur ,  
 aequitatis locis. Atque etiam ante iudicium , de con-<sup>22</sup>  
 siliuendo ipso iudicio solet esse contentio , cum  
 aut , sine actio illi , qui agit , aut iamne sit , aut  
 num iam esse desierit , aut illane lege , hisne ver-  
 bis sit actio , quaeritur. Quae etiam si ante , quam  
 res in iudicium venit , aut concertata , aut dijudicata ,  
 aut confecta [ non ] sunt ; tamen in ipsis iudiciis per-  
 magnum saepe habent pondus , cum ita dicitur : Plus  
 petisti : sero petisti : non fuit tua petitio : non a me , non  
 hac lege , non his verbis , non hoc iudicio. Quarum <sup>100</sup>  
 causarum genus est positum in iure civili : quod  
 est in privatarum ac publicarum rerum lege , aut  
 more positum ; cuius scientia neglecta ab oratori-  
 bus plerisque , nobis ad dicendum necessaria vi-  
 detur. Quare de constituendis actionibus , accipien-  
 dis subeundisque iudiciis , de excipienda iniuitate  
 actionis , de comparanda aequitate , quod ea fere  
 generis eius sunt , ut , quamquam in ipsum iudi-  
 cium saepe delabuntur , tamen ante iudicium tra-  
 c-tanda videantur , paululum ea separo a iudiciis ,  
 tempore magis agendi , quam dissimilitudine ge-  
 neris. Nam omnia , quae de iure civili , aut de

aequo et bono disceptantur, cadunt in eam formam, in qua, quale quid sit ambigitur, de qua dicturi sumus: quae in aequitate et iure maxi-  
29 me consistit. In omnibus igitur causis tres sunt  
101 gradus, ex quibus unus aliquis capiendus est, si plures non queas, ad resistendum. Nam aut ita consistendum est, ut id, quod obiicitur, factum neges; aut illud, quod factum fateare, neges eam vim habere, atque id esse, quod adversarius criminetur; aut, si neque de facto, neque de facti appellatione ambigi potest, id, quod arguere, neges tale esse, quale ille dicat, et rectum esse,  
102 quod feceris, concedendumve, defendas. Ita primus ille status, et quasi conflictio cum adversario, coniectura quadam; secundus autem definitione atque descriptione, aut informatione verbi; tertius aequi, et veri, et recti, et humani ad ignoscendum disputatione tractandus est. Et quoniam semper is, qui defendit, non solum resistat oportet, aliquo statu, aut insitiando, aut definiendo, aut aequitate opponenda, sed etiam rationem subiiciat recusationis suae: primus ille status rationem habet ini-  
qui criminis, ipsam negationem initiationemque facti; secundus, quod non sit in re, quod ab ad-  
versario ponitur in verbo; tertius, quod id recte factum esse defendat, quod sine ulla nominis con-  
103 troversia factum fatetur. Deinde unicuique rationi opponendum est ab accusatore id, quod si non esset in accusatione, causa omnino esse non posset. Itaque ea, quae sic referuntur, continentia causarum vocentur: quamquam non ea magis, quae contra

rationem defensionis afferuntur, quam ipsae defensionis rationes, continent causas. Sed distinguendi gratia rationem appellamus eam, quae assertur ab reo ad recusandum, depellendi criminis causa: quae nisi esset, quid defenderet, non haberet: firmamentum autem, quod contra ad labefactandam rationem refertur, sine quo accusatio stare non potest. Ex rationis autem, et ex 30 firmamenti confictione, et quasi concursu, quaestio <sup>104</sup> exoritur quaedam, quam disceptationem voco: in qua, quid veniat in iudicium, et de quo disceptetur, quaeri solet. nam prima aduersariorum contentio diffusam habet quaestionem: ut in coniectura, Ceperitne pecunias Decius; in definitione, Minueritne maiestatem Norbanus; in aequitate, Iure occiderit Opimius Gracchum. Haec, quae primam contentionem habent ex arguendo et resistendo, lata, ut dixi, et confusa sunt. Rationum et firmamentorum contentio adducit in angustum disceptationem. ea in coniectura nulla est. Nemo enim eius, quod negat factum, rationem aut potest, aut debet, aut solet reddere. Itaque in his causis eadem et prima quaestio, et disceptatio est extrema. In <sup>105</sup> illis autem, ubi ita dicitur, Non minuit maiestatem, quod egit de Caepione turbulentis: populi enim Romani dolor iustus vim illam excitavit, non tribuni actio: maiestas autem, quoniam est magnitudo quaedam populi Romani, in eius potestate ac iure retinendo, aucta est potius, quam diminuta: et ubi ita refertur, Maiestas est in imperii, atque in nominis populi Romani dignitate, quam minuit is,

qui per vim multitudinis rem ad seditionem vocavit : exsistit illa disceptatio , Minueritne maiestatem , qui voluntate populi Romani rem gratam ,  
106 et aequam per vim egerit. In his autem causis , ubi aliquid recte factum , aut concedendum esse factum defenditur , cum est facti subiecta ratio , sicut ab Opimio , Iure feci , salutis omnium , et conservandae reipublicae causa : relatumque est ab Decio , Ne sceleratissimum quidem civem , sine iudicio , iure ullo necare potuisti : oritur illa disceptatio , Potueritne recte , salutis reipublicae causa , civem , everforem civitatis , indemnatum necare ? Ita disceptationes eae , quae in his controversiis oriuntur , quae sunt certis personis et temporibus notatae , sunt rursus infinitae , detractisque temporibus et personis , rursus ad consultationis formam rationemque re-  
31 vocantur. Sed in gravissimis firmamentis etiam illa  
107 ponenda sunt , si qua ex scripto legis , aut testamenti , aut verborum ipsius iudicii , aut alicuius stipulationis , aut cautionis opponuntur defensioni contraria. Ac ne hoc quidem genus in eas causas incurrit , quae coniectura continentur . quod enim factum negatur , id argui non potest scripto. Ne in definitionem quidem venit , genere scripti ipsius. Nam etiamsi verbum aliquod de scripto definitum est , quam vim habeat: ut , cum ex testamentis , quid sit penus , aut cum ex lege praedii quaeritur , quae sint ruta caesa : non scripti genus , sed verbi interpretatio controversiam parit.  
108 Cum autem plura significantur scripto , propter verbi , aut verborum ambiguitatem , ut liceat ei ,

qui contra dicat, eo trahere significationem scripti, quo expedit, aut velit: aut, si ambigue scriptum non sit, vel a verbis voluntatem et sententiam scriptoris abducere, vel alio se, eadem de re, contrarie scripto defendere: tum disceptatio ex scripti contentionе existit, ut in ambiguis disceptetur, quid maxime significetur: in scripti sententiaeque contentionе, utrum potius sequatur iudex: in contrariis scriptis, utrum magis sit comprobandum.

Disceptatio autem cum est constituta, propositum esse debet oratori, quo omnes argumentationes, repetitae ex inveniendi locis, coniiciantur. Quod quamquam satis est ei, qui videt, quid in quoque loco lateat, quique illos locos, tanquam thesauros aliquos argumentorum, notatos habet: tamen ea, quae sunt certarum causarum propria, tangemus. In coniectura igitur, cum est in insitiando 32 reus, accusatori haec duo prima sunt; ( sed accusatorem pro omni actore et petitore appello: possunt enim etiam sine accusatione in causis haec eadem controversiarum genera versari; ) sed haec duo sunt ei prima, causa et eventus. Causam appollo, rationem efficiendi: eventum, id, quod est effectum. Atque ipsa quidem partitio causarum paulo ante in suasionis locis distributa est. Quae enim in consilio capiendo futuri temporis praecipiebantur, quamobrem aut utilitatem viderentur habitura, aut efficiendi facultatem, eadem, qui de facto argumentabitur, colligere debebit, quamobrem et utilia illi, quem arguet, fuisse, et ab eo effici potuisse demonstret. Utilitatis coniectura movetur,

si illud, quod arguitur, aut spe bonorum, aut malorum metu fecisse dicitur: quod sit acrius, quo  
112 illa in utroque genere maiora ponuntur. Spectantur etiam ad causam facti, motus animorum, si ira recens, si odium vetus, si ulciscendi studium, si iniuriae dolor: si honoris, si gloriae, si imperii, si pecuniae cupiditas: si periculi timor, si aes alienum, si angustiae rei familiaris: si audax, si levis, si crudelis, si impotens, si incautus, si insipiens, si amans, si commota mente, si vinolentus, si cum spe efficiendi, si cum opinione celandi: aut, si patefactum esset, depellendi criminis, vel perrumpendi periculi, vel in longinquum tempus differendi: aut si iudicii poena levior, quam facti praemium: aut si facinoris voluptas maior, quam damnationis  
113 dolor. His fere rebus facti suspicio confirmatur, cum et voluntatis in reo causae reperiuntur, et facultas. In voluntate autem utilitas ex adceptione alicuius commodi, vitationeque alicuius incommodi quaeritur, ut aut spes, aut metus impulisse videatur, aut aliis repentinus animi motus, qui etiam citius in fraudem, quam ratio utilitatis, impellit. Quam-  
114 obrem sint haec dicta de causis. *Filius.* Teneo, et quaero, qui sint illi eventus, quos ex causis effici  
33 dixisti. *Pater.* Consequentia quaedam signa praeteriti, et quasi impressa facti vestigia: quae quidem vel maxime suspicionem movent, et quasi tacita sunt criminum testimonia: atque hoc quidem graviora, quod causae communiter videntur insimulare et arguere omnes posse, quorum modo interfuerit aliquid: haec proprie attingunt eos ipsos, qui ar-

gauntur , ut telum , ut vestigium , ut cruor , ut deprehensum aliquid , quod ablatum eruptumve videatur , ut responsum inconstanter , ut haesitatum , ut titubatum , ut cum aliquo visus , ex quo suspicio oriatur , ut eo ipso in loco visus , in quo facinus , ut pallor , ut tremor , ut scriptum , aut obsignatum , aut depositum quippam. Haec enim talia sunt , quae aut in re ipsa , aut etiam ante quam factum est , aut postea , suspiciosum crimen efficiant. Quae si non <sup>115</sup> erunt , tamen causis ipsis , et efficiendi facultatibus niti oportebit , adiuncta illa disputatione communii , non fuisse illum tam amentem , ut indicia facti aut effugere , aut occultare non posset : ut ita apertus esset , ut locum crimi relinqueret. Communis ille contra locus , audaciam temeritati , non prudentiae esse coniunctam. Sequitur autem ille locus ad augen- <sup>116</sup> dum , non esse exspectandum , dum fateatur : argumentis peccata convinci : et hic etiam exempla ponentur. Atque haec quidem de argumentis. Sin au- 34 tem erit etiam testium facultas : primum genus erit <sup>117</sup> ipsum laudandum , dicendumque , ne argumentis teneretur reus , ipsum sua cautione effecisse , testes effugere non potuisse : deinde singuli laudentur : ( quae autem essent laudabilia , dictum est : ) deinde etiam argumento firmo ; ( quia tamen saepe falsum est , posse recte non credi : ) viro bono et firmo , sine vitio iudicis , non posse non credi. Atque etiam , si obscuri testes erunt , aut tenues ; dicendum erit , non esse ex fortuna fidem ponderandam , aut eos esse cuiusque locupletissimos testes , qui id , de quo agatur , facilissime scire pos-

sint. Sin quaestiones habitae , aut postulatio ut habeantur , causam adiuvabunt : confirmandum genus primum quaestionum erit : dicendum de vi doloris , de opinione maiorum , qui eam rem totam ,  
218 nisi probassent , certe repudiasserent ; de institutis Atheniensium , Rhodiorum , doctissimorum hominum , apud quos etiam ( id quod acerbissimum est ) liberi civesque torquentur ; de nostrorum etiam prudentissimorum hominum institutis , qui cum de servis in dominos quaeri noluissent , de incestu tamē et coniuratione , quae facta me consule est , quaerendum putaverunt. Irridenda etiam disputatio est , qua solent uti ad infirmandas quaestiones , et meditata , puerilisque dicenda. Tum facienda fides , diligenter esse et sine cupiditate quaesitum : dictaque quaestionis , argumentis , et coniectura ponderanda. Atque haec accusationis  
35 fere membra sunt. Defensionis autem primum in-  
119 firmatio causarum ; aut non fuisse , aut non tantas , aut non sibi soli , aut commodius potuisse idem consequi ; aut non iis se esse moribus , non ea vita ; aut nullos animi motus , aut non tam impotentes fuisse. Facultatum autem confirmatione utetur , si aut vires , aut animum , aut copias , aut opes abfuisse demonstrabit : aut alienum tempus , aut locum non idoneum , aut multos arbitros , quorum crederet nemini : aut non se tam ineptum , ut id susciperet , quod occultare non posset , neque tam amentem , ut poenas ac iudicia contemneret. Consequentia autem diluet , exponendo , non esse illa certa indicia facti , quae etiam nullo ad-

misso consequi possent : consistetque in singulis : et ea , aut eorum , quae ipse facta esse dicit , propria esse defendet potius , quam criminis : aut si sibi cum accusatore communia essent , pro periculo potius , quam contra salutem valere debere : testiumque et quaestionum genus universum , et quod poterit , in singulis , ex reprehensionis locis , de quibus ante dictum est , refellet. Harum causarum principia , suspiciosa ad acerbitatem , ab accusatore ponentur ; denunciabiturque insidiarum commune periculum , excitabunturque animi , ut attendant. Ab reo autem , querela conflati criminis collectarumque suspicionum , et accusatoris insidiae , et item commune periculum proferetur , animique ad misericordiam allicantur , et modice benevolentia iudicum colligetur. Narratio autem accusatoris , erit quasi membratim gesti negotii suspiciosa explicatio , sparsis omnibus argumentis , obscuratis defensionibus. Defensori , aut praeteritis , aut obscuratis suspicionum argumentis , rerum ipsarum eventus erunt casusque narrandi. In confirmandis autem nostris argumentationibus , infirmandisque contrariis , saepe erunt accusatori motus animorum incitandi , reo mitigandi. Atque haec quidem utriusque maxime in peroratione facienda : alteri frequentatione argumentorum , et coacervatione universa ; alteri , si plane causam redarguendo explicarit , enumeratione , ut quidque diluerit , et miseratione ad extremum.

*Filius.* Scire mihi iam videor , quemadmodum 36 conjectura tractanda sit. Nunc de definitione audia-

mus. *Pater.* Communia dantur in isto genere accusatori defensorique praecepta. Uter enim definiendo describendoque verbo magis ad sensum iudicis opinionemque penetrarit, et uter ad communem verbi vim, et ad eam praeceptionem, quam inchoatam habebunt in animis ii, qui audient, magis et proprius accesserit, is vincat necesse est.

- 124 Non enim argumentando hoc genus tractatur, sed tanquam explicando excutiendoque verbo: ut, si in reo, pecunia absoluto, rursusque revocato, praevaricationem accusator esse definiat, omnem iudicii corruptelam ab reo; defensor autem, non omnem, sed tantummodo accusatoris corruptelam ab reo: sit ergo haec contentio prima verborum, in qua, etiamsi proprius accedat ad consuetudinem mentemque sermonis defensoris definitio, tamen accusator sententia legis nititur: negat enim probari oportere, eos, qui leges scripserint, ratum habere iudicium, si totum corruptum sit; si unus accusator corruptus sit, rescindere: nititur aequitate: ut illa quasi scribenda lex sic esset, quaeque tamen completeretur in iudiciis corruptis, ea verbo uno praevaricationis comprehendisse 125 dicatur: defensor autem testabitur consuetudinem sermonis, verbique vim ex contrario reperiet, quasi ex vero accusatore, cui contrarium est nomen praevaricatoris; ex consequentibus, quod ea litera de accusatore solet dari iudici; ex nomine ipso, quod significat eum, qui in contrariis causis, quasi varie esse positus videatur. Sed huic tamen ipsi configendum est ad aequitatis locos,

ad rerum iudicatarum auctoritatem , ad finem aliquem periculi : communeque sit hoc praeceptum , ut , cum uterque definierit , quam maxime potuerit ad communem sensum vimque verbi , tum similibus , exemplisque eorum , qui ita locuti sunt , suam definitionem sententiamque confirmet. Atque <sup>127</sup> accusatori in hoc genere causarum locus ille communis , minime esse concedendum , ut is , qui de re confiteatur , verbi se interpretatione defendat : defensor autem et ea , quam proposui , aequitate nitatur , et , ea cum secum faciat , non re , sed depravatione verbi se urgeri queratur. Quo in genere percensere poterit plerosque inveniendi locos . nam et similibus utetur , et contrariis , et consequentibus ; quamquam uterque , tamen reus , nisi plane erit absurd a causa , frequentius. Amplificandi <sup>128</sup> autem causa , quae , aut cum digredientur a causa , dici solent , aut cum perorabunt , haec vel ad odium , vel ad misericordiam , vel omnino ad animos iudicum movendos ex iis , quae sunt ante posita , sumentur , si modo rerum magnitudo , hominumve aut invidia , aut dignitas postulabit.

*Filius.* Habeo ista : nunc ea , quae quum , quale sit quipiam , disceptatur , quaeri ex utraque <sup>37</sup> parte deceat , velim audire. *Pater.* Confitentur in isto genere , qui arguuntur , se id fecisse ipsum , in quo reprehendantur : sed , quoniam iure se fecisse dicunt , iuris est omnis ratio nobis explicanda. quod dividitur in duas partes primas , naturam atque legem : et utriusque generis vis in divinum et humanum ius est distributa : quorum

130 aequitatis est unum , alterum religionis. Aequitatis autem vis est duplex : cuius altera directi , et veri , et iusti , et , ut dicitur , aequi et boni ratione defenditur ; altera ad vicissitudinem referendae gratiae pertinet : quod in beneficio , gratia ; in iniuria , ultio nominatur. Atque haec communia sunt naturae atque legis : sed propria legis et ea , quae scripta sunt , et ea , quae sine literis , aut gentium iure , aut maiorum more , retinentur. Scriptorum autem privatum aliud est , publicum aliud. publicum , lex , senatusconsultum , foedus ; privatum , tabulae , pactum conventum , stipulatio. Quae autem scripta non sunt , ea aut consuetudine , aut conventis hominum , et quasi consensu obtinentur. Atque etiam hoc in primis , ut nostros mores legesque tueamur , quodammodo 131 naturali iure praescriptum est. Et quoniam breviter aperti fontes sunt , quasi quidam aequitatis , meditata nobis ad hoc causarum genus esse debebunt ea , quae dicenda erunt in orationibus , de natura , de legibus , de more maiorum , de propulsanda iniuria , de ulciscenda , de omni parte iuris. Si imprudenter , aut necessitate , aut casu quippiam fecerit , quod non concederetur iis , qui sua sponte et voluntate fecissent : ad eius facti depreciationm , ignoscendi petenda venia est : quae sumetur ex plenisque locis aequitatis. Expositum est , ut potui brevissime , de omni controversiarum genere : nisi praeterea tu quid requiris.

38 *Filius.* Illud equidem , quod iam unum restare 132 video , quale sit , cum disceptatio versatur in scrip-

tis. *Pater.* Recte intelligis : eo enim exposito , munus promissi omne confecero. Sunt igitur ambi-gui duobus adversariis praecepta communia. Uterque enim hanc significationem , qua utetur ipse , dignam scriptoris prudentia esse defendet : uterque id , quod adversarius ex ambigue scripto intelligendum esse dicet , aut absurdum , aut inutile , aut iniquum , aut turpe esse defendet , aut etiam discrepare cum ceteris scriptis , vel aliorum , vel maxime , si poterit , eiusdem ; quamque defendet ipse , eam rem et sententiam quemvis prudentem , et iustum hominem , si integrum daretur , scripturum fuisse , sed planius : eamque sententiam , <sup>133</sup> quam significari posse dicet , nihil habere aut captionis , aut vitii ; contrariam autem si probarit , fore , ut multa vitia , stulta , iniqua , contraria consequantur. Cum autem aliud scriptor sensisse videtur , et aliud scripsisse : qui scripto nitetur , eum , re exposita , recitatione uti oportebit ; deinde instare adversario , iterare , renovare , interrogare , num aut scriptum neget , aut contra factum infitietur. Post , iudicem ad vim scripti vocet. Hac confirmatione usus , amplificet rem legē <sup>134</sup> laudanda , audaciamque confutet eius , qui cum palam contra fecerit , idque fateatur , adsit tamen , factumque defendat. Deinde infirmet defensionem , cum adversarius aliud voluisse , aliud sensisse scriptorem , aliud scripsisse dicat , non esse ferendum , a quoquam potius latoris sensum , quam a lege , explicari. Cur ita scriferit , si ita non sensebit ? Cur , cum ea , quae plane scripta sint , ne-

glexerit, quae nusquam scripta sint, proferat? Cur prudentissimos in scribendo viros, summae stultitiae putet esse damnandos? Quid impedierit scriptorem, quo minus exciperet illud, quod adversarius, tanquam si exceptum esset, ita dicit se secutum? Utetur exemplis iis, quibus idem scriptor: aut, si id non poterit, quibus alii, quod excipiendum putarint, exceperint. Quaerenda etiam ratio est, si qua poterit inveniri, quare non sit exceptum: aut iniqua lex, aut inutilis futura dicetur, aut alia causa obtemperandi, alia abrogandi: dissentire adversarii vocem atque legis. Deinde amplificandi causa, de conservandis legibus, de periculo rerum publicarum atque privatarum, cum aliis locis, tum in perorando maxime graviter erit 39 vehementerque dicendum. Ille autem, qui se sententia legis voluntateque defendet, in consilio atque in mente scriptoris, non in verbis ac literis vim legis positam esse defendet: quodque nihil exceperit in lege, laudabit, ne deverticula peccatis darentur, atque ut ex facto cuiusque iudex legis mentem interpretaretur. Deinde erit ostendendum exemplis, in quibus omnis aequitas perturbetur, 136 si verbis legum, ac non sententiis pareatur. Deinde genus eiusmodi calliditatis et calumniae retrahatur in odium iudicis, cum quadam invidiosa querela. Et si incidet imprudentiae causa, quae non ad delictum, sed ad casum necessitatemve pertineat, quod genus paulo ante attigimus: erit iisdem aequitatis sententiis contra acerbitudinem verborum deprecandum. Sin scripta inter se dissen-

tient : tanta series artis est , et sic inter se sunt pleraque connexa et apta , ut , quae paulo ante praecepta dedimus ambigui , quaeque proxime sententiae et scripti , eadem ad hoc genus causae tertium transferantur. Nam quibus locis in ambiguo 138 defendimus eam significationem , quae nos adiuvat , eisdem in contrariis legibus nostra lex defendenda est. Deinde est efficiendum , ut alterius scripti sententiam , alterius verba defendamus. Ita quae modo de scripto sententiaque praecepta sunt , eadem hoc omnia transferemus.

Expositae sunt tibi omnes oratoriae partitiones , 40 quae quidem e media illa nostra Academia flo- 139 ruerunt : neque sine ea aut inveniri , aut intelligi , aut tractari possunt. nam et partiri ipsum , et definire , et ambigui partitiones dividere , et argumentorum locos nosse , et argumentationem ipsam concludere , et videre , quae sumenda in argumentando sint , quidque ex iis , quae sumta sunt , efficiatur ; et vera a falsis , verisimilia ab incredibilibus dijudicare , et distinguere , aut male sumta , aut male conclusa reprehendere , et eadem vel anguste differere , ut dialectici qui appellantur , vel , ut oratorem decet , late exprimere : illius exercitationis et subtiliter disputandi , et copiose dicendi [ artis ] est. De bonis vero rebus 140 et malis ; aequis , iniquis ; utilibus , inutilibus ; honestis , turpibus , quam potest habere orator , sine illis maximarum rerum artibus , facultatem , aut copiam ? Quare haec tibi sint , mi Cicero , quae exposui , quasi indicia fontium illorum : ad

quos si nobis eisdem ducibus aliisve perveneris ,  
tum et haec ipsa melius , et multo maiora alia  
cognosces. *Filius*. Ego vero , ac magno quidem  
studio , mi pater : multisque ex tuis praeclarissi-  
mis muneribus nullum maius exspecto.

M. TULLII CICERONIS  
TOPICA.



## M. TULLII CICERONIS

A D

C. TREBATICUM,  
TOPICA.

## ARGUMENTUM.

Trebati voluntati satisfacturus hoc quasi compendium Topicorum Aristoteleorum fecit. Primo locos argumentorum cum artificiosorum tam *ατεχγων* breviter enumerat, definit quodque genus et exemplis illustrat c. 2. 3. 4. deinde fusiū de singulis differit c. 5--20. ac addit tandem de diversis quaestioneī causarumque generibus, quibus alios locos aliis aptiores esse ostendit.

**M**aiores nos res scribere ingressos, C. Trebatii, et iis libris, quos brevi tempore satis multos edidimus, digniores, e cursu ipso revocavit voluntas tua. Cum enim mecum in Tusculano essem, et in bibliotheca separatim uterque nostrum ad suum studium libellos, quos vellet, evolveret, incidisti in Aristotelis Topica quaedam, quae sunt ab illo pluribus libris explicata. Quia inscriptione commotus, continuo a me eorum librorum sententiam requisisti. Quam tibi cum exposuissem, disciplinam inveniendorum argumentorum, ut sine ullo errore, ad eam rationem, via perveniremus ab Aristotele inventa, libris illis contineri: verecunde tu quidem, ut omnia, sed tamen ut facile cernerem te ardere studio, mecum, ut tibi illam traderem, egisti. Cum autem ego te, non tam vitandi laboris mei causa, quam quod id tua in-

teresse arbitrarer, vel ut eos per te ipse legeres, vel ut totam rationem a doctissimo quodam rhetore acciperes, hortatus essem: utrumque, ut ex te audiebam, es expertus. Sed a libris te obscuritas reiecit. Rhetor autem ille magnus, haec, ut opinor, Aristotelica se ignorare respondit. Quod quidem minime sum admiratus, eum philosophum rhetori non esse cognitum, qui ab ipsis philosophis, praeter admodum paucos, ignoraretur. Quibus eo minus ignoscendum est, quod non modo rebus iis, quae ab illo dictae et inventae sunt, allici debuerunt; sed dicendi quoque incredibili quadam cum copia, tum etiam suavitate. Non potui igitur tibi, saepius hoc roganti, et tamen verenti, ne mihi gravis essem, (facile enim id cernebam,) debere diutius, ne ipsi iuris interpreti fieri videretur iniuria. Etenim cum tu mihi meisque multa saepe scripsisses, veritus sum, ne, si ego gravarer, aut ingratum id, aut superbum videretur. Sed, dum fuimus una, tu optimus es testis, quam fuerim occupatus: ut autem a te discessi, in Graeciam proficiscens, cum opera mea nec respublica nec amici uterentur, nec honeste inter arma versari possem, ne si tuto id quidem mihi liceret: ut veni Veliam, tuaque et tuos vidi, admonitus huius aeris alieni, nolui deesse ne tacitae quidem flagitationi tuae. Itaque haec, cum mecum libros non haberem, memoria repetita, in ipsa navigatione conscripsi, tibique ex itinere misi: ut mea diligentia mandatorum tuorum, te quoque, et si admonitore non

eges, ad memoriam nostrarum rerum excitarem. Sed iam tempus est ad id, quod instituimus, accedere.

Cum omnis ratio diligens differendi duas ha-<sup>2</sup>beat partes; unam inveniendi, alteram iudicandi: <sup>6</sup> utriusque princeps, ut mihi quidem videtur, Aristoteles fuit. Stoici autem in altera elaboraverunt. Iudicandi enim vias diligenter persecuti sunt, ea scientia, quam *Dialecticen* appellant. Inveniendi vero artem, quae *Topice* dicitur, quaeque ad usum potior erat, et ordine naturae certe prior, totam reliquerunt. Nos autem, quoniam in utraque, summa utilitas est, et utramque, si erit otium, persequi cogitamus, ab ea, quae prior est, ordiemur. Ut igitur earum rerum, quae absconditae sunt, demonstrato et notato loco, facilis inventio est: sic, cum per vestigare argumentum aliquod volumus, locos nosse debemus: sic enim appellatae ab Aristotele sunt hae quasi sedes, e quibus argumenta promuntur. Itaque licet defisiire, *Locum* esse argumenti sedem: *Argumentum* autem, rationem, quae rei dubiae faciat fidem. Sed ex his locis, in quibus argumenta inclusa sunt, alii in eo ipso, de quo agitur, haerent: alii assumuntur extrinsecus. In ipso, tum ex toto, tum ex partibus eius, tum ex nota, tum ex his rebus, quae quodammodo affectae sunt ad id, de quo quaeritur. Extrinsecus autem ea dicuntur, quae absunt, longeque disiuncta sunt. Sed ad id totum, de quo differitur, tum definitio adhibetur, quae quasi involutum evolvit id, de quo quaeritur.

ei⁹⁹⁹ argumenti talis est formula : Ius civile est ,  
aequitas constituta iis , qui eiusdem civitatis sunt ,  
ad res suas obtainendas : eius autem aequitatis utilis est cognitio : utilis est ergo iuris civilis scientia . tum partium enumeratio , quae tractatur hoc modo : Si neque censu , neque vindicta , nec testamento liber factus est , non est liber . neque est ulla earum rerum : non est igitur liber . tum notatio , cum ex vi verbi argumentum aliquod elicetur , hoc modo : Cum lex Aelia Sentia assiduo vindicem assiduum esse iubeat , locupletem iubet locupleti : locuples enim est assiduus , ut ait Ae-  
lius , appellatus ab asse dando . Ducuntur etiam 10 argumenta ex iis rebus , quae quodammodo affectae sunt ad id , de quo quaeritur . Sed hoc genus in plures partes distributum est . Nam alia coniugata appellamus , alia ex genere , alia ex formula , alia ex similitudine , alia ex antecedentibus , alia ex consequentibus , alia ex repugnantibus , alia ex causis , alia ex effectis , alia ex comparatione 11 maiorum , aut parium , aut minorum . Coniugata dicuntur , quae sunt ex verbis generis eiusdem . Eiusdem autem generis verba sunt , quae orta ab uno varie commutantur , ut sapiens , sapienter , sapientia . Haec verborum coniugatio , συζυγία dicitur , ex qua huiusmodi est argumentum : Si 12 compascuus ager est , ius est compascere . A genere sic dicitur : Quoniam argentum omne mulieri legatum est , non potest ea pecunia , quae numerata domi relicta est , non esse legata ; forma enim a genere , quoad suum nomen retinet , nun-

quam seiungitur : numerata autem pecunia nomen argenti retinet : legata igitur videtur. A forma generis , quam interdum , quo planius accipiatur , partem licet nominare , hoc modo : Si ita Fabiae pecunia legata est a viro , si ea uxor materfamilias esset ; si ea in manum viri non convenerat , nihil debetur. Genus enim est , uxor : eius duae formae ; una matrumfamilias , earum , quae in manum convenerunt ; altera , earum , quae tantummodo uxores habentur. qua in parte cum fuerit Fabia , legatum ei non videtur. A similitudine , hoc modo : Si aedes eae corruerunt , vitiumve fecerunt , quarum ususfructus legatus est , heres restituere non debet , nec reficere , non magis , quam servum restituere , si is , cuius ususfructus legatus est , deperisset. A differentia : Non , si uxori vir legavit omne argentum , quod suum esset , idcirco , quae in nominibus fuerunt , legata sunt. multum enim differt , in arcane positum sit argentum , an in tabulis debeatur. Ex contrario autem , sic : Non debet ea mulier , cui vir bonorum suorum usumfructum legavit , cellis vinariis et olearii plenis relictis , putare id ad se pertinere. usus enim , non abusus , legatus est. ea sunt inter se contraria. Ab adiunctis : Si ea mulier testamentum fecit , quae se capite nunquam diminuit , non videtur ex edicto praetoris secundum eas tabulas possessio dari. adiungitur enim , ut secundum servorum , secundum exfulum , secundum puerorum tabulas possessio videatur ex edicto dari. Ab antecedentibus autem , et consequentibus , et repug-

nantibus , hoc modo : ab antecedentibus , Si viri culpa factum est divortium , et si mulier nuntium remisit , tamen pro liberis manere nihil oportet : a consequentibus , Si mulier , cum fuisse nupta cum eo , quicum connubium non esset , nuntium remisit ; quoniam qui nati sunt , patrem non sequuntur , pro liberis manere nihil oportet : a repugnantibus , Si paterfamilias uxori ancillarum usumfructum legavit a filio , neque a secundo herede legavit ; mortuo filio mulier usumfructum non amittet . quod enim semel testamento alicui datum est , id ab eo invito , cui datum est , auferri non potest . repugnat enim recte accipere , et invitum reddere . Ab efficientibus causis , hoc modo : Omnibus est ius parietem directum ad parietem communem adiungere , vel solidum , vel fornicatum . at si quis in pariete communi demoliendo damni infecti promiserit ; non debebit praestare , quod fornicis vitii fecerit . non enim eius vitio , qui demolitus est , damnum factum est , sed eius operis vitio , quod ita aedificatum est , ut suspendi non posset . Ab effectis rebus , hoc modo : Cum mulier viro in manum convenit , omnia , quae mulieris fuerunt , viri fiunt dotis nomine . Ex comparatione autem omnia valent , quae sunt eiusmodi : Quod in re maiore valet , valeat in minore : ut , si in urbe fines non reguntur , nec aqua in urbe arceatur . Item contra : Quod in minore valet , valeat in maiore . licet idem exemplum convertere . Item : Quod in re pari valet , valeat in hac , quae par est : ut ,

Quoniam usus auctoritas fundi biennium est, sit etiam aedium. at in lege aedes non appellantur, et sunt ceterarum rerum omnium, quarum annuus est usus. valeat aequitas, quae paribus in causis paria iura desiderat. Quae autem extrinsecus assumentur, ea maxime ex auctoritate ducuntur. itaque Graeci tales argumentationes, *ατεχνες*, vocant, id est, artis expertes: ut, si ita respondeas: Quoniam P. Scaevola id solum esse ambitus aedium dixerit, quod, parietis communis tegendi causa, tectum proiiceretur, ex quo in tectum eius, aedes qui protexisset, aqua deflueret, id tibi ius videri.

His igitur locis, qui sunt expositi, ad omne argumentum reperiendum, tanquam elementis quibusdam, significatio et demonstratio datur. Utrum igitur haec tenus satis est? tibi quidem, tam acuto, et tam occupato, puto. Sed, quoniam avidum 5 hominem ad has discendi epulas recepi, sic accipiam, ut reliquarum sit potius aliquid, quam te hinc patiar non satiatum discedere. Quando ergo 26 unusquisque eorum locorum, quos exposui, sua quaedam membra habet, ea quam subtilissime persequamur: et primum de ipsa definitione dicatur. Definitio est oratio, quae id, quod definitur, explicat, quid sit. Definitionum autem duo sunt genera prima: unum earum rerum, quae sunt; alterum earum, quae intelliguntur. Esse ea dico, 27 quae cerni tangive possunt, ut fundum, aedes, parietem, stillicidium, mancipium, pecudem, suppellectilem, penus, cetera; quo ex genere quae-

dam interdum nobis definienda sunt. Non esse rursus ea dico , quae tangi demonstrative non possunt , cerni tamen animo , atque intelligi possunt : ut , si usucaptionem , si tutelam , si gentem , si agnationem defunias : quarum rerum nullum subest quasi corpus : est tamen quaedam conformatio insignita , et impressa intelligentia : quam notionem voco. ea saepe in argumentando definitione explicanda sunt. Atque etiam definitiones aliae sunt partitionum , aliae divisionum : partitionum , cum res ea , quae proposita est , quasi in membra discerpitur ; ut , si quis ius civile dicat id esse , quod in legibus , senatusconsultis , rebus iudicatis , iurisperitorum auctoritate , edictis magistratum , more , aequitate consistat : divisionum autem definitio formas omnes complectitur , quae sub eo genere sunt , quod definitur , hoc modo : Abalienatio est eius rei , quae mancipi est , aut traditio alteri nexu , aut in iure cessio , inter quos ea iure civili fieri possunt. Sunt et alia genera definitionum : sed ad huius libri institutum illa nihil pertinent : tantum est dicendum , qui sit definitionis modus. Sic igitur veteres praecipiunt : cum sumseris ea , quae sint ei rei , quam definire velis , cum aliis communia , usque eo persequi , dum proprium efficiatur , quod nullam in aliam rem transferri possit. Ut hoc , *Hereditas est pecunia*. Commune adhuc : multa enim genera sunt pecuniae. Adde quod sequitur : *quae morte aliquius ad quempiam pervenit*. nondum est definitio . multis enim modis sine hereditate teneri mortuo-

rum pecuniae possunt. Unum adde verbum, *iure*. iam a communitate res disiuncta videbitur, ut sit explicata definitio, sic: *Hereditas est pecunia, quae morte alicuius ad quempiam pervenit iure*. Nondum est satis: adde, *nec ea aut legata testamento, aut possessione retenta*. confectum est. Itemque, ut illud, *Gentiles sunt, qui inter se eodem nomine sunt*. Non est satis. *Qui ab ingenuis oriundi sunt*. Ne id quidem satis est. *Quorum maiorum nemo servitutem servivit*. Abest etiam nunc. *Qui capite non sunt deminuti*. Hoc fortasse satis est. Nihil enim video Scaevolam, pontificem, ad hanc definitionem addidisse. Atque haec ratio valet in utroque genere definitionum, sive id, quod est, sive id, quod intelligitur, definiendum est. Partitionum autem 30 et divisionum genus quale esset, ostendimus; sed quid inter se differant, planius dicendum est. In partitione quasi membra sunt: ut corporis, caput, humeri, manus, latera, crura, pedes, et cetera: in divisione, formae sunt, quas Graeci *δεις* vo- 7 cant: nostri, si qui haec forte tractant, *species* appellant; non pessime id quidem, sed inutiliter ad mutandos casus in dicendo. Nolim enim, ne si Latine quidem dici possit, *specierum*, et *speciebus* dicere: et saepe his casibus intendum est: at *formis*, et *formarum* velim. Cum autem utroque verbo idem significetur, commoditatem in dicendo non arbitror negligendam. Genus et formam 37 definiunt hoc modo: Genus est notio ad plures differentias pertinens. Forma est notio, cuius differentia ad caput generis et quasi fontem re-

ferri potest. Notionem appello, quam Graeci tum  
*εννοιαν*, tum προνοην dicunt. Ea est insita, et ante  
percepta cuiusque formae cognitio, enodationis  
indigens. Formae igitur sunt hae, in quas genus,  
sine ullius praetermissione, dividitur: ut si quis  
ius in legem, morem, aequitatem dividat. Formas  
qui putat idem esse, quod partes, confundit ar-  
tem, et similitudine quadam conturbatus, non fa-  
32 tis acute, quae sunt secernenda, distinguit. Saepe  
etiam definiunt et oratores et poetae per transla-  
tionem verbi, ex similitudine cum quadam suavi-  
tate. Sed ego a vestris exemplis, nisi necessario,  
non recedam. Solebat igitur Aquilius, collega et  
familiaris meus, cum de litoribus ageretur, quae  
omnia publica esse vultis, quaerentibus iis, ad  
quos id pertinebat, quid esset litus, ita definire,  
*qua fluctus eluderet*: hoc est, quasi qui adolescen-  
tiam, florem aetatis; senectutem, occasum vitae,  
velit definire: translatione utens discedebat a ver-  
8 bis propriis rerum ac suis. Quod ad definitiones  
attinet, haec tenus: reliqua videamus.

33 Partitione autem sic utendum est, nullam ut  
partem relinquas, ut si partiri velis tutelas, in-  
scienter facias, si ullam praetermittas. At si sti-  
pulationum aut iudiciorum formulas partiare, non  
est vitiosum, in re infinita praetermittere aliquid.  
Quod idem in divisione vitiosum est. Formarum  
enim certus est numerus, quae cuique generi sub-  
iiciantur: partium distributio saepe est infinitior,  
34 tanquam rivorum a fonte deductio. Itaque in ora-  
toriis artibus, quae questionis genere proposito, quot

eius formae sint, subiungitur absolute. at cum de ornamentis verborum sententiarumque praecipitur, quae vocantur *σχηματα*, non sit idem. Res enim est infinitior; ut ex hoc quoque intelligatur, quid velimus inter partitionem et divisionem interesse. Quamquam enim vocabula prope idem valere videantur: tamen quia res differebant, nomina rerum distare voluerunt.

Multa etiam ex notatione sumuntur. Ea est autem, cum ex vi nominis argumentum elicetur: quam Graeci *ετυμολογιαν* vocant, id est, verbum ex verbo, veriloquium: nos autem novitatem verbi non satis apti fugientes, genus hoc notacionem appellamus, quia sunt verba rerum notae. Itaque hoc idem Aristoteles *συμβολον* appellat, quod latine est nota. Sed cum intelligitur, quid significetur, minus laborandum est de nomine. Multa igitur in disputando notatione eliciuntur, ex verbo: ut, cum quaeritur, *Postliminium* quid sit: (non dico, quae sint postliminii. nam id caderet in divisionem, quae talis est: Postliminio redeunt haec, homo, navis, mulus clitellarius, equus, equa, quae frena recipere solet) sed cum ipsius postliminii vis quaeritur, et verbum ipsum notatur. In quo Servius noster (ut opinor) nihil putat esse notandum, nisi *post*; et *liminium* illud productionem esse verbi vult, ut in *finitimo*, *legitimo*, *aeditimo*, non plus esse *timum*, quam in *meditullio tullium*: Scaevola autem, P. filius, iunctum putat esse verbum, ut sit in eo et *post* et *limen*: ut quae a nobis alienata sunt, cum ad

hostem pervenerint, et ex suo tanquam limine exierint, dein cum redierint post ad idem limen, postliminio videantur rediisse. Quo in genere etiam Mancini causa defendi potest, postliminio rediisse: deditum non esse, quoniam non sit receptus. Nam neque ditionem, neque donationem sine acceptatione intelligi posse.

- 9 Sequitur is locus, qui constat ex iis rebus, quae  
38 quodammodo affectae sunt ad id, de quo ambigitur: quem modo dixi in plures partes distributum. Cuius primus est locus ex coniugatione, quam Graeci *συζυγιαν* vocant, finitimus notationi, de qua modo dictum est: ut, si aquam pluviam eam modo intelligeremus, quam imbri collectam videremus; veniret Mucius, qui, quia coniugata verba essent pluvia et pluendo, diceret, omnem aquam oportere arceri, quae pluendo crevisset.  
39 Cum autem a genere ducetur argumentum, non erit necesse id usque a capite arcessere: saepe etiam citra licet, dummodo supra sit, quod sumitur, quam id, ad quod sumitur: ut, aqua pluvia ultimo genere ea est, quae de coelo veniens crescit imbre: sed propiore loco, in quo quasi ius arcendi continetur, genus est, aqua pluvia nocens: eius generis formae, loci vitio, et manu nocens: quarum altera iubetur ab arbitro coerceri; altera  
40 non iubetur. Commodo etiam tractatur haec argumentatio, quae ex genere sumitur, cum ex toto persequare partes, hoc modo: Si dolus malus est, cum aliud agitur, aliud simulatur; enumerare licet, quibus id modis fiat: deinde in eorum

aliquem id , quod arguas dolo malo factum , includere : quod genus argumenti in primis firmum videri solet.

Similitudo sequitur , quae late patet ; sed orato-<sup>10</sup>ribus et philosophis magis , quam vobis. Etsi <sup>41</sup> enim omnes loci sunt omnium disputationum , ad argumenta suppeditanda , tamen aliis disputationibus abundantius occurunt , aliis angustius. Itaque genera tibi nota sint : ubi autem his utare , quaestiones ipsae te admonebunt. Sunt enim similitudines <sup>42</sup> , quae ex pluribus collationibus perveniunt quo volunt , hoc modo : Si tutor fidem praestare debet , si socius , si , cui mandaris , si qui fiduciam acceperit : debet etiam procurator. Haec ex pluribus perveniens quo vult , appellatur inductio : quae graece *πτωγών* nominatur ; qua plurimum est usus in sermonibus Socrates. Alterum similitu-<sup>43</sup> dinis genus collatione sumitur , cum una res uni , par pari comparatur , hoc modo : Quemadmo- dum , si in urbe de finibus controversia est , quia fines magis agrorum videntur esse , quam urbis , finibus regundis adigere arbitrum non possis : sic , si aqua pluvia in urbe nocet , quoniam res tota magis agrorum est , aquae pluviae arcenda adi- gere non possis arbitrum. Ex eodem similitudinis <sup>44</sup> loco etiam exempla sumuntur , ut Crassus in Cu- riana causa exemplis plurimis usus est , agens de eo , qui testamento sic heredem instituisset , ut , si filius natus esset in decem mensibus , isque mortuus prius , quam in suam tutelam venisset ; se- cundus heres hereditatem obtineret. Quae comme-

moratio exemplorum valuit; eaque vos in re-  
45 spondendo uti multum soletis. Facta etiam exempla  
similitudinis habent vim: sed ea oratoria magis  
sunt, quam vestra: quamquam uti etiam vos so-  
letis, sed hoc modo: Finge mancipio aliquem  
dedisse id, quod mancipio dari non potest. num  
idcirco id eius factum est, qui accepit? aut num  
is, qui mancipio dedit; ob eam rem se ulla re  
obligavit? In hoc genere oratoribus et philoso-  
phis concessum est, ut multa etiam loquantur, ut  
mortui ab inferis excitentur, aut aliquid, quod  
fieri nullo modo possit, augendae rei gratia, di-  
catur, aut minuendae, quae hyperbole dicitur, et  
multa mirabilia alia. Sed latior est campus illorum.  
eisdem tamen ex locis (ut ante dixi) et in ma-  
ximis, et in minimis quaestionibus argumenta-  
ducuntur.

11 Sequitur similitudinem differentia rei, maxime  
46 contraria superiori: sed est eiusdem, dissimile et  
simile invenire. Eius generis haec sunt: Non,  
quemadmodum quod mulieri debeas, recte ipsi  
mulieri; sine tutorē auctore, solvas: ita quod  
aut pupillae, aut pupillo debeas, recte possis eo-  
47 dem modo solvere. Deinceps locus est, qui a  
contrario dicitur. Contrariorum autem genera  
sunt plura: unum eorum, quae in eodem genere  
plurimum differunt, ut sapientia et stultitia. Eodem  
autem genere dicuntur, quibus propositis occur-  
runt, tanquam e regione, quaedam contraria,  
ut celeritati tarditas, non debilitas. ex quibus  
(contrariis) argumenta talia existunt: Si stulti-

tiam fugimus, sapientiam sequamur : et bonitatem, si malitiam. Haec, quae ex eodem genere contraria sunt, appellantur adversa. Sunt enim alia <sup>48</sup> contraria, quae privantia licet appellemus latine, Graeci appellant *ατερπτικα*. Praepositio enim IN, privat verbum ea vi, quam haberet, si IN praepositum non fuisset : ut *dignitas*, *indignitas*, *humanitas*, *inhumanitas*, et cetera generis eiusdem : quorum tractatio est eadem, quae superiorum, quae adversa dixi. Nam alia quoque sunt contra- <sup>49</sup> riorum genera, velut ea, quae cum alio conseruntur : ut duplum, simplum : multa, pauca : longum, breve : maius, minus. Supt etiam illa valde contraria, quae appellantur *negantia*. ea *αποφατικα* Graeci, contraria aientibus : ut, Si hoc est, illud non est. Quid enim opus exemplo est ? tantum intelligatur, argumento quaerendo, contrariis omnibus contraria non convenire.

Ab adiunctis autem posui equidem exemplum <sup>50</sup>, paulo ante, multa scilicet adiungi, quae suscipienda essent, si statuissemus, ex edicto secundum eas tabulas possessionem dari, quas is instituisset, cui testamenti factio nulla esset. Sed locus hic magis ad conjecturales causas, quae versantur in iudiciis, valet : cum quaeritur, quid aut sit, aut evenerit, aut futurum sit, aut, quid omnino fieri possit. At loci quidem ipsius forma talis est. Admonet autem hic locus, ut quaeratur, quid ante <sup>51</sup> rem, quid cum re, quid post rem evenerit. Nihil hoc ad ius ; ad Ciceronem, inquibat Gallus noster, si quis ad eum tale quid retulerat, ut de

facto quaereretur. tu tamen patiere, nullum a me artis institutae locum praeteriri; ne, si nihil, nisi quod ad te pertineat, scribendum putaris, nimium te amare videare. Est igitur magna ex parte locus hic oratorius, non modo non iurisconsultorum, 52 sed ne philosophorum quidem. Ante rem enim quaeruntur, quae talia sunt, apparatus, colloquia, locus, constitutum, convivium. Cum re autem, pedum crepitus, strepitus hominum, corporum umbrae, et si quid eiusmodi. At post rem, rubor, pallor, titubatio, et si qua alia signa conturbationis et conscientiae: praeterea restinctus ignis, gladius cruentus, ceteraque, quae suspicione facti possunt movere.

53 Deinceps est locus dialecticorum proprius ex consequentibus, et antecedentibus, et repugnantibus, qui etiam ab adiunctis longe diversus est, nam adiuncta, de quibus paulo ante dictum est, non semper eveniunt: consequentia autem semper. Ea enim dico consequentia, quae rem necessario consequuntur. itemque et antecedentia et repugnantia. quidquid enim antecedit quamque rem, id cohaeret cum re necessario: et quidquid repugnat, id eiusmodi est, ut cohaerere nunquam possit. Cum tripartito igitur distribuatur locus hic, in consecutionem, antecessionem, repugnantiam; reperiendi argumenti locus simplex est, tractandi triplex. nam quid interest, cum hoc sumseris, pecuniam numeratam mulieri deberi, cui sit omne argentum legatum, utrum hoc modo concludas argumentum: *Si pecunia signata, argentum est;*

legata est mulieri. est autem pecunia signata argen-  
tum. legata igitur. An illo modo ? Si numerata pe-  
cunia, non est legata ; non est numerata pecunia ar-  
gentum. est autem numerata pecunia argentum. legata  
igitur est. An illo modo ? Non et legatum argen-  
tum est, et non est legata numerata pecunia. legatum  
autem argentum est. legata igitur numerata pecunia  
est. Appellant autem dialeictici eam conclusionem 54  
argumenti, in qua, cum primum assumferis, con-  
sequitur id, quod annexum est, primum conclu-  
sionis modum : cum id, quod annexum est, ne-  
garis, ut id quoque, cui fuerit annexum, negan-  
dum sit, secundus appellatur concludendi modus :  
cum autem aliqua coniuncta negaris, et his alia  
negatio rursus adiungitur, et ex his primum sum-  
feris, ut, quod relinquitur, tollendum sit : is ter-  
tius appellatur conclusionis modus. Ex hoc illa 55  
rhetorum sunt ex contrariis conclusa, quae ipsi  
enthymemata appellant : non quod non omnis  
sententia proprio nomine enthymema dicatur :  
sed, ut Homerus propter excellentiam commune  
poetarum nomen efficit apud Graecos suum ; sic,  
cum omnis sententia enthymema dicatur, quia  
videtur ea, quae ex contrariis conficiatur, acu-  
tissima, sola proprie nomen commune possidet.  
Eius generis haec sunt. *Hunc metuere, alterum in*  
*metu non ponere ? Eam, quam nihil accusas, dam-*  
*nas : bene quam meritam esse autumas, dicas male*  
*mereri ? Id, quod scis, prodest nihil : id, quod*  
*nescis, obest ? Hoc differendi genus attingit om-* 56  
*nino vestras quoque in respondendo disputationes :*

sed philosophorum magis ; quibus est cum oratoribus illa ex repugnantibus sententiis communis conclusio , quae a dialecticis tertius modus , a rhetoribus enthymema nuncupatur. Reliqui dialeictorum modi plures sunt , qui ex disiunctionibus constant : *Aut hoc , aut illud : hoc autem : non igitur illud.* Itemque , *Aut hoc , aut illud : non autem hoc : illud igitur.* Quae conclusiones idcirco ratae sunt , quod in disiunctione plus uno verum esse non potest. Atque ex iis conclusionibus , quas supra scripsi , prior , quartus ; posterior , quintus a dialecticis modus appellatur. Deinde addunt coniunctionum negantiam , sic : *Non et hoc est , et illud : hoc autem : non igitur illud.* Hic modus est sextus. Septimus autem , *Non et hoc , et illud : non autem hoc : illud igitur.* Ex his modis conclusiones innumerabiles nascuntur , in quo est fere tota dialectica. Sed ne eae quidem , quas exposui , ad hanc institutionem sunt necessariae.

58 Proximus est locus rerum efficientium , quae causae appellantur : deinde rerum effectarum ab efficientibus causis. Harum exempla , ut reliquorum locorum , paulo ante posui , et quidem ex iure civili : sed haec patent latius. Causarum igitur genera , duo sunt : unum , quod vi sua id , quod sub ea subiectum est , certo efficit , ut ignis accedit : alterum , quod naturam efficiendi non habet , sed sine quo effici non possit : ut , si quis aet causam statuae velit dicere , quod sine eo non possit effici. Huius generis causarum , sine quo non efficitur , alia sunt quieta , nihil agentia , stolida

quodammodo ; ut locus , tempus , materiae , ferramenta , et cetera generis eiusdem : alia autem praecursionem quandam adhibent ad efficiendum , et quaedam afferunt per se adiuvantia , et si non necessaria , ut amori congressio causam attulerit , amor flagitio. Ex hoc genere causarum , ex aeternitate pendentium , fatum a Stoicis necritur. Atque ut earum causarum , sine quibus effici non potest , genera divisi ; sic etiam efficientium dividi possunt. Sunt enim aliae causae , quae plane efficiant , nulla re adiuvante : aliae , quae adiuvari velint : ut sapientia efficit sapientes sola per se : beatos efficiat , necne , sola per se , quaestio est. Quare <sup>60</sup> cum in disputationem inciderit causa efficiens aliquid necessario , sine dubitatione licebit , quod efficitur ab ea causa , concludere. Cum autem erit <sup>16</sup> talis causa , ut in ea non sit efficiendi necessitas ; necessaria conclusio non sequitur. Atque illud quidem genus causarum , quod habet vim efficiendi necessariam , errorem afferre non fere solet : hoc autem , sine quo non efficitur , saepe conturbat. Non enim , si sine parentibus filii esse non possunt , propterea causa fuit in parentibus gignendi necessaria. Hoc igitur , sine quo non fit , ab eo , <sup>61</sup> a quo certo fit , diligenter est separandum. Illud enim est tanquam ,

*Utinam ne in nemore Pelio securibus  
Caesa cecidisset abiegnā ad terrām trabes !*

Nisi enim cecidisset abiegnā ad terrām trabes , Argo illa facta non esset. nec tamen fuit in his trabibus efficiendi vis necessaria. At cum in Aiacis

navim *crispisulcans igneum fulmen* iniectum est,  
62 inflammatur navis necessario. Atque etiam est cau-  
sarum dissimilitudo, quod aliae sunt, ut sine ulla  
appetitione animi, sine voluntate, sine opinione,  
suum quasi opus efficiant, velut, ut omne inte-  
reat, quod ortum est: aliae autem aut voluntate  
efficiuntur, aut perturbatione animi, aut habitu,  
aut natura, aut arte, aut casu: voluntate, ut tu,  
cum hunc libellum legis; perturbatione, ut si  
quis eventum horum temporum timeat; habitu,  
ut facile et cito irascatur; natura, ut vitium in  
dies crescat; arte, ut bene pingat; casu, ut  
prospere naviget. Nihil horum sine causa, nec  
quidquam omnino; sed huiusmodi causae non  
63 necessariae. Omnia autem causarum in aliis inest  
constantia, in aliis non inest. In natura, et in  
67 arte constantia est, in ceteris nulla. Sed tamen ea-  
rum causarum, quae non sunt constantes, aliae  
sunt perspicuae, aliae latent. Perspicuae sunt, quae  
appetitionem animi iudiciumque tangunt: latent,  
quae subiectae sunt fortunae. Cum enim nihil sine  
causa fiat; hoc ipsum est fortunae eventus, ob-  
scura causa, quae latenter efficitur. Etiam ea,  
quae fiunt, partim sunt ignorata, partim vo-  
luntaria: ignorata, quae necessitate effecta sunt;  
64 voluntaria, quae consilio. Quae autem fortuna,  
vel ignorata, vel voluntaria. Nam iacere te-  
lum, voluntatis est: ferire, quem nolueris,  
fortunae. Ex quo aries ille subiicitur in vestris  
actionibus: Si telum manu fugit magis, quam  
iecit. Cadunt etiam in ignorationem atque

in imprudentiam perturbationes animi : quae , quamquam sunt voluntariae , ( obiurgatione enim , et admonitione deiiciuntur , ) tamen habent tantos motus , ut ea , quae voluntaria sunt , aut necessaria interdum , aut certe ignorata videantur. Toto igitur loco causarum explicato ,<sup>65</sup> ex earum differentia in magnis quidem causis vel oratorum , vel philosophorum , magna argumentorum suppetit copia ; in vestris autem , si non uberior , at fortasse subtilior. Privata enim iudicia maximarum quidem rerum in iurisconsultorum mihi videntur esse prudentia. Nam et adsunt multum , et adhibentur in consilio : et patronis diligentibus , ad eorum prudentiam confugientibus , hastas ministrant. In omnibus igitur iis iudiciis ,<sup>66</sup> in quibus , *ex fide bona* , est additum : ubi vero etiam , *ut inter bonos bene agier* : in primisque in arbitrio rei uxoriae , in quo est ; *quid aequius , melius* , parati esse debent. Illi enim dolum malum , illi fidem bonam , illi aequum , bonum , illi , quid socium socio , quid eum , qui negotia aliena curasset , ei , cuius ea negotia fuissent ; quid eum , qui mandasset , eumve , cui mandatum esset , alterum alteri praestare oporteret ; quid virum uxori , quid uxorem viro , tradiderunt. Licebit igitur , diligenter cognitis argumentorum locis , non modo oratoribus et philosophis , sed iuris etiam peritis copiose de consultationibus suis disputare. Coniunctus huic causarum loco locus ille est , qui <sup>13</sup> efficitur ex causis. Ut enim causa effectum indicat ,<sup>67</sup> sic , quod effectum est , quae fuerit causa , de-

monstrat. Hic locus suppeditare solet oratoribus et poetis, saepe etiam philosophis, sed iis, qui ornate et copiose loqui possunt, mirabilem copiam dicendi, cum denuntiant, quid ex qua re sit futurum. Causarum enim cognitio, cognitionem eventorum facit.

- 68 Reliquus est comparationis locus, cuius genus et exemplum supra positum est, ut ceterorum : nunc explicanda tractatio est. Comparantur igitur ea, quae aut maiora, aut minora, aut paria dicuntur : in quibus spectantur haec, numerus, species, vis, quaedam etiam ad res aliquas affectio.
- 69 Numero sic comparabuntur, plura bona ut paucioribus bonis anteponantur, pauciora mala malis pluribus, diuturniora bona brevioribus, longe et late pervagata angustis ; ex quibus plura bona propagentur, quaeque plures imitantur et faciant. Specie autem comparantur, ut anteponantur, quae propter se expetenda sunt, iis, quae propter aliud ; et ut innata atque insita, assumtis et adventiciis, integra contaminatis, iucunda minus iucundis, honesta ipsis etiam utilibus, proclivia laboriosis, necessaria non necessariis, sua alienis, rara vulgaribus, desiderabilia iis, quibus facile carere possis, perfecta inchoatis, tota partibus, ratione utentia rationis expertibus, voluntaria necessariis, animata inanimatis, naturalia non naturalibus, artificiosa non artificiosis. Vis autem in comparatione sic cernitur, efficiens causa gravior, quam non efficiens : quae seipsis contenta sunt, meliora, quam quae egent aliis : quae in nostra,

quam quae in aliorum potestate sunt : stabilia incertis : quae eripi non possunt , iis , quae possunt. Affectio autem ad res aliquas , est huiusmodi : principum commoda maiora , quam reliquorum ; itemque , quae iucundiora , quae pluribus probata , quae ab optimo quoque laudata. Atque , ut haec in comparatione meliora , sic deteriora , quae iis sunt contraria. Parium autem comparatio nec elationem habet , nec submissionem. est enim aequalis. Multa autem sunt , quae aequalitate ipsa comparentur : quae ita fere concluduntur. Si consilio iuvare cives et auxilio , aequa in laude ponendum est : pari gloria debent esse ii , qui consulunt , et ii , qui defendunt. at , quod primum , est : quod sequitur igitur. Perfecta est omnis argumentorum inveniendorum praeceptio , ut , cum profectus sis a definitione , a partitione , a notatione , a coniugatis , a genere , a forma , a similitudine , a differentia , a contrariis , ab adiunctis , a consequentibus , ab antecedentibus , a repugnatis , a causis , ab effectis , a comparatione maiorum , minorum , parium , nulla praeterea sedes argumenti quaerenda sit.

Sed quoniam ita a principio divisimus , ut alios locos diceremus in eo ipso , de quo ambigitur , haerere , de quibus satis est dictum , alios assumi extrinsecus ; de iis pauca dicamus : etsi ea nihil omnino ad vestras disputationes pertinent ; sed tamen totam rem perficiamus , quandoquidem coepimus. Neque enim tu is es , quem nihil , nisi ius civile , delectet : et quoniam ad te haec ita scri-

buntur, ut etiam in aliorum manus sint ventura,  
detur opera, ut quamplurimum iis, quos recta  
73 studia delectant, prodesse possimus. Haec ergo ar-  
gumentatio, quae dicitur artis expers, in testimonio  
posita est. Testimonium autem nunc dicimus omne,  
quod ab aliqua re externa sumitur ad faciendam fidem.  
Personam autem non qualiscunque testimonii pondus  
habet: ad faciendam enim fidem auctoritas quaer-  
ritur: sed auctoritatem aut natura aut tempus  
affert. Naturae auctoritas in virtute ineſt maxime:  
in tempore autem multa sunt, quae afferant auctoritatem, ingenium, opes, aetas, fortuna, ars,  
usus, necessitas, concursio etiam nonnunquam re-  
rum fortuitarum. Nam et ingeniosos, et opulen-  
tos, et aetatis spatio probatos, dignos, quibus  
credatur, putant: non recte fortasse, sed vulgi  
opinio mutari vix potest, ad eamque omnia diri-  
gunt et qui iudicant, et qui existimant. Qui enim  
his rebus, quas dixi, excellunt, ipsa virtute vi-  
74 dentur excellere. Sed reliquis quoque rebus, quas  
modo enumeravi, quamquam in iis nulla species  
virtutis est: tamen interdum confirmatur fides, si  
aut ars quaedam adhibetur; ( magna enim est vis  
ad persuadendum, scientiae;) aut usus: plerum-  
20 que enim creditur iis, qui experti sunt. Facit  
etiam necessitas fidem, quae cum a corporibus,  
tum ab animis nascitur. Nam et verberibus, tor-  
mentis, igni fatigati quae dicunt, ea videtur ve-  
ritas ipsa dicere, et, quae a perturbationibus ani-  
mi sunt, dolore, cupiditate, iracundia, metu,  
quia necessitatis vim habent, afferunt auctoritatem

et fidem. Cuius generis etiam illa sunt , ex quibus 75 nonnunquam verum invenitur , pueritia , somnus , imprudentia , vinolentia , insania. Nam et pueri saepe indicaverunt aliquid , ad quod pertineret , ignari : et per somnum , vinum , insaniam , multa saepe patefacta sunt. Multi etiam in res odiosas imprudentes inciderunt , ut Staleno nuper accidit : qui ea locutus est , bonis viris subauscultantibus , pariete interposito , quibus patefactis , in iudiciumque prolatis , rei capitalis iure damnatus est. Huic simile quiddam de Lacedaemonio Pausania accepimus. Concursio autem fortuitorum talis est , ut , 76 si interventum est casu , cum aut ageretur aliquid , quod proferendum non esset , aut diceretur. In hoc genere etiam illa est in Palamedem coniecta suspicionum prodictionis multitudo : quod genus refutare interdum veritas vix potest. Huius etiam generis est fama vulgi , quoddam multitudinis testimonium. Quae autem virtute fidem faciunt , ea bipartita sunt : ex quibus alterum natura valet , alterum industria. Deorum enim virtus natura excellit : hominum autem industria. Divina haec fe- 77 re sunt testimonia ; primum orationis ; ( oracula enim ex eo ipso appellata sunt , quod inest in his deorum oratio ; ) deinde rerum , in quibus insunt quasi opera divina quaedam : primum ipse mundus , eiusque omnis ordo et ornatus ; deinceps aerei volatus avium atque cantus ; deinde eiusdem aeris sonitus et ardores , multarumque rerum in terra portenta ; atque etiam per exta inventa praefensio. A dormientibus quoque multa

significata visis, quibus ex locis sumi interdum so-  
 78 lent ad fidem faciendam testimonia deorum. In  
 homine virtutis opinio valet plurimum. Opinio au-  
 tem est, non modo eos virtutem habere, qui ha-  
 beant, sed eos etiam, qui habere videantur. Ita-  
 que, quos ingenio, quos studio, quos doctrina  
 praeditos vident, quorumque vitam constantem,  
 et probatam, ut Catonis, Laelii, Scipionis, alic-  
 rumque plurium, rentur eos esse, quales seipsi  
 velint. Nec solum eos censem tales esse, qui in  
 honoribus populi, reque publica versantur, sed  
 et oratores, et philosophos, et poetas, et histo-  
 ricos: ex quorum et dictis et scriptis saepe auc-  
 toritas petitur ad faciendam fidem.

21 Expositis omnibus argumentandi locis, illud pri-  
 79 mum intelligendum est, nec ullam esse disputa-  
 tionem, in quam non aliquis locus incurrat, nec  
 fere omnes locos incidere in omnem quaestio-  
 nem, sed quibusdam quaestionibus alios esse ap-  
 tiores locos. Quaestionum duo sunt genera: alte-  
 rum infinitum, alterum definitum. Definitum est,  
 quod *υποθεσιν* Graeci, nos *causam*: infinitum,  
 quod *τετταντην* illi appellant, nos *propositum* possumus  
 80 nominare. Causa certis personis, locis, tempori-  
 bus, actionibus, negotiis cernitur, aut in omni-  
 bus, aut in plerisque eorum: propositum autem,  
 in aliquo eorum, aut in pluribus, nec tamen in  
 maximis. Itaque propositum pars causae est. Sed  
 omnis quaestio, earum aliqua de re est, quibus  
 causae continentur, aut una, aut pluribus, aut  
 81 nonnunquam omnibus. Quaestionum autem, qua-

cunque de re sint, duo sunt genera: unum cognitionis: alterum actionis. Cognitionis sunt hae, quarum finis est scientia: ut, si quaeratur, a naturane ius profectum sit, an ab aliqua quasi conditione hominum et pactione. Actionis autem iusmodi exempla sunt: Sitne sapientis ad rem publicam accedere. Cognitionis quaestiones tripartitae sunt, cum, an sit, aut quid sit, aut quale sit, quaeritur. Horum primum conjectura, secundum definitione, tertium iuris et iniuriae distinctione explicatur. Conjecturae ratio in quatuor partes distributa est: quarum una est, cum quaeritur, sitne aliquid; altera, unde ortum sit; tercia, quae id causa effecerit; quarta, in qua de mutatione rei quaeritur: Sit, necne sit: ecquidnam honestum sit: ecquid aequum re vera; an haec tantum in opinione sint. Unde autem sit ortum, ut, cum quaeritur, natura, an doctrina possit effici virtus. Causa autem efficiens sic, ut, cum quaeritur, quibus rebus eloquentia efficiatur. De commutatione, sic: Possitne eloquentia commutatione aliqua converti in infantiam. Cum autem, quid sit, quaeritur; notio explicanda est, et proprietas, et divisio, et partitio. Haec enim sunt definitioni attributa: additur etiam descriptio, quam Graeci *χαρακτηρα* vocant. Notio sic quaeritur: Sitne id aequum, quod ei, qui plus potest, utile est. Proprietas sic: In hominemne solum cadat, an etiam in belluas aegritudo. Divisio, et eodem pacto partitio, sic: Triane genera bonorum sint. Descriptio, Qualis sit avarus, qualis

asfientator , ceteraque eiusdem generis , in quibus  
¶<sup>4</sup> natura et vita describitur. Cum autem quaeritur , quale quid sit ; aut simpliciter quaeritur , aut compare : simpliciter , Expetendane sit gloria ? compare , Praeponendane sit divitiis gloria ? Simplicium tria genera sunt : de expetendo fugiendoque : de aequo et iniquo : de honesto et turpi. Comparationum autem duo , unum de eodem et alio : alterum de maiore et minore. De expetendo et fugiendo , huiusmodi : Si expetendae divitiae , si fugienda pauperas ? De aequo et iniquo : Aequumne sit ulcisci , a quoconque iniuriam acceperis ? De honesto et turpi : Honestumne sit , pro patria mori ? Ex altero autem genere , quod erat bipartitum , unum est de eodem et alio : ut , si quaeratur , quid intersit inter amicum et assentatorem ? regem et tyrannum ? Alterum de maiore et minore : ut , si quaeratur , eloquentiane pluris sit , an iuris civilis scientia. De cognitionis  
¶<sup>5</sup> quaestib⁹ hactenus. Actionis reliquae sunt : quarum duo sunt genera : unum ad officium , alterum ad motum animi vel gignendum , vel sedandum , planeve tollendum. Ad officium sic ; ut , cum quaeritur , suscipiendine sint liberi. Ad movendos animos , cum fiunt cohortationes ad defendendam rempublicam , ad gloriam , et ad laudem : quo ex genere sunt querelae , incitationes , miserationesque flebiles , rursusque oratio cum iracundiam restinguens , tum metum eripiens , tum exultantem laetitiam comprimens , tum aegritudinem abstergens. Haec cum in propositis quaestio-

nibus genera sint , eadem in causas transferuntur. 23

Loci autem qui ad quasque quaestiones accommodati sunt, deinceps est videndum. Omnes quidem illi , quos supra diximus , ad plerasque sunt: sed alii ad alias , ut dixi , aptiores. Ad coniecturam igitur maxime apta , quae ex causis , quae ex effectis , quae ex coniunctis sumi possunt. Ad definitionem autem pertinet ratio , et scientia definiendi. Atque huic generi finitimum est illud , quod appellari de eodem et altero diximus : quod genus forma quaedam definitionis est. Si enim quaeratur , idemne sit pertinacia et perseverantia , definitionibus iudicandum est. Loci autem convenientes in eius generis quaestionem consequentes , antecedentes , repugnantes , adiunctis etiam duobus iis , qui sumuntur ex causis et effectis. Nam si hanc rem illa sequitur , hanc autem non sequitur : aut si huic rei illa antecedit , huic non antecedit : aut si huic rei repugnat , illi non repugnat : aut , si huius rei haec , illius alia causa est : aut si ex alio hoc , ex alio illud effectum est : ex quovis horum id , de quo quaeritur , idemne , an aliud sit , inveniri potest. Ad tertium genus quaestionis , in quo , quale sit , quaeritur , in comparationem ea cadunt , quae paulo ante in comparationis loco enumerata sunt. In illud autem genus , in quo de expetendo fugiendoque quaeritur , adhibentur ea , quae sunt aut animi , aut corporis , aut externa vel commoda , vel incommoda. Itemque cum de honesto turpique quaeritur , ad animi bona , vel mala , omnis dirigenda oratio est. Cum autem de

aequo et iniquo differitur, aequitatis loci colliguntur. hi cernuntur bipartito: et natura, et instituto. Natura partes habet duas, tuitionem sui, et ulciscendi ius. Institutio autem aequitatis, tripartita est. una pars legitima est, altera conveniens, tertia moris vetustate confirmata. Atque etiam rursus aequitas, tripartita dicitur esse: una ad superos deos, altera ad manes, tertia ad homines pertinere. Prima pietas, secunda sanctitas,  
 24 tertia iustitia aut aequitas nominatur. De proposito satis multa: deinceps de causa pauciora dicenda sunt. Pleraque enim sunt ei cum proposito communia.

91 Tria sunt igitur genera causarum: iudicii, deliberationis, laudationis. Quarum fines ipsi declarant, quibus utendum locis sit. Nam iudicii finis est ius: ex quo etiam nomen. Iuris autem partes tum expositae, tum aequitatis. Deliberandi finis, utilitas: cuius hae partes, quae modo expositae, rerum expetendarum. Laudationis finis, honestas:  
 92 de qua item est ante dictum. Sed definitae quaestiones a suis quaeque locis, quasi propriis, instituuntur, in accusationem defensionemque partitae. In quibus existunt haec genera, ut accusator personam arguat facti: defensor aliquid opponat de tribus: aut non esse factum, aut, si sit factum, aliud eius facti nomen esse, aut iure esse factum. Itaque aut infitalis, aut conjecturalis prima appelletur: definitiva, altera: tertia, quamvis mole  
 25 stum nomen hoc sit, iuridicalis vocetur. Harum causarum propria argumenta, ex iis sumta locis,

quos exposuimus, in praeceptis oratoriis explicata sunt. Refutatio autem accusationis, in qua est de-<sup>93</sup> pulsio criminis, quae Graece *στάσις* dicitur, La-  
tine appelletur *status*: in quo primum insistit quasi ad repugnandum congressa defensio. Atque etiam in deliberationibus et laudationibus iidem exsi-  
stunt status. Nam et negantur saepe ea futura,  
quae ab aliquo in sententia dicta sunt fore, si aut omnino fieri non possunt, aut sine summa diffi-  
culty non possunt. In qua argumentatione status coniecturalis existit. At, cum aliquid de utilitate,<sup>94</sup>  
honeitate, aequitate differitur, deque iis rebus,  
quae iis sunt contrariae: incurruunt status, aut iuris, aut nominis: quod idem contingit in lau-  
dationibus. Nam aut negari potest, id factum esse, quod laudetur; aut omnino non  
esse laudabile, quod non recte, non iure factum sit. Quibus omnibus generibus usus est nimis im-  
pudenter Caesar contra Catonem meum. Sed quae<sup>95</sup>  
ex statu contentio efficitur, eam Graeci *κριτικήν* vocant. mihi placet id, quoniam quidem ad te scribo, *qua de re agitur*, vocari. Quibus autem hoc, *qua de re agitur*, continetur, haec *continen-  
tia* vocentur, quasi firmamenta defensionis: qui-  
bus sublatis defensio nulla sit. Sed, quoniam lege firmius in controversiis disceptandis esse nihil de-  
bet, danda est opera, ut legem adiutricem et te-  
stem adhibeamus. In qua re alii quasi status exsi-  
stunt novi, qui appellantur legitimae disceptatio-  
nes. Tum enim defenditur non id legem dicere,<sup>96</sup>

quod adversarius velit, sed aliud. Id autem contingit, cum scriptum ambiguum est, ut duae differentes sententiae accipi possint. Tum opponitur scripto voluntas scriptoris, ut quaeratur, verbane plus, aut sententia valere debeat. Tum legi lex contraria affertur. Ita sunt tria genera, quae controversiam in omni scripto facere possunt, ambiguum, discrepantia scripti et voluntatis, et scripta contraria. Iam hoc perspicuum est, non magis in legibus, quam in testamentis, in stipulationibus, in reliquis rebus, quae ex scripto aguntur, posse controversias easdem existere. Horum tractationes in aliis libris explicantur. Nec solum perpetuae actiones, sed etiam partes orationis iisdem locis adiuvantur, partim propriis, partim communibus: ut in principiis, quibus ut benevoli, ut dociles, ut attenti sint, qui audiant, efficiendum est propriis locis. Itemque narrationes, ut ad suos fines spectent, id est, ut planae sint, ut breves, ut evidentes, ut credibiles, ut moderatae, ut cum dignitate. quae quamquam in tota oratione esse debent, magis tamen sunt propria narrandi. Quae autem consequitur narrationem fides, ea persuadendo quoniam efficitur, qui ad persuadendum loci maxime valeant, dictum est in iis; in quibus de omni ratione dicendi. Peroratio autem et alia quaedam habet, et maxime amplificationem: cuius effectus is debet esse, ut aut perturbentur animi, aut tranquillentur: et, si ita iam affecti ante sunt, ut augeat eorum motus, aut sedet oratio. Huic generi, in quo et

misericordia , et iracundia , et odium , et invidia ,  
et ceterae animi affectiones perturbantur , prae-  
cepta suppeditantur aliis in libris , quos poteris  
mecum legere , cum voles . Ad id autem , quod te <sup>102</sup>  
velle senseram , cumulate satis factum esse debet  
voluntati tuae . Nam , ne praeterirem aliquid , quod  
ad argumentum in omni ratione reperiendum per-  
tineret , plura quam a te desiderata erant , sum  
complexus , fecique quod saepe liberales vendito-  
res solent , ut , cum aedes fundumve vendiderint ,  
rutis caesis receptis , concedant tamen aliquid  
emtori , quod ornandi causa apte et loco positum  
esse videatur . sic tibi nos ad id , quod quasi man-  
cipio dare debuimus , ornamenta quaedam volui-  
mus non debita accedere .





